

ԱՐԱՋԱԳՈՐԾԵՐ





ՀՐԱՄԱՆԱՒ

Ե.Ս.Օ.Ս.Տ. ԳԱՐԵԳԻՆ ԵՐԿՐՈՐԴԻ

ՍՐԲԱՁՆԱԳՈՅՆ ԵՒ ՎԵՐԱՓԱՌ
ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ

Ա. ԳՐԻԳՈՐ ՆԱՐԵԿԱՅԻ

**ՄԱՏՅԱՆ
ՈՂԲԵՐԳՈՒԹՅԱՆ
(ՆԱՐԵԿ)**

*Գուարաղից թաղղմանեց
Մկրտիչ Խելսանյանը*

ՄԱՅՐ ԱԹՈՌՈ Ա. ԷԶՄԻԱԾՆԻ ՀՐԱՏԱՐԱԿՈՒԹՅՈՒՆ
Ա. ԷԶՄԻԱԾԻՆ - 2012

ՀՏԴ 891.981-1 Նարեկացի
ԳՄԴ 843-5
Ն 406

*Տպագրվում է երաշխավորությամբ
Մայր Աթոռ Սուրբ Էջմիածնի
Հրատարակչական Խորհրդի*

Նարեկացի Ս. Գրիգոր
Ն - 406 Մատյան Ողբերգության / Ս. Գրիգոր Նարեկացի.
թարգմ.՝ Մկրտիչ Խերանյան. – Եջմիածին: Մայր
Աթոռ Սուրբ Էջմիածին, 2012.– 656 էջ:

ՀՏԴ 891.981-1 Նարեկացի
ԳՄԴ 843-5

ISBN 978-9939-59-102-5
© Մայր Աթոռ Սուրբ Էջմիածին, 2012 թ.

«ԴԱՆՃԱՐԸ ԵՎ ՍՈՒՐԲԸ ՄԵԿ ԱՆՁԻ ՄԵԶ»

Շատ չեն այն ստեղծագործությունները, որ միշտ նոր, արդիական ու քարմ են հնչում, եւ ամեն անգամ վերընթերցելիս, ունկնդրելիս կամ դիտելիս ակամա մտածում ես, թե ազատ են դրանք ժամանակի գերիշխանությունից: Այդպիսի եզակի արժեք է Նարեկը՝ Ժ. դարի հանճարեղ բանաստեղի «Սատեան ողբերգութեան» քերթվածը, որ թեպետ թևակոյնել է իր գոյության երկրորդ հազարամյակը, սակայն, մեզ, մեր ժամանակակցին թվում է այժմեական՝ համահունչ ու համընթաց նորօրյա մեր կյանքին: Կարծես, «հրեշտակն ի մարմնի, սուրբն Գրիգոր Նարեկացի» քամել է ամբողջ նախորդ շրջանի գրականության, նաև աստվածաբանության, իմաստափրության, գիտելիքի այլևայլ բնագավառների նվաճումների սերուցքը, ուստի և իր ստեղծագործությունը որոշակի իմաստով վեր է սոսկ բանաստեղծությունից՝ լինելով քրիստոնեական քաղաքակրթության նվաճումների մի տեսակ հանրագումար-ամփոփում:

Ոուս բյուզանդագետ Սերգեյ Ավերինցև Ս. Գրիգոր Նարեկացու նասին իր գնահատական խոսքն ասում է՝ նկատի ունենալով քրիստոնեական միջնադարի մշակութային համապատկերը, և նրա դիտողություններն առաջին հերթին դրանով են հետաքրքիր: «Դանճարը հազվադեպ է լինում նաև սուրբ, – ասում է ոուս բանասերը... – բայց հաճարը և սուրբը մեկ անձի մեջ, որ ի պաշտպանություն, հովանավորություն պատմեին ժողովրդի մեջ այնպիսի նուրբ տեմբրի ավանդագրույցներ, որպիսիք հայ սրբախոսությունը կապում է Գրիգորի անվան հետ՝ դա, թվում է, իր

տեսակի մեջ միակ դեպքն է»¹: Ֆրանսիացի բանաստեղծ-քարգմանիչ Լյուկ-Անդրե Մարսելը կարծես ձայնակից է սրան: «Ոչ մեկ ժողովուրդի մեջ, – ասում է նա, – ժողովուրդն ու բանաստեղծը չեն նույնացած, չեն ձուլուած այսքան սերտորեն, որքան ձեր մեջ ... բանաստեղծ մը՝ Նարեկացին, որ կը վերածուի սուրբի, կը պաշտուի սուրբի մը պէս, կը միշտարէ ու մահը կը քաղցրացնէ»²:

Սուլը Գրիգորի մեծագործությունը Նարեկն է, հայ ժողովորի ամենասիրելի գրքերից մեկը, թերևս ամենասիրվածը: Այն ունեցել է բազմաթիվ ընդօրինակություններ, իրատարակվել է ոչ պակաս հաճախականությամբ: Մատյանը բարձր է գնահատվել միջնադարում, ունեցել բազմաթիվ ձեռագիր ընդօրինակություններ: Բարձր է գնահատվում այսօր, և արդեն ոչ միայն մասնագետների ու հայ րնբերցողի, մտավորականի կողմից: Նրան նվիրված հիացական խոսքերն այսօր մի ստվար հատոր կկազմեին: Եթե կամենանք դրանց ամենասեղմ ամփոփումն անել՝ պիտի հիշենք Ուիլյամ Սարոյանի խոսքը, որ բնաբան է դարձել նոր միայն մեր հիշած ժողովածուին: «Օր մը ամբողջ աշխարհ քիչ-շատ պիտի Նարեկին ճանչնայ»: Բայց հեղինակավոր գիտնականների, բանաստեղծների, ընթերցողների կարծիքները մեզ հեռու կտանեն, իր գործի մեծությունն ու անմահությունը այդ բոլորից առաջ խորապես գիտակցել է բանաստեղծն ինքը.

... Եվ թեպելու որպես մահկանացու պիտի վախճանվեն ես,
Սակայն այս համեստ մարդանուս միշտ անմեռ կմնամ:
Քո կամքով՝ թող այն անեղծ մնա, Տե՛՛ր... (Բան ԶԸ., թ.):

¹ «Գրիգոր Նարեկացի. Խռովահույզ՝ Բախի խորալների պես», կազմեց և առաջաբանը գրեց Լևոն Սկրտչյանը, Երևան, 1999, էջ 131:

² Կ. Փոլատեան, Զրոյց Ահարոնի, Ելիւարի, Օ. Պերպերեանի, Յ. Տէր-Մովսիսեանի, Լիւկ-Անդրէ Մարսելի ... հետ, Փարիզ, 1952, էջ 199:

Միջնադարյան մատենագրությունը «կենդանի հարընթաց» էր, և մեծ հեղինակը միայն մի բաղձանք, մի ցանկություն ունի՝ տարիների ընդօրինակություններով չաղճատել իր ստեղծագործությունը: Մատենագրության մեջ շատ են դեպքերը, երբ ձեռքից ձեռք անցնելով, ընդօրինակվելով՝ բնագրերը հարմարեցվել են տվյալ ժամանակի, նույնիսկ ընդօրինակողի նտայնությանը, հարմարեցվել են նորօրյա խնդիրներին: Նարեկը չունի այդպիսի մեծ շեղումներ, աղավաղումներ, որովհետև համահումչ է բոլոր ժամանակներին:

Նարեկացուն նորովի ճանաչելու դարաշրջան եղավ քսաներորդ դարաշրջանը: Այսօր Նարեկը թարգմանվել ու թարգմանվում է բազմաթիվ լեզուներով: Ընդ որում շատ երկրներում (օրինակ Ռուսաստանում) թարգմանվել է մի քանի անգամ: Գրվեցին մենագրություններ, հոդվածներ, բանաստեղծություններ՝ մի շարք լեզուներով, հատկապես ռուսերեն: Բայց անհնարին չէ, որ միջնադարում նույնպես հետաքրքրված լինեն օտարները Նարեկով: ԺԵ. դարի բանաստեղծ և գիտնական Առաքել Սյունեցու «Ներբողեան ի սուրբ Գրիգոր Նարեկացին» քերթվածի հետևյալ խոսքը թերևս երկու իմաստով կարելի է հասկանալ.

*Սուրբ ու մաքուր բանի բոյին
Վլասենից ազգ ցանկային,
Եռափափաք սիրով եկին
Եւ զծագրեալ առեալ զնացին¹:*

Կամ թարգմանել են, ուրեմն, կամ պարզապես ընդօրինակել են օտարները:

Նարեկը շատ բարձր են գնահատել հատկապես ԺԴ.-ԺԵ. դարերում, մասնավորաբար՝ Գլաձորի ու Տաթկի համալսարանականները: Ժամանակին, անշուշտ, համարձակ է

¹ «Գրիգորի Նարեկայ վանից վանականի Մատենագրութիւնք», Տփիսիս, 1905, էջ 368:

հնչել Մատթեոս վ. Զուղայեցու գնահատականը. նա համեմատել է հայ սուրբի Երկը սաղմոսների հետ:

Ըստ միջնադարյան ավանդության Նարեկացուն տեսիլք է հայտնվել՝ սուրբ Կույսը Աստվածորդու հետ, և լիացած Սուրբ Յոգով՝ բանաստեղծը «արար զիրաշալի զայն զիրք աղօթից, որ կոչի Նարեկ, որոյ ննանն ցարդ չերևեցաւ յաշ-խարիի»¹:

«Մատթեանը» բացառիկ է այնու, որ յուրաքանչյուր ընթերցող անպայման այնտեղ կգտնի իր խառնվածքին, մտածումներին, նախասիրություններին ու զգացմունքներին համահունչ ինչ-որ բան: Դա հանճարի հատկություններից մեկն է հավանաբար. խոսել յուրաքանչյուր ընթերցողի, ունկնդրի հոգու հետ՝ սնունդ տալով նրանց մտքին ու սրտին: Եվ բանաստեղծի խոսքը ոչ միայն հասկանալի է դառնում ընթերցողին, այլև կաշառում է, գրավում, տանում իր հետևից: Որպեսզի բանաստողն առավել ազդեցիկ և ընդունելի լինի՝ հեղինակն իրեն է վերագրում ընդհանրապես մարդկային հասարակության մեջ կատարված ու հնարավոր մեղքերը: Այդ անկեղծ մենախոսությանը ներկա է ընթերցողը: Եվ հեղինակի հետ նույնանում է ոչ միայն «քնարական հերոսը», այլև ընթերցողը՝ ո՛ր դարում ապրած-ապրելիս լինի, որովհետև Նարեկը, դարձալ հեղինակի հավաստմամբ՝

... Մեծապէս զիրակ բոլոր վշտերի՝

Նշանակում է ուրույն պատրկերով կրթերը ամեն մարդու պատրահող.—

Այս երկրում ապրող ամեն հասակի բանականների համար անխիքիր,

Աշխարհում ցոլած բոլոր բազմասիլուոր քրիստոնյանների... (Բան Գ., բ.)

¹ «Ստեղծեց աղոքըների հրաշալի այն զիրքը, որ Նարեկ է կոչվում, որի նմանը մինչև այժմ չեղավ աշխարհում» (Ս. Չամչեանց, Պատմութիւն Հայոց, Խո. Բ., էջ 853):

«Մատեան ողբերգութեան» քերթվածի արդիականության հիմքերի հիմքը հետինակի քանթաղի անպարագիծ մեծությունն է:

Նարեկը զերծ է վիպական տարրից, ամբողջապես քնարական տարերքով, ասես մեկ շնչով հորինված Բանաստեղծություն է: Բայց եթե ուզենք, այնտեղ կգտնենք բազմաթիվ աստվածաշնչյան հիմնահետքեր: Ըստ Էության այստեղ աննկատելիորեն «վերակենանանում», «վերապատճվում» են սուրբգորային գրեթե բոլոր գլխավոր առակներն ու պատմությունները. մեկ-երկու ակնարկություն՝ և դրանք վերականգնվում են ընթերցողի մտապատկերում, և բանաստեղծի խիստ խոսքը այնքան հասկանալի է դառնում, որքան լավատեսյակ է ընթերցողը սուրբգորային ավանդություններին: Այս Ելակետից ասես ընթանելի է դառնում և Ստ. Մալխասյանցի՝ առաջին հայացքից անընդունելի թվացող զուգահեռը նոր ժամանակների թատերգական տեսակի՝ ողբերգության հետ: Նարեկացին, խոսքն առաջ է տանում Մալխասյանցը, – «միանգամայն ինքնուրույն բանաստեղծ է, իսկ նրա մտահղացումը, ներքին իդեան՝ բոլորովին նոր ու միակն է աշխարհի գրականության մեջ»¹:

Լինելով հարուստ ու բազմաբովանդակ ստեղծագործություն՝ Նարեկը նույնպիսի ճոխություն է ցուցահանում նաև ձևի բնագավառում: Նրա հորինվածքը նույնպես կրում է հանճարի կնիքը: Բովանդակության խորությունն ու հարստությունը համարժեք ճոխությամբ են դրսևորվել. գեղարվեստական գրականության զինարանին այսօր հայտնի բոլոր միջոցներն ու հնարները կիրառված են, և կիրառված են կատարելությամբ:

Այնուամենայնիվ, գեղարվեստական արտահայտչամիջոցների և մյուս ձևական հանգամանքների կատարելու-

¹ Ստ. Մալխասյանց, Մատենագիտական դիտողություններ, Երևան, 1966, էջ 229:

թյունը լոկ օժանդակ դեր ունի հանճարեղ բանաստեղծի տիեզերագոր խոսքի նկատմամբ. ծառայում է բովանդակության առավելագույն բացահայտմանը:

«Մատեան ողբերգութեան» քերթվածը ունեցել է մի շարք աշխարհաբար (արևանտահայ և արևելահայ) թարգմանություններ. լավագույն թարգմանիչներից մեկը բանաստեղծ Սկրտիչ Խերանյանն է (1899-1970), որ, Գրիգոր Նարեկացու նման, ծնվել է Վասպուրական աշխարհում, զավակն է նույն հող ու ջրի: Նրա թարգմանությունը լույս տեսավ Երևանում, 1960 թ., 20.000 տպաքանակով, սպառվեց աննկատելիորեն և արժանացավ բարձր գնահատականի:

Ս. Խերանյանի սույն թարգմանությունը դիմացել է ժամանակի քննությանը, և այսօր բնական է հրատարակիչների ուշադրությունը նրա նկատմամբ: Սակայն ժամանակի գաղափարախոսության թելադրանքով Ս. Խերանյանը (նաև ուրիշներ) «դուրս է թողել» իր թարգմանությունից Շե, ՂԲ և ՂԳ գլուխները, ինչպես նաև ԻԶ, ԼԳ, ԼԴ գլուխների ինչ-ինչ հատվածներ, նկատի ունենալով դրանց «զուտ դավանաբանական և կրոնափիլիսոփայական» բնույթն ու բովանդակությունը¹:

Ուստի հայոց հին քերթության մեծագույն հրաշալիքը մերօրյա ընթերցողին ամբողջական տեսքով հրամցնելու մտահոգությամբ մենք աշխատեցինք տեղադրել շինության պակասող այսուները, և դա կատարեցինք մեր կարողության չափով ու այն գիտակցությամբ, որ ցանկացած, թեկուզ փոքր, գործի հաջողությունը ապահովվում է լոկ Աստծու կամոք:

Ա. Մադոյան

¹ Տե՛ս Գրիգոր Նարեկացի, Մատյան ողբերգության, գրաբարից թարգմանեց Սկրտիչ Խերանյան, Երևան, 1960, էջ XXXIV:

ԹԱՐԳՄԱՆՉԻ ԿՈՂՄԻՑ

Մենք ջանացել ենք մեր այս թարգմանության մեջ, որը բան հնարավոր է, հարազատ մնալ մեծ բանաստեղծի ոգուն ու ոճին, տողին ու տառաչափությանը:

«Մատյան ողբերգության» պոեմի տիրապետող չափը՝ յամբ-անապեստյան երկանդամ 10, եռանդամ 15 և քառանդամ 20 վանկանի ոտանավորն է: Սակայն միշտ չէ, որ բանաստեղծը մնում է գերիշխող այդ չափի սահմաններում: Նարեկացու արվեստը չի կարող ճանաչել ոչ մի սահմանափակում, որոշակի շրջանակ, ուստի նրա բանաստեղծական թրիչքը հաճախ ընդուտնելով ամեն արգելը ու սահմանանիշ՝ ճախրում է սավառնաքե, գործածելով հայերենին հատուկ բոլոր չափերը, ստեղծելով ըստ տեղի և բովանդակության ազատ-անկաշկանդ տաղաչափության բազմազան նմուշներ:

Այնուհետև, ինչպես հայտնի է, Նարեկացու ամենաճոխ ու ճկուն լեզուն, նրա բանաստեղծական խոսքը հարուստ է ննանաձայնություններով, համահունչ բառերի համադրությամբ, որոնք ուժեղացնում են ոիբմն ու երաժշտականությունը: Համարձակորեն կարելի է ասել, որ Նարեկացին մեծագույն ու անգերազանցելի վարպետն է ալիտերացիայի: Առաջին անգամ և աննախընթաց կերպով նա հասկացավ դրա նշանակությունը ու լայնորեն օգտագործեց այն, բանաստեղծական խոսքը դարձնելով հույժ երաժշտական ու ներգործուն:

Պոեմն ընդհանուր առմանք գրված է անհանգ, սակայն երբեմն, ըստ հոգեվիճակի՝ հանգավորված են որոշ հատվածներ:

Բոլոր դեպքերում մենք մեր թարգմանության մեջ, մեր ուժերի մերածին չափերով ջամացել ենք պահպանել պոեմի այդ առանձնահատկությունները: Զգտելով այդ նպատակին, պահպանել ենք նաև հաճախ գրաբարյան հոլովածեր ու դարձվածքներ, հեղինակին յուրահատուկ բառակազմություններ ու բառաբարդումներ, որոնք լիովին հասկանալի լինելով ընթերցողին՝ ստեղծում են անհրաժեշտ կոլորիտ, հանապատասխան համ ու հոտ:

Մեր այս թարգմանությունը կատարելիս ձեռքի տակ ենք ունեցել, որպես օժանդակ գրականություն, «Բառարան Սուլը Գրոց», «Դայկազյան» և այլ բառարաններ ու աշխատություններ Նարեկացու մասին, ինչպես նաև բանասիրական գիտությունների դոկտոր-պրոֆեսոր Մ. Մկրտչյանի «Գրիգոր Նարեկացի» մենագրությունը:

ՄԱՏՅԱՆ
ՈՂԲԵՐԳՈՒԹՅԱՆ
(ՆԱՐԵԿ)



Ա

Սրտիս ողբաձայն հառաջանքների աղաղակն,
ահա՝,

Դեպ երկինքն ի վեր՝ քեզ եմ ընծայում, գաղտ-
նատե՛ս Աստված.

Եվ իմ սասանյալ հոգու իղձերի պտուղն այր-
վող՝

Անձս տոչորող թախծության հրի վրա դնելով՝
Կամքիս բուրվառով առաքում եմ քե՛զ:

Նայի՛ր, ո՛վ գթած, հոտոտի՛ր դու այն առավե՛լ
սիրով,

Քան պատարագը բոլորանվեր, մատուցված
ծխով ամենաառատ:

Ընդունիր այս պարզ ու սեղմ խոսքերիս շա-
րադրանքը դու

Հաճությամբ հոժար և ո՛չ բարկությամբ:

Բանավոր զոհիս նվերն այս սրտանց

Մեղքերիս պարարտ ճարպի զորությամբ ողջա-
կիզվելով,

Թող որ խոհերի իմ խորհրդակից սենյակի խորքից

Բարձրանա և քեզ հասնի անհապաղ:
Եվ աղերսախառն երբ դատի նստեմ ես քեզ
Հետ, Հզո՞ր,

Թող որ տաղտկալի չթվա քեզ այդ,
Ինչպես ամբարիշտ Հակոբի ձեռքերի կարկա-
ռումն ի վեր,

Որի գեմ բողոք է գրել Եսային¹
Եվ կամ ինչպես անիրավությունը Բաբելոնի՝
Սաղմոսի յոթանասուներկուերորդ առակում
ասված²:

Այլ ընդունիր այն կամովին, ինչպես խունկն
Հաճոյական,

Որ մի ժամանակ բուրեց Սելովի խորանի մեջ այն,
Որը նոր շուքով վերանորոգված՝ Դավիթը
կանգնեց³

Հանուն գերադարձ այն տապանակի,

Որ նման է իմ կորուսյալ հոգու վերստին գյու-
տին:

Բ

Բայց և ահավոր ձայնը հատուցման քո դատաս-
տանի

Վրեժինդրության ձորում ուժգնապես հնչելով
ահա⁴,

¹ Եսայի Ա. 15

² Սաղմ. ՅԲ.7

³ Բ. Թագ. Զ. 17

⁴ Յովել Գ. 2-4

Երկնում է իմ դեմ մարտի մաքառման գրգիռ-
ներ կրկին,

Այժմվանից և իսկ զգում եմ իմ մեջ
Էռլթյունս հուզող շարժումներ ներհակ
Ու խուռն ամբոխվող խռովություններ:
Եվ չար ու բարի խորհուրդներ զինված սուր ու
սուսերով՝

Բախվում են ընդդեմ իրարու դարձյալ,
Ինձ մահվան գերի դարձնելով համակ,
Ինչպես երբեմն, երբ դեռ չէր հասել քո շնորհը
ինձ:

Առաքելական դասի մեջ Պողոսն՝ ընտրելագույ-
նը,

Մովսեսի օրենքն այս շնորհի հետ համեմատելով,
Քրիստոսի բերած փրկությունն հաղթող է հայ-
տարարում¹:

Զի եթե ճիշտ է, որ մոտ է Տիրոջ օրն, ինչպես
Գիրքն է ասում,

Հրապարակի մեջ Հովսափաթի և կամ Կեդրոնի
Հովտում նեղանձուկ²,—

Դատաստանի փոքր հանդիսատեղի և ժամա-
դրավայր,

Որոնք երկրային երկույթներով պատկերաց-
նում են հանդերձյալն ինձ պարզ,

Ապա և ինձ է մոտեցել հավետ թագավորու-
թյունն մարմնացյալ Աստուծո,

¹ Գործք ԺԳ. 38, Հռովմ. Ը. 2-3

² Հովել Գ. 2, 14

Որը ենթակա պիտի գտնի ինձ մեծապես ծանր
 հատուցումների,
 Այն բազմապիսի մեղանչումների համար իմ բո-
 լոր,
 Որոնք հիրավի ամբաստանելով՝ դատեն ինձ
 պիտի ավելի սաստիկ,
 Քան թե բարձրացող Նրա ձեռքն հուժկու,
 Որ մի ժամանակ եղովմայեցի և փղշտացի և այլ
 բարբարոս ազգերի զարկեց:
 Եվ, սակայն, նրանց չարչարանքները կարճատե-
 եղան,
 Մինչ իմ մեղքերի պատիժը ո՛չ վերջ ունի, ո՛չ
 սահման:
 Վախ, գուր, որոգայթ անճողոպրելի,—
 Հստ մարգարեի և առակողի¹,—
 Սաստիկ տաղնապով դուռս ափ առած՝
 Մշտնջենական ամոթն են իրենց գծագրում ար-
 դեն:
 Եվ արդ, միայն դո՛ւ կարող ես գտնել հրաշա-
 գործ դեղեր,
 Ի կյանք կոչելու հոգիներն ամեն՝ մատնված վա-
 րանման և տարակույսի,
 Քավի՛չ բոլորի, անսահմանելի բարձրությանդ
 մեջ
 Քո անճառ փառքով գովվա՛ծ հավիտյան:

¹ Եսայի ԻՂ, 17, - Երեմ. ԽԸ. 43



Ա

Քանզի մարմնավոր շուրթերով, ահա՛, ուղերձ
ես կարդում բարձրյալ Աստծուն,
Որ գործերով է գրավվում միայն և չի կաշառ-
վում բանաստեղծությամբ,
Եվ քո սրտի մեջ նայում ես դու միշտ դեպի
եգիպտոս,
Համապատասխան քեզ ի՞նչ օրինակ դնեմ ես
այստեղ, անձ իմ հանցավոր:
Պատժակից եմ ես քանդված Սողոմին,
Պապանձված դատախազն եմ Նինվեի,
Սոսկալի բարբարոս՝ ավելի, քան տիկինն հա-
րավային,
Քանանից վատթար ավելի և Ամաղեկից համառ,
Կուռքերի քաղաք անբժշկելի¹,
Հին Իսրայելի ապստամբության մնացած քեկոր,
Հիշատակարան պահված՝ Հուղայի ուխտազան-
ցության²:

¹ Երեմ. ԾԱ. 9

² Երեմ. Գ. 11

Կշտամբված եմ ես ավելի, քան Ծուրը
Եվ Ծայդանից ավելի տարամերժված.
Խորթաբարո ավելի, քան Գալիլիան,
Եվ քան անհավատ Կափառնայումն աններելի¹.
Պարսավված եմ ես, ինչպես Քորագինը և
Բեթսայիդայի հետ բամբասված.
Անպարկեշտության մեջ սպիտակած մազերն եմ
Եփրեմի².
Աղավնու նման մեղմ եմ ես՝ Հիմարությամբ և
ո՛չ հեզությամբ³.
Օձ եմ ես բանավոր եղեռնական՝ առյուծի կոր-
յուններից ծնված⁴.
Ժանտությամբ լցված քարքի ձվերի կերպա-
րանքն ունեմ⁵,
Պատկերն եմ ես Երուսաղեմի վերջին հարված-
ների,
Հստ գուշակության տեսանողների և տերունա-
կան խոսքի համաձայն:
Կործանման հասած մերժված տաղավար եմ ես,
Կրկնակի ներկված շինվածք եմ խոսուն՝
Խորտակված դռան ջարդված փականքով:
Ժառանգություն եմ վայելուչ թեև, սակայն և
թողնված,
Մոռացված տուն եմ աստվածակերտ,

¹ Սատթ. ԺԱ. 23-24

² Ովսեն Է. 9

³ Ովսեն Է. 11

⁴ Եսայի Լ. 6

⁵ Եսայի ԾԹ. 5

Ինչպես ասել են Մովսեսը, Դավիթն ու Երեմիան։
 Բորոտությամբ վարակված բանական մի տուն
 եմ ես՝
 Ապաշխարության խրատին ենթարկված,
 Օրենքով նորոգված և ծեփված կավով՝ ողոք հե-
 զության,
 Բայց ճարահատված այլևս բուժման մի ելք
 գտնելուց՝
 Շինողի ձեռքով լրիվ քանդըված,
 Եվ հրամանով Հզորի, իբրև արդար հատուցում,
 Դուրս նետված անսուրբ մի վայր՝ անխնա,
 Հեռու վտարված և տարագրված¹։
 Հողի տակ թաղված դրամն եմ անպետ՝
 Ավետարանի ավանդակորույս ուրացողի քան-
 քարի նման²։

Բ

Սակայն դու, ո՞վ Աստված,
 Աստված Հոգիների բոլոր ու մարմինների,
 Աստվածաշնորհ Մովսեսի դավանությամբ,
 Եվ ըստ ձայնի երկայնամիտ ու բազումողորմ
 սուրբ Հովնանի,—
 Տուր ինձ ուժ, որպեսզի քո օրհնյալ կամքին ի
 հաճություն
 Կարողանամ ավարտել աղոթամատյանն այս
 ողբերգական,

¹ Ղնմտ. Ղատ. ԺԴ. 35-46

² Մատթ. ԻԵ. 24-25

Որ սկսել եմ ես ահավասիկ:
Եվ մինչ արցունքով եմ սերմանում խոսքերս
Մեզ համար պատրաստված օթևաններդ տանող
Ճանապարհի վրա ոտք դրած պահին այս իմ,
Թող որ, երբ հասնեմ հունձքն հավաքելուն՝
Դառնամ բերկրալից ու երջանիկ և լիովին քավ-
ված՝

Բարի օրանների երանական արդյունքով:
Մի՛ տար ինձ սրտի արգանդ անորդի իսրայելի
պես,
Եվ ոչ էլ ցամքած ստինքներ աչքի, ո՛վ ամենա-
գութ՝

Լսի՛ր բանական աղաչավորիս, հզո՛ր ողորմած,
Նախքան երկնքին, երկինքը՝ երկրին, երկիրը՝
գինուն, ցորենին, ձեթին,
Եվ սրանք բոլորն էլ իսրայելին¹ ի՞նձ լսիր.
Երկնավորների աղերսը առ քեզ՝
Թող ազդի հոգուս, քան թե տարրերին ապա-
կանացու:

Ստեղծիչ ես դու, և ես ինքս՝ կավ.
Հեծեծագին այս աղոթքներիս նախամուտքում.
Հայտնի՛ր, գթառատ, քաղցր կամքըդ ինձ՝ տա-
րակուսյալիս,

Որպեսզի այստեղ, երկրի վրա իսկ զորանամ ես,
Եվ, երբ որ բացվի երկինքը վերին,
Զլինի՛ որ ես լույսը վայելելու անվարժ, անըն-
տել՝

¹ Ովսեն Բ. 21-22

Մոմի պես հալվեմ, սպառվեմ իսպառ, ջնջվեմ
մեջտեղից:

Սիրտ տուր զրկվածիս, ինչպես ասողն է գոչել
աղոթքով¹, –

Ուժ՝ թալկացածիս և կյանք մաշվածիս խղճի
խայթերից,

Եվ ո՞չ անձկությամբ ու չարչարանքով քեզ
որոնելուց:

Ա՛ռ մաղթանքներիս ավանդն այս և տուր ողոր-
մությունը քո չնորհների:

Ընդունիր դու այս փոքրը տկարիցս և չնորհիր
մեծը հզորիդ կողմից:

Զղջումիս խոսքերն արա՝ զորավոր, մեզ ուղար-
կելով Հոգիդ բարձունքից,

Պատգամներով այն աստվածաշունչ, որոնք
դրել եմ ես այս գրքիս մեջ:

Հաճի՛ր, բարերար, լուսավորելով ճշմարտապա-
տում առակն Եսայու,

Մատուցելով ինձ՝ մահվան արժանուս
Գոյությանս անարգաձայն պղնձի փոխարեն՝
չնորհիդ ոսկին՝

Անզարդ, սեաթույր երկաթի տեղակ՝ հրաշեկ
աղինձը Լիբանանի²,

Որ օրինակ է առաքինության,
ինչո՞ւ կարծրացնես սիրտը եղկելուս, անձա՛ռ
ահավոր,

¹ Ովսեն Բ. 21, Զաք. Ը. 12

² Եսայի Կ. 17

Որ չթափանցի երկյուղդ այնտեղ:
Թող որ չլինեմ ես անպտուղ՝ փոքր այս վաստա-
կիս մեջ՝
Անբերի հողում, իզուր, ապարդյուն սերմանողի
պես:

Չլինի, որ երկնեմ ես, և չծնեմ,
Ողբամ՝ և չարտասվեմ, խորհեմ՝ և չհառաչեմ,
Ամպեմ, և չանձրենեմ, ընթանամ՝ և չհասնեմ,
Ես ձայն տամ, և դու չլսես, պաղատեմ՝ և ան-
տես մնամ,
Կողկողեմ՝ և ինձ չողորմես, աղաչեմ՝ բայց ոչինչ
շահեմ,
Զոհ մատուցեմ, և չմխամ,
Տեսնեմ քեզ՝ և դատարկ դուրս գամ:
Դեռ քեզ չդիմած՝ լսիր ձայնս դու, ո՞վ միայն
հզոր:
Մեղքերով ապրած օրերիս չափով
Տանջանքի տուգանք վճարել մի՛ տա ինձ՝ չա-
րագործիս:
Փրկիր ինձ, գթած, լսիր, ողորմած,
Մարդասիրաբար ներիր ինձ, ներող,
Խնայիր, երկայնամիտ, պաշտպանիր, ապավեն,
Բարերարիր, հզոր, ազատիր, ամենակալ,
Կյանք տուր, նորոգող, վերականգնիր, ահավո՛ր,
Լուսավորիր, երկնային, բժշկի՛ր, ձեռնահաս,
Քավի՛ր, անքնին,
Պարզեատրիր, առատաձեռն, շնորհազարդիր,
աննախանձ,

Հաշտվիր, անախտակիր, ընդունիր, անոխակալ,
Ճնջիր պարտքերս, օրհնյա՛լ:
Երբ հասնի վերջին օրս թշվառ,
Եվ ես հառեմ աչքերս տեսնելու վտանգները
կրկնակի,
Քո փրկությո՛ւնը տեսնեմ թող, հո՛ւյս և խնա-
մակալ:
Եվ երբ ուշադիր նայեմ դեպի վեր՝ ամենագրավ
ճամփին սոսկալի,
Խաղաղության հրեշտակդ թո՛ղ քաղցրությամբ
հանդիպի ինձ:
Երբ վերջին օրը իմ շունչը փչեմ, ցույց տուր
ինձ դու, Տե՛ր,
Երկնավորներից եկած երջանիկ, մաքուր մի ոգի,
Որ լուսաթոփիչ՝ ի՞նձ հասնի՝ սիրուդ պարգևը
առած:
Հասցրու ինձ նույնպես կարեկից մի՝ մեռած
արդարներից.
Հուսահատ օրս դու չարագործիս քո անակնկալ
բարին պարգևիր:
Քա՛վ լիցի, թե դու, ո՛վ բարեբանյալ, որ փրկու-
թյունն ես բոլորի,
Հիվանդ ոչխարիս դժնդակ գազան և մի տաս
ուղեկից.
Պարգևիր վերին կյանք անապական՝ մեղքով մե-
ռածիս,
Եվ փրկություն՝ պարտքերի տակ կործանվածիս:

Գ

*Միթե պիտի մոռանաս բարերարելդ, ո՞վ ակն-
կալություն,*

Պիտի անտեսե՞ս գթասիրելդ, ո՞վ խնամող.

Պիտի փոփոխե՞ս մարդասիրելդ, ո՞վ անփոփոխ.

*Պիտի նահանջե՞ս կենսագործելուցդ, անվախ-
ճա՞ն.*

*Պիտի թողնե՞ս ողորմությունդ, երջանի՛կ
պտուղ.*

*Պիտի աղավաղե՞ս բարեշնորհ ծաղիկը քո քաղց-
րության.*

*Պիտի անպատվե՞ս նյութը պանծալի քո հարս-
տության.*

*Պիտի պակասեցնե՞ս փառքը վարսերի քո բարձ-
րապանձ¹,*

*Պիտի չպահե՞ս պսակիդ պայծառ զարդը վայե-
լուչ:*

Եթե ողորմածներին է երանությունը,

*Եվ դու, որ համակ արքայություն ես սիրով
լիուլի,*

*Միթե չպիտի պարգևես դու քո փրկությունն
ամբողջ.*

Դեղ չդնե՞ս պիտի իմ վերքերին

*Եվ սպեղանի՝ խոցվածներիս և տկարությանս՝
դարման չպիտի՝ տանես,*

Պիտի չծագե՞ս լույս՝ խավարի մեջ –

¹ Ա. Թագ. ԻԶ. 19

Ինձ, որ զորությանդ վրա եմ միայն իմ հույսը
դրել,
Տիեզերական դու կենսապարգև:
Դու' միայն ունես փառք իսկ ի բնե, մշտնջենա-
պես,
Եվ արարածներն համայն առհավետ վկայում են
այդ:
Օրհնված ես դու և փառավորված հավիտենու-
թյան մեջ եռապատիկ
Եվ իմանալի հավիտյանների սահմանից էլ վեր՝
Միշտ ու միշտ. ամեն:





Ա

*Տե՛ր իմ, Տե՛ր պարգևատու, ինքնաբուն բարի,
Բոլորին տիրող հավասարապես, միայն Արարիչ
դու ամեն ինչի.*

*Փառավորյալ անքնին, ահեղ ահարկու, սոսկալի
հզոր,*

*Անպարագրելի, անմերձենալի, անըմբոնելի,
անիմանալի,*

*Անճառելի, անտեսանելի, անզննելի, անշոշա-
փելի, անորոնելի,*

*Անսկիզբ և անժամանակ, անշամանդադ գիտու-
թյուն,*

*Համարձակ տեսողություն, ճշմարիտ էականու-
թյուն,*

Բարձր և խոնարհ, օրհնաբանված գոյություն.

*Անստվեր ծագում, ամենափայլ ճառագայթ,
խոստովանված լույս,*

*Անտարակույս վստահություն, կատարյալ հան-
գիստ,*

Անհեղելի կնիք, անսահման պատկեր, վկայված
անուն,
Ճաշակ քաղցրության, բաժակ բերկրության,
Հաց՝ հոգին հաստող, սեր՝ մթանն օտար, ան-
երկբա խոստում,
Ծածկույթ ցանկալի, զգեստ անկապուտ, օթոց
բաղձալի,
Զարդ վայելչական, մեծազոր պաշտպան, գով-
ված ապավեն,
Աննվազելի չնորհ, անպակասելի գանձ,
Անապական անձրե, արփիացնցուղ ցող,
Ամենաբույժ դեղ, ձրի բժշկություն, կրկնածիր
առողջություն,
Վեհագույն խրախույս, անպատիր կոչում, հա-
նուր ավետիս,
Ստրկամեծար թագավոր, աղքատասեր պաշտ-
պան, մշտահարուստ տվող,
Անխափան ընթացք, աննահանջ հրաման,
Անհամառուտ հույս, երկար տեսողություն,
տուրք անզղական,
Ամենաբաշխ աջ, արդարակշիռ ձեռք, անաչառ
աչք,
Միսիթարիչ ձայն, սփոփարար լուր, բերկրու-
թյան բերումն,
Անուն կենդանի, նախախնամող մատ,
Անմոլար ճամփա, անխարդախ ընթացք, կենդա-
նարար կամք,

Աննենգելի խրատ, աննախանձ պատիվ, լայ-
նարձակ հնարք,
Անձկական պայման, անգտնելի հետք, անե-
րեռութ շավիղ,
Անչափագիր պատկեր, քանակությո՛ւն անսահ-
ման,
Աննմանական տիպ, անզուգական գութ, ողոր-
մություն բազմազեղ,
Խոնարհություն տոնելի, համբույր փրկարար,
Կա՛ն դեռ շատ ուրիշ խոսքեր ավելի վեհ ու վա-
յելուչ
Նվիրելու քեզ՝ աստվածությանդ:
Օրհնված, գոված, բարեբանված, քարոզված,
ավետարանված,
Հռչակված, հնչեցված, պատմված,
Աղաչված կամքով անխարելի,
Եվ դեռ ինչ որ դու ներշնչում ես մեզ քաղցր
բխումով,
Որոնք մեր հաջորդ ճառերում պետք է որ լու-
սաբանվեն:
Որով և պիտի դու զվարթանաս իմ փրկությամբ,
ո՛վ երանություն,
Ախորժ զգացմամբ լցված լիուլի:
Դատարկ բառերով հյուսված երգով չէ, որ
փառավորվում ես դու,
Այլ իմ այս փոքրիկ աղերսը թող որ դառնա մի
պատճառ քո մեծ փրկության:

Բ

Ողբե՛ր երգեցի ես շարահյուսված այս նոր մատ-
յանում;—

Որն իբրև կցորդ, մեծապես գիտակ բոլոր վշտե-
րի՝

Նշավակում է ուրույն պատկերով կրքերը ամեն
մարդու պատահող;—

Այս երկրում ապրող ամեն հասակի բանական-
ների համար անխտիր,

Աշխարհում ցրված բազմասփյուռ բոլոր քրիս-
տոնյաների,

Բոլոր նրանց, որոնք կյանքի առաջին շրջա-
նումն են,

Եվ նրանց, որոնք արբունքի են հասել,
Նրանց, որ մոտ են անկար ծերությամբ կյանքի
վախճանին,

Մեղավորների և արդարների,

Բարձրահոն ինքնամեծարի և իր սխալն ընդու-
նող անձնադատի,

Բարիների և եղեռնագործների, նկունների և
արինների,

Ստրուկների և հպատակների,

Գերաշխարհիկների և սեպուհների, միջակների
և պայազատների,

Շինականների և տոհմիկների, արուների և էգե-
րի,

Հրամայողների և հնագանդվողների, վսեմների
և նվաստների,

Վեհերի և փոքրերի, ազնվականների և ռամիկների,
Զիավարժների և հետևակների, քաղաքացիների
ու գեղջուկների,
Ահավորի սանձով բռնված գոռող արքաների,
Վերնականների հետ խոսակցող մենակյացների,
Մաքրակենցաղ ու տիրանվեր զգաստների,
Երջանկակրոն և ընտրելագույն քահանաների,
Վերակացու և բարեզգեցիկ առաջնորդների,
Նախաթոռ գահակալների, սրբանվեր տեսուչների համար,
Որոնցից ոմանց՝ աղերս-աղաչանք և ոմանց՝ բարի խրատներ
Հորինեցի ես աղոթքի համար՝ այս մատենիկով,
Որ հոգուդ զորությամբ եմ ձեռնարկել,
Գրի առնելով մաղթանքներ պես-պես,
Որպեսզի խնդրանքներն այս բոլորի սրանով
ընդմիշտ
Քո մեծ գթությանը ներկայացվեն:

Գ

Արա՛ այս մատյանն ընթերցողների սրտերը
Հստակ,
Բժշկի՛ր նրանց հոգիները դու և հանցանքները
սրբի՛ր,
Թո՛ղ պարտքերը նրանց և արձակի՛ր կապանքների:

Արտասուքները թող բխեն սրանով հրահանգ-
վողների,
եվ թո՛ղ սրանով պարզեի նրանց իղձ ապաշա-
փի:
Շնորհվի թող, ո՛վ Տեր, նրանց հետ և ի՛նձ
գղջումի կամք,
ինչպես և նրանց՝ ի՛մ իսկ բառերով՝ շունչ բա-
րեհամբույր.
Թող այս մատյանով և ի՛նձ նվիրվի պաղատան-
քը նրանց,
եվ իմ խոսքերով իմ փոխարեն էլ խնկվեն նրանց
հեծեծանքները:
Ողբերգությունն այս սիրով ճաշակող սրտերում
թող որ
Շնորհիդ լո՛ւյսը մտնի և բնակվի:
Եթե պատահի, որ ինձ համար բարեպաշտները
սրանով քեզ ընծայվեն,
ի՛նձ էլ ընդունիր, գթած, նրանց հետ, որոնք
կենդանի են քեզ համար.
Եթե սրանով մեղքերը մաքրող արցունքներ կա-
թեն աչքերից,
Ո՞վ խնամակալ, անձրեկի՛ր նաև նրանք ի՛նձ
վրա:
Հաղորդակիցներն այս կենաց գրքի՝ թող
փրկվածներին լինեն դասակից:
Քո կամքով, օրհնյալ, թող որ նաև ե՛ս համար-
վեմ փրկված:

Եթե խոսքերի իմ ազդեցությամբ որևէ մեկի
սրտի խորքերից
Հնչեն հառաջներ աստվածահաճո,
Թող որ նրա հետ, ո՞վ բարձրյալ, և ե՛ս օգտվեմ
քեզանով.
Թե մաքուր մի ձեռք անուշ խունկերով առ քեզ
կարկառվի,
Թող իմ ձայնի հետ հասնի, միանա
եվ այս աղերսանքն առ քեզ մատուցվող
աղոթքների.
Եթե ուրիշներն էլ պաղատանքներ երկնեն ինձ
նման, բազմաբովանդակ,
Նրանցով ե՛ս էլ թող որ քեզ կրկին նվիրված
լինեմ:
Եթե բանավոր պատարագն այս իմ հաճո լինի
քեզ և գնահատես,
Ուրիշներինն էլ, առաջ, քան թե իմ, թող քեզ
ընծայվի.
Եթե տրտմությամբ մի ոք սրտաբեկ նվաղի
տկար,
Թո՛ղ կանգնի դարձյալ հառաջանքների այս
հաստարանով՝ քեզնով հուսադրված.
Եթե ամբարտակն ապահովության խորտակվի
մեղքով,
Թո՛ղ որ քարերովն այս պատշաճապես կառուց-
վի՝ դարձյալ, աջովդ պաշտպանված.
Եթե հանցանքի սրով կտրվի հույսի լարը ձիգ,

Ամենակալիդ կամքով թող դարձյալ կցվի ամրաւ-
պես՝ քո պատվաստումով.
Եթե հոգեկան ցավի մի վտանգ պաշարի մեկին
մահացու կերպով,
Թող որ փրկություն գտնի սրանով՝ հույսով
ապրելու,
Ո՞վ կեցուցիչդ քեզ աղոթողի:
Տարակուսանքի տագնապով եթե խոցոտվի մի
սիրտ,
Թո՞ղ քո քաղցրությամբ՝ բուժվի սրանով և
առողջանա.
Թե անքավելի մեղքի կորսայամբ մեկն ընկղմել
է խոր անդունդի մեջ,
Այս կարթով թող որ դեպի լո՛ւյսը գա՝ քո պաշտ-
պանությամբ.
Թե խավարային գործերով թմրած՝ ուժասպառ
է ոք,
Թող որ զորանա քեզ ապաստանած, միա՛կ
ապավեն.
Եթե պահպանակը վստահության լքել է մեկի
հոգին,
Այս միջնորդությամբ թող ձեռքդ նրան ընդու-
նի դարձյալ և ամրապնդի.
Եթե ոք հսկող պահպաններից հեռու դեգերի,
Այդպիսին թող որ սպասի սրանով նորոգչիդ
դարձին.
Եթե դիվային ջերմի սարսուռը խռովի մեկին,
Մթափիվի՛ թող նա խաչիդ խորհրդի

Այս խոստովանված ու երկրպագված նշանի առջև.

Անօրենության խորտակիչ հողմի մրրիկը եթե
Մարդու մարմնեղեն շինվածքն աշխարհի ծովում հարվածի,

Թող որ քո կողմից շինված այս ղեկով, առագաստներով խաղաղվի՛ դարձյալ:

Դ

Մատյանն այս ողբերի, որ քո անունով սկսեցի,
բարձրյա՛լ,


Թող՝ կենսատու դեղ ու դարման լինի
Եվ բժշկի քո արարածների հոգու և մարմնի ցավերը բոլոր:

Սկսածն այս իմ՝ իր ավարտին հասցըռու դու
Եվ թող քո Հոգին խառնվի սրան:

Մեծիդ նորոգող շունչը թող միանա ինձ շնորհածդ՝
Հածդ այս բանաստեղծությանը,

Քանզի դո՛ւ ես լոկ տալիս զորություն վհատ
սրտերին

Եվ ընդունում փառք բոլորից. ամեն:



Արդի խորհերից խոսչ Լուսու-ծո Հեղ

Ա

Եվ քանզի խոսել սկսեցի քեզ հետ,
Որ կենդանի շունչն ունես ձեռքիդ մեջ բազմա-
մեղ հոգուս՝

Սարսում եմ սաստիկ տագնապով իրոք ու դող-
դողում եմ երկյուղից ահա՝,

Զի հիշելն անգամ քո անխուսափելի և անաչառ
դատաստանի մասին,

Ուր պիտի մեղքերն իմ կշտամբվեն, ո՞վ Արարիչ
երկնի և երկրի,

Ահավոր է և անպարփակելի ու վեր ամեն սահ-
մանումից:

Մանավանդ, որ չկա բժշկություն իմ բազմա-
վտանդ, անողջանալի սաստիկ վերքերին,

Որոնք ստացա հոգիս կորսոյան մատնողի մա-
հաբեր ժանիքներից

Եվ չիք պատախան «պատերազմի օրն»,- ըստ
առակողի¹:

¹ Ժողով. Ը. 8

Հնար չի լինի ո՞չ խոսքով արդարանալ, ո՞չ վերաբկուի տակ պահպել,
Ո՞չ դիմակավոր՝ կեղծել և ո՞չ երեսպաշտ խոսքերով մոտենալ,
Ո՞չ շինծու ձևերով խաբել, ո՞չ կցկտուր բառերով ստել,
Ո՞չ արագուտն փախչել, ո՞չ թիկունք դարձնել,
Ո՞չ երեսն ի վայր՝ դեմքն հողին քսել,
Եվ ո՞չ էլ երկրի խորքերում թաքնվել,
Քանզի ծածկվածները բաց են քեզ համար և
աներեւությունն հրապարակված:
Արդարությունն իմ նվազել է իսպառ և ունայնացել,
Մեղքերս հայտնի են դարձել և շատացել են է՛լ
ավելի,
Մնացական են չարություններն իմ, և ես՝ կորստական.
Իրավունքի կշիռն է պակասած, և անիրավությունն իմ՝ միանգամից զորացած.
Բարեգործության պտուղներն են հալած, և
սխալմունքներն արձանացած.
Ավանդն է կորած, և դատակնիքն այժմվանից
գտնված.
Մահվան մուրհակն է գրված, և ավետման
կտակն եղծված.
Բարերարն է տիրած, և բանսարկուն ուրախացած.

Հրեշտակների գունդը թախծած, և սատանան
խնդասիրտ պար բռնած.
Վերնական զորքը ողբի մեջ, և երկրայինները
բերկրած.
Սպանողի մթերանոցն է լի, և պահպանողի գան-
ձը կողոպտված.
Օտարի մասն է կանգուն, և Ստացողի պարգև՝
մատնված,
Ստեղծողի շնորհն է մոռացված, և կորուսչի
ծուղակները պահված.
Փրկչի երախտիքն է հեգնված, և Բելիարն է
զվարթացած.
Կենաց աղբյուրն է փակված, և գոռողի ժանգը
ժանտիս հասած:

Բ

Եվ արդ, ինչպես Գիրքն է ասել դեռ առաջուց¹,
Ցանկալի չէ՞ր արդյոք չստեղծվել երբեք արգան-
դի մեջ,
Զձեավորվել որովայնում և չծնվել,
Ո՛չ մարդկանց թվում գրվել և ո՛չ աճել, առնել
հասակ,
Ո՛չ գեղեցիկ պատկերով զարդարվել և ոչ էլ
օժտվել խոսելու ձիրքով,
Քան թե ենթարկվել այսպիսի սաստիկ ու սար-
սափելի ծանրությունների,

¹ Յոբ Գ. 2-3

Որոնց չեն կարող դիմանալ կարծր քարերը
նույնիսկ,
Եւ ո՞ւր կմնան մարմինները լույծ:

Գ

Ուստի, բարեգութ, աղաչում եմ քեզ, տո՛ւր ինձ
ողորմություն,
Դու, որ քո խոսքերով սահմանեցիր մեզ վարվել
այսպես,
Ասելով.- Տվե՛ք այդ նվերն Աստծուն՝ ձեր փրկու-
թյան համար,
Ու մաքրվեցեք, քանզի ողորմություն եմ ուզում
ես և ո՛չ պատարագ:
Այդ խոսքդ հիշելով, բարձրացի՛ր ահա վերստին,
խնկվա՛ծ,
Դու, որ ունես ամեն ինչ և ամեն ինչ քեզանից
է.
Քեզ փա՛ռք բոլորից. ամեն:





Բան Ե
Սրբի խորժերից խոսչ Ասպառ-ծո Հետ

Ա

Եվ արդ, ես որ մարդ եմ երկրածին՝
Անկայուն կյանքի երևույթներով զբաղված,
Եվ պատրող գինու հիմարությամբ արբած,
Որ ստում եմ ամեն ինչով ու ոչ մի բանով ճիշտ
չեմ խոսում,
Վերոհիշյալ բոլոր ախտանիշներն իմ մեջ կրե-
լով,
Ես ի՞նչ երեսով հանդգնեմ կանգնել ատյանիդ
առաջ,
Ո՞վ արդարադատ, ահավոր անձառ, անպա-
տում, հզոր Աստված բոլորի:
Մեղանչած հոգուս ապերախտությունն համե-
մատելով երախտիքիդ հետ,
Պիտի ցույց տամ, թե զորեղ ես դու միշտ իրա-
վունքիդ մեջ,
Եվ հանիրավի գործերովըս ես՝ հավետ պարտա-
կան:
Դու ստեղծեցիր ինձ քո պանծալի պատկերի
նման,
Քո նմանությամբ օժանդակելով անուժ-տկա-
րիս:

Բ

Խոսելու շնորհով զարդարեցիր ինձ և փայլեց-
րիր ներշնչումով¹,
Ճոխացրիր ինձ մտքով և իմաստությամբ աճեց-
րիր,
Հանճարով հզորացիր ինձ՝ մյուս շնչավորներից
տարբերելով,
Իմանալի Հոգով շաղեցիր ու պճնեցիր անձնիշ-
խանությամբ,
Ծնեցիր հայրաբար, սնեցիր դայակորեն, խնա-
մեցիր որպես տեր,
Տնկեցիր ամբարիշտիս քո գավթի մեջ,
Ոռոգեցիր կենաց ջրով և ավազանի ցողով մաք-
րեցիր.
Ու կենսատու վտակով արմատացրիր,
Երկնային հացովդ ջամբեցիր
Եվ արբեցրիր արյամբդ աստվածային,
Անհպելի և անհաս բաների ընտանեցրիր,
Երկրային աչքիս համարձակություն տվեցիր
նայելու քեզ,
Եվ փառքիդ լույսով պարածածկեցիր,
Անմաքուր ձեռքիս մատներն հողանյութ քեզ
մոտեցրիր,
Մահկանացու մոխիրս անարգ՝ հարգեցիր իբրև
լույսի ճաճանչ,
Քո Հորը հզոր, ահավոր, օրհնյալ՝
Մարդասիրաբար անարժան անձիս հայր անվա-
նակնքեցիր:

¹ ԾԱՌԴ. Բ. 7

Նանրությամբ լցված բերանն իմ չայրեցիր,
Երբ ինձ ժառանգակից անվանեցի քեզ.
Զկտամբեցիր, երբ հանդուցի քեզ կցորդվե-
լու:

Չստվերացրիր աչքիս տեսողությունը, երբ ես
հայացքս հառել էի քեզ.

Մահապարտների հետ շղթայակապ չտարագրե-
ցիր և ինձ,

Չխորտակեցիր դաստակը բազկիս, երբ անմաք-
րապես բարձրանում էր քեզ.

Չկոտրտեցիր մատներիս հողերը, երբ քո կենաց
Բանն էի շոշափում,

Մառախուղ չպատեց շուրջս, երբ, ո՞վ ահավոր,
պատարագ էի ձոնում քեզ¹.

Չփշրեցիր շարքն ատամներիս, երբ ըմբոշխնում
էի քեզ, անսահմանելի՛.

Բարկությամբ խոտորնակ չգնացիր ինձ, մինչ
ես խոտորնակի հետեւցի քեզ,

Ինչպես վարվեցիր հսրայելի տան հետ մոլորա-
գնաց.

Չխայտառակեցիր հարսնարանիդ մեջ ինձ՝ պա-
րերգությանդ անարժանիս,

Ոչ էլ զգեստն իմ գծուծ տեսնելով հանդիմանե-
ցիր անօրենիս,

Կամ կապկապելով ձեռքերս ու ոտքերս՝ արտա-
քին խափարը հալածեցիր:

¹ Ինչպես որ պատահեց քահանաներին, երբ տապանակը տաճա-
րի մեջ դմելուց հետո մի անպ հանկարծ լցրեց Աստուծո տունը,
խափանելով նրանց տեսողությունը:

Գ

Բարիքներն այս բոլոր և ներողամիտ համբերությունդ

Ընդունել եմ ես քեզանից, ո՞վ բարերար, օրհնյալ և միշտ երկայնամիտ,

Եվ սակայն հանցապարտս ես փոխարինեցի նրանք

Մարմնական և հոգեկան երկրաքարչ հուզումներով

Եվ մտածումներով՝ ախտախորհուրդ ու բազմածուփ:

Սրանք են ահա՝, Աստված իմ և Տեր,
Որ վճարեցի ես քո այնքան բարիքների փոխարեն.

Ես ինքս հատուցեցի այս չարիքները քեզ,
Ինչպես Մովսեսն իր հանդիմանական առակովն է ասում,

Իմաստությունը մոռացած՝ հիմարություն սիրող,

Բոլոր այդ բարիքներդ ու երախտիքներդ ես իմ ունայն վարքով չարաչար վատնեցի:

Բարձրյալիդ խնամքով գումարված լուսավոր շնորհներն այս անճառ

Ցնդեցրի ես խելագարության մրրկով:

Եվ թեպետ բազում անգամ հոգածու ձեռքերդ ինձ երկարելով

Ուզեցիր դու ինձ քաշել դեպի քեզ, բայց ես չցանկացա,

Նմանվելով մարդարեից ամբաստանված հսրաւյելին:

Թեև խոստացա քեզ հաճոյանալ, բայց ուխտն իմ չպահեցի,

Այլ նույն չարիքը նյութեցի դարձյալ՝ նախկին կենցաղիս վերադառնալով:

Սրտիս անդաստանը հերկեցի փշեր աճեցնելու համար,

Որպեսզի որոմն արդյունավորվի:

Ինձ են վերաբերում աստվածարյալ սուրբ մարդարեների առածները բոլոր.

Զի դու ինձանից խաղող սպասեցիր, և ես փուշընձյուղեցի.

Ես օտար այգիս՝ դառն ու անախորժ պտուղներ տվի.

Փաթաթվեցի հողմին անհաստատ,

Որով մշտածուփի տատանումներով՝ այս կողմ ու այն կողմ եմ տարուքերվում.

Եվ ինչպես որ երանելի Հոբն է ասում՝ գնացի ճամփով անդառնալի,

Ավագի վրա կառուցեցի ես շենք հիմարության՝ Լայն արահետով խաբվեցի հասնել անձկալի կյանքի,

Ինքս փակեցի ելքն ուղեորիս

Եվ կորստյանս խորխորատը ես իմ կամքո՛վ բացի:

Խցկեցի պատուհանն ականջներիս, որ չլսեմ խոսքդ կենդանի,

Փակեցի նայվածքն հոգուս աչքերի, որ չտեսնեմ
կյանքի սպեղանին:

Զընդուստնեցի մտքիս լքումից ու թմրությունից՝
ի լուր պատգամիդ ահավոր փողին.

Զզգաստացա մեծ դատաստանի հրափորձ օրվա
գուժկան գոչյունից.

Զզարթնեցի նիրհից մահացու քնի, որ դեպի կո-
րուստն է առաջնորդում:

Հանգիստ չտվի երբեք քո հոգուն ես իմ մարմ-
նեղեն տաղավարի մեջ.

Բանական շնչիս հետ չխառնեցի մասը պար-
գևած քո շնորհների.

Ես ինքս իմ ձեռքով կանչեցի կորուստն, ըստ
առակողի,

Մեոցնելու համար կենդանի հոգիս:

Դ

Բայց ինձ ի՞նչ օգուտ՝ հյուսել այս խղճուկ խոս-
քերը մորմոք, չափաբերական,


Երբ որ անցել է չափն իմ մեղքերի, և անհնար է
բուժումը նրանց:

Լոկ դո՛ւ կարող ես կյանք ընձեռել ինձ՝ հոգով
մեռածիս,

Եվ անոխակալ՝ ձեռք կարկառել ինձ, օգնելու
համար դատապարտվածիս,

Ո՞վ կենդանի դու Աստուծո

Որդի, քեզ փա՛ռք հավիտյան. ամեն:



Ա

Բայց ի՞նչ բարիք ինձ և կամ ի՞նչ օգուտ,
Եթե շարելով տողերն այս ողբիս ես հուսալքվեմ
Ու դուրս չթափեմ խոսքի խարանով
Մահացու վերքիս շարավն ամբարված,
Եվ կամ սրտիս մեջ կուտակված ցավի,
Հոգեկան խիթի ծանրությունն ամբողջ
Զզվանք պատճառող մատնամխությամբ ի դուրս
Հփսխեմ:

Բ

Եվ քանզի արժանի չեղա պարծենալու փառքով
սրբերի հետ,
Որոնց բերանները լի են ծիծաղով, և շրթունքնե-
րը՝ ցնծությամբ,
Հստ առակողի և սաղմոսողի,՝
Ուստի և երկրորդ կարգին դիմեցի,
Որպեսզի այստեղ հիշատակեմ ես իմ նմաննե-
րին,
Թեև իմ բարքի թերությունների հետ համեմա-
տած՝
Նույնիսկ նրանք էլ բարձր են ինձանից,

Ինչպես ապաշխարողը՝ չապաշխարողից:
Այսպես, տոնելի եղավ Մանասեն,
Պատիվ ստացավ և փարիսեցին,
Զի ես նրանցից ավելի՝ դաժան ամբարիշտ եղա:
Գովեց անառակ որդին, քանի որ չեղավ նա
ինձ պես անդարձ ուխտագանց:
Հիշվեց կեղծավոր որդին Ամասիայի,
Որ չեղավ ինձ չափ ապերախտ սաստիկ և շնոր-
հուրաց:
Օրհնություն առավ ավագակն անգամ, որ
դատախազն է անհավատների.
Պոռնիկ կինն անգամ պատիվ ստացավ, իբրև
նախամայր զղջացողների:
Փարավոնից ոչ պակաս կարծրացրի ես իմ
սիրտը.
Ոչ նվազ եբրայական խուժանի կատաղու-
թյունից՝
Արարչիդ դեմ ընդվզեցի,
Աստվածամարտներից ետ չմնացի
Ու չխորշեցի բոլորիս ստեղծողիդ ուրանալուց:
Ծփացի մրրիկներից հուզված ծովի նման.
Չսարսեցի սաստիկ քո հրամանից ու չպատկա-
ռեցի այնքան,
Որքան մեծածուփ ծովի ալիքներն իրենց ափե-
րից:
Իմ գործերի չափն ու քանակը որոշելու համար
ավագակույտը վերջացավ,

Պակասեցին նրանց անբավ շեղջերը՝ չափելու
կուտակումներն իմ անօրեն արարքների:

Գ

Թեպետև թվով շատ են ծովափին համահավաք-
ված ավազները,
Բայց չունեն նրանք ծնունդ և աճում,
Իսկ իմ մեղքերը ու հանցանքները այնքան շատ
են, որ հիշել չի լինի,—
Մեկն իր ծնունդով և մեկ ուրիշն իր շառավիղ-
ներով.
Մեկն իր բծերով, մյուսն՝ արկածներով.
Մեկն իր փշերով, մյուսն՝ արմատներով.
Մեկն իր կազմությամբ, և մեկ ուրիշը իր պտուղ-
ներով.
Մեկն իր մասերով, մյուսը՝ ճյուղերով.
Մեկն իր ոստերով, մյուսն իր ցողունով.
Մեկն իր ճանկերով, մյուսը՝ մատներով.
Մեկն իր խլրտմամբ, և մյուսն իր ուժով.
Մեկն իր ազդեցությամբ, մյուսն օրինակներով.
Մեկն իր հետքերով, մյուսը՝ մնացորդներով.
Մեկն իր ստվերներով և մեկ ուրիշն իր մթու-
թյուններով.
Մեկն իր հարձակմամբ, մյուսն՝ հնարքներով.
Մեկն իր պատրությամբ, մյուսն իր դիտավորու-
թյուններով.
Մեկն իր գրոհով, մյուսը՝ չափերով.
Մեկն իր խորությամբ, մյուսը՝ գարշանքներով.

Մեկն իր կայծերով, մյուսն իր կրքերով.
 Մեկն իր մթերմամբ, մյուսն իր գանձերով.
 Մեկն իր ցնցուղով, մյուսն՝ աղբյուրներով.
 Մեկն իր գետերով, մյուսն իր շանթերով.
 Մեկն իր հրդեհներով, մյուսն իր ամոթով.
 Մեկն իր վիճերով, մյուսն՝ անդունդներով.
 Մեկն իր բորբոքումներով, մյուսն՝ աղջամուղջներով.
 Մեկն իր ամպրոպներով, մյուսն իր կայլակներով.
 Մեկն իր հորձանքով, մյուսն՝ հեղեղներով ու
 սառույցներով.
 Մեկն իր դռներով, մյուսը՝ շավիղներով.
 Հնոցն իր տապով, կրակն իր գոլորշիներով.
 Ճարպի հալոցն իր ճենճերումներով.
 Օշինդրը իր դառնություններով.
 Կործանարարն իր հպատակներով.
 Բոնավորն իր հելուզակներով.
 Գոռողն իր սպառագեններով.
 Ավազակապետն իր գումարտակներով.
 Գագանն իր կորյուններով.
 Խածանողն իր ծակոտվածքներով,
 Եվ ապականություն գործողն իր նմաններով:

Դ

Սրանք են ահա՝ հոգիներն համայն մեր ապա-
 կանող
 Գլխավոր մեղքերն իրենց ենթակա և ստորա-
 դաս բոլոր մասերով,

Որոնցից յուրաքանչյուրը բաղկացած է բյուր-
հազարներից:
Իսկ ամբողջական թիվը կարող է իմանալ լոկ
նա՛,
Որը մեր կողմից չեղյալ համարվածները
Տեսնում է, որպես արդեն գոյություն ունեցող
գործեր:
Արդ, եթե մեկը չխաբի իրեն կամ չձևանա
Ու չանհավատի կեղծավորաբար, և պարզ ու
հասարակ վարվի,
Ճանաչի իրեն որպես մարդ մահկանացու,
Համարի երկրածին իրեն և իր չափի ու սահմա-
նի մեջ մնա,—
Այդպիսին պետք է հասկանա, որ ես գուր չգրեցի
Մեղքերի բոլոր դեպքերը այստեղ,
Որոնց գլխավոր մասերը մեկ-մեկ թվեցի վերև,
Կամ ամբողջությամբ չսահմանեցի իսկությու-
նը ես
Այն տեսակ-տեսակ սխալանքների,
Որոնք պտտվում, գալար են գալիս մեր բնու-
թյան մեջ:
Այլ բյուրավոր չար արգասիքներից միայն մի
փոքրիկ չափով ցույց տվի,
Մնացածները թողնելով, որ դուք սրանց միջո-
ցով ուսումնասիրեք,
Թեև ո՞չ լրիվ և ամբողջապես:

Բան Է



Սակայն, որպեսզի փրկության հույսն իմ իսպառ չկտրեմ
Եվ, մնալով անզեն, չմատնվեմ ձեռքն այն աներեւութ հակառակորդների,
Որոնց մասին ես հիշատակեցի վերև ահավոր պատկերների տակ,
Եվ որոնք ոչ այլ ինչ են, եթե ոչ ինքնածին բուսած ընտանի թշնամիներ,
Ապա, ես այստեղ այդ բազմամբոխ ու հզոր մարտիկների դեմ ցույց պիտի տամ նաև
Աստվածային ամենահաղթ և անպարտելի ախոյաններ,
Զնայած որ դա կսկծալի ցավ է,
Անհասանելի ծառերի դժվարակութ պտուղ,
Եվ անկոխ ճամփաների տառապալից տաժանք:
Բայց աչքերից կաթած կաթիլ մի արցունք
Կարող է բանսարկուի չարագունդ զորքերը բոլոր ցամաքեցնել,
Ինչպես տկար խլրտումով գետնաքարշ սողացող
Բազմոտանի գեռուների ու որդերի վրա
Ընկած ձեմի կաթիլ և կամ դույզն ինչ թույն սատակչական:

Հեծեծող սրտի հոգուց դուրս ելած հառաչանք-
ները
Բարկ արևի հետ խառն տոթաշունչ խորշակի
պես
Հալեցնում են մեղքերի սառույցները սաստիկ,
Քանզի որդերի պես որքան հեշտածին են մեղ-
քերը,
Նույնքան էլ դյուրամեռ են նրանք այս դիմա-
դրական միջոցներով:

Բ

Բայց ես չպիտի դադարեմ դարձյալ դատելուց
ինքս ինձ՝ դատապարտյալիս,
Եվ քարկոծելու անձս հանցապարտ դառն խոս-
քերով,
Իբրև չարագործ անհամոզելի, փրկությունից
զուրկ:
Քանզի եթե ինձ նեղողներից ոմանց սատակեց-
նում եմ,
Սակայն ոմանց էլ ուժ եմ տալիս ես, որ կենդա-
նանան,
Անդարձ կորստյան մատնելով հոգիս:
Ես տունկս դառնության, որ անառակ վարքի
գարշությունը ծաղկեցրի.
Բարունակս ապականաբեր և մահողկուզյան,
որ կորստյան գինին երկնեցի.
Քանանի զավակս և ո՛չ Հուդայի՝ մեծ Դանիելի
խոսքի համաձայն.
Որդիս գեհենի և ո՛չ արքայության.

Ժառանգս դժոխքի և ոչ թե փառաց փափագելի.
Նյութս տանջանքի և ո՛չ հանգստյան.
Ապերախտս երախտավորիդ և ապաշնորհս
բազմապարգեիդ հանդեպ.

Մշտապես մեղավորս երկայնամտիդ հանդեպ.
Բարերարիդ քաղցրությունը դառնացնողս.
Ծառաս չար և վատ, ըստ տերունական հանդի-
մանության.

Իմաստունս չարագործության մեջ, ըստ նախա-
գուշակության Եսայու.

Ժիրս՝ զազրելի ժանտագործության մեջ.

Փութաջանս՝ Տիրոջը բարկացնելու մեջ.

Մշտաշարժս՝ սատանայական գյուտերի մեջ.

Ես վիշտ հանապազօրյա՝ Արարչին.

Թույլս՝ բարի թոփչքների մեջ.

Ծույլս՝ երանական վիճակ ընտրելու գործում.

Դանդաղս՝ խոստացվածներին ուշք դնելու մեջ.

Անարիս՝ պիտանի և օգտակար ձեռնարկու-
թյուններում.

Պաշտոնյաս տիրադրուժ և երախտամոռ:

Գ

Վա՛յ մեղավոր հոգուս, որ բարկացրի իմ Արար-
չին.

Վա՛յ կորստյան որդուս, որ կենդանության
պարգելը մոռացա.

Վա՛յ պարտապանիս բյուր ու անհամար այն
քանքարներին,

Որոնք անկարող եմ հատուցանել.
Վա՛յ ծանր ու դժվար մեղքերի բեռնակրիս,
Որ չեմ կարող հանգստարան վերադառնալ.
Վա՛յ տերունական մեղքեր գործող հանցա-
վորիս,
Քանի որ չկա հնար՝ հզորին ներկայանալու.
Վա՛յ եղեգընյա դյուրավառ նյութիս,
Որ տոչորվելու եմ գեհենի մեջ.
Վա՛յ ինձ, որ հիշում եմ, թե՝ Աստուծո բարկու-
թյան նետերն հրեղեն են.
Վա՛յ ինձ՝ հիմարիս, որ չըմբռնեցի,
Թե ծածուկ գործերն հրապարակվելու են անպայ-
ման.
Վա՛յ ամբարիշտիս, որ միշտ անդադրում չա-
րությունների ոստայն հյուսեցի.
Վա՛յ ինձ, որ պարարեցի մարմինս իբրև կեր
անմեռ որդերի,
Ես ինչպե՞ս պիտի տոկամ թունավոր այդ
կտտողներին.
Վա՛յ ինձ, երբ ըմպեմ բաժակը մահվան,
Եվ ինչպե՞ս պիտի կրեմ ես տուգանքն հավիտե-
նական.
Վա՛յ ինձ, երբ ելնի եղկելի մարմնիցս անարժան
հոգիս,
Ինչպե՞ս պիտի ներկայանամ ճշմարիտ դատա-
վորին.
Վա՛յ ինձ, երբ լապտերիս յուղն սպառվի,
Զի եթե մարի, էլ չի վառվի նա,

Վա՛յ ինձ պակուցման համար այն ահեղ ու
տագնապալից,
Երբ առագաստի մուտքը փակվի.
Վա՛յ ինձ, երբ լսեմ երկնավոր թագավորի
վճռով կնքված
Սիրտս դող հանող և սասափելի այն խոսքն
ահավոր,—
«Քեզ չեմ ճանաչում»¹:



¹ Մատթ. ԻԵ. 12



Ա

Արդ, ի՞նչ պիտի անես, ա՞նձն իմ կորուսյալ,
 Ուր պիտի թաքնվես, ինչպե՞ս ազատվես,
 Կամ ինչպե՞ս ելնես մեղքերի բանտից,
 Քանզի բազում են պարտքերդ և վճարելիքներդ
 անթվելի.
 Կշտամբանքը սաստիկ է, և նախատինքն՝ ան-
 վախճան.
 Հրեշտակներն անողորմ են, և դատավորն՝ ան-
 կաշառ.
 Ատյանն հզոր է, և բեմն՝ անաչառ.
 Քստմնելի են կշտամբանքներն ու հատուցում-
 ներն անողոք.
 Հրամանն ահարկու է, և հանդիմանություննե-
 րը՝ մերկապարանոց.
 Հրեղեն են գետերը, և վտակներն՝ անանցանելի.
 Խավարն է թանձրամած, և մառախուղն՝ անթա-
 փանցելի.

Անձողոպրելի է գուբը, և տագնապը՝ մշտնջենավոր,
 Տարտարոսն ամենակուլ է, և սառնամանիքն՝
 անզերծանելի:
 Եվ այս դառնությունները բոլոր քեզ համար են
 արդարեւ,
 Իբրև տաժանելի և դժնդակ օթևաններ՝ անտա-
 նելի պատուհասների,
 Ո՞վ դու անարժան ա՛նձն իմ մեղավոր, չարա-
 գործ, պոռնիկ,
 Բազմաբիծ և ամբողջապես անմաքրության ան-
 դաստան:
 Քո իսկ գործերի արդյունքն ես, ահա՝, ժառան-
 գելու դու,
 Վրիպյա՛լդ ուղղությունից և խոտորյա՛լդ մաք-
 րությունից,
 Հեռացել ես արդարությունից և պարկեշտու-
 թյան կարգուկանոնից.
 Ունա՛յնդ դու՝ հոգեպարգև հարստությունների
 լիությունից,
 Նախանձարկո՛ւդ ամենակալ և բարերար թա-
 գավորի¹:

Բ

Եվ այսպես ահա՝ կառուցեցիր դու քեզ համար
 Արգելարան անել և որոգայթ անփախչելի,
 Ինքդ իսկ խոստովանելով, թե անբժշկելի են
 վերքերդ

¹ Ա. Կորնթ. Ժ. 22

Եվ կրած հարվածներդ՝ անօրինակ,
Հաստատելով, թե մահապարտ անձիդ բեկու-
թյունն է անբուժելի,
Ո՞վ դու չարդ բարիների մեջ,
Ո՞վ դու դառնությունդ քաղցրությանց մեջ,
Ո՞վ խավարդ լուսագարմերի մեջ,
Ո՞վ կողոպտվածդ պճնվածների մեջ,
Ո՞վ պախարակվածդ գովվածների մեջ,
Ո՞վ ամբարիշտդ բարեպաշտների մեջ,
Ո՞վ շնչավորդ բանականների մեջ,
Ո՞վ անմիտդ մտացիների մեջ,
Ո՞վ անհանճարդ իմաստունների մեջ,
Ո՞վ անմաքուրդ ընտրյալների մեջ,
Ո՞վ մեռածդ ողջերի մեջ,
Ո՞վ զազիրդ սրբերի մեջ,
Ո՞վ արբշիռդ պարկեցտների մեջ,
Ո՞վ կեղծավորդ արդարների մեջ,
Ո՞վ անպիտանդ պիտանիների մեջ,
Ո՞վ անարգդ փառավորների մեջ,
Ո՞վ նվազդ առավելությունների մեջ,
Ո՞վ գերիդ գերագույնների մեջ,
Ո՞վ նվաստագույնդ վեհերի մեջ,
Ո՞վ աղքատդ ունեորների մեջ,
Ո՞վ անարժանդ փրկվածների մեջ,
Ո՞վ տնանկդ բարձրերի և հոգեպես հարուստ-
ների մեջ,
Եվ բաժանվածդ դու օրհնվածներից:



Ա

Եվ արդ ողբագին աղաչանքների այս կտակարան իմ մատյանի մեջ

Ի՞նչ բամբասանքներ շարադրեմ արդյոք ես քեզ
արժանի, ո՞վ անձն իմ թշվառ,

Աևերեսըդ դու և պատասխանի համար անբարբառ,

Անպիտանըդ՝ Աստուծո և սրբերի հաղորդակցության:

Քանզի եթե ես ծովի ջրերը մելանի փոխեմ

Եվ բազմասպարեզ ընդարձակությամբ դաշտերը թղթի նման տարածեմ,

Կտրեմ եղեգնի անտառները և գրիչներ շինեմ՝

Մի մասն իսկ բազում անօրինական իմ արարքների

Դարձյա՛ չեմ կարող ես գրի առնել:

Եվ Լիբանանի մայրիներն եթե իրար զոդելով շինելու լինեմ կշեռքի լծակ,

Ու նժարներից մեկի մեջ դնեմ լեռն Արարատ-
յան՝
Դարձյա՞լ չի կարող հավասարվել նա իմ մեղ-
քերի հետ:

Բ

Ես ծառ բարձուղեշ՝ ստվար ոստերով, սաղար-
թախիտ, բայց անպտուղ,
Ճիշտ ու ճիշտ նման այն թղենուն, որ Տերը չու-
րացրեց:

Իեւ իսկապես վարսագեղ, սաղարթազարդ,
Արտաքին տեսքով բարեշուք ես դու,
Պաճուճված, ինչպես պսակով մի պերճ,—
Եվ հեռվից նայողներին երևում ես բաղձալի,
Բայց երբ մոտենա Տնկողն իր ուզածը փնտրելու,
Ամեն բարիքից դատարկ և ունայն պիտի գտնի
քեզ,

Եվ գարշելի՝ գեղեցկությանդ մեջ՝
Տեսնողներին ի ծաղը և նախատողաց՝ նշավա-
կություն:

Քանզի եթե անժամանակ, չսպասված ժամին՝
Տունկը հերապանծ, անպտուղ և անկենդան,—
Որ մի պատկերն է անպատրաստ մեղավորների,—
Ենթարկվեց անեծքի,
Եվ կամ թե հողն այն, ոռոգված ցողով,
Որ երկրագործի թափած աշխատանքների դի-
մաց
Բազմապատիկ արդյունք չտալու պատճառով
լքվում է և մոռացվում,—

Հապա ուրեմն դու, ո՞վ անձն իմ եղկելի,
Դու հո՛ղ բանավոր ու տունկ կենդանի,
Որ չես տալիս պտուղ իր ժամանակին,
Ինչպե՞ս կարող ես վերի առակում հիշված պա-
տիժը չկրել, ինչպե՞ս:
Քանզի դու բոլոր արդյունքն ու բերքը նանիր
գործերի,
Առաջին մարդուց սկսած մինչև սերունդը վեր-
ջին,
Եվ գյուտերը նոր, որոնք քեզ ստեղծող Աստու-
ծո համար
Ատելի են խիստ, անախորժելի՝
Անպակաս չափով, առավելապես մեջդ ընդու-
նեցիր:

Գ

Եվ քանզի ես քեզ արի նշավակ-նպատակակետ
իմ մտադրությանց, ա՞նձն իմ անպիտան,
Բանաստեղծական խոսքերովս, ինչպես պարսա-
քարերով,
Քեզ, իբրև վայրի անընտել գազան՝ պիտի քար-
կոծեմ անողորմաբար:
Եթե մինչև իսկ չկարողանամ արդար անվանվել,
Սակայն առաջին պատասխանիս մեջ, ինչպես
մի ոսոխի հետ,
Ոգորեմ պիտի ես հոժարակամ, ինչպես իմաս-
տունն է բարբառել մեծ¹:
Եվ իմ մտքերի, մտածումների հույզերը թաքուն

¹ Առակ. ԺԸ. 17

Իբրև չար գործեր՝ կատարված արդեն, խոստու-
 վանելով,
 Քո առջև պիտի տարածեմ բոլոր, Աստված իմ
 և Տեր,
 Քանզի ի՞նչ չափով որ պիտի չափեմ մեղա-
 դրանքն անձիս,
 Միւսույն չափով պիտի անվազ քո գթու-
 թյա՞նը ես արժանանամ,
 Ընդունելով քո չնորհներն առատ իմ ամենամեծ
 պարտքերի տեղակ:
 Որքան ճարակեն վերքերն անհնար և անբու-
 ժելի,
 Այնքան ավելի և կրկնապատիկ բարձրյալ
 բժշկիդ
 Հրաշագործության իմաստությունը բարեմաս-
 նորեն պիտի հոչակվի:
 Հանցանքներն որքան որ ավելանան,
 Նո՞ւյնքան փոխատվիդ առատությունն բարե-
 բանելով՝
 Պիտի պսակվի, ըստ քո խնկելի առակի, ընդ-
 միշտ¹:
 Քանզի փրկում ես դո՛ւ և դո՛ւ քավում,
 Նորոգում ես աջով քո և չորացնում մատով.
 Արդարացնում ես հրամանովդ և ողորմու-
 թյամբդ ազատում.
 Երեսովդ լուսավորում ես և քո դեմքով զվար-
 ճացնում.

¹ Դուկ. է. 43

Բարերարում ես Հոգով քո և յուղիդ օծումով
սփոփում

Ու չնորհիդ ցողով զվարթացնում ես դու:

Դու ես տալիս մխիթարություն և վհատության
մոռացում.

Վերացնում խավարը վշտերի և հեծության ող-
բերը՝ ծիծաղի փոխում:

Եվ քեզ է վայելում օրհնություն՝ գովությամբ
հանդերձ, երկնքում,

Նախահայրերից բոլոր և նրանց սերունդներից,
Հավիտյանս հավիտենից. ամեն:





Ա

Թե՛ զղջումն ուժգին և թե՛ մոլեգին մեղանչումը մեզ

Կորսայան են մատնում հավասարապես:

Թեպետև նրանք օտար եմ միմյանց և նմանությամբ իրարից տարբեր,

Բայց եթե քննենք յուրաքանչյուրի էությունը մենք,

Պիտի տեսնենք, որ նրանք երկուսն էլ մղում են մարդուն հուսահատության:

Զի կասկածում է մեկը Հզորի ձեռքի զորությանն,

Իսկ մյուսը չորքոտանի անասնի նման, անզգայաբար

Խզում է հույսի առասանն իսպառ:

Ուստի առաջնին միշտ փաղաքչելով՝ խնդում է սատանան,

Իսկ երկրորդով լիզելով արյունն, իբրև կերակուր

Պարարվում է նա դժոխորովայն գաղանի նման:

Բ

Արդ, բազմահարված բրով ծեծվածի և մահվան
ափը հասածի նման

Դույզն-ինչ շունչ դարձյալ և կենդանության
ոգի առնելով՝

Պետք է զորանալ, կազդուրվել ու կանգնել,

Հառնել կորստից անկենդանական,

Օգնություն առած Քրիստոսի ձեռքով, որ
գութ է տածում բոլորի հանդեպ.

Նաև երկնավոր բարերար Հորից ձեռք բերեմ
պտուղ փրկության և բժշկության

ինձ՝ մեղավորիս և ախտավորիս.

Եվ սկսելով ողբերգությունն այս աղերսանքնե-
րի,

Ես հավատքի շենքը պիտի կառուցեմ:

Զի ոմն նախնիներից հավատքով զինված՝

Փոխադրվեց իսկույն երկնային կյանքն անմա-
հական.

Ապաշխարության դեղն ընդունելով, զղջման
միջոցով՝

Նա անկեղծության գրավականը ժառանգեց
այստեղ,

Առավել քան նրանք, որոնց նրա հետ առաք-
յալն է հիշատակում¹.

Որոնք երկրի վրա մրցման հանդեսներ կատա-
րելով,

¹ Եբր. ԺԱ. 36

Ապագա երկնավոր պարգևների հույսով՝ հավատացին

Ու փարթամացան անտեսանելի ճոխություններով:

Արդ, հիշենք այստեղ Տիրոջ պաշտելի խոսքը
խրախուսիչ,

Թե՛ «Ամենայն ինչ հնարավոր է նրան, ով հավատում է»:

Եթե ընտրյալների աստվածահաճո բարեմասնությանց չափն այստեղ քննենք.

Հավատքը պիտի գտնենք գերազանց, ամեն ինչից վեր,

Քանզի նրանով կարող են մտնել սուրբ խորանից ներս:

Առանց հավատքի փառաց Տերն անգամ Զհաճեց ցույց տալ իր հրաշագործ զորությունը մեզ,

Այլ նախ և առաջ իրեն լծակից իր բարերարությանը,

Մեր հավատքը նա պահանջեց մեզնից:

Նա՛ է մոտեցնում մարդուն Աստուծո,

Կյանք ընձեռելով մեզ իր ինքնիշխան ընդունակությամբ,

Զի օրհնաբանված Աստուծո բերանն էր, որ վկայեց,

Թե՛ «Հավատքը քո փրկեց քեզ»:

Քանզի արդարեւ հստակ տեսողությունը, կատարյալ իմաստությունը,

Մտերմությունն Աստուծո հետ և բարձրյալին
ծանոթ լինելը
Հավատքի մասն են – մի երջանիկ և ընտրյա՛լ
բառ,
Որ հարատելով մնում է անվթար և անպար-
փակ,
Պատվակից լինելով սիրո և հույսի:
Զի մանանեխի ամենափոքրիկ հատիկի չափով
Հավատքը եթե
Կարող է ծովի խորքը փոխադրել մեծամեծ լեռ-
ներ,
Ապա ճիշտ է, որ կյանքի առաջնորդն այս նա-
խաշավիդ
Հավատն ընդունեցինք որպես աներկմիտ աստ-
վածապաշտություն:
Սիրո և հույսի դասակից և երրորդության
փառատրելի անվամբ պատված
Այդ հավատքն է, որ հոգու աչքերով աներկբա-
յորեն
Տեսնում է ծածուկները բոլոր և ապագան:
Քանզի այս երեք առանձին մասերն եթե միա-
սին և նույն խորհուրդով դիտես,
Նրանց շնորհիվ, Աստուծով պիտի հավետ ճո-
խանաս:

Քանզի եթե հավատաս նրան, կսիրես նաև,
Որով և կհուսաս նրա աներեւույթ պարզեներին:
Նրան փա՛ռք հավիտյանս. ամեն:



Եվ արդ, ես հետինս դավանողների, բարիքներից ունայն՝

Մտքիս աչքերով դիտելով սկիզբն իմ եղելության,

Որը տեղի ունեցավ Արարչի ձեռքով, անէությունից,- հավատում եմ լիահույս,

Թե Հիսուս Քրիստոս կարող է անել, ինչ որ կամենա:

Քանզի հավատացի, ուստի և խոսեցի,

Պողոսից խրատված և սովորած՝ Դավթից¹¹.

Ուրեմն այժմ թող նրանց կենդանի աղոթքն ինձ օգնի՝

Հավատքով ճանաչել նրան ճշմարտապես

Եվ նրա հարության զորությանն, ըստ առաքյալի,

Հաղորդակից լինել նրա չարչարանքներին,

Եվ այն բոլորը, որոնք հիշվում են հաջորդ տողերով:

¹ Բ. Կորնթ. Դ. 13

Կցորդ է սրան և հույժ նմանատիպ՝
Հավատալն իսկապես և այն նոր փոփոխության,
Որով մեղավորը դուրս է գալիս քավված,
Զարագործն՝ արդարացած և անմաքուրը՝
սրբված,
Եվ անքավելի մահացու մեղքով հանցավորը
ես՝ անդատապարտելի երանության
Եվ ստրկական կապանքներից զերծ՝
Երկնավոր ազատության տիրացած:
Եվ ի՞նչ կա արդյոք ավելի չքնաղ, քան սիրտն
այն մեղավորի,
Որն իր միտքը գտած տարակուսանքի թանձը
խավարից,
Եվ Աստուծո օգնությունն ստացած,
Երբ մի կողմից մարմնապես ծիծաղում է, մյուս
կողմից հեծում հոգեապես:
Այդպիսին թեպետ գերազույն բարձրությունից,
Նորագյուտ և անհերքելի մեղքերով ծանրա-
բեռնված
Սուզված է խորը՝ կործանման գուքի անդունդն
անհատակ,
Սակայն փրկավետ կյանքին մոտեցնող նշխարը
ունի,
Որպես լուսեղեն մի կայծ իր մտքում և հոգում
պահած.
Ինչպես թանձրամած հուրն այն նշանավոր և
զարմանալի՝
Հրամանով Վեհի մակարդած հրաշքով՝

Խորունկ հատակում նիրհող ջրհորի¹:
 Ուստի և ահա՝ թախծալից իսպառ մեղավորը
 հեղ,
 Որ կորցրել է բարին գտնելու ակնկալությունն
 Ու զրկվել չնորհի համարձակությունից,—
 Կարող է հուսալ, թե կրկին անդամ հասնելու
 է նա
 Նախապես իրեն պարգևված փառքի զարդա-
 րանքներին:
 Զի Աստուծո կողմից է պատրաստվում նաև
 այս, որ գործադրվի սույնի վերաբերմամբ,
 Քանի որ սա ամենահնար տվողի զորությունն է
 ավետարանում,
 Որով հաճելի խունկ է հոտոտում Աստված,
 Քան ամենաանուշ բույրերը բոլոր,
 Քան խունկն այն, որ մանր աղալով, երբեմն խո-
 րանի համար էին պատրաստում².
 Ի՞սկը համակերպ այն հոգիներին,
 Որոնք զղջումով խոնարհվել են վար,
 Նույն նմանությամբ իրար միանալու:
 Հստ որում և փրկիչը բոլորի՝ կույրերից ոմանց
 հարցնելով,
 Թե՛ «Հավատո՞ւմ եք, որ ես կարող եմ ձեր աչքը
 բանալ»,
 Լույս չպարգևեց նրանց աչքերին,

¹ Բ. Մակար. Ա. 19

² Ելից Լ. 7-8

Մինչեւ նրանցից հաստատ հավատքի գրավական չառավագ:

Ի՞նչն է մեզ համար ավելի անհույս, քան թե հավատալ,

Թե չորս օրվա մեռելը կարող է կրկին կենդանանալ:

Եվ սակայն կանայք, հավատքով լցված,
Որոնք ընկան ոտքերն Արարչի,
Տեսան անհապաղ Աստուծո փառքի ապացույցը պարզ,
Երբ նրանց եղբայրը կենդանացավ¹:

Բ

Իսկ այն մասին, թե մեղանչումից վերջն էլ մնում
է չնորհն անկապտելի՝
Կան հզորագույն վկաներ.

Նախ Ենովքն ու Ահարոնն, ապա
Նրանցից հետո Դավիթը և Պետրոսը դարձյալ,
Որոնց հետ նաև Եղիազարը կրտսեր,
Որ ողորմություն գտնելով մեծն Աստուծո կողմից՝

Վկա հանդիսացավ մեծագույններին:
Ավելորդ է առ այն հիշել, և՛ առակը անառակը
որդու:

Թողնում եմ պոռնիկին², որ Տիրոջից գովզեց,

¹ Յովի. ԺԱ. 17-44

² Սատր. ԻԶ. 6

Եվ մաքսավորին¹, որ բարեգործից հիշատակ-
 վեց,
 Նաև երջանիկ այն ավազակին²,
 Որը վերջին չնչում պսակվեց չնորհիվ իր հա-
 վատքի.
 Եվ նույնիսկ նրանք, ովքեր մասնակից եղան
 Արարչի սպանմանը,
 Որ հանցանքների ամենեն անքավելին է:
 Դրանից էր ինքը՝ Պողոսն ընտրյալ,
 Որ առաջինն էր անօրենների մեջ մի ժամանակ:
 Սրանցից ոմանք, որոնք օրենքի ճանաչողու-
 թյամբ հանդերձ գլորվեցին,
 Քան օրենքից առաջ ապրողների առավելու-
 թյունը,
 Կանգնեցին կրկին նախկին կյանքն իրենց հա-
 գարապատիկ գերազանցությամբ:
 Իսկ նա, որ նախքան օրինակի տրվելը՝ ավան-
 դությունն էր պահել հայրենի
 Եվ ավելի մոտ է եղել հավատքի սկզբնահոր³
 պատվիրանին,
 Եվ նախամարդու մեղապարտությունն իրենը
 համարելով՝
 Տուժել էր այն իր տաժանագին տառապանքնե-
 րով,—
 Քավություն գտավ ոչ թե հողի տակ թաղվելով,

¹ Ղուկ. ԺԸ. 14

² Ղուկ. ԻԳ. 43

³ Աբրահամի

Այլ հզորապես հաղթահարած բռնությունը
մահվան՝
իր չարչարելի մարմնով դեպի երկինք փոխա-
դրվելով,
Հանդիսանալով բանականների կյանքի կարա-
պետ¹:
Իսկ ոմանք դեռ խակ՝ տհաս հասակից չարու-
թյամբ տարված,
Երբ տարիքն իրենց առան կատարյալ,
Ոչ թե թափվեցին բարձրությունից վար,
Այլ աշխարհային կյանքի դժնդակ թշվառու-
թյունից՝
Բարձրացան դեպի կամարն երկնքի:
Եվ եթե կանխապես կարելի եղավ չարերին դար-
ձի բերել վերստին
Եվ մեր հողանյութ գոյացությունը փոխել ու-
կեղենի,
Պատկերն արքունի՝ կերպարանքին մեր ի պա-
տիվ՝
Նկարված խորքը մեր հոգու քանդակումով
արքայական,
Մեր բնությունն անկորուստ և անփոփոխ
Եվ դավադրության դեմ անպարտելի,—
Ապա, առավել հուսալի է այժմ անողոք և
անծածկույթ
Շնորհաց հայտնությունը, ուխտված մեր Տեր
Քրիստոսով,

¹ Ենովք

Ինքը լինելով հաշտարար միջնորդ
Եվ երկնային անմահ, կենդանի ու մշտնջենավոր
բարեխոս,
Որով հաստատուն կմնա մեր մեջ Տիրոջ խոսքը
միշտ, ըստ մարդարեի.—
«Ուխտ խաղաղության և կնիք հաստատու-
թյան»¹:
Ուրեմն և ես այս ճշմարտագույն Կանոնի,
անփոփոխ վճռի
Եվ արարչավանդ պայմանի համաձայն, ահա՝,
Հավատավորի իմ շրթունքներով համբուրում
եմ ճշմարտությունն այս խոսքի
Եվ հույս ունեմ՝ փառքի շնորհին արժանանա-
լու.
Քանզի, արդարեւ, երբ Աստված ինքն է մեզ
արդարացնում,
Ոչ ոք չի կարող մեզ դատապարտել, ըստ հաս-
տատ խոսքի առաքելական:

Գ

Այս պայծառ գծագրված վստահությանն ապա-
վինած, ահա՝,
Կանգուն եմ կործանյալս դարձյալ, և թշվառաց-
յալս՝ հաղթող,
Մոլորյալս կգամ կենարար դարձի,
Ամենաթշվառ չարագործս՝ դեպի հույս,
Մահվան մատնվածս՝ դեպի կյանք,

¹ Եսայի ԾԴ. 10

Ապականությամբ վաճառվածս՝ դեպի չնորհ,
Դժոխային գործերով տարվածս՝ դեպի լույս,
Երկրասեր անասնակենցաղս՝ դեպի երկինք,
Կրկնակի մոլորյալս՝ դեպի փրկություն,
Մեղքերով կապկապյալս՝ դեպի հանգստյան
խոստում,
Անբժշկելի վերքերով վարանածս՝ դեպի դեղն
անմահական,
Ստամբակյալս վայրագաբար՝ դեպի սանձ զսպո-
ղական,
Հեռացյալս վարատական՝ դեպի կոչում,
Դժնդակ կամակորս՝ դեպի հեղություն,
Հնդդիմախոս հայհոյողս՝ դեպի ներումն,
Եվ այս բոլորը չնորհիվ Հիսուս Քրիստոսի
Եվ նրա Հոր հզոր և ահավոր
Եվ ճշմարտության Հոգու անունով ու բարի
կամքով,
Որոնց օրհնաբանված իսկությանը և մի աստ-
վածությանը
Ե՛կ զորություն, և՛ արքայություն, և՛ մեծու-
թյուն, և՛ փառք
Հավիտյանս. ամեն:



Սըդի խորչերից խոսչ Եսպո-ծո Հետ

Ա

Եվ արդ, քանզի զղջման նախընթաց գլուխներում
Հուսահատության խոսքերով լքվեցի սաստիկ,
Եվ տարակուսանքի հեծանով մահու չափ ձաղ-
կեցի ինքս ինձ,
Ուստի և այստեղ վերադառնալով հույսին վերս-
տին՝
Համարձակվեմ պիտի գո՛ւթ շարժել ես,
Սուրբ Երրորդությանը մեղավորիս օգնության
կանչելով:
Գիտեմ, որ եթե օրհնաբանեմ ես և դավանեմ
Արարածներին բոլոր կյանք տվող Աստծուն,
Եվ ընտանի ձայնով կանչեմ անունն ահավոր
չնորհապարգև Բարերարի,
Նա կենդանություն պիտի տա, անշուշտ ինձ՝
մեղավորիս,
Հստ մարգարեի կանխասացության,
Թե՛ «Ով որ կանչի Տիրոջ անունը, նա պիտի
ապրի»:
Իսկ ես ոչ միայն կանչում եմ նրան,

Այլ հավատում եմ նրա մեծությանն ամենից
առաջ.

Ոչ թե գալիս եմ խնդրելու նրա պարզեցները ես,
Այլ նույնիսկ իրեն, որ կենդանությունն է
ճշմարտապես,

Շնչառությունն իսկ, առանց որի չի՞ք շարժում
և ընթացք:

Ո՞չ այնքան հույսի հանգույցով, որքան սիրո
կապով եմ ես կապվում նրան.

Ու ոչ թե տուրքի, այլ այն տվողի կարոտով եմ
ես վառվում շարունակ:

Ոչ թե փառքն է ինձ համար անձկալի,

Այլ փառավորյալն է համբուրելի,

Ոչ թե ապրելու կյանքի փափագով,

Այլ կենարարի հիշատակով եմ տոչորվում ես
միշտ:

Ոչ թե վայելքի տարփանքով եմ ես հեծում ող-
բաձայն,

Այլ այն կազմողի տենչանքովն եմ խոր հառա-
չում սրտանց:

Չեմ փնտրում հանգիստ, այլ աղաչում եմ երեսը
տեսնել Հանգստարի:

Ոչ թե հարսանքատան խնջույքի, այլ փեսայի
անձկությամբ եմ մաշվում,

Որի զորության շնորհիվ՝ վստահ ակնկալու-
թյամբ,

Հավատում եմ ես աներկմիտ հույսով,

Որ վերոգրյալ մեղքերի բեռներն ունենալով
հանդերձ՝
Ապաստանելով ամենակարողի ձեռքին,
Ոչ միայն պիտի հասնեմ քավության, այլև պի-
տի տեսնեմ իրեն,
Ընդունելու գութն ու ողորմությունը և ժա-
ռանգելու երկինքը նրա,
Թեև հո՛ւյժ մերժելի եմ:

Բ

Եվ արդ, ամոթահար սաստիկ ու կորագլուխ,
Գրչովս, որ խոսքի միջնորդ է դառնում
Ամուր կողպեքով փակված, պապանձված իմ
շրթունքներին,
Զկարողանալով շարժել լեզուս անհամարձակ,
Պաղատանքների նոր երգեր ահա՛ պիտի ոգեմ
ես՝
Ի վեր ուղերձված իմ աղիողորմ հառաչանքների
աղաղակներով:

Գ

Ընդունի՛ր սիրով, Տեր Աստված Հզոր, աղա-
չանքներն իմ դառնացած սրտի.
Քաղցր գթությամբ մոտեցիր դու ինձ՝ ամոթա-
հարիս.
Փարատի՛ր, ամենապարզե՛, ամոթալի տիսրու-
թյուններս,

Վերցրո՛ւ ինձնից, ողորմա՛ծ, անտանելի ծան-
րություններս,

Հեռացրո՛ւ, հնարագետ, սովորություններս մա-
հացու.

Խափանի՛ր, մի՛շտ հաղթող, հրապույրները խա-
բողի.

Վանի՛ր, վերնային, մառախուղը մոլորեցնողի.

Կասեցրո՛ւ, կեցուցիչ, ընթացքը կորուսչի.

Ցրի՛ր, ծածկատե՛ս, չար հնարքները կապկապո-
ղի.

Խորտակիր, անքնի՛ն, հարձակումները մարտնչո-
ղի.

Տյառնագրի՛ր անունովդ լուսացույց երդն իմ
հարկի.

Պարփակիր քո ձեռքով առաստաղը տաճարիս.

Գծագրիր քո արյունով սեմը սենյակիս մուտքի.

Դրոշմիր քո նշանը աղոթյալիս ճանապարհին,

Ամրացրու քո աջով խշայակն իմ հանգստի.

Զերծ պահիր թակարդներից ծածկարանն իմ
անկողնի.

Պահպանիր քո կամքով տառապած հոգիս.

Անխարդախ արա՛քո շնորհած շունչը մարմնիս.

Կանգնեցրո՛ւ շուրջն իմ՝ պարը երկնային քո
զորքերի,

Որպես դիմամարտ՝ դեերի գնդին:

Տո՛ւր հանգիստ բերկրալի մահահանգույն նիր-
հիս խորին գիշերում՝

Բարեխոսությամբ սուրբ Աստվածածնիդ և բու-
լոր ընտրյալների:
Տեսությանս պատուհանները, որոնք մտքի
գդայարաններ են,
Ամփոփիր այնպես ու պարուրիր,
Որ պաշտպանվեն միշտ անսասանելի
Կենցաղական հոգսերից բոլոր, անըջական
երազներից,
Խռովահույզ ծփանքներից ու ցնորքներից խենթ
ու խոլական
Ու հիշատակով աներկբա հույսիդ մնան ան-
վնաս:
Որպեսզի երբ սթափիվեմ իմ ծանր քնից,
Ամենազգաստ արթնությամբ և հոգենորոգ
գվարթությամբ քո դեմ արձանացած,
Աղաչանքն այս իմ՝ հավատքի բուրմամբ,
Ո՞վ ամենօրհնյալ թագավոր անճառ փառքերի,
Երգակցելով երկնագումար փառաբանող խմբին՝
Քո բարձունքն ի վեր՝ առաքեմ առ քեզ:
Զի փառավորյալ ես դու արարածներից բոլոր
Հավիտյանս հավիտենից. ամեն:



Սրբի խորժերից խոսէ՛ Ըստու-ծո Հեղ

Ա

Աստված բարերար, հզոր, ահավոր,
Շնորհատո՛ւ, բարի, դու Հա՛յր ողորմած.
Անունը անգամ քո մեծությունն ու գթությու-
նը և քո մտերմությունն է ավետարանում,
Քաղցր ես դժնիների և անգոհների համար.
Քեզ հետ Որդիդ էլ նման է միշտ քեզ, ձեռքիդ
պես նրա ձեռքն էլ զորեղ,
Անժամանակ տերությամբ ահեղ՝ քո արարչու-
թյամբ ինքն էլ բարձրացած:
Նաև Սուրբ Հոգին քո ճշմարտության՝ բխելով
քեզնից անսպառորեն,
Իբր աստվածային կատարյալ իսկություն և էու-
թյուն մշտնջենական,
Հստ ամենայնի հավասար է քեզ և իշխանու-
թյամբ՝ փառակից Որդուդ:
Երրյակ անձնավորություն՝ համակ անքնին,
Հատուկ առանձնացումով տրոհված անձեր,
Բայց միավորված համազուգությամբ,
Նույնագո բնությամբ տիրապես, անշփոթ և
անանջրպետ

Միւնույն կամքով և գործակցությամբ,
Ոչ մեկը մյուսից ավագագույն չէ,
Եվ ոչ էլ մի ակնթարթ նույնիսկ մեկ-մյուսից
նվազ երբեկիցե,
Այլ իբրև պատճառ երկնային սիրո անստվեր
լույսի, հայտնված մեր մեջ,
Սրբասացության միակ պսակով՝ անսկզբնաբար
աստվածաբանված:
Քանզի արդարեւ բարձրածայն այս խոստովա-
նությունը երեք փառատրյան այդ դավա-
նության՝
Պետրոսին հավատքի վեմ կոչվելու երանության
արժանացրեց –
Դատապարտյալիս մեղավոր հոգին բարեհրա-
ման քո ակնարկությամբ,
Ո՞վ դու, որ ինտրում ես գերյալիս, հրաշանո-
րոգ թող արդարացնե:
Զի քոնն են թեև պարզեներն ու ողորմություն-
ները,
Բայց դու ո՛չ այնքան քո պարզեներով, որքան
ողորմությամբ ես հոչակված.
Քանզի երկրորդը քո փառքն է ավելացնում,
Իսկ առաջինն առաքինական գործի է հայտա-
րար.
Զի պարզեները փոխարինություն են ծառայու-
թյան դիմաց,
Իսկ ողորմությունը՝ բարերարություն մեղավո-
րիս:

Բ

Եվ արդ, մարդկային գործերը թող որ չգերազանցե՛ն իրենց զորությամբ քո շնորհներին, գթառա՛տ Աստված,

Եթե մինչև իսկ անցավոր բնության օրենքներից էլ վեր լինեն նրանք.

Այլ հաղթող հանդիսանալով քո երկայնամտությունը,

Երկրածինների ընթացքը երբեք չհավասարվի՝ թող քո գործերին:

Քանզի և նրանք, որ օրենքների մաքրությամբ իրենց պարծենում էին,

Քո արդարության լույսը երբ ծագեց,—

Որ նոր օրենքի ճշմարտությունն էր ծանուցանում,—

Հրեաներն հետին անձկությամբ լքված ու նվաստացած,

Ավելի քան տարագիրներն ողորմելի՝ մարդասիրությանդ կարոտ եղան:

Եվ քանզի ամենայն ինչ հնարավոր է քեզ, բարերա՛ր,

Լսի՛ր ողբաձայն պաղատանքներս, որ ուղղում եմ քեզ.

Ողորմիր, փրկիր և մարդասիրիր, զի երկայնամիտ ես դու,

Եվ քոնն են քաղցրություն, փրկություն և քաղություն և փառք

Բոլոր հավիտյան ապրող ազգերից. ամեն:



Բան ԺԴ

Սրբի խորհերից խոսէ՛ Ասպո-ծո Հեղ

Ա

Պաղատում եմ քեզ, լույսի՛ ճառագայթ, արքա՛
երկնավոր,

Գովյալ անապատում, և անձառ Որդիդ դու մեծ
Աստուծո.

Ականջ դիր դարձյալ և այժըմ ահա՛,

Բարձրյալ, բարեգութ, կյանքի ապավեն,

Վիրավորյալիս նվազաձայն հառաչանքներին:

Բ

Զի խոսված երբեք, թե քեզ աղաչեց ավազակնե-
րից խողխողվածը¹,

Քանզի կարկամած էր.

Ոչ էլ պաղատանքի ձայն արձակեց քո ետևից,

Քանզի անկորինչ էր.

Կամ մատների շարժումով աղետն ու վտանգը
հայտնեց տեսողիդ,

Քանզի խորտակված էր.

Ոչ էլ ողբագին արցունքներով լի աչքերը տնկեց
բարերարիդ,

¹ Երիքովի ճանապարհին ընկած վիրավորը. – Ղուկ. Ժ. 30

Քանզի վնասապարտ էր.
 Եվ կամ միջնորդի բարեխոսությամբ ողորմա-
 ծիդ կամքը սիրաշահեց,
 Քանզի լքված էր.
 Ոչ էլ ջախջախված մարմնի արյունով՝ ներկված
 հագուստները ցույց տալով քեզ՝
 Գթածիդ սիրտը ճմլեց, քանզի հուսահատ էր.
 Ոչ էլ հաստատուն ծնկներով՝ իբրև ոտքի
 գարշապարով՝ չընթացավ,
 Քանզի անկանգնելի էր.
 Զի կիսամեռ ասել կենդանուն՝ հեռու չէ այնքան
 մեռելությունից:
 Մանավանդ որ խոսքով քո խրատվելուց,
 Ողորմությամբդ բարերարվելուց
 Եվ քո փառքով լուսավորվելուց հետո էլ դեռ,
 Ոչ միայն չդադարեց քեզ հակառակ ընթացք
 բռնելուց,
 Այլև չենթարկվելով, գլուխ բարձրացրած՝ իր
 թշնամյաց կողմն անցավ
 Եվ նրանց հետ մեկտեղ դաշն կնքած՝ միաբանեց
 քեզ ատողների հետ¹:

Գ

Իսկ դու, բազմապարգև բարերար, անոխակալ և
 ամենափրկիչ,

¹ Զուգորդաբար՝ Երիքովի վիրավորից անցնում է Բերհեզդայի անդամալույժին, որը քրիստոնեական հին ավանդության համա-
ձայն հետո Եղավ Կայիափայի այն սպասավորը, որը Վերջին գիշերը քահանայական ապարանքում ապտակեց Քրիստոսին:

Ոչ միայն չհիշեցիր մեղքերն այդ չարագործի,
 Այլև ոչ իսկ խոսքով հանդիմանեցիր.
 Չոտնահարեցիր ընկածին, այլ կարեկցաբար մո-
 տենալով նրան,
 Ծայրագույն խնամք ցուցաբերեցիր:
 Քահանայապես, ըստ ահարոնյան տկար օրեն-
 քի, —
 Որ զորավոր է մահ գործելու մեջ¹,
 Դատապարտիչ անեծքներով և բռնալիր քա-
 րածգությամբ, —
 Դու չփութացիր վիրավորվածին խորտակելու.
 Եվ ոչ էլ, ինչպես զետական առաջնորդն այն
 թերապաշտոն,
 Որը երկուսի միջև իբրև բաժանող անջրպետ՝
 Հնի լրումն էր և սկիզբը նորի,
 Եվ որ հոգեզզուրկ ապաշխարության հրավիրակ
 հանդիսացավ, —
 Վիրավորյալի տագնապը տեսար.
 Որ չլինի թե արմատակտուր տապարի օրինա-
 կով
 Քո մեջ չարատանջ մահվան պաշտոնը նկատե-
 լով²
 Սատակի գալիք փորձություններին դեռևս չեն-
 թարկված.

¹ Բ. Կորնթ. Գ. 7, 9

² Այսինքն՝ չուզեցիր նմանվել նույնիսկ ծառի արմատին մոտեցված այն կացնին, որով Շովիաննեսը պատկերացրել էր մոտակա գալուստը, - Մատթ. Գ. 10

Այլ պահպանանուն ասորեստանցի հեթանոսներին¹,

Որոնք ստացան իրենց օրենքը հրեաներից

Ու պահեցին միշտ, մինչդեռ նրանք մոռացան, –
Կցորդվելով՝ մեր բնությամբ խառնված մարմ-

նիդ վերարկուով,

Օտար ազգերին էլ ազատության ավետիս համ-

բավեցիր

Եվ աստվածային քո ներգործությամբ անապա-

կան՝ ձեռք երկարելով՝

Մահացու կերպով մեղանչած մարդուն կանգ-

նեցրիր դարձյալ իր սերունդներով:

Տիրաբեկ սիրտն ուրախացրիր և վհատյալին

հուսաղրեցիր,

Եվ թշվառին զվարթացրիր դարձյալ.

Ավաղանի կենարար օծմամբ և բաժակով լույսի՝

լցրիր.

Նորոգեցիր հացով քո երկնային՝ արարչական

մարմնով.

Երջանիկների և ընտիրների վերակացությամբ
ինամարկեցիր ու փայփայեցիր ու դարձանե-

ցիր,

Եվ հանդարտընթաց գրաստի խնամքին հանձ-

նելով նրան՝

Անփորձ պահեցիր, մինչև հանեցիր հարկը լու-

սեղեն:

¹ Սամարացոց, ըստ որում Սամարիա, որ պահապան է նշանակում:

Առաջին և երկրորդ կենդանատու կտակարանների միջնորդությամբ դարձան տարար՝¹
դու մարդասիրաբար:
Եվ, ինչպես երբեմն Մովսեսին² թևատարած
արծվի պես ընդունեցիր
Եվ բարի երկրի խաղաղ հանգստին առաջնորդեցիր,
Հրամայելով վարդապետներին՝ խոսքի կերակրով սնել նրան:

Դ

Եվ արդ, դու, որ ողջ առավելագույն լույսդ բարության
Ամեն բանի մեջ բովանդակապես հրաշագործեցիր,
Ցրվողի գանձը սեփականելով՝ քո ստացվածքը
վերադարձրիր քեզ,—
Ինձ էլ ապրեցրու, մեղքերի պարտքերն իմ մաքրելով,
Ո՞վ դու, որ պարգևում ես ձրի և հանպատրաստից,
Շնորհիր և ի՞նձ քավություն ու բժշկություն,
Բարեգործություն, զորեղ, անքնին, անեղծ, ահավոր,
Օրհնյալ միշտ, հավիտյանս հավիտենից. ամեն:

¹ Գրաբարում՝ դարմանատրեցեր, այսինքն՝ խնամք տանել - ծնթիրատ.:

² Բ. Օրին. ԼԲ. 11



Սըմի Խորիչերեց խոսք Հայութածո Հետ

Ա

Արդ, նույն ցավագին հեծեծանքներով վշտահար սրտիս

եվ բոլորովին տագնապած հոգուս տառապանքներով,

Այս անգամ դարձյա՛լ միևնույն ոճով դիմելով
ես քեզ,

Ամենապարգև քո բարերարի գո՛ւթն եմ խնդրելու:

Պաղատում եմ իբրև մեռյալ՝ կենդանի անմահ
Աստծուդ,

Փառքիդ հանդեպ իմ անարգությունը խոստովանելով,

Ինչպես և քո բարությունն իմ չարության դիմաց.

Որոնցով հաղթվեցի ինքս, քան թե բուժվեցի,

Ամաչեցի, քան թե համարձակվեցի,

Ուխտակորույսս ես և ավանդամոռաց:

Բ

Այն ոչխարի պես, որին օրինակ է բերում առակն
երկրորդ¹,

Ես էլ ծայրահեղ չափով մատնված անզգայու-
թյան

Ու մոլորվելով անմարդաբնակ լեռներում՝ եր-
կար,

Եվ դեերի հետ գաղանաբարո վայրի կուռքերի
մեջ թափառելով,

Առանց թեկուզ փոքր-ինչ հոտին մոտենալու,-
Չունեի լեզու, որով պատմեի ցավերն իմ տան-
ջող,

Ոչ էլ ձեռք, որի շարժուձևերով համրերն են
իրենց մտքերը հայտնում:

Իսկ դու, միայն գովյալդ, սկսած նախնի սե-
րունդներից մինչև այսօր,

Գտնելով և ինձ մեղավորիս էլ մոլորության մեջ
անլույս ու անել,

Հստ գոչման առ քեզ մաղթանք երգողի²,

Քո խնամարկու կամքի տեսչությամբ Հովիվ
կոչվեցիր.

Ոչ միայն հոգ տարար, այլև փնտրեցիր,
Եվ, ո՞վ հրաշագործ, ոչ միայն գտար, այլև
անձառելի բարերարությամբ

Վերցրիր սիրով դու կենդանարար քո ուսի վրա,
Եվ քո երկնային զորաց հետ մեկտեղ՝

¹ Ղուկ. ԺԵ. 3-7

² Եզեկ. ԼՂ. 11-12

Քո հայրենական ժառանգության մեջ դասեցիր
ինձ:

Եվ արդ, դու հզո՞ր, կենարար, օրհնյալ, այցելու
գթած և մի՛շտ ողորմած,

Դու, որ ընդունեցիր նրանց՝ անաղերսներին այն
անլեզու¹,

Որոնցից մեկը մահացու խոցված՝ չարչարվում
էր խիստ,

Մյուսն անբանների անզգայությամբ

Փախել էր դեպի հեռու ամայի վայրեր անբնակ,
Եվ վտարանդի, շվար ու վհատ՝ բառաչում էր
խեղճ, անիմաստորեն,—

Քո աստվածային բարեխնամությամբ տիեզե-
րահրաշ

Ցույց տվեցիր դու հոգածությունդ թշվառու-
թյան մեջ կորածի հանդեպ,—

Հայտնիր արդ և ի՛նձ գթությունդ խոր և բա-
րիքներիդ հորդումներն առատ,

Ինձ, որ բերված օրինակներից շատ ավելի եմ
եղել անօրեն.

Ինձ, որ մահապարտ եմ բազմօրինակ.

Ինձ, որ բարության քաղցր խառնուրդում՝ հա-
տուկ համ եմ չար.

Ինձ, որ արժանի եմ անդամներիս հատմանն
արդարեւ,

Ինձ, համաճարակ, ախտով վարակված վիրավոր
հոգուս.

¹ Վիրավորին ու ոչխարին

Ինձ, որ անզգա անասուններին եմ հավասարվել
եվ օտարացել իմաստունների ընտանությունից.
Ինձ, որ նման չեմ բնությամբ ինձ պես բանա-
կաններին:

Եթե մի օրինակ ունենայի, ես կասեի.
Թե նմանակից ունենայի՝ կպատմեի.
Թե հանգունակից ունենայի՝ կխռուեի.
Թե ինձ հավասարն ունենայի՝ կգրեի.

Թե նույն բանը անող ունենայի՝ ցույց կտայի.
Թե ինձ համեմատն ունենայի՝ կիմացնեի.
Թե անցյալում լիներ՝ կսփռփվեի.
Թե ներկայումս՝ կհուսայի:

Սակայն, քանի որ ոչ նմանս ունեմ, ոչ էլ օրի-
նակ,

Ուստի դո՛ւ միայն կարող ես քավել ու բժշկել
ինձ և կենսագործել,

Կենդանարարդ բոլոր մեռելների և նորոգո՛ղդ
տիեզերաց:

Գ

Զի եթե երջանիկ, սուրբ ու սրատես Դավթի
գործած չարիքներն ու

Անօրենությունները գլխից ավելի վեր բարձրա-
ցած էին,

Եվ մեղքերն ու հանցանքները դժվարակիր բեռ-
ների նման ծանրացած սաստիկ,

Հապա ուրեմն իմ սխալմունքներն ավելի են,
քան

Տիեզերասույզ, ամենասպառ ծովի ջրակուտակ
հեղեղի հորդությունը

Ու անցնում են բոլոր լեռների կատարներից:

Բայց թող որ փչե քաղցրաշունչ քամիդ,-
ինչպես այդ եղավ Նոյի ժամանակ,-

Որ լեռներն անդամ կարող է հալել,

Յամաքեցնելու բազմաբովանդակ ջրակույտն
իմ երկրակործան հանցանքների

Ու լեռնակարկառ բարձրությամբ դիզված մեղ-
քերն իմ բոլոր:

Եվ արդ, համառոտ քո խոսքով հզոր,

Եվ ամենակարող հնարավորությամբ կարճ
դատաստանիդ,

Հստ մարգարեի, քավության մի ելք ցույց տուր
ինձ՝

Անօրենության մեջ ընդերկար մոլորյալիս:

Եվ դու, ներելով համառությունն իմ,

Ո՞վ երկայնամիտ, ողորմած, օրհնյալ,

Շնորհի՛ր ինձ կատարյալ թողություն և բարե-
գործիր ճշմարտապես,

Զնջի՛ր բոլորովին՝ անվճարելի պարտքերիս
արժանահատույց տոկոսների տույժը տա-
ժանակիր:

Զէ՞՞ որ դու չունես ցասումնալից սիրտ ու բար-
կություն բոլբոք,

Ինչպես նաև չկան քո մեջ նենդություններ և
նշաններ մթության,

Քանզի դու կյանք ես կամենում և լույս,

Դու մահ չստեղծեցիր և, ըստ Դավթի ու Սողոմոնի,
Մարդու կորուստը քեզ ուրախություն չի պատճառում:

Դ.

Քո բարեվիճակ կանոնների մեջ դու մեծագույն
պայման սահմանեցիր մարդկանց համար՝
Զարությունը չարությամբ չփոխարինել,
Այլ մի օրվա մեջ յոթանասունյոթ անգամ գործած
մեղքերը նույնիսկ ներել պատգամեցիր մեզ¹,
Մեզ, որ ի բնե հակամետ ենք միշտ ի հայտ բերելու²
անհամար չարության բծեր,
Որոնք աճում են ու միշտ նորոգվում
Մեր ամեն տեսակ փշեր բուսցնող բնության
դաշտում՝
Համաձայն անսուտ քո վկայության,
Թե՛ «Մարդու միտքը իր մանկությունից տրամադիր է չարիք² գործելու»:
Քո կենաց բանի ավետարանիչ Հովհաննեսն
անգամ,
Որը մաքուր էր կատարելապես,
Նա ինքը՝ որպես հասարակության բնության
լծակից,

¹ Մատթ. ԺԸ. 22

² Ծննդ. Ը. 21

Ամբողջովին արդարացած՝ քո ճշմարտությունը
հաստատեց իմ ստության հանդեպ:
«Եթե ասենք, որ ոչ մի մեղք չունենք, — ասում
է նա, —

Սուտ դուրս բերած կլինենք նրան»:

Արդ, կատարված է խոսքդ խնկելի

եվ լիովին ստույգ արդարացված՝

իմ մոլորության խիստ դժնդակ անիրավության
հանդեպ:

Ուստի խնայի՛ր ինձ ողորմությամբ, քաղցրա-
հա՛մ աղբյուր,

Դո՛ւ միայն օրհնյալ հավիտյանս. ամեն:





Բան ԺԶ

Սրբի խորիւերից խոսէ՛ Ասպո-ծո Հեղ

Ա

Եվ արդ, դո՛ւ միայն Աստված երկնավոր, բարձր-
յալ, բարեգործ.

Քոնն են զորությունն ու ներողությունը,

Քոնն են բշկությունն ու առատությունը,

Քոնն են պարգևներն ու չնորհները ձրի,

Քոնն են քավությունն ու պաշտպանությունը,

Քոնն են հնարքներն անիմանալի,

Քոնն են հրաշքներն անգտնելի,

Քոնն են չափերն անչափելի,

Դո՛ւ ես սկիզբն ու վերջը:

Սրտմտության խավարը երբեք չի ստվերում
լույսը քո ողորմության,

Քանզի լինելով ինքդ մտքից վեր՝ զերծ ես դու
նաև որևէ ախտից:

Պատկեր ես դու անպարագիր՝ անկշռելի որքա-
նությամբ,

Ո՛վ անչափություն փառաց լայնության,

Անսահմանափակ ընդարձակություն հատու
զորության,

Անամփոփելի առավելություն,

Անտկարանալի բարերարություն գթության:
 Դու մահվան ստվերն, ըստ մարդարեի, այդա-
 բացի ես փոխում¹,
 ինքնակամ իջար տարտարոսը դու՝ արդելված-
 ների բանտն ստորերկրյա,
 Ուր աղոթքների դուռն անդամ փակ էր ամուր
 կողակեքով²,
 Խլելով նրանից այնտեղ վտարված հոգիների
 կողոպուտը ողջ,
 Հաղթական խոսքիդ հրամայող սրով
 Սատակիչ մահվան կապը կտրեցիր
 Եվ փարատեցիր երկյուղը մեղքի:
 Դարձի՛ր այժմ ինձ, որ տագնապում եմ տղմոտ
 իմ գուբի զնդանում խորունկ,
 Մեղքի շղթայով ամուր կապկապված
 Եվ բանսարկուի նետի սլաքով խոցված կարե-
 վեր:

Բ

Դու Տեր բարերար, բացարձակ բարի, լո՛ւյս
 խավարի մեջ,
 Օրհնության դու գանձ, ողորմած, գթած, մար-
 դասեր, կարող,
 Զորեղ, անապատում, անքնին, անճառ,
 Դու՝ հո՛ւյժ ձեռնհաս, ըստ սուրբ Հակոբի.

¹ Անովս Ե. 8


² Այսինքն՝ ուր այլևս անգոր էր աղաչանքը:

Հնարավորություն միշտ դյուրապատրաստ՝
 ամեն անհնար բաների դեպքում,
 Մեղքի խոխվներն սպառող կրա՛կ,
 Կիզանուտ ճաճանչ դու ընդհանրական և մեծա-
 խորհուրդ թափանցողությամբ:
 Հիշի՛ր ինձ, օրհնյալ, քո ողորմությամբ և ո՛չ
 ըստ իրավունքի,
 Ներողությամբ քո և ո՛չ պատժելով,
 Երկայնամտությամբ և ոչ թե հավաստի համոզ-
 վածությամբ:
 Եթե կամենաս կշռել ծանրությունն իմ մեղքերի,
 Արա՛ քաղցրությամբ քո մարդասերի և ո՛չ
 արդարությամբ.
 Քանզի ըստ առաջին պայմանի՝ շա՛տ են թեթև
 նրանք,
 Իսկ ըստ վերջինի՝ սաստիկ ծանրակիր:

Գ

Արդ, մոտեցիր ինձ, ո՛վ դու բարություն,
 Ինչպես բուժելու համար մոտեցար քո դեմ ելնո-
 ղի ականջին¹,
 Մահվան խոռվիչ հողմը հեռացրու մեղավորիցս,
 Որ հանգչի իմ մեջ խաղաղության մեծազոր Հո-
 գիդ:
 Փա՛ռք քեզ ամենուր, ամեն բանի մեջ հավիտ-
 յանս. ամեն:

¹ Դուկ. ԻԲ. 51



Աղաչում եմ քեզ՝ վտանգված, վշտոտ ու տիրաթախիծ տառապանքներով լի հոգիների խնամակալիդ,

Մի՛ ավելացնիր ցավն իմ հեծության և մի՛ խոցիր ինձ՝ վիրավորվածիս,

Մի՛ դատապարտիր պատժվածիս և մի՛ տանջիր չարչարվածիս,

Մի՛ գանակոծիր հարվածյալիս, մի՛ գլորիր ընկածիս,

Մի՛ կործանիր սայթաքյալիս, մի՛ հեռացնիր հեռացվածիս,

Մի՛ ամաչեցնի պատկառյալիս, մի՛ տարագրիր հալածվածիս,

Մի՛ կշտամբիր խրտնածիս, մի՛ խորտակիր ջախնվածիս,

Մի՛ խռովիր վրդովյալիս, մի՛ ալեկոծիր փոթորկվածիս,

Մի՛ սասանիր դղրդվածիս, մի՛ շփոթիր մրրկյալիս,

Մի՛ կեղեքիր գիշատվածիս, մի՛ ջախնջախիր փշրվածիս,

Մի՛ հոշոտիր մորմոքյալիս, մի՛ կուրացնի խավարածիս,

Մի՛ զարհուրեցնիր ապշահարիս, մի՛ խորովիր
խարշատվածիս,
Մի՛ մահացնիր հիվանդիս, մի՛ ծանրաբեռնիր
տկարիս,
Մի՛ ավելացնիր անուր՝ կարկամած թիկունքիս,
Մի՛ բարդիր ողբեր դառն հեծեծանքիս,
Մի՛ ուժգնորեն վարվիր հողիս հետ,
Մի՛ սաստկապես՝ մոխրիս հետ,
Մի՛ անաչառորեն՝ ստեղծվածիս հետ,
Մի՛ ահարկությամբ՝ փոշուս հետ,
Մի՛ խստությամբ ընդհարվիր մեծդ փոքրիս հետ,
Լույսդ՝ ստվերիս հետ,
Բնությամբ բարիդ՝ ի բնե չարիս հետ,
Ողկույզդ օրհնության՝ անիջալ պտղիս հետ,
Քաղցրությունդ ճշմարիտ՝ համակ դառնու-
թյանս հետ,
Փառավորյալդ անփոփոխ՝ իսպառ անարգիս
հետ,
Կենաց նշխարդ՝ կավեղեն զանգվածիս հետ,
Տերերի Տերդ՝ երկրային տիղմիս հետ,
Աննվազ լիությունդ չքավոր ստրուկիս հետ,
Անկապուտ ճոխությունդ՝ անպատսպար տա-
ռապյալիս հետ,
Անկարոտ բարությունդ՝ ամենաթշվառ աղքա-
տիս հետ:
Քանզի ո՞վ է նա, որ առավոտյան լույսին հաս-
նելով՝
Կտարակուսի, թե խավարի մեջ կարող է ընկնել.

Կամ մոտ լինելով կյանքին՝ մահանալ,
Կամ ազատության՝ և բռնության ենթարկվել,
Կամ շնորհին՝ և դատապարտվել,
Կամ փրկության՝ և մատնվել,
Կամ նորոգման՝ և քայքայվել,
Կամ օրհնության՝ և տարագրվել,
Կամ բժշկության՝ և վիրավորվել,
Կամ լիության՝ և նվազել,
Կամ առատ հացի՝ և քաղցել,
Կամ հոսող գետերի՝ և պապակել,
Կամ մայրական գիրության՝ և նրանից նենգվել,
Կամ աստվածային խնամող աջիդ՝ և տառապել:

Բ

Արդ, բորոտությամբ մարմնի սաստկապես վարակվածի հետ¹
Ե՛ս էլ վշտահար հոգովըս ահա՝ պաղատում եմ
քեզ.
«Տե՛ր, եթե ուզե՞ն՝ կարող ես ինձ մաքրել»:
Մշտագիշեր խարխափումներով տանջվող կույրերի հետ

Հառաչում եմ ձայնով մեծակական.
Ոչ թե անվանում եմ քեզ Դավթի որդի,
Այլ աստվածային էության իբրև ծնունդ եմ
դավանում քեզ.
Ոչ միայն կոչում եմ Ռաբբի,
Որ պատվանուն է իսկությունը գիտենալ կարծող վարդապետների,

¹ Սատթ. Ը. 3

Այլև հավատում եմ քեզ, որպես Տիրոջ երկնի և
երկրի:

Ոչ միայն մոտից ձեռքդ երկարելով, ո՞վ դու բա-
րեգութ

Աստված մերձավոր,
Այլև վստահ եմ, թե մեծ միջոցով նույնիսկ ին-
ձանից հեռու լինելով՝
Խոսքդ կարող է բուժել թշվառիս:
Կամեցողությանդ և ողորմությանդ միջև
անջրպետ չեմ դնում երբեք,

Որ երկմտություն է նշանակում տարակուսելի,
Այլ համոզված եմ, թե կկամենաս որպես բարե-
գութ

Եվ կկարենաս որպես Արարիչ.
Ասա՛ խոսքովդ, և ես կբուժվեմ:
Հարյուրապետի հավատքին և ես կլինեմ լծորդ.
Ոչ միայն մոտիկ տարածությունից, խորանից
խորան՝

Զորավոր ես դու տալու հարություն և բժշկու-
թյուն,

Այլև երկնքում բազմելով նույնիսկ,
Ստորեւ, երկրի վրա բովանդակ դու սքանչելի
հրաշքներ ես գործում,
Որոնց փոխարեն հատուցանելու ես ոչինչ չու-
նեմ:

Գ

Ծնորհիր և ինձ, ինչպես որ պոռնիկին ընդու-
նելիս

Վճռեցիր խոսքիդ դատակնիքով հինգ հարյուր
դենար պարտքը շնորհել¹,
Աստված բարությանց և Տե՛ր երանությանց:
Որքան շատ բաշխես, այնքան ավելի՝ կփառա-
վորվես.

Որքան որ շատ տաս, այնքան կսիրվես.
Եվ ավելին ողորմելով՝ դո՛ւ էլ կրկնակի կբար-
գավաճես.

Այսքան բարիքներիդ համար իրավամբ գովզում
ես դու,

Ամեն բանի տեր լինելով հանդերձ՝ մեզ հավա-
սար ես ցույց տալիս դու քեզ.

Եվ դու, որ ունես ամեն ինչ առատ՝ մեր ունեցա-
ծին արժեք ես տալիս.

Քո պարգևների փոխարեն անճառ՝ մերն իբրև
վճար ես ընդունում դու.

Երկրայինի տեղ անվախճանի տալն ես արժանի
գտնում.

Մեծ համարելով մերը՝ վեհորեն գոհանում ես
դու.

Զե՛ս մեծամտի, երբ քո տվածի փոխարեն
դույզն-ինչ փառավորվես²:

Նո՛ւյն գթությունդ ցույց տուր նաև ինձ՝ հույժ
մեղապարտիս,

Որ երբ թվարկեմ քո պարգևների երախտիքը ես՝
Նույն չափով սիրելդ էլ չմոռանամ:

Ամեն բանի մեջ քեզ փա՛ռք հավիտյան. ամեն:

¹ Դուկ. Է. 41

² Հմնտ. Դուկ. Է. 47



Բան ԺԷ

Սրբի խորժերից խոսդ Սարգս-ծո Հետ

Ա

Արդ, ես ծնունդս մեղքի և մահացու երկունքի
որդիս,

Արդարև պարտավոր եմ մի օրվա մեջ բյուր
քանքարների տույժը հատուցել:

Սակայն ոչ թե մարդկային մտքի փոքրության
համեմատ եմ ես ներումն հայցում,

Այլ փրկչիդ՝ Հիսուս Քրիստոսի աննվազելի
լիության չափով եմ պաղատում մարդա-
սիրություն:

Զկայի երբեմն, և ստեղծեցիր,

Ես չաղաչեցի, և դու գոյացրիր,

Դեռ աշխարհ չեկած՝ տեսար դու ինձ,

Զէի հայտնվել, և դու գթացիր,

Զէի խնդրել ես՝ խնամարկեցիր,

Զէի բարձրացրել ձեռքս՝ նայեցիր,

Զէի պաղատել՝ և ողորմեցիր,

Զէի ձայն հանել, և դու լսեցիր,

Զէի հառաչել՝ և ունկնդրեցիր,

Գիտեիր, թե ինչ կպատահի ինձ, և չանտեսեցիր,

Նախատես աչքով քո նկատեցիր չարագործու-

թյունը պատժապարտիս և հորինեցիր ինձ:

Եվ արդ, ես, որ քո ստեղծածն եմ, քեզանով
փրկված

Եվ այնքան խնամուտ սիրովդ հոգացված,—
Արա՛ դու այնպես, որ չարահնար մեղքերի հար-
վածն ինձ դեպի կորուստ չտանի իսպառ:
Թող համառության մառախուղը իմ՝ քո ներո-
ղության լույսին չհաղթի,
Եվ ոչ էլ սրտիս կարծրությունը՝ քո երկայնա-
միտ համբերությանը,
Եվ կամ մսեղեն այս մահկանացուն՝ քո լրու-
թյանն ամենակատար,
Ոչ էլ նյութեղեն տկարությունս իմ՝ քո բարձ-
րությանն անպարտելի:

Բ

Ահա՛, կարկամած բազուկն իմ հոգու կարկա-
ռում եմ ես քո անվամբ, հզո՛ր,

Արա՛ այն առողջ, ինչպես էր առաջ,

Երբ դրախտի փափկության մեջ կենաց պտուղն
էի քաղում ես:

Ախտավոր կնոջ նման կաշկանդված, գոսացած
ձեռքով,

Գլխիկոր, շվար և անուղղելի մեղքերով կքած
թշվառ իմ հոգին

Սատանայական ամուր կապանքով ակնկոր,
ահա՛,

Զի նայում վերև, որ քո երկնայնոց ողջույնը
չառնե:

Խոնարհվիր վրաս, միայն ողորմած, և բարձրաց-
 րու ինձ
 Գետնահար ընկած ծառիս բանավոր.
 Բարեվայելուչ կյանքով վերստին ծաղկեցրու
 չորացյալիս,
 Հստ աստվածաբանության սուրբ մարդարեի¹:
 Ինչպես ի ծնե լուսագուրկ մի կույր՝ չունեմ տե-
 սողություն,
 Որ կարողանամ տեսնել Արարչիդ դեմքն ու
 պաղատեմ,
 Հզո՛ր բարեկութ, դու միայն պաշտպան,
 Քո անճառ սիրո հոգածու, ակնարկն ինձ
 դարձընելով՝
 Շնչավոր, խոսուն քո անոթի մեջ անէությունից
 լո՛ւյս գոյացրու դու:
 Տասներկու տարվա ախտով տառապած, տան-
 ջահար, տիսուր
 Կնոջ նման ես մեղքի արյան մեջ ողողվում եմ,
 տե՛ս.
 Անմատույց լույսով քո պարածածկված՝ նայիր
 բարձունքից,
 Ուր չկա քղանցք ձեռագործ վերարկուի, որին
 ես դիպչեմ²,
 Բայց ամենուրեք տարածված են քո հրաշքներն
 հզոր:

¹ Եզեկ. ժԵ. 24

² Դները մի ժամանակ երկինքը նմանեցրել են մի մեծ վարագույրի, վրանի և նույնիսկ պատմուժանի կամ վերարկուի:

Մեղսոս կնոջ պես պատժապարտս ես¹
Օծման յուղով չէ, որ մոտենում եմ կենսաձիր
ոտքիդ,
Կաթիլներն աչքիս գլխիս վարսերով բերելով
ընծա,
Այլ հավատս անբիծ՝ իմ բազուկների վերամ-
բարձումով, ստույգ դավանմամբ,
Հոգու ողջույնով և փակ շուրթերով երկրպա-
գելով:
Եվ աղբերահոս արցունքներիս հետ խառնելով
նաև հեծեծանք, ահա՝
Բժշկություն եմ աղերսում հոգուս:
Գոյությունն հոգուս՝ մեղկությամբ լուծված և
քայլքայված է մեղքերով համակ,
Եվ մարմնիս շինվածքը իրենց վրա վերցնող ոտ-
քերս,
Որոնք քայլում են կաղալով տիսեղծ ու խիստ
անհաստատ,
Եվ որոնց չարը արգելք է լինում մտնելու ու-
ղիղ—
Դեպի կենսաթիռ պտղաբեր ծառը տանող ճամ-
փի մեջ,—
Զորացրո՛ւ դարձյալ, ո՛վ ամենազոր, քանզի
դո՛ւ միայն կարող ես փրկել:
Քո ստեղծած լեզուս, որով քեզ էի փառաբա-
նում միշտ,

¹ Յովի. ԺԲ. 3

Ամրափակ խցմամբ կապեց, համրացրեց հողմը
 բանսարկուի:
 Զգայուն հոգուդ մեծ ողորմությամբ,
 ինչպես բուժեցիր Ավետարանում հիշատակվա-
 ծին¹,
 Հրաշափառորեն շնորհիր և ի՞նձ Բանդ կեն-
 դանի,
 Որպեսզի ես էլ խոսեմ անսայթաք:
 Ախտով վարակված՝ մեղքի մահիճն եմ ընկել ես,
 ինչպես կենդանի մեռյալ.
 Ի լուր ողբագին հեծեծանքներիս և թշվառու-
 թյանն իմ կարեկցելով,
 Ո՛վ դու բարերար Որդի Աստուծո,
 Քո օրհնաբանված աչքերի ցողով ինձ ոտքի՝
 հանիր կրկին կենդանի,
 ինչպես սիրելուդ՝ անշարժ ու անշունչ մեռելու-
 թյունից²:
 Ստույգ անօրեն եմ տարակուայալ՝ մեղքի գուբն
 ընկած.
 Զեռքըդ ինձ տալով, արև՝ անստվեր, Որդիդ
 բարձրյալի,
 Քո ճաճանչափայլ լույսի՞ն հանիր ինձ:
 Ինչպես աղեխարչ թշվառ ճիչերով, մատների
 տխուր տատանումներով
 Կուրծքը ծեծելով, արցունք թափելով, տխրա-
 մած դեմքի տվայտանքներով

¹ Մարկ. Է. 33-34

² Ղազարոսին

իր միամորիկ որդուն ողբացող Նայինի այրին¹,—
ես էլ սրտագին, սաստիկ հեծությամբ պաղա-
տում եմ քեզ,

Տո՛ւր հուսահատիս քաջալերություն քո մխի-
թարիչ և գլխոտ խոսքով,

Ասելով և ինձ, ո՞վ բարեբանյալ ստեղծիչ
աշխարհի,

Թե՝ «Մի՛ լար՝ այդպես սաստիկ ողբալի».

Որպեսզի կրկին կենդանացած այն պատանու
հետ,

Որ սփոփեց վիշտն իրեն ծնող մոր,

ես էլ քեզանով իմ ամենապարտ հոգին ընդու-
նեմ վերանորոգված:

Այսահարությամբ անզգայացած, դիվալուկ ու
քարակոշկոճ,

Հեղձամղձուկ ու եղկելի, քստմնելի, գիսախոիկ
մազերով,

Վայրենադեմ ու ցնորամիտ մարդկանց հետ,
որոնց դու ողորմեցիր²,

ես էլ նրանց պես քեզ պիտի դիմեմ, ամենա-
փրկի՛չ:

Հեռու դու վանիր ապականարար գնդերը չարի
մարմնիս խորանից,

Որպեսզի հասնի հոգին քո բարի և հանգստանա
այնտեղ վերստին,

¹ Ղուկ. Ե. 11

² Մարկ. Ե. 2

Եվ մաքուր՝ շնչով լցնելով մարմինս ու անդամ-
ներս՝
Զգաստացնես ինձ՝ խելագարվածիս ամենա-
թշվառ։
Դժոխաբնակ և վտարանդի հոգիների հետ
գերված՝ նաև ես
Արգելափակված տառապում եմ խիստ։
Փառահեղ ճառագայթը քո ողորմության, լույսդ
իմ անձկալի,
Ծագելով վրաս՝ ինձ պառակտիչի կապերից
փրկիր։
Վհատ կերպարանք է առել հոգիս,
Որ գաղտնորոգայթ և աներեռույթ արահետնե-
րում մոլորաթափառ՝
Գարշ իմ մեղքերով է հիվանդացած։
Իմ՝ չարագործի թույնից գոյացած այտուցքներն
անտես,
Որդի՝ Աստուծոն,
Քեզ միայն հատուկ քո կարողությամբ առող-
ջացրու դու գթասիրաբար։
Զանազանակերպ և բազմատեսակ ախտերն մա-
հացու,
Որոնցից ամեն մեկն իր առանձին արդյունքն
ունի,
Եվ որ ժանտարմատ շառավիղներով հաստատ-
ված են մեր անօրեն մարմնի մեղկ անդաս-
տանում,

Ամենակալի քո ձեռքով թող որ կորզե՛ս արմա-
տից,
Դու, որ արորով՝ մեր հոգիների դաշտերն անո-
պա մշակում ես միշտ,
Որպեսզի կենաց քո խոսքը հավետ արդյունա-
վորվի:

Գ

Եվ քանզի ճարակող քաղցկեղի նման
Հանցանքներիս վերքն այս իմ բերած օրինակնե-
րը գերազանցեց,
Եվ ախտն ամբողջովին անդամներիս մեջ տա-
րածվեց,—
Զիք սպեղանի, ինչպես իսրայելին, որ դրվի ան-
չափ իմ խարանների վրա,
Ազդրերիս խարսխից մինչև ծայրն իմ անդամ-
ների կառուցվածքի¹
Զի մնացել մի տեղ լիովին առողջ և բժշկելի:
Իսկ դու, ողորմա՛ծ, բարերար, օրհնյալ և երկայ-
նամիտ թագավոր անմահ,
Լսիր վշտահար սրտիս խղճալի պաղատանք-
ներն այս,
Որ դառնահառաչ քեզ եմ ուղերձում իմ նեղու-
թյան մեջ,
Տե՛ր ամենակալ:

¹ Այսինքն՝ ոտքից մինչև գլուխ:



Բան ԺԹ-

Արդի խորհերից խոսէ՛ Ըստու-ծո Հեր

Ա

Ով դու, բարի կյանքի հուսատու ամենահայաց
տեսողություն,

Ուշք դիր ցավագնած հոգուս հեծեծանքների
բարձրածայն աղաղակին,

Անհա՛ս մեծություն, անուն ահավոր, բարբառ
կենդանի,

Լուր ցանկալի, ճաշակ ախորժելի, կոչումն պաշ-
տելի,

Բարություն խոստովանելի, ազդումն խնկելի,
Դավանելի իսկություն, էություն փառատրելի,
գոյություն օրհնաբանելի,

Ո՞վ դու Տեր Հիսուս, Հորդ հետ գովված ու
երկրպագված

Եվ Սուրբ Հոգուդ հետ բարձրացած ու հոչակ-
ված,

Որ մարմնացար մեզ պես ու մեզ համար,
Որպեսզի մեզ էլ անես քեզ համար ու քեզ նման,
Լույս ամենայնի, համակ ողորմած, հզոր երկնա-
յին:

Եվ այժմ քայքայված ու խորտակված անոթն իմ
հողեղեն

Աստվածորեն հրաշակերտելով, աղաչում եմ,
գթա՛ծ, նորոգիր նորեն:

Մեղքերով հնացած պատկերն իմ՝ քո ինձ տված,
Հալելով կրկին քուրաների մեջ խոսքիդ կայծա-
կով՝

Պաղատում եմ քեզ, ձուլի՛ր վերստին:

Հոգիս պահպանող մարմնիս խորանի շինվածքը
խախտված՝ հանգստարանը քո,

Աղաչում եմ, ո՛վ բարերար, մաքրագործիր քեզ
ի բնակություն:

Իմ չար գործերի փոխարեն մի՛ հատուցիր նույ-
նը դու ինձ:

Արբած եմ ես, բայց ոչ թե գինով, ինչպես մար-
գարեն է ասում¹.

Թափիր հրամանով քո ազատարար, ամենակե-
ցո՛ւյց,

Մահվան բաժակիս թմրեցնող մրուրն անօրենու-
թյան,

Որ բաժակդ ես չքամեմ վերջին օրը հատուց-
ման²:

Բ

Արդար ես դու իրավունքիդ մեջ և հաղթող՝ քո
դատաստանում.

Թե մատնես մահվան՝ ճշմարիտն արած կլինես.

¹ Եսայի Իթ. 9

² Երեմ. ԻԵ. 15-16

Թե դատապարտես, այստեղից սկսելով կշտամբություննդ տանջողական՝ հատուցում է ճիշտ.

Թե անդունդների խորքերը սուզես,

Թե կենդանության շարժումները դադարեցնես,

Թե զորությունն իմ խոսքի ունայնացնես,

Թե պատուհաններն աչքերիս ստվերացնես,

Թե կյանքի ճաշակն ինձնից հետ առնես,

Թե ընդհանրական կերակրից ինձ զրկես,

Թե օրերիս երկարությունը կարճացնես,

Թե իջնող քաղցր ցողի հետ մեկտեղ վերից հուրթափես,

Թե խոսքդ լսելուց ինձ քաղցած թողնես,

Թե ականջներիս դռները խցես,

Թե շնորհիդ պատկերն ինձանից կտրես,

Թե ոտքիս տակի հողը սարսես,

Թե ինձ անձկալի քո լույսից հանես,

Թե այս աշխարհից ինձ բոլորովին դու դուրս վտարես,

Թե հրաբորքոք փայլատակումով ինձ ահաբեկես,

Թե ինձ չարչարող դեերին մատնես,

Թե ցասման հողմով ինձ հեռու քշես,

Եվ թե ուրիշ նոր չարչարանքների գործիքներ կազմես –

Տարտարոսից վատ և գեհենից էլ ավելի սաստիկ,

Ավելի թունոտ, քան թե որդերը, և քան խավա-
րը տարակուսելի
եվ երկյուղալի՝ խորխորատից էլ, և ողորմելի՝
մերկությունը քան,—
ես ինքս անձամբ վկայում եմ, թե արժանի եմ
խիստ այդ բոլորին:

Գ

Եվ քանզի մեղքերս նման են իրար,
Ուրեմն և նրանց հատուցումներն էլ պետք է որ
նման լինեն իրարու,
իբրև միմյանց պատկերակից, միատեսակ և զու-
գակշիռ,
Այս հասկացողության կրողներն են,
Ուստի կարեոր է խոստովանել և քողը վերցնել
նրանց երեսի,
Որպեսզի տեսնի փնտրողը նրան և ծանոթանա,
Քանի որ ջերմ սիրով չմոտեցա ես ընկերոջս կա-
րիքներին,
Իրավացի է, որ առաջին իսկ վտանգի պահին
սառեմ տագնապած:
Եվ որովհետեւ ես չսանձեցի ցանկություններս
ապերասան,
Ուստի եղկելուս արժանի է, որ կրում եմ կի-
զումն անզովանալի:
Եվ քանի որ ես չսիրեցի ավետիսը լույսիդ՝
Արդար է, որ ես կորստյան մեգի թանձը խավա-
րում խարխափեմ մոլորագնաց:

Եվ քանզի խտրություն չդրի մանր ու մունք
 հանցանքների միջև, համարելով նրանք
 անվնասակար,
 Զազիր գեռունների խայթումներից խոցոտվում
 եմ արդ արժանապես:
 Եվ քանի որ ես ձեռք չերկարեցի վտանգի մեջ
 վշտակըին օգնելու,
 Տեղին է, որ դարձ ապականության գուբին
 մատնվեմ:

Դ

Եվ արդ, ո՛չ աստվածային քո դանձերից՝ չարիք,
 Ո՛չ քո լույսի շողերից՝ խավար,
 Եվ ոչ էլ քեզ ապավինելուց սայթաքումներ
 առաջ կգան,
 Այլ ես ինքս՝ կորստյան որդիս գտա այս բոլորը:
 Բազում անօրեն մեղքերս են, որոնք նյութեցին
 այսքան բարկություն:
 Մոլորեցուցիչ իշխանի կամքին հնազանդելով՝
 նրան թողի ես քո տեղն իսկական,
 Հստ Գրքի հանդիմանության¹:
 Եվ քանզի հայտնի դարձավ մարմնիս անդամ-
 ների գաղտնիքն ու խայտառակությունը,
 Եվ երեսիս ընկավ անվայելուչ ստվերն ամոթան-
 քիս, ըստ մարգարեի առակի²,

¹ Ժողով. Ժ. 4

² Նավ. Գ. 5-6

Ինձ բոլորովին տգեղացնելով՝ մերկ, խայտառակված պոռնիկի նման,—
 Ծագիր իմ մեջ լույսը քավության, երկնավո՛ր
 արքա,
 Որպեսզի թոթափելով մեղքերիս փոշին,
 Ավետյաց ձայնը լսած, Բաբելոնից ետ դարձող-
 ների պես¹,
 Հողից վեր կենալով՝ վերստին նստեմ,
 Եվ անսասան՝ հույսիդ ամրությանը հիմնվելով,
 Ինչպես Եսային է ասել,
 Նախնի մաքրությամբ հագնեմ քո բազկի զորու-
 թյունը կարող,
 Քո քաղցր փառքի մեծության համար և աստ-
 վածությանդ ամենապարզեւ,
 Օրհնյա՛լ հավիտյանս. ամեն:



¹ Եսայի ԾԲ. 2



Բան Ի Սրբի խորժերից խոսչ Ըստու-ծու Հեղ

Ա

Տե՛ր անոխակալ և երկայնամիտ, ներող, բարեգութ, հզոր, ողորմած,
Ահա՛ ճշմարիտ են քո գործերը և դատաստան-
ներդ խոստովանված,
Եվ որոշումներդ վկայված են, ո՛վ ծածկություն-
ների տեսանո՞ղ:
Երեք երջանկահիշատակ երիտասարդների հետ,
Որոնք կիզանուտ բոցով փորձվեցին ու չվնաս-
վեցին Բաբելոնի մեջ,
Նրանց թախծալի ե՛րգն եմ հառաչում.—
«Ես մեղանչեցի և անօրեն դարձա,
Ապստամբվեցի և պատվերներին քո չանսացի»:
Մաքուր լինելով հանդերձ՝ այսպես գոչեցին
նրանք խոստովանաբար,
Իսկ ես, որ իսպառ մահապարտ եմ մի,
Զայնակցելով նրանց այդ ողբերին,
Այս ողբերգությանս դեռ ուրիշնե՛ր էլ պիտի
ավելացնեմ ես՝ ամեն բանով մահապարտս,
Դանիելի հետ՝ երանելի և սուրբ մարգարեի,

Որը հարազատ ազգական էր քեզ և Հուդայի
տան ընտիր շառավիր,
Նրա հաճելի և նվիրական պաղատանքների
խոսքերն առնելով՝¹
իմ պատժապարտի հեծեծանքներով դեռ ուրիշ-
նե՛ր էլ պիտի կրկնեմ ես:
Գիտակցելով մեկտեղ՝ անպատշաճ ընթացք ու-
նեցա,
Զարտուղելով շարունակ և դժնդակորեն սխալ-
վելով.
Եվ այսպես՝ մեղանչեցի ես ամեն բանի մեջ,
ամեն եղանակով:
Կամքիդ որոշակի սահմանից ես ի դուրս սլացա,
Որ և իսկական օրինակ է մի անմաքուր անօրե-
նության:
Անչափելի չարիքներն հաճախակի կրկնելով՝
իրենց լրումին հասցրի,
Ինչ որ ճշգրիտ մի պատկեր է հանցավորության:
Սպառնացիր՝ չզարհուրեցի, խրատեցիր ինձ, և
չանսացի,
Որ հայտնի նշան է ըմբոստության:
Արդարություն հարդարեցիր քեզ, ո՞վ բարե-
րար,
Եվ ինձ՝ պատրաստեցիր ամոթ ու պատկառանք:
Քեզ՝ փառք վայելչական և ինձ՝ նախատինք
հարմարավոր.

¹ Դան. Թ. 4-19

Քեզ՝ քաղցր հիշատակ և ինձ՝ մաղձ քացախյալ
վերջում.

Քեզ՝ անլոելի բարեբանություն և ինձ՝ ողբ ու
կոծ.

Քեզ՝ օրհներգություն խնկելի և ինձ՝ մերժումն
ի բաց.

Քեզ՝ իրավունք բազմարժան և ինձ՝ ամենավա-
րան պատասխանատվություն.

Քեզ՝ փառք անճառ գովեստներով և ինձ՝ մոխիր
լիզելու անարգական պատիժ:

Բ

Արդ, ընդունեցիր դու, ո՞վ անկշիռ սահման ըն-
տիր բարությանց,

Քոյիններից վեր առար կնդրուկներ ախորժա-
նուշ՝ քեզ համապատասխան,

Իսկ ես ստացա այստեղ բազում պարսավանքներ
սրանց դիմաց՝ կրկնակի բարդությամբ:

Եթե անբիծներն հանձն էին առնում այսպես
աղոթել,

Իսկ ես պարսավի ինչպիսի՛ տողեր հյուսեմ ինձ
համար,

Երբ քան բոլոր դժնաբարոներն առավել վրիպե-
ցի:

Անառակ ընթացքովն իմ ես մոլորվեցի որպես
վայրենամիտ,

Եվ հանդգնեցի իմ շրթունքներով երկրավոր
խոսքեր բարբառել:

Մոլի դարձա անկասելի կերպով ամոթալի գործերի մեջ,

Փքվեցի և վերացա ես, որ փոքրինչ ժամանակից հետո մահվան հողն եմ իջնելու.

Գոռողացա և բարձրամտեցի ես, որ տերն իսկ չեմ հոգուս դրավական եղող շնչառությանը:

Ամբարտավանացա՝ փոշիս շնչավոր,

Ամբարհավաճեցի կավս ձայնավոր,

Հպարտացա հողս անգոսնելի,

Դեպի վեր ելա մոխիրս մերժելի,

Բազուկ բարձրացրի՝ բաժակս փշրելի:

Տարածվեցի առավել, քան իբր վեհ,

Եվ իբրև հետ մղված՝ դարձյալ ինքս իմ մեջ ամփոփվեցի:

Բարկության բոցով ցոլացա՝ տիղմս բանավոր:

Իբրև անմեռ մի՝ մեծամտեցի, ես, որ չորքոտանիների հետ մահից եմ կառչած:

Այս կյանքի սիրույն բացի գիրկս ես և դեմքիս փոխարեն քեզ թիկունք դարձրի.

Մտքիս թևերով մութ խորհուրդների միջից սլացա.

Անարատ հոգիս մարմնիս փափկությամբ հավետ հյուծեցի.

Զորությունն իմ աջ կողմի տկարացրի,

Իսկ ձախակողմիս ուժգնություն տալով՝ հաղթեցի նրան¹:

¹ Զախը իբրև բացասական կողմ չարամետ ուղղության նշանակ:

Հոգածությունդ իսկ տեսա ինձ համար,— որն
այստեղ գրել անկարող եմ ես, ու չպատ-
կառեցի¹.

Վայրի հավքի պես սլացա դեպի սովորությունն
իմ վաղեմի,

Ինչպես Ովսեեն Եփրեմի վերաբերյալ է ասել²:
Աղոթավայրում ես այս կենցաղի զբաղումնե-
րով շրջանակվեցի.

Մտքիս երիվարը բանականության երասանա-
կով ոտքի չհանեցի:

Հին չարությունների վրա ես ինքս նորերն
ստեղծեցի,

Եվ, ինչպես Հոբն է ասում, անտանելի ծանր
անուրներն ինձ վրա ես ինքս ծանրացրի:

Ինքս ինձ սփածանելի արի անկարկատելի, ըստ
երեմիայի.

Եվ առակողի խոսքի համաձայն,

Անունն անգրելի մի վիժվածի պես՝ մարդահա-
մարից ջնջվեցի,

Եվ ըստ Եսայու՝ դաշտանավորի գգեստի նման
զազրելի դարձա:

Որպես թրծված խեցեղեն աման՝ աննորդելի կեր-
պով փշրվեցի:

Եղովմին ուղղած մարդարեական մեղադրանք-
ների համաձայն, ե՛ս էլ

¹ Յավանաբար ակնարկում է իր տեսիքի մեջ Յիսուսին տեսնելը, որի հաճար մանրամասնություններ տալը հոգևոր անհա-
մեստություն է նկատում:

² Ովսեեն Է. 11

**Անօրենության սատակիչ չորրորդ չափն իմ ինձ
պատրաստեցի¹:**

**Եվ սո՞ւտ կլինի, որ ավելացնեմ ես այդ բոլորին,
թե Մողոքի դիվանվեր վրանն անգամ առա ես²
դժոխքը ժառանգելու համար:**

**Երկնայինը լքած՝ ես ինքս էլ ձևակերպեցի խայ-
տառակ պատկերն Ուեփանի աստղի,
Որն իսրայելից պաշտվեց Սինայում³:**

Գ

**Եվ արդ, քանզի զրկվեցի ես նախկին շնորհի
համարձակությունից,**

Ելա նրանից, հեռացա դարձյալ և բաժանվեցի,

Եվ անպատվաստելի կերպով կտրվեցի,—

**Հնդունի՛ր ինձ, Տեր, հոգուդ պատկերով կեր-
պարանելով ինձ կրկին անգամ,**

**Ինձ, որ անարժան եմ ապրելու իբրև մահա-
պարտ և չարագործ,**

**Իբրև ամոթահար ու ոտքի կոխան եղած բան-
սարկուի կողմից,**

Որպես անբժշկելի մանրված,

Որպես մահվան հատակը հասած,

Որպես դարշելի դարձած,

Որպես կոչումիդ խոտան համարված,


Որպես միանգամայն կորստյան մատնված,

¹ Ամովս Ա. 11-13

² Ամովս Ե. 26

³ Ամովս Ե. 25-26, Եղեկ. Ի. 7-8

Որպես դեգերյալ, որպես վտարված,
Որպես տարակուսյալ, որպես թշվառացած,
Որպես վհատյալ, որպես կործանված,
Որպես խորտակված, որպես կոտրված,
Որպես թախծոտված, որպես խիստ տրտմած,
Որպես թշնամանված:
Իսկ նայելով վրաս, գթա՛ծ, մարդասեր, հզոր,
Ինչպես նաև աղերսական այս խոսքերիս՝
Ընդունիր ինձ դարձյալ որպես զղջացած, որ-
պես խոստովանված,
Որպես ոտքիդ դիմած, որպես ապաշխարած:
Դու, որ կշռում ես, չափում ու համարում մեծ՝
Հառաչանքն հոգու, ձայնն հեծող շնչի,
Կսկիծը շուրթերի, ցամաքելը լեզվի, տիրու-
թյունը դեմքի,
Կամքը խորհուրդների և հոժարությունը սրտի
խորքերից.
Դու, որ փրկությունն ես հոգիների
Եվ տեսնում ես չգործվածները,
Ստեղծիչն ես բոլորի և աներեւոյթ վերքերի
բժիշկ,
Պաշտպանն ես քեզ հուսացողների
Եվ բարեխնամ Տեր ամենեցուն՝
Ամեն բանի մեջ քեզ փա՛ռք
Հավիտյան. ամեն:



Եվ քանի որ ինքս ինձ անձամբ մատնեցի մահ-
վան իմ ինքնագրությամբ,
Ու չկանգնեցի երբեք ինչպես մարդ՝ ոտքի,
Ոչ էլ ստացա սիրտ բանականի, Գրքի համա-
ձայն¹,
Զթողի նախկին մեղանչումներն իմ ու չփոխ-
վեցի,
Զընթացա ուղիղ ճանապարհով ես,—
Ինչո՞ւ խավարի հետքերը խոտոր ցույց չտամ
ես այս խոսքիս սկզբում:
Ուստի նախընթաց խոսքերի իմաստն ու ձևն
անփոփոխ պահելով, այստեղ,
Հստ այդմ պիտի ես խոստովանեմ
Մնացած բոլոր չարություններս՝ հաջորդ տողե-
րով:

Բ

Արժանապատիժ ժանտագործս օտար՝
Գունդը Բելիարի աճեցրի անսաստ իմ ընթաց-
քով:
Ճարպիկ, խաբեքա և գարշորեն պարող դեերի
համար

¹ Դան. Է. 4

Կաքավումներ, կայթեր, ցույցեր ու վազքեր
պատրաստեցի ես իմ ծուլությամբ,
եվ ընդունեցի դահիճներից այդ կործանված՝
Հարվածներ գաղտնի և խոցեր անհայտ:
Քրիստոսի խաչով չհալածեցի ես այդ վտար-
վածներին,
Այլ առավել ևս գորացրի նրանց:
Հեգ ողորմելուս անօրենության հետևանքով
ՀայՀոյվում է Հիսուսիդ անունն այսականների
մեջ¹,
Ինչպես մի ժամանակ հեթանոսների մեջ՝ իսրա-
յելի պատճառով:
Ես ինքս իմ ձեռքով տնկեցի իմ մեջ
Ապականարար և վնասակար բազում պատու-
հասներ՝
Հոգուս ծաղիկն ուտող և սպառող ժանդն ու
թրթուրը և այլ ուտիչներ,
Որոնց սուրբ Հովելն է նկարագրում իսրայելա-
ցոց երկրի համար
Իբրև օրինակ ավագակների և չար ոգիների՝ իր
հրաշակերտ ողբերգության մեջ:
Սատակեցնելու փոխարեն՝ իմ մեջ ինքս ստեղ-
ծեցի, աճեցրի նրանց,
Եվ իմ անձի դեմ հավաքեցի բյուր մահազեն
մարտիկներ.
Շուրջս անպատկառ և անիրավ կշտամբիչներ
գոյացրի.

¹ Եսայի ԾԲ. 5

Զինեցի իմ դեմ անզգամ և անպարտելի հակառակորդներ.

Քաղցրի փոխարեն դառնությունն առա ինձ իբրև բաժին՝

Ես՝ Արարչի դեմ նենդավորս միշտ և բանսարկուի հանդեպ՝ հավատարիմ:

Ավաղ աղետիս, վիշտ ու վտանգիս, մթին ամոթիս և անարգանքիս.

Ես ինչպես հիմա պիտի հանդգնեմ խոսքերս հայտնապես հրապարակել:

Մեծ է գուման ձայնս ու բարձրադադակ բողքն իմ ահա՛ հույժ անտանելի:

Քանզի եթե հնար լիներ հոգիս տեսնել,

Պիտի երեար, թե որքա՛ն տգեղ է նա, տկար և ազագուն,

Հեծեծագին ցավերով մատնված ծայրաստիճան վարանումի,

Եվ մրոտված, աղտոտ գույնով զազրելի, ինչպես մեհյանի պաշտոնատար,

Զի միւնույնն է, թե՝ սպասարկել կուռքին ձուլածու և կամ ծառայել մեղքերի ախտին:

Արդ, ես քայլեցի կորստյան այս խավարահետ ճանապարհով

Եվ ցանկալի բաժինը դարձրի անկոխ անապատ, ինչպես մեղադրում է մարգարեն իսրայելի քահանաներին¹:

¹ Երեմ. ԺԲ. 10

Գ

Եվ ես, որ տմարդների կարգն եմ դասված՝ ինչ-
պե՞ս համարեմ ինձ մարդ.
Ինչպե՞ս անվանվեմ բանական, երբ կցորդվել
եմ հիմար անբաններին,
Ինչպե՞ս կարող եմ կոչվել տեսանող, երբ խա-
վարել եմ ներքին լույսս ես,
Ինչպե՞ս համբավվեմ ես իմացական,
Երբ իմացությանս դռներն են փակվել,
Կամ ինչո՞վ ցույց տամ ինքս ինձ որպես պատ-
կեր Աստուծո անեղծ և անմահ, երբ անձ-
նասպան եմ եղել հոգեպես.
Եվ ոչ իսկ շարժուն և կամ չնչավոր կարող եմ
կոչվել, թո՛ղ թե հոգեոր և իմացական:
Անոթների մեջ անպիտան եմ ես և անարգա-
գույնը՝ որմնաքարերի մեջ,
Արհամարհված եմ կանչվածների մեջ և վատ-
թարը՝ հրավիրվածների խմբում,
Ահաբեկված մահվան արհավիրքով և բոլորից
լքված անխրախույս:
Երուսաղեմի ցավերով ու տանջանքներով եմ ես
պատժված, ըստ Երեմիայի խոսքի¹.
Պակասել են օրերս հեծությամբ և տարիներիս
ընթացքը՝ հառաջանքներով,
Ըստ սաղմոսողի նվագերգության²:
Ինչպես ասվին ցեցից և փայտը որդից՝

¹ Երեմ. Զ. 7

² Երեմ. Լ. 11

Այդպես նաև ես սրտիս խիթերից հալվեցի իսպառ ըստ իմաստունի:

Ու սաղմոսողի խոսքի համաձայն սարդոստայնի պես մաշվեցի ահա և դարձա անպետ.

Առավոտյան ամպի և վաղորդյան ցողի պես ցնդեցի ես, մարդարեռթյան խոսքի համաձայն:

Բայց ես իմ հույսը մարդու վրա չեմ դրել,
Որ տեսանողի ակնարկած անեծքն վրաս առնելով վհատվեմ անհուսորեն,

Այլ քեզ վրա, Տե՛ր իմ ոգեսեր,
Որ լցված անբավ բարեգթությամբ
Նույնիսկ խաչի վրա բեեռված պահին՝

Մեծ ողորմությամբ աղոթեցիր դու առ Հայրդ
բարձրյալ՝ քեզ չարչարողների համար:

Արդ, չնորհի՛ր ինձ դու քավության հույս,
կյա՛նք և ապավեն,
Որպեսզի թշվառ շունչս երբ փչեմ՝ ստանամ Հոգին քո բարի:

Եվ քեզ քո Հոր հետ ու քո Սուրբ Հոգուն՝
Զորություն, հաղթություն,
մեծություն և փառք,
Հավիտյանս. ամեն:

Բան ԻԲ

Սրբի խորչերից խոսչ Առաքո-ծո Հեղ

Ա

Նախատված անձիս կշտամբանքների շարքը
նույն ձևով ու պատկերներով
Պիտի կրկնեմ ես այստեղ վերստին նոր-նոր
բարդությամբ.

Կոկծեցուցիչ դառն այս խոսքերիս դատակնիքը
հանդիմանական
Ամենագետը թերևս համարի ճիշտ խոստովա-
նանք

Իմ բոլոր գաղտնի և չար գործերի:

Բ

Խոսուն մի ձի եմ ես, կարծրերախ, սանձակոտոր
և ապերասան,
Հովանակ անհամբույր, վայրենի և անկրթական,
Երինջ խրտչող, անուղղա և անվարժական¹,
Մարդ մոլեգին, տարագրված և կորստական,

¹ Ակնարկում է տապանակի սայլը քաշող երինջներին, որոնք իրենց հորթերից զատված լինելու համար թեև դժկանում էին, սակայն և այնպես իրենց ճամփից չէին խոտորում. մինչդեռ ինքը իր հոգուր պարտականության լջի տակ մնում է անուղղա և անընտել:

Մանուկ մեղավոր, անխրատ և թափառական,
Տնտես մահապարտ, տարտամ և անգործնական,
Բանական անասնաբարո, դազանացյալ և
անմաքրական,
Զիթենի լքված, անպտուղ և կործանական,
Մարմին՝ հոգիս տրտմեցնող, դատող ու տանջո-
ղական,
Խոցված եմ անբուժելի, անխնամ և անկանգնա-
կան,
Վատնված և անգտնելի ոսկի շարոց եմ կայսե-
րական,
Ծառա եմ սխալական, փախստական և թշվա-
ռական:

Գ

Եվ այսպես, ահա, ես ինքս իմ դեմ եղա կամովին
անձնամատ սաստիկ և մարմնակործան,
Հոգեկորույս և միշտ մտախար,
Կամակոր իսկական և սրտաբեկ,
Ուշագնաց և խելակորույս,
Զգայազուրկ և իմաստասպառ,
Հայրատես և եղեռնալուր:
Ես ամեն կողմից բռնված ամբողջովին մահաբեր
երկունքի բորբոքումներով՝
Մի լավ բանի մեջ, Տեր իմ, ոչ մի կերպ քեզ պի-
տանի չեմ:
Ողբում եմ ես այն որովայնը, որ ինձ երկնել է,
Ողբում ստինքներն այն, որ սնել են ինձ:

Ինչո՞ւ կաթի հետ մակարդված ես մաղձ չծծեցի,
Եվ ինչո՞ւ քաղցրության փոխարեն չտրվեց ինձ
դառնություն:

Զի եթե ես իմ խոսքերով այսքան ինքս իմ դեմ
եղա անձնադատ դատախազ դժնի,

Եվ իմ բարկության սուրն է տակավին անխո-
նարհելի,

Ո՞ր երկրածինն ինձ կկարողանա ողոքել այլեւ:
Ամեն ինչ պիտի հրապարակեմ,

Եռությունս համակ ես պիտի դատեմ ու դատա-
պարտեմ,

Ողջ վնասակար գնդերը պիտի ես գանակոծեմ,
ես ինձ խոցոտող զինվորների դեմ պիտի բողո-
քեմ

Եվ իմ գլխավոր զգայարանքներս պիտի կշտամ-
բեմ:

Ամեն բանի մեջ և ամեն ձեռվ ես մեղանչեցի,
ողորմի՛ր, գթա՛ծ:

Նոր չէ, որ գտար հանցապարտության մառա-
խուղն իմ մեջ,

Այլ նույնն եմ հավետ, միշտ նույն արատով
հանցապարտության

Անկարկատելի ձորձով սխալված՝ անփոխելի
քո առջևն եմ ես,

Եվ ինքդ միայն իսկապես գթած, օրհնյալ, մար-
դասեր,

Քո ներողությամբ անայլայլելի փութա աջ
կողմս ի փրկություն ինձ¹:

Դ

Արդ, ո՞վ երկնավոր, հզոր ու բարի դու խնա-
մակալ,

Ստեղծիչդ ամեն ինչի՝ ոչնչից,

Կայձն իմաստության զորավոր խոսքիդ մոտեց-
րու լեզվիս,

Որպեսզի դառնա առիթ մաքրության՝

Քո ձեռքով կերտված մարմնիս մաս կազմող
զգայարանքներիս:

Եվ ես նրանցով՝ քո կամքով կազմված և քեզնով
բուժված՝

Նոր պատրաստությամբ, անպակաս ձայնով,
անհատ բարեառով

Քեզ վերընծայեմ գոհաբանություն՝

Ի փառս քո Հոր՝ մեծ Աստուծո,

Հավիտյանս. ամեն:



¹ Հմմտ. Զաքար. Գ. 1-3



Սըրի ի խորժերից իսոսի Ասպոն-ծո Հետ

Ա

Տե՛ր, Աստված ամենայնի և գորավոր ամեն բանում,

Տե՛ղ անպարագիր և անվայրափակ,
Բոլո՞ր իսկությամբդ ամենքին մոտիկ,
Ամենուր ես դու, և չկա ոչ մի սահման առանց
քեզ:

Զես երեսում երբեք, բայց առանց լույսիդ չի
տեսնվում ոչինչ,

Ո՞վ ահավոր փառք և անհաս անուն,
Մեծության կոչում, ձայն անբավելի,
Իսկություն անքնին, անմատչելի հեռավոր և
անընդմիջելի մերձավոր,

Տեսնող՝ հեծության և նկատիչ՝ թշվառության,
Տիրության այցելու և ամենաբույժ հնար՝ ան-
ճարության,

Հայր գթության, ծագող ողորմության և Աստ-
վա՛ծ միսիթարության:

Բ

Տե՛ր, ողորմությամբ նայիր բազմավտանգ ախ-
տերի դառնավիշտ իմ պատկերին,

Որ քո հանդեպ եմ տածում ահա՛:
Կարեկից եղիր ինձ բժշկապես և ոչ թե որպես
քննիչ-դատավոր:

Արդարեւ մեծ է տագնապն այս ցավատանջ տա-
րակուսանքի և վարանման,
Երբ մեղքով է տարված մարմինն ամբողջովին,
իսկ հոգին չի մեկուսացած չար գործերից,
Երբ զգայարանքները կապկապված են մոլորու-
թյունների սովորությամբ,
Եվ զանգվածը շաղախված է մահացու կրքերով.
Երբ սրտի զգայությունը խայթերո՞վ է խոցոտ-
ված,
Եվ բարիքների ակնկալությունն իսպառ վերա-
ցած.
Երբ բանականությամբ հանդերձ՝ անասունների
շարքն է դասված,
Եվ գոյության հետ զազրելի գարշություններ
են շարամանված.
Երբ արտաքնապես թեև առողջ, սակայն ներք-
նապես է վիրավորված
Եվ հիշելով իր մեղքերը սաստիկ՝ հուսահատու-
թյան է միշտ մատնված.
Երբ որ նախապես գործած մեղքերի տագնա-
պումներով է տարակուսված,
Եվ աղոթքի հստակությունն իսպառ պղտորված.
Երբ խղճմտանքը խռովանքներով է հույժ տո-
չորված

Եվ ձեռքը մաճին՝ հետեւի գործերն հետազոտեալով է միտքն զբաղված¹.
Երբ դեմքով դեպի առաջ է դիմում, ոտքերով՝
դեպի հետև ընկրկած
Եվ գիտենալով հանդերձ ծշմարիտ գոյությունները, անգոներից է շարունակ խարբված
Եվ մտքի մղած մարտերի մեջ միշտ փոքրություններից է հաղթահարված,
Եվ սրտի սաստիկ հառաչանքներից հագագի դուռն է համակ հրդեհված.
Երբ ամենուրեք՝ խոնավությունն է քիմքի տուչորված
Եվ ամեն կողմից անարև մեգով է շրջապատված.
Երբ ակնկալության ընդարձակությունն է իսպառ ամփոփված,
Եվ անտանելի տառապանքներն են զգայարանների վրա դրոշմված.
Երբ որ կորսայան եղկելիությունն է մտաքերված,
Եվ հատուցումի դատավճիռն է մտքի դիվանում արձանագրված.
Երբ բարերարի աչքն է զայրալից երևոյթ առած,
Եվ լույսը խնդությամբ հողազանգվածիս դեմ է զայրագնած.
Երբ որ Աստուծո ահավորությունն փոքրիկ է ությանս հետ է ընդհարված

¹ Դուկ. Թ. 62

ԵՎ իր խոսքերի որոտումով միշտ՝ բանավոր
մոխրիս դեմ է բարկացած,
ԵՐԲ արդարության իր քարերով նա մահվան
արժանուս է միշտ քարկոծած,
ԵՐԲ որ ինձ տրված տաղանդը այստեղ անառա-
կության մեջ եմ կորցրած,
ԵՎ իմ պատվական ստացվածքն իբրև անարդ
անարժեք՝ հողի տակ է թաղված.
ԵՐԲ ողջ արգասիքն իմ աշխատանքի՝ ծուլու-
թյան մութով է ծածկված
ԵՎ չի երևում ճրագի լույսի պես հեռու տար-
ված,
ԵՐԲ իրավազուրկ պատասխանարանն է լեզվիս
կարկամած,
ԵՎ իմ անհամբույր բարբառող շուրթերս իրոք
արժանի կերպով պապանձված
ԵՐԲ հուզյալ միտքս ամեն ուղղությամբ ցրիվ է
եկած
ԵՎ օգտակարին հասու լինելու անկարող դար-
ձած,
ԵՎ լավն ու բարին ընտրելու կշռի մեջ հիմա-
րացած.
ԵՐԲ ճանապարհը չարի արգելքով է խափան-
ված,
ԵՎ վառարանն է յուղի՝ հնոցի մոխրով լցված.
ԵՐԲ կենաց մատյանից իմ անվան գիրն է ջնջված,
ԵՎ երանության փոխարեն այնտեղ կշտամբանք
գրված:

Գ

Թե զինվոր եմ տեսնում՝ սպասում եմ մահվան.
 Թե պատգամավոր՝ խստության.
 Թե գրագիր՝ կորսայան մուրհակի.
 Թե կրոնավոր՝ անեծքի.
 Թե ավետարանիչ՝ ոտքի փոշին թոթափելու.
 Թե բարեկրոն՝ հանդիմանության.
 Թե անզգամ՝ կսկծանքի.
 Եթե փորձվեմ ջրով՝ կխորտակվեմ¹.
 Եթե մի դեղ քննության առնեմ՝ կսատակեմ.
 Թե բարիք տեսնեմ, կասկածելով չար գործերից՝ կփախչեմ.
 Թե բարձրացած մի ձեռք՝ կկորանամ.
 Թե խրտվիլակ փոքրիկ՝ կսարսեմ.
 Թե լսեմ թնդյուն մի թեթև՝ կընդուստնեմ
 Թե կերուխումի հրավեր ստանամ՝ կդողամ.
 Թե մեծիդ ներկայանամ՝ կսարսափեմ.
 Թե հարցաքննության կանչվեմ՝ կկարկամեմ.
 Թե իրավամբ քննվեմ՝ կհամրանամ:
 Արդ, իրար վրա բարդված իմ այսքան տարա-
 կույսները ամենաթշվառ և ողորմագին,
 Որոնք ի ներքուստ խոցում են սիրտս անբույժ-
 ցավերով, նետերով անտես,
 Եվ բեեռվելով անարտաքսելի՝ նրանք հոգուս
 հետ հանապազամուխ ու հարամնաց,
 Եվ շարավներով լցնելով հոգիս, հարվածելով
 միշտ՝

¹ Հմնտ. Թվոց Ե. 16-22

Սատակիչ մահվանս վտանգն են սաստիկ նա-
խագուշակում
իր ներսը մխված երկաթը պատող կույտը թա-
րախի,
Տագնապը ծածուկ ու մեջս պահված վերքերն
անդարման
իմ շնչառության միջոցին սաստիկ ցավ են
պատճառում:
Ուստի և նրանց նեղություններից չարաչար
ճնշված,
Թախծալից հոգուս ձայնով բարձրագուչ և աղեր-
սախառն իմ արցունքներով
ինձ համար նաև աղոթող բոլոր նահատակների
հետ այն երկրաստեղծ,
Եվ հեծությամբ ողբակից նրանց արտասկանվեր
իմ այս ողբերով,
Հղձակաթ աղերսն իմ՝ Բարեգործիդ ամենա-
հնար՝
Երկրիցս դեպի երկինքը, ահա՛, առաքում եմ
քեզ:
Շնորհիր, ո՞վ Տեր, հանգիստ ու խաղաղ կյանք
ողորմելի վաստակյալիս,
ինձ, որ ընդունա՛յն եկրագործեցի.
Ո՞վ համայնդ դու ամեն ինչի մեջ,
քեզ փա՛ռք հավիտյան:

Բան ԻԴ

Սրբի խորժերից խոսել Ասպո-ծո Հեղ

Ա

Եվ արդ, ի՞նչ բաների արժանի համարելով ինքս
ինձ, մոտենամ ես քեզ աղերսելու,
Արքայությա՞ն, որից վրիպեցի,
Թե՞ վայելուչ փառքիդ, որից զրկվեցի,
Թե՞ անմահ կյանքիդ, որից վտարվեցի,
Թե՞ պարակցությանը հրեշտակների, որից
տրոհվեցի,
Թե՞ արդարների մասնակցությանը, որից ջոկ-
վեցի,
Թե՞ ուռն լինելու կենդանի որթի, որից պոկվե-
ցի,
Թե՞ ոստը բերկրության ծառի, որից գոսացա,
Թե՞ ծաղիկը փառքի չնորհի, որից թափվեցի,
Թե՞ ժառանգավորն պանծանաց, որից կորացա,
Թե՞ հայրական հարազատ գրկին, որից դուրս
ընկա,
Լուսեղեն զգեստո՞վ պարծենամ, որից մերկացա,
Թե՞ ստացողի դարձին հուսամ ես, որից խոր-
թացա,
Հղձալի լույսի՞ն դիմեմ ես արդյոք, որից մեկ-
նեցի,

Թե՞՝ ոսկորներին հոդվեմ Հիսուսի, որից մերժվեցի,
Նրա թևերի[՝]ն մոտենամ, որից օտարացա,
Թե՞՝ ապավենին ապաստանեմ ես, որից զատվեցի,
Նորոգությա՞նը հուսամ փրկարար, որից մահացա,
Թե՞՝ զվարթարար զգաստությանը, որից լքվեցի,
Կամ ուխտադրական կենաց կանոնին, որից
փոխվեցի,
Թե՞՝ հաստատական օրինադրության, որից սահեցի,
Անշարժ, անսասան Վեմի[՝]ն կառչեմ ես, որից
սասանեցի,
Թե՞՝ սրբոց գնդին լինեմ դասակից, որոնցից
ինքս ինձ ի դուրս մղեցի,
Անդրանիկների քաղաքում[՝] շինվեմ, որից ես
գերի քշվեցի,
Թե՞՝ ամենօրյա հացին աղոթեմ, որ չվաստակեցի,
Թե՞՝ տաժանքների վերացումն խնդրեմ, որոնց
համար չըրտնեցի,
Թե՞՝ պարգևներով պսակվեմ ես այն, որոնց
արժանի չհանդիսացա
Կամ կենաց գրքում արձանագրվեմ, որից
ջնջվեցի,
Թե՞՝ երախտիքներդ հիշեմ ես արդյոք, որոնք
մոռացա:

¹ Յրեշտակների երկնային բնակարանը կամ ըստ ոմանց՝ Առաքելական Եկեղեցին:

Բ

Եվ ահավասիկ, ապրելու հույսի լարը կտրվեց,
 Ու վարակվեցի՝ ես բոլորովին գարչ բորոտու-
 թյամբ.

Տգեղ, սպիտակ ու փոքր-ինչ փայլող պալարի
 պես այն,

Որը կրկնակի մեր անմաքրության իբրև նշա-
 նակ՝

Նախնական ախտի սպին է պահում երկդիմի
 կերպով¹,

Ապականությունն ինձ պաշարելով՝ սպառեց
 մարմինն իմ բոլորովին

Պարծանքի նշույլը բոլորովին շիջավ ինձ համար,
 Փրկությունը վտանգվեց, բարին ստվերացավ,
 Կյանքի դուռն ընդմիշտ փակվեց,

Միսիթարությունը վերացավ,
 Դատաստանի ատյանը մոտեցավ,
 Մահվան թույնն արծարծվեց իմ մեջ,
 Սպանվածն իմ մեջ կրկին կենդանացավ,
 Նավահանգիստը քարերով խցվեց,
 Հույսի շավիղը կուրացավ,
 Շնորհի ծածկույթն ինձանից հանվեց,
 Փառքի վայելչությունն աղոտացավ,
 Առաջնորդող հանճարը խափանվեց,
 Կշտամբանքների փուշը շատացավ,
 Անօրենության ուղեշը ծաղկեց,
 Գեհենի բոցը բորբոքվեց իմ դեմ,

¹ ՂԱՄ. ԺԳ ԳԼՈՒԽԸ

Ծառայության լուծը սաստկացավ,
Ստրկության կապը զորացավ,
Կառույցը պահող սյունն ահա ընկավ,
Բարձրության վստահարանը կործանվեց,
Ընտանի միաբանությունն անջրպետվեց,
Եվ տիսրեց սաստիկ սրբություն սիրող Աստուծո
Հոգին:

Գ

Եվ քանզի ես դառնությունների մրուրը ճաշա-
կեցի,-
Տանջանքներ, խայթեր ու տիսրություններ,
վշտեր հոգեկան,
Յավեր անդարմանելի և տարակույսներ անհու-
սադրելի,
Ամոթանքներ անպարտակելի, խայտառակու-
թյուններ անծածկելի,
Պատկառություններ անհամարձակ, փախուստ-
ներ անդառնալի
Եվ հալածանքներ անմարդասիրելի,
Երկար ու ձեռնունայն, անպաշար ուղեկորու-
թյուն,-
Ուստի և դու, ո՛վ փրկություն, զորություն և
օգնություն,
Ողորմություն, լուսավորություն, քավություն
և անմահություն,
Տեր Հիսուս Քրիստոս, Որդի կենդանի Աստու-
ծո, Արարիչ երկնի և երկրի,

Որ ջուր ես տալիս ծարավներին անջուր անապատում,
Օրհնյալ, բարդութ, հզոր, մարդասեր,
Երկայնամիտ, խնամակալ, հնարավոր, այցելու,
Պաշտպան աննախանձ, պահապան հաղթող և
կյանք անկորուստ,
Միջնորդ երկնային, լիություն անվագ, երանություն տոնելի,
Քո ողորմության աջ ձեռքը սիրով երկարելով
ինձ
Ընդունի՛ր և ներկայացրու քավված և սրբված
ամենապարտիս՝
Քեզ հավասարապատիվ Հոգուն, ո՛վ կենդանի
Բան,
Որպեսզի քեզնով հաշտված վերստին՝ իմ մեջ
դառնա նա:
Եվ քո միջոցով նա, որ զորեղ է ինքնությամբ
իր մաքուր կամքով ինձ սրբագործած՝ Հորդ ըն-
ծայելով՝
Միաժամանակ ամբողջ իմ շնչով անբաժանորեն
Կապի, միացնի բարեշնորհիդ հետ:
Որի համար՝ քեզ, Հորդ ու Սուրբ Հոգուդ՝
Երրյակ անձնավորությանդ՝ մի բնությամբ և մի
աստվածությամբ—
Փա՛ռք և բովանդակ արարածներից գոհաբա-
նություն
Հավիտյանս հավիտենից. ամեն:



Բան ԻԵ

Սրբի խորժերից խոսի Ըստու-ծո Հետ

Ա

Եվ քանզի նախորդ իմ ողբերի մեջ ես մասամբ
միայն նկարագրեցի

Մեկը մյուսից ծանր ու գերազանց մեղքերն իմ
այնքան,

Որոնց գերին է դարձել վշտակիր և թշվառ հո-
գիս,-

Ուստի ես պիտի փոխեմ իմ խոսքի եղանակն հի-
մա,

Բայց ո՛չ ավաղանքն իմ աղետների:

Բ

Կյանքը ինձ համար նման է սաստիկ ծփացող
ծովի,

Ուր հոգիս, մարմնիս շինվածքով՝ իբրև նավա-
կում,

Իրար վրա խուժող անթիվ, անհամար ալիքնե-
րից,

Տարուբերվում է միշտ այս աշխարհում:

Եսային ևս այս օրինակով պատկերացրեց

Երուսաղեմի հախուռն ու հանկարծաղեպ քան-
դումը պարսիկ հրոսակներից,

Որ և սխալ չի լինի համեմատել իմ հոգեոր խոր-
տակման հետ:

Մինչ ես չվում էի անհոգ, անտարակույս վստա-
հությամբ,

Հազիվ թե մտքիցն իմ անցկացնելով դույզն-ինչ
կասկածանք ինչ-որ արկածի

Փոքր այն միջոցին հանգստի միջև և աշխատու-
թյան,

Իբրև թե արդեն նավահանգիստը հասած լինեի,-
Եվ ահա՝ ամառվան մեջ ձմեռն հանկարծահաս՝
հողմով իր բքաբեր

Երեքալյան ուժգին բախումով խաղաղությունը
խռովեց հանկարծ:

Խորտակվեց նավը՝ վայրագ ալիքների բախու-
մից.

Թիակների կազմվածքը քայքայվեց.

Պոկվեց իր տեղից կայմը վերամբարձ,

Թոշարանն առագաստի պատովեց ծվեններով
անկարկատելի.

Շինվածքի շքեղությունն անշքացավ,

Ու խզվեցին բոլոր առասանները ձիգ.

Գլխակողմի բարձրադիր դիտարանը խոնարհ-
վեց,

Կտրվեց պարանն ապավանդակի,

Խարսխի հենարանը քայքայվեց,

Ու բաժանվեցին իրար կցորդված գերաններն
երկու.

Ուղիղների սամիները դալարվեցին,

Հնկղմվեց լաստի հատակը իսկույն, հիմքն ու
հաստարանն ամբողջ շինվածքի.

Ղեկի սարքն ամբողջ սուզվեց տեղնուտեղ,

Զվելու հարմարանքները պակասեցին,

Կոտրվեց իսկույն ողնափայտն ամուր.

Կապարանները զիստի ջարդուփշուր եղան,

Նավագողն անպետքացավ,

Հետնակողմը նավի, եզերող շրթներով, խախտվեց ու դուրս թռավ.

Բազմոցներն ընկնելով՝ անհետացան.

Վայելչագեղ վանդակապատն իջավ հատակ.

Շուռ եկավ գահավորակն հանգստավետ.

Իրար կպած տախտակաշարքերն անջատվեցին
իրարից,

Եվ նրանց ամրապնդող բևեռները ելան:

Ողբերի հիշատակարան դարձած արդյունքն
ինձ նմանվեց:

Նավապետը դեմ-հանդիման նավի՝ դեգերում է,
ողբում,

Զեռքը ծնոտին դրած՝ արցունքի գե՛տ է հոսեց-
նում:

Նավից մնացած սակավաթիվ բեկորները ալե-
կոծ ծովի ծփանքի վրա

Բանականների նման խողխողված՝ հեծում են
թախծոտ ու ողորմագին:

Եվ այսպես, ահա՛, սխալված չենք լինի, եթե
ասենք,

Որ նավապետը բարի իր երկնավոր զորքով՝ այս
աշխարհի ծովում
իմանալի իմ գոյության խորտակված տապանն
է աշխարում.
Քանզի արդարե բարեգութ Տերը լացեց
իր թաղված ազգակցի վրա, որպես օրինակ՝ հա-
մայն մարդկության,
Լացեց նա նույնպես մոլորյալ երուսաղեմի,
ինչպես և մոլեգնած Հուդայի վրա,
Որոնցից երկուսը մնացին անհույս՝ նման քայ-
քայված նավի.
Իսկ մեկը նրանցից արդեն անդունդի հատակը
հասած՝
Հույսի առասանն իր ձեռքն ունենալով՝
Դեպի ապահով խաղաղությունը դուրս եկավ
նորեն:

¶

Կտեսնե՞մ արդյոք ես երբեիցե մարմնի տապա-
նակն իմ բազմախորտակ՝ կրկին նորոգ-
ված.
Կտեսնե՞մ արդյոք ողբալի հոգուս նավը
փշրված՝ կրկին ողջ-առողջ.
Մեծ տարածությամբ բաժանվածս ես կլինե՞մ
արդյոք դարձյալ միացած.
Կտեսնե՞մ արդյոք հոգնաթախիծ վշտացյալիս
սիրտը դարձյալ ուրախ.
Կարո՞ղ եմ հուսալ՝ հավետ խաթարված պատ-
կերն իմ բնության հարդարված նորից.

Կտեսնե՞մ արդյոք թշվառացյալիս քանդված
տաղավարը կրկին կանգուն.
Հուսա՞մ, թե պիտի տեսնեմ տարամերժ հոգիս
ազատված,
եվ լույսիդ չնորհից զրկվածիս կրկին վերակազ-
դուրված.
Պիտի ցույց տա՞ս արդյոք ողորմաբար վայելքն
ընտանի քո պայծառության.
Կտեսնե՞մ արդյոք երբեիցե ամենատխուր դեմ-
քը հոգուս՝ ժպտուն.
Արդյոք կլսե՞մ գումկան ձայնի տեղ ավետյաց
համբավն ինձ առաքված.
Կտեսնե՞մ արդյոք իմ բյուրակործան փշրված
անոթն վերանորոգված.
Պատուհաններն իմ մտքի աչքերի կտեսնե՞ն
արդյոք պարտամուրհակն իմ մի օր
պատոված.
Օրն իմ անձկության քավությանդ չնորհիվ՝
կծագի՞ արդյոք քո լույսը վրաս,
Արդյոք կմտնե՞մ լուսախորանի խնջույքը մի օր
քո առաջնորդությամբ.
Անկյանք, ցամաքած ոսկորներս կրկին կկենդա-
նանա՞ն,
Ըստ Եգեկիելի՝ ներգործուն չնչիս ետ գալով
դարձյալ զորություն առած.
Կլինի՞ արդյոք, որ կրկին նայեմ քո սուրբ տա-
ճարին,—
Ինչպես մարգարեն, որ աղաղակեց կետ ձկան
պորտից,—

Ես, որ կանգնել եմ դեմք ամոթահար՝ լույսիցդ
մերժված.

Մթնածիս վրա խավարասնունդ կծագի՞՝ արդյոք
պայծառ առավոտ.

Եվ մշտասառույց տագնապյալս ես կհասցնե՞մ
արդյոք գարուն տեսնելու.

Կտեսնե՞մ արդյոք ճարակ ինձ համար հոգինե-
րը դալարեցնող ցողն անձրեային.

Կլինի՞, որ տեսնեմ գազանաբեկ մերժելի ոչ-
խարս կրկին քո ամենագութ կամքի հո՛տը
դարձած:

Դ

Եվ, սակայն, ինչպես որ Հորն է ասում,
Զարի թակարդներն անելանելի պաշարել են
ինձ,

Իսկ եթե քո բարերար կամքի ողորմության
լույսն ինձ ցույց տրվի,

Քո գթության դուռը բացվի,

Փառքիդ ճառագայթը ծավալվի,

Զեռքիդ խնամքը հայտնվի,

Կենացդ արեգակի օրը տարածվի,

Քո առավոտյան ըղձալի դեմքը պարզվի,

Քաղցրությանդ առատությունն աղբյուրի պես
բխի,


Արարչի կողի վտակը հոսի,

Անապակ սիրույդ ծորումը թափվի,

Ավետյաց շնորհիդ ծագումն երեա,

Պարգևիդ ծառը ծաղկի,

Քո օրհնյալ մարմնի մասունքը բաշխվի,
Սակավ ակնկալությունն իրագործվի,
Ընդհատված ձայնը ողջույնիդ լսվի,
Հեռացած խաղաղությունդ մոտենա:
Այնժամ հավիտյան այս պայմաններով երանելի,
Հաստատուն հույսով և հավատով զինված,
Ապավինելով Սուրբ Հոգուդ, որ պաշտվում է
Հորդ հետ և փառաբանվում քաղցրաձայն,
Քեզ հետ լույսի մեջ անմատչելի, քավությամբ
հանդերձ,
Ինձ՝ մեղապարտիս կընծայվի և՛ կյանք, և՛ երա-
նություն:
Եվ սրանք որպես անկորուստ ավանդ կպահվեն
իմ մեջ,
Իբր առհավատչյա ճշմարիտ հիշատակի՝ ի ձիր
անեղծության,
Երբյակ անձնափորությամբ հզոր, սուրբ ու միակ
Եվ անքննելի տերությանդ անձառելի, ահեղ
անունով,
Դո՛ւ ես, որ իսկությամբ քո և էությամբ,
Եվ բարձրությամբ քո հարակա, քաղցրությամբ,
ողորմությամբ
Եվ մարդասիրությամբ պսակված հավետ թա-
գավորում ես:
Այո՛, բոլորի համար և ըստ ամենայնի, ամենայն
բանում կարող ես, գթա՛ծ:
Եվ քեզ վայել է փա՛ռք երկրիս վրա,
Նաև հանդերձյալ մշտնջենական աշխարհում,
Մեծ օրն հայտնության, հավիտյանս. ամեն:



Բան ԻԶ

Արդի խորժերից խոսէ՛ Ըստու-ծո ՀԵՐ

Ա

Եվ արդ նրանց հետ, որոնք ողբագին եղանակ-ների

Համաձայն խոսքեր են շարահարում, հորինում հարմար,

Ամեն մի տողի վերջում միևնույն գիրը դնելով,
Որով արտասուք հոսեցնելու չափ մորմոքեցու-ցիչ

Առավել սաստիկ ու սուր են ճմլում սրտի ցա-
վերը,-

Ուստի ես ինքս գլուխն անցած այժմ այդպիսի-ների,

Որոնք լալագին բանաստեղծություն են եղանա-կում,

Նրանց ողբաձայն հեծեծանքներով վշտակիր
հոգիս եմ պարզում ահա՝,

Որը չի մեռել դեռ բոլորովին աշխարհի համար,
Ոչ էլ իսկապես կենդանի է նա Աստուծո հա-մար.

Ոչ իսկապես ջերմ, ոչ էլ ցուրտ իրոք,-
Հստ ավետարանչի առակի՝ գրած իր Հայտնու-թյան մեջ¹,-

¹ Հայտն. Գ. 15-16

Որը երիցս ատելի է երրյակ տերությանն ու
ամենատես արարչությանը:

Այս է եղանակն ամենահարմար՝ թախծությունը
մեր նկարագրելու,

Հանգավորելով յուրաքանչյուր տող,

Որով և հոգու հույզերը տխուր և՛ս առավել են
հնչում սրտառուչ:

Բ

Դրամական պարտքն ուրանալով, ես վատս, հի-
րավի,

Գործովս անարժան մատնվել եմ վաղ տույժ ու
տուգանքի.

Կրկնահանցագործ վատնիչս կորած՝ գանձին
արքունի,

Որ մեծ Աստուծո հաշիվ պետք է տա և պատաս-
խանի.

Պետք է բյուր քանքար, մինչդեռ ես չունեմ
կշիռ մի ունկի¹:

Ես անբարեխոս դառն արգելքի տակ կապկապ-
ված գերի,

Ճաշակում եմ խիստ ցավ ու հեծություն խավա-
րում բանտի.

Տանջվում եմ անօդ հետ ողորմելիս առանց պա-
շարի.

Ինձ համար ողբի մի այլ եղանակ այստեղ ընտ-
րեցի,

Եվ այս խոսքերովս այն կոկծալի կոծի փոխեցի.

¹ Հմնտ. Մատթ. ԺԸ. 24

Նույն չափով ու նույն վերջավորությամբ ես
շարադրեցի,
թիվ անհատելի և խորհրդավոր երկյակ տասն-
յակի¹:
Հնոցն աղքատության մրրկվում է ամեն կողմից
ուժգնակի.
Անպաշտպան, թշվառ՝ դրված է տիսուր սիրտն
իմ գրավի.
Ապաշնորհ, տկար մարդ եմ ենթակա միշտ վրի-
պանքի,
Շուտով ինձանից անզիջում կերպով դատ կպա-
հանջվի:
Զգայարանս մահվան ու մեղքի զենքով կիսոցվի,
Գերիս՝ անփախուստ կերպով մատնված բռնի
ախտերի,
Հոշոտում է ինձ սաստը սուր սրով իր սարսա-
փելի:
Այժմվանից, նույնիսկ, երբ բեմն եմ հիշում ես
դատաստանի,
Անլույս մուայլը չարատես աչքիս առջև կփովի.
Անօգ, կապկապյալ եղկելիս մատնվել եմ տա-
րակույսի.
Երևում է ինձ պատկերը երկյուղ ազդող վեր-
նայնի:

¹ Այս բացատրությամբ ուզում է ասել, թե ոտանավորի հանգերը կազմված են ի գրով, որը համազոր է քսանի (=երկյակ տասնյակ 2×10) և որ իբրև առանձին թիվ՝ ունի խորհրդավոր հանգամանք, ըստ ավետարանական առակի տրված ու շահված քանթարների կամ վնասների գումարը՝ 20: Իմաստն այս է. «Այս ոտանավորի հանգերը ես նրա համար «ի»-ով կազմեցի, որ ցույց տամ, թե պարտական եմ քսան քանթարի, այսինքն այն բազում շնորհներին, որոնք ընդունեցի Կստծուց»:

Տարտարոսի մեջ անարև սաստիկ և անծածկելի,
Գեհենի հրում մորմոքվում է հույժ անձն իմ
եղկելի,

Անհայտ ու անհետ կորած-կործանված անդն-
դում մեղքի:

Ահա ունեցածս արծաթն անպիտան, որ արժեք
չունի,

Որ չի ընդունվի տերունի գանձում և չի ամբար-
վի:

Հանցանքս է պղտոր, և ձեռքս անմաքուր,
աննվիրելի.

Բայց ես սրտաբեկ, մատներս շարժելով, հուսա-
լով դարձի,

Երեսս հողին՝ պաղատում եմ քեզ, դու մա՛յր
Հիսուսի.

Բարեխոսս եղիր ինձ մեղավորիս, երկնի՛ց իսկու-
հի.

Մաղթիր քավություն ինձ, ո՛վ գորավոր փրկա-
նակ կյանքի,

Թող երկրի վրա միշտ օրհնություններ, բու-
րումներ խունկի

Եվ անուշահոտ յուղեր մատուցվեն քեզ ախոր-
ժելի:

Գ

Իմ այս ողբերի հյուսվածքի վրա ես մի ուրիշ
մաս ևս ավելացրի,

Շնորհապարգև մեծ բարերարին առատ
արցունքներ ընծա բերեցի.

Զկարողացա չափելով երբեք գտնել խորությունն ես իմ կորուստի,
Հազիվ թե հակիրճ խոսքերով միայն ես նրան
հանդես բերել ջանացի,
Զհասա նրան ես մինչև անգամ արագացնելով
թևերն իմ մտքի:
Խորունկ մեղքերից խելքըս պարտրված՝ բարեկության բաժակն իմ ձեռքը առի,
Տարակուսանքի տարտամությունն իմ ես ինքս
իբրև մահ ճաշակեցի:
Եվ այժմ էլ, ահա, հանցանքներս անթիվ երգեցի
ձայնովն իմ ողորմելի:
Մի աներեւոյթ բարկ կրակարան բորբոքվում է
մեջս անզովանալի,
Ասես թե անտես հալոց-քուրաներ եռում են
սաստիկ, անշիջանելի:
Թունավոր նետի սլաքներ կան սուր՝ շտեմարանի խորքը իմ սրտի.
Ցավառիթ խիթեր մահացու կերպով խոցում են
բոլոր երակներս լյարդի:
Ճեպելու անճար աղիքներիցս չեն կարող ելնել
ցավերն երկունքի.
Երիկամունքներն իմ երկու կողմից այրում է
ջերմը անդարմանելի.
Անչափ կուտակված դառն մաղձն ահա նախադուն է իմ հասել կոկորդի:
Շնչափողիս մեջ հնչում են ուժգին վհատեցուցիչ ձայներ ավաղի,

Էռությանս բազում մասերը՝ ներհակ իրար դեմ
ելել են պատերազմի.

Կասկածանքների վախով վարանած՝ մատնվել
եմ ես անհուն տագնապի,

Թեև հարազատ՝ ջարդում են իրար դավաճանա-
բար, ինչպես թշնամի,

Թաղված մեղքերի գարշելի տիղմում՝ ո՛չ մեռած
եմ ես և ո՛չ կենդանի:

Հայացքս քեզ եմ ուղղում, բարերա՛ր, կասկածը
սրտումն իմ պատժապարտի,

Որպեսզի կյանքի անհույս այս վիճից դուրս
հանես դու ինձ լույսին անձկալի:

Դ

Նա, որ մատյանը այս շարադրեց՝
Երջանիկների շարքում պսակվի,

Ակնկալելով ողորմությունը՝

Անարատներին թող հաղորդակցի,

Եվ հանուն Բան-Աստծուդ գենման՝

Բարեգործությամբըդ կենդանանա,

Գովյալ շուրթերիդ օրհնությունը թող

Գիրքս ընծայողի գլխին [միշտ] մնա,

Հաստվի ըղձական սողսոսնյան խոսքը առակի¹:

Բարձրյա՛լ, քո Հոգով պատկերագրիր

Անեղծանելի նորոգման համար,

Քանի որ դու ես ներողը միակ,

Ո՛վ ներողամիտ, փա՛ռք քեզ հավիտյան: Ամեն:

¹ Առակ. ԺԱ. 31:



Բան Իլ:

Սրբի խորժերից խոսէ Եսպո-ծո Հետ

Ա

Քանզի ողբաձայն բանաստեղծության հետ վերընծայեցի և՝ չափական խոսք,
Հյուսեցի կական ու կողկողագին հառաչ-հեծություն,

Դառնաթախիծ լաց, արտասվագին երգ,—
Այժմ վերստին պիտի սկսեմ պաղատանքներն իմ
Խոստովանորեն և զղջողաբար, բարբառելով բաց
Ու մերկանալով ծածուկն ու գաղտնին:
Որպեսզի սկիզբն ամեն մի տողի, ինչպես և վեր-
ջը միենույն բառի կրկնությամբ,
Այս թախանձալից և նմանաձայն աղոթքը այս-
տեղ ես պիտի դնեմ,
Որ խոնարհություն է հոգեկեցույց:

Բ

Մեղա՛ ես Մեծիդ բարերարությանն, անարգս՝
մեղա՛.
Մեղա՛ ծագումիդ ճառագայթների, խավարս
մեղա՛.

Մեղա՛ չնորհիդ երախտիքներին, արդարեւ մեղա՛.
Մեղա՛ երկնային գթառատ լույսիդ, հայտնապես մեղա՛.
Մեղա՛ ոչնչից կյանք ստեղծողիդ, ստուգիվ մեղա՛.
Մեղա՛ գերագույն գոգիդ գրգրալիր, անսահման մեղա՛.
Մեղա՛ աննվազ լույսիդ վայելմանն, նենգողս մեղա՛.
Մեղա՛ ճաշակմանն անճառ քո կենաց, բյուր անգամ մեղա՛.
Մեղա՛ միշտ անհաս քո պարգևներին, հանապազ մեղա՛.
Մեղա՛ քո գովյալ մարմնին Աստուծո, մահուչափ մեղա՛.
Մեղա՛ Արարչիդ պաշտելի արյանն, իսկապես մեղա՛:
Ահա՛, արդարեւ, հատվածն այս խոսքի՝
«Մեղան» օրհնյալ է և հուսադրական, սրտերի համար:
Ավանդ է նա պատվական, անմոռաց պատկեր,
հայրենական տուրք,
Նախահարց օրենք, պաշար ընդհանրական,
Անհերքելի խոսք, զորավոր պատասխան,
Կենդանության կամուրջ՝ ախորժելի՝ վերնայնին, սիրելի՝ սրբոց,
Անխղելի կապ, հրաշալի բարբառ, անժխտելի փաստ,

Բաղձալի աղերս, փափագելի սեղան, անճարներին ճար,
Կարծրության վանիչ, կարդ աստվածապաշտների,
Հեթանոսաց գիրք, վաղնջական օրենք,
Քրիստոնյաներին հարազատ և հաղթող՝ արարչությանն,
Անջրպետ հզոր, ահավոր խարոց,
Բարձրագույն արվեստ, խորություն անչափ,
Հիանալի տեսիլ,
Կնքված խորհուրդ, որին չի կարող թափանցել
ոչ ոք,
Արագաթոիչ միտքը մինչև իսկ անընդունակ է
ըմբռնելու այն:
Զայն բարեպատեհ և հրաշալի, որը չլսվեց,
Երբ դասը մերժված ընդունում էր իր վճիռը
վերջին.
Գուցե և այնժամ ետ առնվեր իսկույն մահապարտության վճիռը արդար,
Որով դատաստանն այլևս անելիք չունենալով՝
Հավիտենական սահմանը պիտի լուծվեր, վերանար:
Մեծագույն փառքի զարդն է այն, որով նույնիսկ աստվածությունն ինքը կպսակվի պայծառորեն:
Քանզի ո՞վ էր, որ վազելով՝ բռնեց եղջյուրներից այս սուրբ սեղանի
եվ ազատվելով իսկույն պատմից՝ չմաքրվեց¹:

¹ Յին օրենքի համաձայն Սեղանի եղջյուրներին փարվողը չէր 11 - Ա. Գրիգոր Նարեկացի 161

**Իսկ եթե Աքար Քարմյանն ու Սավուղ Կիսյանը
և Սիմոնյան Հուդան¹**

**«Մեղան» այս ասելով հանդերձ չարդարացան,
Վկայում եմ և ես իրավամբ, խոստովանելով, թե
արդարացի էր ճմարտապես:**

**Զի նրանք, որ ակամա և բռնադատյալ են այդ
խոսքն արտասանում,
Չունեն կատարյալ սեր, հետեապես՝ և փրկու-
թյուն:**

**Իսկ ես կամովին եմ համբուրում, կրկնելով
դարձյալ խոսքն այդ երջանիկ, որ մկրտու-
թյունս է հարազատ:**

Գ

**Մեղա՛, որ մոռացա երախտիքներդ, վերստին
մեղա՛.**

**Մեղա՛, որ եղա ես հանձնապաստան, հիմարս
մեղա՛.**

**Մեղա՛, որ կյանքիդ դրժողը եղա, իսկ և իսկ մե-
ղա՛.**

**Մեղա՛, որ խոսքերդ արհամարհեցի, չարաչար
մեղա՛:**

**Մեղա՛, սատակման օրվան վազելուս, վատթարս
մեղա՛.**

ազատվում մահապատժից, մինչդեռ նոր օրենքի սեղանի այս
եղջյուրներին, այսինքն մեղայի զղջման ապավինողը կփրկվի:

¹ Աքար Զարմյան (Զարմյան), որը գողություն արավ Երիքովի ավարից (Դեսու է, 20): Սավուղը Խրաբելի թագավորն էր, իսկ Յուդան մատնիչը: Այս Երեքն էլ հանցավոր էրն. առաջինը՝ գո-
ղության, Երկրորդը՝ կամապաշտ անհնազանդության և Երրորդը՝
տիրամարտության համար: Երեքն էլ թեև զղջացին, բայց նրանց
զղջումն ընդունելի չեղավ:

Մեղա՛ պարտականս անկենդան մահվան, ծաղ-
րելիս մեղա՛.
Մեղա՛ անպատկառս՝ բարձրությանդ հանդեպ,
տաղտկալիս մեղա՛:
Դարձյալ ու վերջին անգամ աշխարանք իմ հո-
գու համար:
Ես ինքս եղա ինձ դեպի կորուստ-կործանում
տանող,
Զի անդարձ կերպով հեռացա և որդիս՝ թշնամի
համարվեցի,
Ընկա երկնքի բարձրությունից և վարքի փշեր
դիզեցի:
Եվս առավել է սաստկանում ողբերիս աղաղակն
ահա,—
Զի ես ինքս անձամբ անարգեցի
Ու դարձըրի ինձ կորուսիչ բագին:
Ունեմ ես նաև մի այլ դժնդակ կսկիծ իմ սրտում.—
Ուրիշները ինձ համարում են այն, ինչ որ չեմ
երբեք:
Արտաքնահարդար բաժակս անմաքուր,
Ծեփված որմս գարշելի,
Սին պարծանքներով պաճուճյալս, լույսս՝ մոայ-
լի փոխված,
Գերանակիր աչք թշվառ, փառքի շիջած ջահ.
Հանցապարտ իրոք և վնասակար ամեն ինչի մեջ
ըստ ամենայնի,
Հանդեպ տերունյան տնօրինությանց և աստվա-
ծային հայտնությունների,

Եվ արարչագիր երևումների և խոնարհությանց
հանդեպ սոսկալի,
Եվ նրա հանդեպ, որին ես իմ իսկ աչքերով
տեսա,
Եվ որի համար ես ավելի եմ պատասխանատու,
քան թե համորեն Ավետարանի:
Եվ այդ է, որ ինձ պատճառում է զարմանք և
հիացում,
Հոգսեր մաշողական և տարակույսներ անկարե-
լի,
Հաշիվներ՝ մտքում անզետեղելի,
Ելքեր անկատար, էջքեր անհաստատ, հուսա-
լքումներ,
Հանդիմանություններ տեղին ու ծաղրուծանակ,
Նզովքներ իրավացի և անեծքներ արժանահա-
տույց:
Սրանք են ահա կշտամբությունները մեղավո-
րիս
Եվ ինքնահարված տանջանքները իմ:

Դ

Միայն դո՛ւ կարող ես հանցանքներս ներել
Եվ բուժել մահացու խայթվածներն ամեն,
Տե՛ր ողորմության, Աստված՝ բոլորի,
Քրիստոս թագավոր բարձրյալ Հոր Որդի,
Ստեղծիչ, գթած, բարերար, օրհնյալ առատա-
ձեռն, հարուստ,
Ահավոր, հզոր, ողորմած տեսուչ, ձեռնկալ հաս-
տիչ,

Ապրեցնող, դարմանող, փրկող,
Երկայնամիտ, անոխակալ, ապավեն,
Բժիշկ գովյալ երկնավոր, անճառ լույս ու կյանք,
Հարություն, նորոգություն և քաջություն,
Եթե համաձայն քո սովորության՝ մարդասիրու-
թյամբ նայես ինձ վրա,
Ես էլ նայելով քեզ՝ դառնապես կողքամ.
Եթե լսես ինձ կհառաչեմ.
Եթե ականջ դնես՝ կպաղատեմ.
Եթե ներես ինձ՝ կաղաչեմ.
Եթե դառնաս դեպի ինձ՝ կգոչեմ.
Իսկ եթե անտես առնես՝ կկործանվեմ.
Եթե ոտնահարես՝ կուլամ.
Եթե հոգեպահիկ չընծայես՝ կմեռնեմ.
Ապա եթե ահարկու դեմք ցույց տաս՝ կսատա-
կեմ.
Իսկ եթե սաստես՝ կդողամ.
Եթե խեթ աչքով նայես՝ կսոսկամ.
Եթե բարկանաս սաստիկ՝ կսարսափեմ.
Եթե հալածես՝ կհեծեմ.
Իսկ եթե ընդվայր զարկես ինձ՝ կոչնչանամ.
Եթե վհատ ողբերս չդադարեցնես՝ կտագնապեմ.
Եթե խստանաս՝ կփախչեմ.
Ապա եթե սպառնաս կընկճվեմ.
Իսկ եթե քննես՝ կքարկոծվեմ.
Եթե ուժգնակի ակնարկես՝ կսուզվեմ.
Եթե չխնայես՝ կմերժվեմ.
Եթե կանչես՝ կկասկածեմ.

Իսկ եթե աչքդ հառես վրաս՝ կամաչեմ.
Եթե ձայն տաս՝ կերկնչեմ:
Զի անարգել եմ ես պարզեները բարի,
Երանությունը թողել, շնորհը լքել և ուխտը
դրժել,
Կենաց ավանդը մոռացել,
Համարձակությունն ու վստահությունը կորց-
րել,
Արարածների ստեղծողիդ բարկացրել,
Անձառելի շնորհն եմ ընդոտնել
Եվ պատվական պատկերն այլայլել:
Իսկ եթե խեղդող հեծությանս այս իմ ու ցավե-
րիս մեջ
Մարդասիրություն հասցնես դու ինձ, Տե՛ր Հի-
սուս Քրիստոս,
Վրաս ի կատար ածելով խոսքն այն,
Թե՝ «Բժշկությունը դադարեցնում է մեծամեծ
մեղքերն»,—
Ապա ես այնժամ քո առատագույն մարդասի-
րությամբ պատվաստվելով քո մեջ
Եվ նկարելով լուսեղեն պատկերդ խորքը իմ հո-
գու,
Նորից գտնված՝ կգոտեպնդվեմ քավված լիովին
Ու փրկվելով՝ կրկին կստեղծվեմ հավիտենական
անարատ կյանքով.
Եվ քեզ Հորդ հետ և Սուրբ
Հոգուդ փա՛ռք հավիտյան. ամեն:



Բան ԻՌ

Սրբի խորչերից խոսէ Ասպոս-ծո Հեղ

Ա

Եվ արդ, ո՞ր մեղքերս հայտնեմ և կամ որո՞նք
մատնացույց անեմ,
Որպիսիների՞ մասին ես խոսեմ.
Որքա՞ն ծածուկ հանցանքներ մերկացնեմ կամ
որո՞նք խոստովանեմ,—
Ներկայիննե՞րը, որոնք արդեն ունեմ,
Թե՞ անցյալինները, որոնք կուտակեցի.
Գալիքնե՞րը, որոնցից վախենում եմ,
Թե՞ գայթումներս բազում, որոնք ինձ գլորեցին.
Փո՞քըն իմ կարծիքով, որը սակայն մեծ է համա-
րում Աստված,
Թե՞ անմարմինը, որն հիշատակել մինչև իսկ
չարժե,
Քի՞չը, որ շատ է, թե՞ թեթևները, որոնք ծանր
են ու խիստ.
Հոգեկան կրքե՞րը կորստաբեր, թե՞ մարմնա-
կան ախտերն սպանիչ.
Հեշտառիթնե՞րն սկզբում, թե՞ վերջում վնա-
սողները,
Աներեռոյթնե՞րը, թե՞ տեսանելիները.
Զեռքով շոշափվողնե՞րը, թե՞ հեռվից շնչողները.

Հայնակի դյուրին խածոտողնե՞րը¹, թե՞ երկարորեն արձակված նետերը.

Խոր խոցողնե՞րը, թե՞ հայտհանդիման սպառողները.

Պոռնկությունը բազմագլխյան, թե՞ հիվանդությունն անբժշկելի.

Չարի պարարումը մարմնովս, թե՞ բարուն սովելը հոգովս.

Աստուծո համար անախորժներին տածած խնամքնե՞րս,

Թե՞ բռնադատման պարանով ձգվելս նույն մոլեգնությանը.

Դեպի մահ տանող մեղքե՞րը, թե՞ խոհերն ունայն:

Բ

Արդարե որպես կամավ խելագար, ձորձերս հանելով,

Ամոթույքս ցուցադրեցի ես, գործելով ընդդեմ իմաստունի.

Թե՛ խոհեմները ամոթույքն իրենց պետք է որ ծածկեն²:

Հեռացել եմ ես բարի կարգերից և օտարացել առաքինության,

Սրբության մեջ եղել եմ անսուրբ և կուսության մեջ՝ անմաքուր,

Արդարության մեջ՝ ամբարիշտ, բարեպաշտության մեջ՝ վնասապարտ.

¹ Մեղքի չորս կողմը գործած ավերներն է ակնարկում:

² Առակ. ԺԲ. 16

Բերանովս մոտ եմ ստեղծողին և խորհուրդներով՝ հեռու,

Երթունքներովս եմ ես պատվամատույց, ըստ մարգարեի, և ո՞չ թե սրտովս¹:

Եվ եթե պետք է քստմնելիներ ասել այստեղ,—

Մի հանդումություն, որ տանջանքներից ծանր է ավելի,—

Որպես Աստուծո պաշտոնյա անպետ, անկայուն մտքով,

Դեպի մահ տանող զույգ ճամփաների միջև վարանած՝

Ճանում եմ ու չեմ շահում ոչինչ,

Հետապնդում եմ ու չեմ հասնում,

Շտապում եմ ու չեմ ժամանում,

Փափագում եմ ու չեմ հանդիպում,

Ունեմ ամենայն ինչ երկրավոր,

Եվ պատգամավոր եմ աղոթանվեր համայն աշխարհի:

Բայց դու, բարերա՛ր, ներիր այս բազում իմ հանցանքները և միտ մի՛ բերի.

Քանզի դյուրին է քեզ համար ջնջելը նրանք, Քան թե ինձ համար նկարագրելը հոգնատանջ ձեռքով:

Ուստի գրեցի առանց խնայելու,

Որպեսզի դու էլ առատապես ջնջես, օրհնյա՛լ:

Զէ՞՞ որ մեղավորներիս համար կոչվեցիր դու երկայնամիտ,—

¹ Եսայի ԻԹ. 13

Ինչպես աղոթեց Եղրասն երջանիկ՝ սրտի հեծությամբ,

Երբ հույժ անձկությամբ և վհատ հոգով հիշեց
գործերն այն, որ պատմում է նա:

Ամեն տեսակի մահացու կրքերով տանջվում եմ
ես,

Ընկած գարշելի վիճը՝ դժնդակ և ապականիչ
մեղանչումների:

Եվ չեմ հավատում, թե մինչեւ անգամ կլսես դու
ինձ, ինչպես Հոքն է ասում:

Արդ, ահավասիկ, ես ինքնապարսավ, անձնա-
դատ գերի՝

Կամավորապես ինքս ինձ մատնելով,

Ապրելու բոլոր հնարներն իմ առջև փակեցի,

Խափանեցի ու կնքեցի ամուր ամեն կողմից,

Որ փրկելով ինձ՝ մեղքերով կապկապկածիս՝
կրկնակի անգամ մեծանաս, գովյա՛լ:

Գ

Եվ սակայն հետեւելով մարդարեի բարեխրատ
խորհուրդներին,

Մենք էլ նրա հետ աղոթենք պիտի Հոգովդ
երգելով,

Հաստատուն հույսով քեզ ապավինած:

«Խոսքեր առեք ձեզ հետ, — ասում է Ովսեեն, —
դարձեք ձեր Տիրոջն ու ասացեք նրան.

«Կարող ես դու մեր մեղքերը ներել», որպեսզի
բարիք ստանաք,

Եվ ունենաք վայելք բարօրության»:
Աստված ահա խոսեց և ո՞վ է, որ չկամենա լսել.
Նույն ինքը վկայեց, և ո՞վ է որ չուզենա հավա-
տալ:

Արդ, այս խոսքերն են՝ վճիռ պաշտելի,
Սրբազն պայման, օրենք անփոփոխ,
Կենաց ավետիս, նշան տերունի և բարության
դուռ,

Սփոփիչ հրավեր և ճշգրիտ պատկեր,
Անպակասելի գանձ, անմոռաց հիշատակ:
Առ այս, և ես հավատալով՝ հաստատում եմ այդ՝
մարգարեի հետ,

Թե կարող ես ներել բոլորովին մեղքերս բազ-
մաբեղուն:

Եվ այդպիսով՝ ավելի պիտի մեծանաս դու ու
բարձրանաս կրկին

Իմ կործանված և ամենաթշվառ հոգու հանդեպ:
Ամեն ինչում կարող ես դու, բավարարում ես
բոլորին և հասնում ամենուրեք,
Հաղթում ես բոլոր բռնություններին և փշրում
կարծրություններն ամեն.

Վանում ես ամեն ընդդիմադիր ուժ և վատնում
ամեն խստություն.

Ընդոտնում ես ամեն սրություն և բոլոր
դառնություններ անուշացնում,
Քաղցրացնում ես բոլոր դժվարամոքելիները,
Բաշխում ես պարտքերը բոլոր և ներում հան-
ցանքներն ամեն:

Կարող ես, զորավոր, հզոր, հնարավոր ես դու և
ամենարվեստ՝

Ընկղմել բոլորի մեղքերը, չքացնել ու բառնալ
մեջտեղից.

Ինչպես փայլն այն փոքրիկ կայծի, չնչին չափա-
զանց և չքոտի,

Որ ընկնելով ծովը տիեզերատարած՝ կորչում է
իսպառ:

Դ

Արդ, մատյանն այս վերծանողների աղոթքների
խոսքով,

Ողորմի՛ր Որդուդ խաչի և մահվան չարչարանք-
ների համար, Հա՛յր գթած,

Որ նախապատճառն եղավ ողբածայն և արտոս-
րածին իմ այս նվագի,

Եվ որ պատրաստեց կենաց փրկության դեղն
այս մեզ համար,

Թող ի՛նքն էլ բուժվի քո անվամբ, հզո՛ր:

Նա, որ մեզ այսպես խոստովանության ճամփան
ցույց տվեց,

Թող իր պարտքերից լինի անարատ:

Նա, որ հպարտության թևերը կտրել վարդա-
պետեց մեզ կենաց կանոնի այս պատգամ-
ներով,

Թող որ ազատվի բոլոր մահառիթ պատահար-
ների չար կապանքներից

Եվ երրորդությանդ բարեգործությամբ նորոգ-
վի դարձյալ և լուսավորվի.

Հնդ որում և մե՛նք պիտի համարենք մեզ
երջանկացած:

Ե

Դո՛ւ, որ այսքան շատ հրաշքներ ես գործել,
Հայր ամենաստեղծ, անուն ահավոր, ձայն սար-
սափելի,
Կոչումն ընտանի, խոսք համբուրելի, ազդումն
սքանչելի,
Հրաման սոսկալի, էություն անքննելի, գոյու-
թյուն անձառելի,
Իսկություն անբավելի, զորություն անզննելի,
կամք ամենաբարի,
Տերություն անսահմանելի, մեծություն անչա-
փելի, բարձրություն անբովանդակելի,
Քանակություն անկոռելի, առավելություն
անհասանելի,
Պատճառ Որդու՝ հայրությամբ, այլ ո՛չ նախա-
դաս լինելով.
Քո միջոցով և անպարագիր քո զորության
չնորհիվ
Սաստի՛ր տառապեցնող ու դիվական տենդիս
ջերմությունը,
Որ սպրդելով՝ մեղքի հետ մտավ ներս, որպեսզի
փախչի մարդուց,
Զարհուրելով երկնավոր գառիդ սխրալի և
առատահոս արյան վտակից,
Որով սրսկվեցինք թեպետ մի անգամ, բայց
մաքրվեցինք մշտնջենապես:

Ω

ԵՎ արդ, արարչակերտ այս խորհրդի պատկա-
ռելի խոնարհությունից
Թո՛ղ ամաչի սատանան իր հրեշտակների չար
գործերի համար,
Տանջվի՛ թող և հալածվի, հեռանալով ու
արտաքսվելով
Քո բնակարանն եղող մարմնի խորանից դեպի
խավարն արտաքին:
ԵՎ ջնջի՛ր, սրբիր, դու մեր դեմքերից արցունքն
ողբագին
ԵՎ հեծեծագին հառաչանքները մեր սրտերից
հա՛ն,
Հիշելով հարվածները քստմնափուշ, ժանտատե-
սիլ և մահառիթ այն բեեռների,
Որոնցով գամվեց Միածինը քո՛ խաչի աշտարա-
կի վրա՝ թող չարը ցավի գա
ԵՎ կողքը հերձող սայրասուր սլաքի ուժգին
բախումից,
Որից խորապես մեծ վերք ընդունեց,
Նախապատճառը մահվան թող իսպառ սատա-
կի՛, կորչի՛:
ԵՎ քանզի հոգին ավանդելիս իր գովյալ գլուխը
խոնարհեց քո գիրկը, Բարձրյա՛լ,
Ուստի ապստամբությունն անբարի բարքի տեր
Բելիարի
Թո՛ղ ի կոր կործանվի, ըստ ամենայնի կորուստի
մատնված:

Եվ դարձյալ, քանզի անմահ իսկությունն թաղ-
վեց ու ծածկվեց երկրի արգանդում,
Ապա, ուրեմն դրանով թող որ գոռոզի հոխորտ
Հպարտությունը
Մահվան դժոխքի մթաստվեր ու խոր հատակը
դիտի,
Եվ թող որ հիշի առաջին հարվածն անբժշկելի,
Որով մահացավ դիմադրությունը թունոտ վի-
շապի՝
Ամենազորի կենարար չարչարանքների գնով:
Ի փառ քո և ի գովեստ Որդուդ ու Սուրբ Հո-
գուդ է
Խոստովանությունն այս, Հայր ողորմության,
Քանզի խորախորհուրդ ձեր միության մեջ
Մեկդ մյուսի զորությանը կարոտություն չունի:
Ուստի և մենք փառավորելով Բանդ անսկիզբ ու
մարմնացած՝
Փառավորած կլինենք նույնպես Հորդ անժամա-
նակ:
Եվ քեզ՝ միակ Սուրբ Երրորդությանդ,
Հավասարապատիվ տերությանդ,
Համարուն, անբաժան ինքնությանդ՝
Օրհնաբանություն, գոհություն, զորեղություն
Եվ անճառ վայելչություն մեծության բարեվի-
ճակ հարթության,
Զուգակշիռ հավասարության՝
Հավիտյանս. ամեն:



Բան Իթ-

Սըդի խորժերեց խոսք Ըստու-ծո Հետ

Ա

Դու ես բարիքի սկիզբը միայն,
Գթություն անճառ, Որդիդ բարձրյալ միակ
Աստուծո,

Որ ամբողջ օրը արիր մեզ համար ներման փրկա-
րան,
Եվ ո՛չ կորստյան դատապարտարան,
Օրվա չարը փոխարկելով ինձ համար հույսի
ավետման:

Բժիշկ ախտավորիս,
Հովիվ մոլորյալ ոչխարիս,
Տեր՝ քեզ ապավինած ծառայիս,
Գինի անապակ՝ մեծապես տրտմածիս,
Դեղսպեղանի՝ վիրավորվածիս,
Ազատություն՝ մեղքով գրավվածիս,
Բարի օրհնություն՝ մերժվածիս,
Շնորհաց կնիք՝ արհամարհվածիս,
Կոչումի օծումն՝ կողոպտվածիս,
Կանգնումն կրկին՝ կործանվածիս,
Պատսպարան հզոր՝ գլորվածիս,

Օժանդակդ վեհ՝ սայթաքածիս,
Դուռը բարձրադիր՝ տարակուսածիս,
Սանդուղ երանության՝ եղկելիիս,
Ճանապարհ ուղիղ՝ մոլորվածիս,
Թագավոր ներող պարտվածիս,
Քաղցր հուսադրություն՝ լքվածիս,
Կյանքի ձեռնտու՝ վտարվածիս,
Դո՛ւ միայն ես մեծ և ամենառատ, որ քո լիուլի
բարիքների մեջ՝
Ավելի, քան մենք հասկանում ենք և խնդրում,
Սահմանում ես ու միշտ հեղում, ըստ Պողոսի
գոհաբանության:
Քանզի դո՛ւ պատվիրեցիր, որ վաղորդյանից
մինչև արևամուտ,
Միւնույն օրում՝ ինն անդամ հիսուն և չորս ան-
գամ տասը հեղ բարիք գործենք՝
Միշտ ակնկառույց, սրտով անարգել ներելով
միմյանց մեղքերը սիրով,
Մի բան, որ մարդիկ չեն հուսա երբեք, թե կա-
րելի է այդքանը խնդրել:
Իսկ եթե իմ թշվառությունն ու անարգությունը
համեմատենք քո փառքի հետ,
Ամենակարող զորություն ահեղ, Աստված բոլո-
րի, օրհնյալ Տեր Քրիստոս,
Ինչպիսի՝ կշռով և կամ ի՞նչ չափով կհավա-
սարվի հողս՝ հաստողիդ,
Զի անհուն ես դու, անբավ և անհետազոտելի,

Բացարձակ բարի և թե բարկության խավարին՝
անմասն:

Ուստի հույժ նվազ են համեմատած քո մեծու-
թյան հետ

Թիվն այն աստղերի, որոնք ոչնչից ստեղծեցիր
դու ու հորջորջեցիր ուրույն անուններով
Կամ մթնոլորտում հեղված նյութն երկրի, որոնք
հաստելով անգոյությունից՝

Կերտեցիր երկրի զանգվածն ահագին՝

Շատ քիչ են, քան թե վերևում հիշված այն թի-
վը, որով

Դու քեզ նմանվել վարդապետեցիր:

Բ

Ահա՝ ընկղմվեց, ծածկվեց անհետ քո երկայնա-
միտ կամքի լույսի մեջ

Բոլորի չարիքն, իբրև դույզն մեդ, որ փարատ-
վում է արևի տապից,

Ինչպես որ այստեղ մեր իսկ բնական զգացում-
ները

Նույնը ցույց կտան մեր հասարակաց բարքերի
մասին:

Քանզի մարդկանցից այն ո՞վ մեղանչեց, և
չզղջաց.

Ո՞վ ապականվեց՝ և չամաչեց.

Ո՞վ գարշելի դարձավ՝ և չպատկառեց.

Ո՞վ սխալվեց՝ և չապաշավեց.

Ո՞վ կործանվեց՝ և չհեծեծեց.

Ո՞վ գայթակղվեց՝ և չստրջացավ.
Ո՞վ հաղթվեց՝ և իր բերանը չփակեց.
Ո՞վ խաբվեց՝ և հոգոց չհանեց.
Ո՞վ ճաշակեց լեղի՝ և չդառնացավ.
Ո՞վ ընկավ բարձրից՝ ու վեր չցատկեց.
Ո՞վ կորցրեց մեծությունը՝ և չաշխարեց,
Ո՞վ զրկվեց երանությունից՝ և չլացեց.
Ո՞վ կողոպտվեց փառքի շնորհներից՝ ու չողբաց.
Ո՞վ ինքն իր դեմ դարձավ վնասակար՝ և իրեն
չմեղադրեց.
Ո՞վ մերժվեց Աստուծո երեսից՝ և չհառաչեց.
Ո՞վ լսեց Աստուծո սպառնալիքներն՝ ու չսոս-
կաց.
Ո՞վ մի մեղքի դեմ հազար չափաղեց.
Ո՞վ մերկացավ ձմռանը՝ և չսարսուաց.
Ո՞վ գործեց անօրենություն՝ և իր խիղճը չքար-
կոծեց.
Ո՞վ տեսավ ստրուկին իր մեծության մեջ՝ և չցա-
վեց,
Ո՞վ չարիք գործեց՝ և ինքն իրեն չնզովեց.
Ո՞վ բռնվեց ախտով՝ և իր անձը չպարսավեց.
Ո՞վ ամոթալի գործեր կատարեց՝ և իր մարմինը
չձաղկեց.
Ո՞վ ձեռք զարկեց անպատկառ գործի՝ և իր օրը
չանիծեց.
Ո՞վ հիշեց գործածները՝ ու չտապացավ.
Ո՞վ մտաբերեց գաղտնիները՝ և չխորովվեց.

Ո՞վ նկատեց ծածուկները՝ և կորսայան մահ չխնդրեց.

Ո՞վ աներեռույթները պատկերացրեց՝ և գլուխը չկախեց.

Ո՞վ հեշտավետ մեղանչումների հետ հնոցի անշեղ բոցը չխառնեց.

Ո՞վ պագչոտացավ՝ ու չպապակեց.

Ո՞վ իր կամովին գործած չարիքներն հիշեց՝ և իր սատակման համար չաղոթեց.

Ո՞վ չպատմվելիքները՝ և չխռովվեց.

Ո՞վ մարդկային էության համար անտանելիները՝ և չթախծեց.

Ո՞վ մեծամեծներն՝ ու չմաշվեց.

Ո՞վ անբծությունն ապականողները՝ և չտոչորվեց.

Ո՞վ տարագրության պատճառ եղող հանցանքները՝ և չտագնապեց.

Ո՞վ իր երեսի աղտեղի տեսքը՝ և անձը վերնայնի բարկության արժանի չհամարեց.

Ո՞վ աչքի առջև բերեց գլխավոր մեղքերից մեկը՝ և մահացու զենքով չխոցվեց.

Ո՞վ խայտառակություններն հիշեց՝ և վհատության ողբածայն վայեր չհյուսեց.

Ո՞վ արքայական իր գահից զրկվեց՝ և կարկամելով՝ վայր չգլորվեց.

Ո՞վ պսակի տեղ հող դրեց գլխին՝ և հոգով չարաչար չմահացավ.

Ո՞վ պայծառ պատմուճանի տեղ քուրծ հագավ՝
և չտխրեց.

Ո՞վ իր կյանքը կորցրեց՝ և չերկնեց արյուն-ար-
տասուք.

Ո՞վ լուսեղեն վերարկուի փոխարեն խավար հա-
գավ՝ և չնվազեց.

Ո՞վ իր սիրելու սուրբի վրա չթառամեց:

Սրանք են ահա ճշգրտագույն կերպարանքը՝
հանդիմանության արժանի մեղապարտիս՝
Տիսուր դեմք, շիջած ճառագայթ, ցամաքած խո-
նավություն, նիհարած շրթունք,

Անշքացած տիպ, տիրամած հոգի, այլայլված
ձայն, ծոված պարանոց:

Եթե մեկը իսկական ճշմարտությունը ցույց տա,
Չի ստի, ասելով՝

Ամբարտավան միտք և անհպարտ սիրտ,

Ու չլինի՝ պարգև խնդրելու անկարող թշվառ և
աղերսելու ծարավյալ,

Ինքնակշտամբ դեգերող, իրավամերժ սովյալ,

Արդարալլուկ քաղցած, պատշաճաղատ հար-
վածյալ,

Ինքնավկա մահապարտ, արժանապես արտաքս-
ված և անձնանեծ եղկելի:

Սրանց օրինակ են ծառայում արդարագործ
փարիսեցին, որ կշտամբվեց,

Եվ մեղապարտ մաքսավորը, որ հոչակվեց:

Գ

Եվ արդ, եթե այն չարիքներն ամեն,
 Որոնք հնարում ու սերմանում է մեր սրտերի
 մեջ մոլորյալներիս գտնող բանսարկուն,
 Իրենց տեղն ունեն օրվա հաշվի մեջ,—
 Ինչո՞ւ չպիտի համրես դու նաև այն բարիքները,
 Որոնք խնամակալ ապրեցնող քո կամքն է տնկել
 մեր մեջ,
 Արիացնելու համար մեր հոգին, ո՞վ բարեգութ
 Տեր, հզոր ու հաղթող,
 Քավիչ մեղավորների, ամենակարող փրկիչ բո-
 լորի,
 Եթե ուզենաս՝ անդունդները դու երկնքի կփո-
 խես,
 Եվ կամ խավարը մթին՝ կփոխարկես լույսի,
 Դառնահամ լեղին՝ քաղցր մանանայի.
 Եվ կամ սաստկավիշտ ողբ ու կոծերից հարսան-
 յաց ուրախ պար ու նվազներ կարող ես
 կազմել:
 Սրանք բոլորն էլ դյուրին են քեզ մոտ և հնա-
 րավոր,
 Եվ դեռ ավելի՛ն կարող ես անել,
 Զի տիրում ես դու համայն բոլորին ահավորա-
 պես.
 Փա՛ռք քեզ հավիտյանս հավիտենից.
 ամեն:



Բան I.

Սրբի խորժերից խոսել Եսպո-ծո Հեղ

Ա

Եվ արդ, թող ճշմարտվի քո խոսքը, ողորմած
Աստված դու բոլորի,
Ներող և օրհնյալ՝ այն մեղավորի մասին,
Որը մի օրում բազմաթիվ անգամ գայթելով՝
Վերջապես դարձի կգա զղջացած,
Թեկուզ այդ լինի իր վերջին շնչում
Եվ կամ չարություն գործած միջոցին:
Մանավանդ որ դժնյա կցորդս այս անձնիշխա-
նական՝
Մի մարտիկ է միշտ, խաբող շողոքորթ, ստու-
թյան հարած,
Հստ առակողի՝ հողմեր արածող,
Դժվարբոնելի փախչող՝ հաստողից,
Որսողին գերի՝ մոլեկան մարմնիս,
Ներհակ տնկակից, որի պատճառած վարանում-
ների
Որքանությունը դո՛ւ գիտես միայն:
Սակայն մեղքերին հաջորդում են խիստ հուսա-
հատական և տաժանակոծ,
Բազմավաղելի հո՛ւյժ ողորմագին բարձրածայն
ողբեր,

Արցունքով գրված և ի գութ շարժող թառանչ-
ներ թշվառ,
Որոնք մեղքերով տագնապողը, Տե՛ր, տարա-
ծում է քո առջև ամոթահար:

Բ

Եկ որպեսզի կրկնաբանությունս շատախոսու-
թյան չհասնի
Ու չդառնա ավելի ողբալի, քան այս,
Ասեմ, թե նա արքայություն չէ, որ համարձակ-
վում է խնդրել քեզանից,
Այլ միայն թեթևացում տանջանքների.
Ոչ թե կհուսա բնակվել լույսի մեջ ապրողների
հետ,
Այլ՝ խավարի մեջ, գերեզմանականների հետ,
զգայական չնչով.
Ոչ թե բարձրերի, այլ խորտակվածների և բեկ-
յալների հետ լինել.
Հոգնաբեկ է նա իր հանգստի մեջ և խրախճան-
քում՝ տրտում,
Դեմքով ժպտուն է և մտքով՝ խոցված.
Երեսը ծիծղուն, և աչքն արտասվագին.
Առերևույթ սփոփիված է ձևացնում իրեն,
իսկ արտասուքը սրտի դառնությունն է վկա-
յում:
Իր երկու ձեռքում երկու ըմպանակ, մեկն
արյամբ լցված և մյուսը՝ կաթով.

Եվ վառվող երկու բուրվառ ունի նա, մեկը
խունկով լի, մյուսը՝ ճենճերով.
Անոթներ երկու, մեկը քաղցրությամբ լեցուն և
մյուսը՝ դառնությամբ.
Մի զույգ բաժակներ երկու նյութով լի, մեկը
արտասուք և մյուսը՝ ծծումբ.
Մատների ծայրով բռնած երկու տաշտ՝ գինի մե-
կի մեջ ու մյուսում լեղի:
Տեսողության դռներ իրարու ներհակ՝ մեկը լաց
լինելու և մյուսը սխալվելու տրամադիր.
Իրար հակառակ երկու հալոցներ, մեկն արծար-
ծում է և մյուսը՝ մարում.
Երկդիմի նայվածքներ՝ մեկը ողոքիչ և մյուսն
անխնա բարկությամբ լեցուն.
Դեպի վեր պարզած երկու բազուկներ՝ մեկն
հարվածելու, մյուսը մերժելու.
Դեմք՝ երկու տարբեր արտահայտությամբ -
տխուր ու ցասկոտ.
Մեկի փոխարեն երկու կշտամբանք՝ ներկայի
համար և ապագայի.
Ապավինումներ կասկածելի՝ մեկը «գոնե» և
մյուսը «թերես».
Մի բերանի մեջ երկակի բարբառ՝ մեկը եղկու-
թյուն, մյուսը խոռվանք.
Միւնույն սրտում երկու զգացմունք՝ մեկը կաս-
կածելի հույսի և մյուսը ճշգրիտ կորսայան.
Ամպ լի լրթագույն, ահազնատեսիլ կրկնակ տե-
ղումով՝ մեկը սուր նետեր և մյուսը՝ քարեր.

Որոտում ահեղ երկու բերումով՝ կարկուտ ու
կըակ¹.

Ցավագին գիշեր երկու վշտով լի՛ լալու ու մահ-
վան².

Սուգի առավոտ երկու գոչյունով՝ մեկը սաստի
և մյուսն սպառնալիքի.

Արևներ երկու՝ երկու կողմերից - մեկը խավարի
և մյուսը կիզման³:

Գ

Եթե մի բոռնցք բարձրանա հանկարծ, կար-
ծում է՝ իրեն է հարվածելու.

Իսկ եթե երկարի ձեռք պարգևածիր՝ նա ինքը
իրեն համար հույս չունի:

Երբ մեկը պարծենում է, կորանում է նա,

Եվ երբ գլուխը բարձր են պահում՝ ընկճվում է.

Երբ չար արարքներ են հիշվում՝ հեծում է.

Երբ սրբերի մասին է խոսվում՝ ամաչում է.

Հանդերձյալի մասին պատմվելիս՝ երերում է.

Երբ մեկից օրհնվի հայտնապես՝ ծածուկ անի-
ծում է իրեն.

Երբ գովեստ լսի մեկից՝ կշտամբում է իրեն պար-
սավանքով.

Երբ նախատվի սաստկապես՝ գտնում է նա այդ
իրավացի.

¹ Հմնտ. Ելից Թ. 24

² Հմնտ. Ողբ Երեմ. Ա. 2 Բ. Կորնթ. Է. 10

³ Հմնտ. Յայտն. Զ. 12

Եթե ուժգին ծաղրվի՝ համարում է այդ սակավ
հատուցում նա իր բազմաթիվ մեղքերի
համար.

Եթե լսի նա՝ իր մահն են ուզում՝ ասում է «այո՛»
և կրկնում դարձյալ.

Եթե երկնքից մահ ու շանթ ճայթի՝ իր դեմքն
հազիվ է բաձրացնում վերև:

Իր իրավունքների մատյանն է գոցված,
Պատասխան տալու հույսն է կտրված,
Համարձակության ճամփան է փակված:
Զէր դանդաղի նա լինել անձնասպան,
Եթե չլիներ այդպիսի կորուստն անփրկելի քայլ:
Արդարեւ վա՛յ այն մեղավորին,
Որ տարակուսյալ կկանգնի երկու ճամփաների
վրա, ըստ իմաստունի հոգելից խոսքի:

Դ

Եվ արդ, ինչպե՞ս չես ողորմում, բարեգութ,
Այսքան ողբածայն ու կողկողագին հեծեծանք-
ներիս,
Դու այս խոսքով բարձրացար, ասելով, թե՝ «Ես
ողորմած Տե՛ր եմ»:
Ահա՝ չարության դեմ գերուս՝ կա քո բարու-
թյունը,
Մահապարտիս դառնության դեմ՝ քո քաղցրու-
թյունը,
Կորուսյալիս գտնելու համար՝ քո ճառագայթը,

Հանդուգնիս մոլության դիմաց՝ քո ողորմությունը,
Վնասակարիս խստության դիմաց՝ քո հեզությունը,
Կործանվածիս օգնելու համար՝ քո աջը,
Ընկղմվածիս դուրս բերելու համար՝ քո ձեռքը,
Անողջանալի վերքերիս բժշկության համար՝ քո
մատը,
Ահաբեկվածիս պաշտպանության համար՝ քո
ոգին,
Ապերախտիս վստահացնելու համար՝ քո երկայ-
նամտությունը,
Ամենադաժանիս օծման համար՝ քո զորությունը,
Մեղավորիս քավության համար՝ քո հրամանը,
Փախչողիս ապավինության համար՝ քո ոտքը,
Դուրս սլացողիս պատսպարության համար՝ քո
բազուկը,
Վրիպածիս առաջնորդության համար՝ քո լույսը,
Տարակուսյալիս հնարավորության համար՝ քո
հանճարը,
Անիծյալիս դարձյալ ստանալու համար՝ քո օրհ-
նությունը,
Վհատյալիս քաջալերության համար՝ քո խրա-
խույսը,
Վշտացյալիս մխիթարության համար՝ քո բաժա-
կը,
Նեղյալիս ընդարձակության համար՝ քո կամքը,
Ատելուս կանչելու համար՝ քո սերը,

Սասանյալիս հաստատության համար՝ քո խոս-
քը,
Հոգով վիրավորվածիս համար՝ քո արյան կա-
թիլը,
Անտես ցավերս ցրելու համար՝ քո ակնարկու-
թյունը,
Հուսահատվածիս վերընտրության համար՝ քո
իշխանությունը,
Կտրվածիս պատվաստելու համար՝ քո կցորդու-
թյունը,
Մահվան խավարով ծածկվածիս համար՝ շողդ
կենսատու,
Խռովյալիս հանդարտության համար՝ քո խա-
ղաղությունը,
Վայրագորեն օտարացածիս համար՝ քո ողջույ-
նը,
Մոլորվածիս դարձի բերելու համար՝ քո ձայնը,
Զի դու ես տիրում բոլորին քո գլխությամբ,
Եվ չկա քո մեջ խավարի մասնիկ,
Եվ չկա բարություն առանց քեզ,
Եվ քեզ է վայելում փա՛ռք
Հավիտյանս, ամեն:



Բան ԱՀ Սրբի խորչերից խոսվ Եսպո-ծո Հետ

Ա

Եվ այսպես ահա՝ սաստկացրի ես ինձ անսփոռ
փելի ցավ պատճառող կրքերս,
Ողբալով երկար և՝ հեծեծագին, և՝ մեծահառաչ,
Որ դու, ողորմա՛ծ, սկզբնահայրդ անհայտ ու
ծածուկ մեղքերի խոստովանության,
Որդիդ կենդանի Աստուծո, Տեր Հիսուս Քրիս-
տոս,
Քաղցրությա՛մբ նայես քավելու համար.
Արդարե կարող ես դու և ձեռնհաս ես ճշմար-
տապես,
Եթե կամենաս՝ հնարներ ունես դու.
Ինչքան որ կամենում ես, այնքան էլ կարողա-
նում ես,
Հարստանում ես դու մեծապես՝ տալով, քան թե
առնելով,
Քաղմանում են դանձերդ ցրվելով, քան թե հա-
վաքելով,
Շատանում է ստացվածքդ սփռելով, քան թե
խնայելով,
Դիզվում են պաշարներդ տարածելով, քան թե
ամբարվելով,

Հավատալով այսպես այս բոլորին՝ հույս ունեմ
ես,

Թե փրկության ե՛լք կդտնեմ քեզանով:

Հավատում եմ անարգս պատվականի հետ,

Եվ հույս ունեմ ես Աբրահամի հետ և Աննայի.

Զի մեկը հավատաց քո խոսքին, և մյուսը քա-
հանայապետի ձայնին անսաց:

Ուստի և մեկը խոր ծերության մեջ դարձավ
անհամար որդիների հայր,

Հուսալով, թե պիտի կարողանար Սառայի
արգանդն ամուլ ու զառամ՝

Բազում ժողովուրդների, մարգարեների և ըն-
տիր թագավորների

Պտղածին և օրհնաբեր անդաստա՞ն տեսնել:

Իսկ մյուսն՝ անմշակ երկիր - սենյակը իր որո-
վայնի

Բարգավաճեց յոթ զավակներով,-

Թի՛վ անհաշվելի, որ աստվածային հավիտենու-
թյուն է նշանակում,

Նրա հարակայության սահմանն անհետազոտե-
լի,

Եվ ավագանի նորածին որդոց առատություն
անսպառ:

Թիվն այս պանծալի, որ չունի իրեն զույգը հա-
վասար, ո՛չ վերջ, ո՛չ վախճան,

Կուսություն է մի ուրույն ընտրությամբ միշտ
նվիրական՝

Որ անճառորեն հավիտենության դժվարմեկնելի
խորհուրդն է խորին ու մեր մտքից վեր¹:

Բ

Արդ, համարի՛ր դու փրկությունից հուսահատ
հոգուս համար որպես արդարացում
Ամենավարան ու կողկողագին ձայնն այս
դառնապես հեծեծող սրտիս,
իմ հավատքի փոքր այս դավանանքը խնդրա-
գին
Վերոգրյալ երջանիկների հավատքին հավասար
դասելով,
Որպեսզի ես էլ ապրեմ նրանց հետ բերկրալից
կյանքով,
Ամուր կառչելով քո շնորհներին, քան թե գոր-
ծերիս:
Մանավանդ որ քո շնորհները բարձր են և
կրկնակի փառավոր
Եվ չեն կշռվում ու չափվում խոսքով,
Ու հավատում եմ ես անտարակույս, թե հզորա-
պես կարող են քավել
Մեղքերս բոլոր՝ խաղաղեցնելով խռովությունն
իմ:
Այդ շնորհներն են՝ քո ահավոր արյան հետ միա-
սին և՝ մարմնավոր ծնողդ խնկելի,

¹ Պյութագորյան ըմբռնումով, որ մուտք է գործել նաև քրիստո-
նեական բնազանցության մեջ, յոթ թիվը համարվում էր կոյս
թիվ, որովհետև տասից ցած ոչ մի թիվ ծնունդ չի տալիս նրան
կամ ծնունդ չի առնում նրանից. այդ պատճառով էլ համարվում
էր հավիտենականության խորհրդանշ:

Առաքյալների խմբերը, դասը մարգարեների,
Եվ գնդերը ողջ՝ հեծյալ, հետևակ և սպառազեն,
Ու մերկամարտիկ քաջաբար մրցող մարտիրոս-
ների, մենակյացների,
Բույլքը ընտրյալ և բարեկրոն վանականների,
Հույլքն երկրի վրա ապրող երկնային հոգեղեն-
ների,
Զինվորություններն մեզ կցորդակից վերնա-
կանների,
Տուրքը երախայրիքների, մատուցումը զվարակ-
ների,
Զահավառումներն ու բույրը յուղով օծված
խունկերի,
Հաղթանակը փրկության նշանների,
Կառուցումներն աստվածաբնակ խորանների,
Եվ շնորհի խորհուրդը կատարող ձեռքերը քա-
հանաների:
Այսպես մեր ամեն մի շարժումի մեջ Աստծուն
ենք հիշում,—
Երբ քայլ ենք փոխում, ձեռք ենք կարկառում,
բազուկ բարձրացնում,
Բարի գործերի համար գոհություն և գայթում-
ների համար աղաչանք ենք վերընծայում.
Ընտանեկան զրույցներում և հասարակաց խո-
սակցության միջոցին
Մեր բնական ձայնի, գործերի հաջողության և
առաքինական ջերմեռանդության պահե-
րին,

Գիշեր թե ցերեկ, քնած ժամանակ և կամ արթմ-
նի,
Քեզնով առաջնորդված հոգեորների օգտակար
ընթացքում,
Ազգերի միջև պատերազմների և դեերի հետ
մղվող մարտերում
Հերձվածողների հետ վիճաբանելիս,
Փոքրերի և մեծերի հետ վերաբերվելիս,
Ըմպելիքներ խմելու և կերակուրներ ճաշակելու
միջոցին,
Մեզ համար հաճո և թե վշտալից բոլոր դեպքե-
րում,
Որոնցից առաջինների համար աղոթում ենք
մենք, որ մնան այնպես,
Եվ մյուսները՝ որպեսզի դու զերծ պահես նրան-
ցից՝
Անճառ, անսահման քո հնարքներով սքանչելա-
պես,
Քանզի ամեն ոք հավատում է, թե օգնելու
պատրաստ՝ կարող ես դու միշտ,
Տակավին ծծկեր երեխաններին, դեռահաս պա-
տանիներին,
Վայրենաբարո մարդկանց և գոռող ստամբակ-
ներին:
Եվ թատերական տեսարանների մեջ մինչև ան-
դամ,
Եվ խառնիճաղանջ բազմությունների խուռնե-
րամներում

Եվ կամ հզորիդ կամքին անհաճո կաքավումնեւ-
րի ու կայթերի մեջ
Դու չե՛ս մոռացված:

Գ

Դո՛ւ ստեղծեցիր, բոլորին, և քո՛նն են բոլորը,
Եվ դու բոլորի՛ն պիտի ողորմես, միա՛յն բարե-
գութ.
Զի թե մեղանչեն իսկ՝ քոնն են, քանզի քո հաշ-
կի մեջ են,
Եվ գիտեն քո զորությունը, ինչպես առակողն է
աղոթել,
Որին ես ինքս էլ ձայնակից եմ իմ խղճուկ խոս-
քերով,
Որպես հանցավոր հաստատելով այդ:
Հանդգնում եմ ասել, թե նա, ով գովեստով է
տալիս անունդ, հավատալով, թե կաս,
Եվ եթե նույնիսկ նա յոթնապատիկ անգամ
հանցանքով վարակված լինի,
Ինչպես բերված է որպես ապացույց-օրինակ՝
արդյոք քոնը չէ[՞] դարձյալ:
Երբեմն արջնաթույր ագռավների մեջ
Սպիտականիշ աղավնիների երամներ ենք տես-
նում,
Եվ ձիերի մեջ խրոխտ, անմաքուր՝ որոջներ հան-
գարտաբարո,
Եվ գագանակերպ շների թվում՝ օրհնված գառ-
ներ,

Խստության մեջ՝ հեզություն,
Թերության մեջ՝ կատարելություն,
Հանձնապաստանության մեջ՝ խոնարհություն,
Ստության մեջ՝ ճշմարտություն,
Խորամանկության մեջ՝ միամտություն,
Նենգամտության մեջ՝ անբծություն,
Զարագործության մեջ՝ բարություն,
Լկտիության մեջ՝ պարկեշտություն,
Անգթության մեջ՝ ողորմություն,
Անհուսության մեջ՝ ապաշավություն,
Բարկության մեջ՝ քաղցրություն,
Թշնամության մեջ՝ հաշտություն,
Խածանողության մեջ՝ անօխակալություն,
Զարչարանքի մեջ՝ քաջալերություն,
Եվ նետաձգության մեջ՝ օրհնություն:
Ուստի անկարող եղա ես դատել ճշգրիտ կերպով,
Թե այն ո՞վ պիտի երկրածիններից կարենա
կանխել ժառանգելու քեզ,
Որ կշտամբում ես անաչառորեն և արդարու-
թյամբ
Այն ամբարիշտին, որը ինքն իրեն մաքուր է
կարծում
Եվ այն պոռնիկին, որ զղջացել է:
Բոլորի համար բարեգործդ դո՛ւ, միա՛կ թագա-
վոր,
Օրհնյալ ի բարձունս, հավիտյանս.
ամեն:



Բան Լի

Սրբի խորժերից խոսչ Ըստու-ծո Հեղ

Ա

Եվ արդ, ես հետինս վերոհիշյալ արժանավոր-
ներից,
Պատժապարտների կարգը արդարև դասելով
ինքս ինձ,
Ողորմություն եմ խնդրում քեզանից բոլորի
աղերս-աղոթքների հետ՝
Նկունների հետ և անհամարձակների,
Տկարների հետ և փոքրիկների,
Ընկածների հետ և արհամարհվածների,
Տարագրվածների հետ և դեպի քեզ դարձածնե-
րի,
Երկմիտների հետ և աներկմիտների,
Կործանվածների հետ և վերականգնածների,
Ընկճվածների հետ և հաստատվածների,
Գլորվածների հետ և կանգնածների,
Մերժվածների հետ և ընդունվածների,
Ատվածների հետ և կոչվածների,
Ապշածների հետ և զգաստների,
Անառակների հետ և զսպվածների,
Հեռացածների հետ և մոտեցածների,

Հերքվածների հետ և սիրվածների,
Ամոթահարների հետ և զվարթացածների
Եվ ամաչկոտների ու խնդամիտների հետ:
Սակայն ես այստեղ կպատմեմ դարձյալ ոչ թե
մեղքերը երուսաղեմի,
Հստ մարգարեի հրամանառության իր նախնի
ժողովրդի վերաբերյալ,
Կամ Հակոբի տան գործերն անօրեն –
Այլ պիտի գամ հայտնելու իմ մեղքերը,
Քանզի իմ մահվան աղետի վրա ավա՛ղ ասելով
ըստ մարգարեի,
Ես ինքս իմ ձայնով պիտի մեղադրեմ ինձ՝
Սաղմոսողի խոսքի համաձայն,
Որպեսզի իմ այս համայնապատում խոստովա-
նությամբ
Պետք չունենալով այլևս ավաղ բացականչելու,
Մեկ անգամ ընդմիշտ մաքրվեմ էիդ օրհնյալ
հրամանով:

Բ

Եվ արդ, ահավասիկ, ծունկի գալով բարերարիդ
քաղցրության առջև,
Փռվում եմ հողին ցույց տալու համար, թե ինչ-
պես եմ ես ի մահ գլորվում,
Ես, որ սոլունի նման սահելով և անասնական
գետնաքարշությամբ,
Կամավոր կերպով գամեցի ինքս ինձ այս կորս-
տական անցավոր կյանքին

Եվ սակայն հիմա հենված քեզ, ո՞վ Տեր,
ինչպես մարմնով Դավթի արմատից ընձյուղ-
ված¹

Եվ անճառորեն անեղ աստվածությանդ հետ
շաղկապված հաստատուն դավագանի
վրա, որպես կյանքի նեցուկի,

Երախտիքներիցդ պատկառելով՝ կիսով չափ
պիտի կանգնեմ դարձյալ,

Կիսաբաց դեմքս հակած դեպի վար, և աչքս դե-
պի վեր,

Խղճալի հայացք հառելով քեզ, Տե՛ր, որ մոտիկ
ես մեր հեծություններին,

Եվ ողորմություն ես բոլորովին, համակ քաղց-
րություն,-

Եվ լիճը լույսիս լցրած արցունքով՝
Հույսով լեփ-լեցուն պաղատանքներս մեծու-
թյանդ պիտի ես վերընծայեմ:

Լսի՛ր աննվազ և ամենառատ երկայնամտու-
թյամբ՝ քեզ դառնացնողիս,
Դո՛ւ մեր փրկության պայմանըդ միակ:

Աստված բոլորի, անճառ մեծություն,
Անբովանդակելի բնություն, անքննելի իսկու-
թյուն,

Հզոր զորություն, կարող բարերարություն,
անպակաս լրություն,
Անճառ ժառանգություն, վայելչական վիճակ,

¹ Եսայի ԺԱ. 1

Առատ պատրաստություն, անստվեր իմաստություն,
Տենչալի տուրք, անձկալի շնորհ, բաղձալի
բերկրություն,
Անտխուր հանգիստ, անտարակույս գյուտ,
անկապտելի կյանք,
Անծախելի ստացվածք, անփոխարինելի բարձ-
րություն,
Ամենարվեստ բժիշկ, անսասան հաստատու-
թյուն,
Դարձուցիչ մոլորվածների, գտնող կորուսյալ-
ների,
Հույս՝ ապավինածների, լույս՝ խավարածների,
Քավիչ մեղանչածների, ծածկարանդ փախչող-
ների,
Անդորրիչ խռովյալների, փրկություն մահա-
ցածների,
Արձակիչ կապվածների, ազատիչ մատնված-
ների,
Պատսպարան սահածների, վշտակիցդ սայթա-
քածների,
Երկայնամտություն տարակուսյալների.
Լուսեղեն տեսք, ցնծության ցույց, օրհնության
անձը,

Հոգի երեսաց, զորություն դեմքի, հովանի գլխի,
Շարժիչ շուրթերի, ազդումն խոսքի, կառավար
անձի,

Բարձրացնող բազկի, երկարող՝ ձեռքի, սանձաւ-
կալ սրտի,
Ընտանի անուն և մերձավոր ձայն,
Կցորդություն հարազատ, խնամածություն
հայրական,
Խոստովանված անուն, պաշտելի պատկեր,
անպարագիր տիպ,
Երկրպագված տերություն, բարեբանված հիշա-
տակ,
Խնդության մուտք, անվրեպ շավիդ, փառքի
դուռ,
Ճշմարտության ճանապարհ, երկնածեմ սան-
դուղք,
Եվ այլ բազմաթիվ խոսքեր գովեստի, անհամար
շարքով, անբավ տողերով,
Որոնք ո՛չ երկրածին բերանը կարող է արտա-
բերել,
Ո՛չ կարող է տանել մարմնեղեն գործիքը,
Եվ ոչ էլ հոգեղեն իղձերը կարող են կշռել:

Գ

Ամեն տեսնող աչք քեզ է նայում, Տե՛ր, Աստ-
վա՛ծ բոլորի,
Եվ դո՛ւ էլ նայիր քեզ հառաջածայն պաղատող
բոլոր քո ծառաներին,
Աղախիններին, թե նրանցից էլ աղաչող լինի:
Ընդունի՛ր և իմ այս ողբ ու լացով ցանկասեր
աչքիս ցողն արցունքների,

Որով, Տե՛ր Քրիստոս, թրջում եմ ահա՝ ոտքը
անարատ քո մարդեղության,
Եվ օրինակով այն խորհրդավոր՝ հանցավոր կնոջ
մազերի¹,
Ընդունի՛ր նաև իմ դավանությունն ու դարձը
առ քեզ.
Եվ Համբուլիներով իմ շրթունքների՝ կյանքի՝
փրկարար հաղորդությունը քո ճաշակելու
Համաշունչ կերպով կապիր ինձ քեզ հետ
անլույծ միությամբ:
Որպես երաշխիք քո ողորմության և քո գթու-
թյան նույնական բարերար,
Փոքր իմ հավատքի փոխարեն թող որ քո մեծ
պարզեց ընդունեմ քեզնից:
Գթառատ սիրով, ծառայիս հանդեպ որ դավա-
նում է անունդ անձկալի,
Թող որ խստաշունչ հողմերը ձմռան՝
Փոխարկվեն հանդարտ մեղմաշունչ օդի,
Սաստիկ մրբիկը՝ ախորժ զեփյուռի,
Կասկածներն երկչոտ՝ մեծ վստահության,
Եվ պատիճների պատուհանները՝ երանության,
Թախծագին տագնապները՝ հոգեոր խրախ-
ճանքի,
Ալեկոծությունները ծփանուտ՝ խորին խաղա-
ղության,
Եվ ղեկի թիավարումները՝ ապահով նավա-
հանդստի՝ հասնեն թող,

¹ Մագթաղինացու

Մեղքերի բեռների բերքն իմ փոխարկվի՛ թող
չնորհաց թոշակի՛:
Քեզանից եկող այս բյուր և բոլոր բարություն-
ներով
Թող որ բարձրանա ամենահզորիդ անունը
խնկված ու խոստովանված.
Թող ամաչի չար բանսարկուն՝ վոնդված և հա-
լածական.
Թող ոչնչանան մուրհակները մեղքերիս.
Կտրվեն կարթերը, և որոգայթները հեռացվեն,
Կտրատվեն կապանքներն ու վիճը վանվի,
Վնասները վերանան, ցնդեն պատրանքներն ու
մեղքերը ջրվեն,
Պարտաթղթերը պատռվեն, լուծը խորտակվի և
քեղիքը քանդվեն:
Թող որ փոխարեն չար հանցանքների մոայլ
մթության
Նաև դեերի մեզ շրջապատող բանակների տեղ՝
Փառքիդ արել հասնի մեզ աջից, ձախից, դիմա-
ցից, թիկունքից նույնպես,
Լուսավորելու և ապրեցնելու, փրկելու համար:
Իսկ նրանց վրա, ովքեր լիահույս ապասում են
քո լույսի երեալուն՝
Թող գարնանային ջինջ առավոտյան ճաճա՛նչը
շողա:
Զի կարող ես դու ամեն ինչի մեջ և բարերար ես
բոլորի համար,
Կամենում ես դու, որ ամենքն ապրեն և փրկու-
թյունն ես ուզում բոլորի:

Դ

Ո՞վ ամենապարզեւ ձեռք Հիսուս Քրիստոսի,
Դարձի՛ր դեպի ինձ, քո շնորհատու աջը կար-
կառելով,
Բնակվի՛ր իմ մեջ և միացիր ինձ,
Զհեռանալով սիրո քո սենյակ՝ անձուկ իմ
սրտից:
Նկարագիրը անեղծանելի, որ նշխարն է քրիս-
տոնեական փրկավետ կոչման պանծալի
լույսի,
Հանդիսանալով միջնորդ քո տեղակ՝
Թող ինձ հետ հավետ մնա անկորուստ այս մատ-
յանի մեջ
Այն հոգով, որ մեզ հավիտենական կյանքի կտակ
էր խոստացել անճառ հորինողդ երկնից:
Եվ քեզ՝ պատճառիդ միակ, և մյուսիդ միակ
պատճառից,
Եվ քեզ՝ որ դարձյալ պատճառն ես մեկի,
Երբյակ անձնավորությանդ և մի աստվածու-
թյանդ
Վայելում է փառք վեհ երկնավորներից և սրբե-
րի դասերից,
Հավիտյանս հավիտենից. ամեն:



Բան 1.Պ.

Սրբի խորժերից խոսել Ասպոն-Ճռ Հետ

Ա

Բանաստեղծությունս այս պաշտամունքի,
Որ հոգուս բերքից նվիրում եմ քեզ, օրհնյա՛լ
բարեգութ,
Խառնի՛ր, կցելով հավասարապես խնկազգեստ-
ների նվիրումներին,
Բարեպաշտ կնոջ՝ Մարիամի յուղի հետ անուշա-
հոտ:
Հավասարելով նույն այն երջանիկ պոռնիկների
հետ,
Որոնց հարգանքով հավերժահրաշ ընդունեցիր
դու,-
Թող որ մեծապես պարարվես և իմ նվաստ խոս-
քերով,
Անհասանելի և բարեբանյալ բարձրյալիդ գլխին
տեղ տալով նրանց,
Զերծ սաղմոսողի բամբասանքներից, որ ասում
է, թե՝
«Մեղավորի յուղը թող չօծի վարսագեղ գագա-
թը»:

Այլ արա՛ այնպես, որ զորեղացած կրկնակի չա-
փով
Բուրումն այս գրքիս խոստովանության ազդի
շատերին,
Նման համասվյուռ, ամենատարած տանն
աշխարհալիր,
Եվ լինի նրանց հիշատակի պես անմոռանալի:
Դու նույն այն Տերն ես, որ զգաստացրիր կա-
նանց մեղավոր և չարախորհուրդ,
Որոնց այլաբանական նմանությունն էր վարքը
մարգարեի,
Որ ճշմարտատիպ քո պատկերի պես կերպավո-
րեցիր.
Առաջ նրա՛նց մեջ այն անճառորեն տպավորե-
լով՝
Ծայրագույն չնորհիդ կատարումը դու ինձ
ցույց տվեցիր:
Անասուններին որպես կերակուր գարու փոխա-
րեն՝
Քո կենաց հացի ցորենի բերքը դու բազմահամ-
բար մեզ պարգևեցիր:
Ապականացու արծաթի տեղակ քո արքունա-
կան պատկերը տվիր.
Հիմարաբար թմրեցնող գինու փոխարեն Արար-
չիդ արյան բաժակը տվիր.
Հին ժողովրդի հայրատ կնոջից առած յուղի
տեղ՝ չնորհիդ օծումն ինձ դարձրիր դու.

Վերցված գլխաշուք կտավի տեղակ՝ անբիծ վերաբկուն.

Պերճաշուք ապարանջանի փոխարեն՝

Օրենքով, Ավետարանով և գործնական առաքինությամբ ձեռք բերված թոփչքներ բարեմասնության.

Ականջը վայելչորեն զարդարող գինդի փոխարեն՝

Հիշատակն անստվեր տերունի ձայնիդ.

Եվ լանջքը պճնող մանյակի տեղակ՝

Քո դրած քաղցր և արդար լուծի օրենքներն համակ:

Բ

Բայց ինչո՞ւ սրանցով պարծենամ ես և չամաչեմ դարձյալ նրանց համար:

Ուստի փոխելով եղանակն այս ողբերգական աղոթագրքի,

Ինչ որ հարմար է ինձ և արժանի՝

Մեղապարտությանս պատիժը պիտի հատուցեմ ես այս գլխում,

Որպես խստագույն դատախազ՝ համառոտ մեջբերումներ անելով մարգարեական գրվածքներից,

Ոչ թե նրանց հետ պարելով ուրախ, այլ լծակցելով նրանց ողբերին,

Ուր կան հառաջներ, հեծության ձայներ, ցասկոտ բողոքներ,

Խորտակիչ նախատինքներ, սաստիկ լաց ու կոծ:

Բայց մեծ Աստծուդ գութն ամենահաս հույս
ներշնչեց ինձ,
Որով և վերև հիշված բազմաթիվ աղետների
հետ տրվեցին նաև՝
Զղջումներ, խոստովանություններ, ավետիս,
պարգև,
Լույսի երևումներ, խրախույսներ աստվածա-
յին, փառքի ժառանգություն,
Հրաշքների հայտնություններ և տեսիլներ
սքանչելի,
Որոնցից ոմանք հույս են ներշնչում, ոմանք
պատճառում վհատություններ,
Որոնց մեջ կամավ, ինձ՝ կործանվածիս վիճակ-
վեց կորուստ:
Զի եթե վարագույրի ծածկոցը Եզեկիելն Աստու-
ծո զգեստ անվանեց¹,
Որով ժողովուրդը կարկատուն կուռքեր ստեղ-
ծեց, որը պոռնկանալ է համարում նրանց
համար,
Հապա ես ո՛րքան ավելի պատիժ պետք է որ կրեմ,
Անմաքուրս, որ Աստծուն եմ հագել ներսից ու
դրսից:
Զարմանում եմ ես, թե ինչպե՞ս չեմ կիզվում,
Շշմում, թե ինչպե՞ս չեմ հափշտակվում,
Տանջվելով, լքվելով, չարչարվելով ու ջախջախ-
վելով,

¹ Եզեկ. ԺԶ. 16

Մանրվելով, խորտակվելով, կտրվելով ու կտոր-
կտոր լինելով

Կորուսչի ժանիքներից, ինչպես որ գրված է
Գրքում:

Բայց պահված է ինձ միայն սա՛, որպես հիշե-
ցուցիչ շող փրկարար հույսի,

Թե Քրիստոսյան Ավետարանը կյանք է ճշմա-
րիտ,

Ինչպես որ բառն էլ ա՛յդ է ծանուցում.

Որով տրվում է՝ մեր մեղքերին դարձ,

Պարտքերին՝ չնորհում, եղծումներին՝ նորոգու-
թյուն,

Քավություն անօրենության, բուժումն վերքերի,
Անդորրություն տագնապի, ներումն պատժի,

Հանդարտումն պատերազմի, անձրև՝ կրակի
վրա,

Պատուհասի փոխարեն՝ պարգև,

Եվ սատակման տեղակ՝ չնորհի արժանացում,

Եվ կյանքի ազատություն՝ մահվան գործիքի
փոխարեն:

Գ

Բայց ինչո՞ւ հիշեմ այսքանն ու մեկ-մեկ թվար-
կեմ այստեղ,

Անճառելիներն ի բաց թողնելով:-

Բարձրյալ Հոր հիշատակությամբ մեր կցորդու-
թյունը Որդու հետ,

Հանուն միածին Որդու՝ ընտանությունը Հոր
հետ,
Եվ հաղորդումն Հոգու հետ՝ սրանց ակնարկու-
թյամբ
Խաչի փրկանքը և սփոփանքը խոսքի,
Ամենագետի կշռով հոժարակամ վարձատրումն
բարվոք,
Ավազանը կենդանարար, որպես միջնորդ հաշ-
տության,
Եվ այլ բարիքներ անթիվ, անհամար՝ բարերա-
րիդ կողմից կուտակված,
Որ զերծ են լծից և հարկից ազատ,
Իշխող են և ո՛չ իշխանության տակ:
Սրանք են ահա, որ մահվան դառնության մեջ
ինձ անտարակույս կյանք են ավետում.
Զի եթե սրանք ես չունենայի, դեռևս վաղո՞ւց
կորած էի ես,
Իսկ և իսկ, ինչպես երգողն է ասել:
Որդուն փոքրացնելով չէ, որ ես փառավորում
եմ Հորը,
Եվ ոչ էլ Հոգին նվաստացնելով՝ Որդուն եմ տա-
լիս նախապատվություն,
Այլ դավանում եմ Երեքն Համափառ՝ նույն
Արարչությամբ:

Դ

Ամենակալ, բարերար և մարդասեր Աստվածըդ
ամենքի,
Երևացողների, աներւույթների Արարիչ,
Փրկող և զորացնող, խնամող և խաղաղարար,
Հոգի հզոր Հոր,
Արդ՝ աղերսում ենք քեզ բազկատարած
Մենք ահավորիդ առջե, գոչելով,
Մաղթանքով հեծության,
Սաստիկ դողալով և երկյուղով մեծ
Մոտենում ենք անզննելի զորությանըդ մատու-
ցելու

Նախ՝ պատարագը մեր այս բանական,
Իբրև հայրական անսասան պատվին
Աթոռակցի և փառակցի, արարչակցի,
Եվ քննողի՝ գաղտնիքները խորածածուկ¹,
Կատարյալ կամքի էմմանուել Հոր՝
Քեզ առաքողի, բոլորի փրկչի,
Կենդանացնողի և ստեղծողի:
Քո միջոցով մեզ ծանուցվեց միասնական աստ-
վածությանդ
Անձնությունը միասնական Երրորդության:
Քեզանով և քո միջոցով շառավիղները առաջին
Նահապետաց, որ տեսանող անվանվեցին,
Անցյալներն ու գալիքները,
Եղածներին ու չգոյացածներին
Անպաճույժ խոսքով վերապատմեցին:

¹ Ա. Կորնթ. Բ. 10

Քեզ Մովսեսը Աստծու Հոգի ճանաչեց¹,
Որ ջրի վրա քո ընթանալով,
Զորություն անսահման,
Հոգածու հզոր հովանավորմամբ
Պաշտպանելով թեատրած,
Գթասիրելով նոր ծնունդներիս՝
Պարզեցիր խորհուրդը գավագանի,
Որի օրինակով վերջին վարագույրի
Հոսուն մանվածը ստեղծելուց առաջ,
Տիրապես կարող,
Անէությունից՝ բոլոր գոյերի ու էակների
Բնությունն ամբողջ ստեղծագործեցիր:
Քեզանով բոլոր արարածները
Պատրաստվում են նորոգվելու Հարության ժա-
մին,
Որ մեր այս կյանքի օրն է հուսկ վերջին
Եվ օրն առաջին՝ ողջերի երկրի:
Քո ազգակիցը հօժար միությամբ
Հնազանդվեց քեզ՝ իբրև իր Հորը:
Հոր էակիցը, անդրանիկ Որդին՝
Մեր կերպարանքով, քո գալն ավետեց,
Ճշմարիտ Աստված՝
Հավասար ու համագոյ Հորը հզոր,
Քեզ հայհոյելն անքավելի համարեց,
Քեզ հաստելով՝ ըմբերանեց չարախոսներին,
Եվ ներեց արդար ու անարատ գտիչն ամեն ինչի,
Որ մեր մեղքերի համար մատնվեց

¹ ԾԱՆԴ. Ա. 2

Եվ հարություն առաջ՝ արդարացնելու մեզ¹:
Փառք նրան քո միջոցով,
Բարեբանություն քեզ՝ ամենակալ Հոր հետ
Հավիտյանս հավիտենից. ամեն:

Ե

Վերստին կրկնեմ խոսքի նույն կարգով,
Մինչև որ ազգմամբ հավատի լույսը հայտնվի
Հրաշապես
Վերավետելու նոր խաղաղություն²:
Արտասվալից հառաչելով՝
Աղաչում և աղերսում ենք
Արարչությանդ՝ փառավորված բոլորի կողմից,
Անեղծ, անստեղծ և անժամանակ գթած Հոգուդ,
Որ մեր անմոռնչ հեծությունների
Բարեխոսն ես ողորմած Հորդ առջև,
Որ պահում ես սրբերին
Եվ մաքրագործում հանցավորներին,
Եվ տաճարներ ես կանգնեցնում
Բարձրյալ Հորդ կենդանի ու ապրեցնող կամ-
քին³:
Արդ՝ ազատիր մեզ անմաքուր բոլոր գործերից,
Որ հաճելի չեն քո բնությանը,
Թող չմարի փայլը լույսիդ շնորհների
Մեր աչքերի հայեցումից,

¹ Յօնվճ. Դ. 25

² Յովի. Ի. 19-21

³ Ա. Կորնթ. Գ. 16

Որովհետև իմացանք՝ կմիանաս մեզ,
 թե հար աղոթենք և ապրենք ընտիր, խնկելի
 վարքով¹:
 Եվ քանզի մեկրդ Երրորդությունից պատարագ-
 վում է,
 Մյուսն ընդունում՝
 իր անդրանիկի հաշտարար արյամբ
 Դառնալով դեպ մեզ,
 Դու կընդունես մեր պաղատանքները
 Եվ կհարդարես մեզ օթևաններ՝
 Պատվական, բոլոր հարմարանքներով,
 Երկնավոր գառանդ ճաշակումը վայելելու,
 Որպեսզի առանց գատապարտող պատիժների
 ընդունենք
 Նոր կյանքի փրկության անմահարար այս մա-
 նանան²:
 Եվ թող հալչի մեր գայթակղությունն այս հրից,
 ինչպես մարգարեն կենդանախարույկ կայծակ-
 մամբ
 Ունելիով մատուցեց³,
 Որ ամենուր քարոզվի քո գթությունը,
 Ինչպես Աստուծո Որդով՝ Հոր քաղցրությունը,
 Որ անառակ որդուն մոտեցրեց Հոր ժառանգու-
 թյանը⁴

¹ Սատր. ԺԸ. 20, Ա. Կորնք. Զ. 17

² Յովհ. Զ. 49-50

³ Եսայի Զ. 6-7

⁴ Ղուկ. ԺԵ. 20-32

Եվ պոռնիկներին առաջնորդեց
Արդարների երանության երկնային արքայու-
թյանը:
Այո՛, այո՛, մեկն եմ ես նրանցից,
Ինձ ևս ընդունիր նրանց հետ
Որպես մեծ մարդասիրության կարոտածի,
Քո չնորհներով փրկվածի,
Քրիստոսի արյունով գնվածի,
Որ այս ամենի մեջ և ամեն ինչում
Երևա քո աստվածությունը:
Հոր հետ փառավորված համապատվորեն,
Մի կամք և մեկ իշխանություն գովական,
Որովհետև քոնն է գթությունը,
Ե՞վ կարողությունը, և՛ մարդասիրությունը,
Զորությունն ու փառքը՝
Հավիտյանս հավիտենից:
Ամեն:





Բան Լ.Դ.

Սրբի խորչերեց խոսի Ըստու-ծո Հետ

Ա

Արանք են ահա՝ իմ թշվառացած շնչի իղձերը և
դափանանքներս քեզ հարմարական,
Քեզ, որ ամեն ինչ բովանդակում ես խոսքով,
Տե՛ր Աստված,
Ինչ որ ճառել եմ նախորդում՝ այստեղ պարզեմ
պիտի ես երկրորդ անգամ:
Իսկ խուռն բազմության առջև գրավոր բեմա-
խոսություն
Կամ ժողովրդին մեկնաբանումներ անելու հա-
մար
Այս աղերսական աղոթքները ես նվեր բերեցի,
Որոնք հետեւյալ գոհաբանական տողերի մեջ եմ
շարադրել ահա':

Բ

Աղաչում եմ անփոփխելի և ամենազոր տերու-
թյանը հզոր Հոգուդ,
Ուղարկիր ցողը քո քաղցրության և բարեգոր-
ծի՛ր,

Դրոշմելով հոգուս և զգայություններիս իշխող
իմ մտքում

Ամենալից շնորհը քո բազմապարգև ողորմու-
թյան:

Հերկիր մարմնեղեն կարծրացած սրտիս բանա-
կան անդաստանը,

Որ կարող լինի պտղաբերելու սերմդ հոգեոր:
Խոստովանում ենք՝ քո ամենիմաստ էությամբ
է, որ

Ծաղկում են մեր մեջ, աճում-ուռծանում պար-
գևներն ամեն:

Դո՛ւ ես ձեռնադրում առաքյալներին ու մար-
դարեներին ներշնչում,

Ուսուցանում ես վարդապետներին ու համրե-
րին խոսեցնում,

Բացում խուլերի ականջները փակ:

Ազգակիցը քո, էակիցը Հոր անդրանիկ Որդին
Քո գործակցությամբ իրագործելով այս բոլորն
ահա՝,

Քեզ Հոր խսկության հավասարակից Աստված
հոչակեց:

Շնորհ արա՛ նաև ինձ մեղավորիս, որ ես էլ խո-
սեմ համարձակությամբ

Կենդանարար խորհուրդն ավետյաց Ավետարա-
նիդ,

Արագաթուիչ մտքի ընթացքով անցնելով անհուն
ասպարեզներով

Քեզնից ներշնչված կտակարանների:

Եվ երբ ձեռնարկեմ ես հանդիսավոր մեկնաբանության՝

Հասնի՛ թող որ քո գթությունը նախ, իր ժամանակին ներշնչելով ինձ՝

Քեզ արժանին, պիտանին և հաճելին՝

Քո աստվածության փառքի և գովեստի,

Ինչպես նաև կաթուղիկե Եկեղեցու կատարյալ շինության համար:

Երկարի՛ր ինձ վրա աջդ ամենամերձ

Եվ զորացրո՛ւ ինձ գթությանդ շնորհներով.

Փարատի՛ր իմ մտքից մոռացության մեզը մթին,
Ցրելով նրա հետ և՝ խավարը մեղքի,

Որպեսզի մտքով և խոհերով այս Երկրավոր
կյանքից ի վեր բարձրանամ:

Լուսավորի՛ր դու վերստին իմ մեջ, ո՛վ գերահզոր,

Աստվածային հրաշալի ծագումն անստվեր,
Որպեսզի արժանի լինեմ ուսանելու և ուսուցանելու,

Որպես բարի օրինակ՝ աստվածասեր լսողներին:

Գ

Խոստովանում, դավանում ենք,

Պաշտում ենք ու երկրպագում

Ամենասուրբ Երրորդության

Միասնությունը զուգափառ.

Անձառելի աստվածություն,

Մշտաբարի և նույնագոյ համապատիվ,

Մտքի սլացքին անհասանելի
 Վեր՝ ամեն մի օրինակից և բարձր՝ նմանությունից,
 Որ գերազանց է անպարագիր բացարձակությամբ,
 Առաջ՝ քան հիմքը հավիտենության,
 Դեռ չստեղծված, չտարրացած էակներից,
 Անթարդմանելի օրհնաբանությամբ
 Ամենահարուստ մեծությամբ հավետ պսակված,
 Ժամանակները սահմանող,
 Ժամանակի մեջ կերպ առածների
 Հորինող-պատճառ,
 Տեսանելիներն ու անտեսները ստեղծող
 Ո՛չ անվամբ է չափվում,
 Ո՛չ հորջորջմամբ է նշանակելի,
 Ո՛չ որակով նմանված
 Եվ ոչ կշռած քանակով:
 Չի ձևանում օրինակով,
 Չի ճանաչվում որպիսությամբ,
 Տարածված չէ թերությամբ,
 Ամփոփված չէ լրությամբ,
 Երբեք չէ գրավված
 Եվ կամ մի տեղ ամփոփված:

Դ.

Հայր գլխության, ամեն ինչի Տեր,
 Աստված բոլորի, որ երկնքում են և երկրում,
 Բացի Բանից միակ, որով իրենն է ամեն ինչ,

Բոլոր շնչերի տվող ու ստեղծիչ,
Բացի իսկակից Հոգուց,
Որով համայնք կազմեց:

Ե

Մեկը երեք անձնավորությունից՝
Երջանկափառ համազոր ահավորությունից,
Այն վերևներից խոնարհվեց ներքեւ,
Որ ի սկզբանե անբաժան էր ներքեիններից,
Մնալով անբաժան փառքի աթոռից
Եվ անկարոտ իր ծնողի տեսության,
Պարզաբար մտավ կույսի արդանդը,
Այնտեղից ելավ՝ մարմին առնելով անբաժանելի,
Լիակատար մարդ և անպակաս աստվածություն:
Միակ Որդին միակ Հոր
Եվ միածին անդրանիկը
Աստվածամայր տիրածին կույսի:
Իրական երկրածին մարդ եղավ՝ լինելով Արարիչ,
Բայց նման չէր նա երկրածիններին,
Այլ նոր ու չքնաղ
Թագավորներին հրաշափառ,
Չտեսնվեց նա դարերում
Եվ չպատահեց ժամանակներում,
Հստ սաղմոսողի եղավ անդրանիկ¹
Թագավորների ամբողջ աշխարհի:
Մարմնում մեր բնությամբ կերպ առավ անապակ խառնմամբ,

¹ Սաղմ. ԶԸ. 28

Հոգու և մարմնի հարաբերությամբ,
 Ոսկու և հրի,
 Կամ ավելի պարզ՝
 Լույսը օդի հետ,
 Անփոփոխ և անանջատ:
 Նա եկավ կամավ խաչին մեռնելու,
 Հանց անարատ գառ գոհվելու գնաց¹,
 Եվ մի զորավար ինքնիշխանությամբ
 Փրկագործեց իր արարածներին:
 Երբ կենդանի էր՝ չարչարվեց իրոք
 Եվ գերեզմանվեց՝ աստվածությունից անբաժա-
 նելի:
 Եռօրյա թաղմամբ
 Այն դժոխական սանդարամետում վհատ բանտ-
 վածներին
 Քարոզեց նորոգում և լույս:
 Եվ ավարտելով փրկագործ ամբողջ
 Խորհուրդը իր մարդեղության՝
 Վերակենցաղեց նա աստվածաբար:
 Հողմերի թևով քերովբեների վրա բարձրացավ²:
 Ծածկվեց ամպով անքննելի³:
 Ծածկվեց երկնից վեր բարձրանալով
 Ճոխությամբ բազմեց սկզբնաժառանգ Հոր
 աթոռին հավասար,
 Որից բնավ չբաժանվեց,

¹ Եսայի ԾԳ 7

² Սաղմ. ԺԷ. 11

³ Գործք Ա. 9

Զեռքբերովին չկորցնելով,
Զնվազեցնելով սեփականը:
Որով և գալու է դատաստանին հատուցման
Արդար իրավանց չափով կշռելու գաղտնիքը,
Որին սպասում ենք,
Որին՝ աղոթում,
Հավատալով՝
Ամեն ինչում, ամեն ինչով
Ամենակալ տերությանն իր,
Որ իսկապես մեկն է միայն այն միակից
Եվ միակի փառակցությամբ
Հավիտյանս երկրպագված:

Ω

Մշտապես օրհնում, բարեբանում ենք
Հոր և Որդու հետ
Նրանց էակից Հոգուն:
Նա ամենազոր,
Կատարյալ և սուրբ և ճշմարիտ է,
Որ արարածներ ստեղծեց անէից,
Ինքնագործ է և իշխանակից մյուս երկուսին՝
Անեղծ, անսահման թագավորությամբ,
Պատճառն առաջին, ահավոր Բանը
Նույն այդ ինքնության,
Նույնն է նաև բարձրացած Հոգին:
Բարի ինքնակալ,
Հոր պարգևները ամենքին բաշխող՝
Հանուն Միածնի փառքի պանծացման,

Որ սահմանեց օրենքները,
 Ներշնչող եղավ մարդարեներին,
 Առաքյալների մեջ տպավորվեց ազգակցի
 փշմամբ¹:
 Աղավնակերպ Հորդանանում հայտնվեց,
 Եկողի փառքի մեծության համար,
 Եվ ավանդական գրքերում փայլեց,
 Հանճարեղացրեց և զորեղացրեց իմաստուննե-
 րին,
 Վարդապետներին կատարյալ դարձրեց.
 Օծեց արքաների, օժանդակեց թագավորների,
 Վերակացուներ տվեց, փրկություններ կար-
 գադրեց,
 Զիրք շնորհեց, քավություններ հանդերձեց,
 Քրիստոսի մահվամբ մկրտվածներիս²
 Իր բնակությունը մաքրագործեց³,
 Որին Հոր և Որդու հետ
 Նաև Առւրք Հոգին ներգործեց⁴
 Եվ ինքն Աստված է՝
 Խնկված տիրապես
 Ամենայնը և ամենայնի մեջ⁵:

¹ Յովհ. Ի. 22

² Յօնվմ. Զ. 3

³ Եփես. Բ. 22

⁴ Յովհ. Ե. 19

⁵ Ա. Կորնթ. ԺԵ. 28

Է

Երբորդության մեջ նախորդ հիշվողը

Մեծ չէ մյուսից,

Նվաստ չի լինում իր նմանակցից հետո հիշելով,

Կամ մեկին ակնարկելիս դեմքի շփոթում չի լինում

Եվ երեքի տրոհմամբ առանձին դեմք չի դառնում:

Եվ չէր մեծարվի Հայրն ամեն ինչով՝

Իր մեջ չունենար Բանի զորություն,

Եվ կամ չունենար թե Հոգին իր հետ՝

Անշունչ, անկենդան մեկը կլիներ

Եվ կնվազեր ամեն հորդորից:

Բանը եթե չճանաչվի Հոր անվամբ՝

Մի որբ կլինի, [կլինի] լքյալ

Սերած ինչ-որ մի մահկանացուից:

Նույնպես և Հոգին

Նշանակալից պատճառ թե չունի՝

Անշուք ինչ-որ բան կլինի միայն,

Թափառիկ իբրև անդասելի շունչ:

Բայց եթե մեկը փորձի բաժանել

Հորը իր Որդուց,

Հակածառելով, թե նախ նա չկար,

Կամ բամբասանքով մի անբանական

Պատվել ցանկանա վեհ մեծությունը,

Եվ կամ բխողին նսեմ համարի

Իբրև էապես ոչ հոգեորի՝

Այդպես այլ, օտար մի բան է մուծվում
Կամ այլայլական ինչոր շփոթում
Սուրբ Երրորդության անարատ պատվին,
Այդպիսիներին հավատո բանի պարսաքարերով
Հերքում ենք, դուրս ենք վտարում
Իբրև գազանի կամ դժնի դեի,
Նզովում նրանց, նրանց դեմ փակում
[Սուրբ] եկեղեցու գավիթը, որ և
Դուռըն է կյանքի:
Ուստի փառք տալով Երրորդությանը՝
Որպես մեկ և նույն տերություն,
Ամբողջական ու հավասարագոր,
Զուգաձայն սրբասացությամբ, համարժեք հար-
թությամբ,
Օրհնյալ, փառաբանյալ երկնքում ու երկրում,
Անդրանիկների խմբից և երկրածին բանական-
ներից
Հավիտյանս հավիտենից: Ամեն:

Ը

Արդ, այս մատյանում պատկերված ծածուկ
խորհուրդների բարձրաձայն խոստովա-
նությունը
Մեծ Աստծուկ ամենալուր ականջներին ընծա-
յեցի ես,
Եվ ահա՛ նրանով սպառազինված՝ մտա ասպա-
րեզ:

Բայց ոչ թե նրա համար, որ կարոտ լինելով ձայ-
նիս՝ նրանով մեծանաս,—
Զի երբ տակավին չէիր ստեղծել դու ամենայն
ինչ,
Երկինքը անմահ փառաբաններով
Եվ երկիրը՝ հողաստեղծ բանականներով,
Դու փառավորված էիր արդեն քո լրության
մեջ,—
Այլ, որպեսզի ինձ՝ մերժվածիս նույնպես,
անձա՛ռ քաղցրություն,
Արժանի անես քեզ ճաշակելու՝ խոսքիս հաղոր-
դությամբ:
Սակայն ի՞նչ պետք է, որ կյանքի կանոն- արքու-
նի հրամանիդ համաձայն ասեմ՝ Աղոնա՝
Տեր,
Եվ հրամայված պատվերդ չկատարեմ,
Ես, որ իմ ձեռքով իսկ ջնջեցի ինձ,—
Պատգամիդ նվիրված ոսկեղեն տախտակս խո-
սուն,
Աստվածային մատներովդ գրված, և որը խոր-
տակելն է իրավացի¹.
Եվ ես այժմ նրա նմանությունն երկրորդ՝ տիրա-
տեսիլ մուրով եմ պատկերում:
Բայց, քանզի բազում խանդաղատանքով պա-
ղատեցի քեզ,—
Որոնք չեն գրված թեև այս գլխի տողերի շար-
քում,—

¹ Ելից ԼԲ. 19

Հսիր, բարեգութ, այս խոսքերի հետ նաև բու-
լորը:

Թող աղերսագին այս աղոթքներս էլ հոդվեն
նրանց հետ,

Թերեւս մաքուրների և քո կամքը կատարողների
կողմից

Յուղով շաղախված և մեջը խորիսին բաղարջի
նման

Հացն այս նվիրված՝ դրվի քո փառքի սեղանի
վրա:

Ո-

Բայց դու, բարերար, համակ մարդասեր,
Քրիստոսդ մի միակ Աստուծո, հզոր և ամենա-
կալ,

Որ գերազանցում ես քաղցր ու խնամածու քո
գլխությամբ

Ոչ միայն ինձ գոյակից մարդկանց առհասարակ,
Որոնք ենթակա են խոռվումների և բազմապիսի
հակառակությանց՝

Այլև անարատ հրեշտակներին,

Եվ սրանցից էլ նույնիսկ ավելի՝ սրբասուններիդ
անբիծ, անբասիր,

Որոնցից մեկն էր նաև Եղիան, որի խստության
նշանները

Երեք ձևով երեան եկան Քորեք լեռան վրա՝
Շարժով ահագին, կրակով կիզիչ, և ուժգին հող-
մով:

Իսկ քո հեղությունը երկայնամիտ հայտնվեց
մեղմիկ օդի քաղցրությամբ, հանդարտա-
բարո.

Զի ողորմություն ես կամենում դու միայն ու
միայն, ինչպես գրված է:

Թեև մարդկային սերնդից ոմանք գեղեցիկ վար-
քով

Առաքինաբար այլ նմանություն առան երկնա-
յին,

Սակայն երկրածին են նրանք նույնպես՝ մարդ-
կանցից ընտրված:

Իսկ դու չես կարող չարանալ, զի բարի ես իս-
կությամբ,

Համորեն օրհնյալդ, համա՛կ փրկություն,

Լիովին հանգիստ և անդորրություն ընդհան-
րական,

Դեղ առողջարար՝ ախտավորների համար համո-
րեն,

Կենդանի ջրի աղբյո՛ւր դու վճիտ, ըստ Երե-
միայի:

Դարձի՛ր գեպի ինձ և ողորմիր, անկարո՛տ Աստ-
ված,

Դու, որ այնքա՛ն ծարավի ես ու պապակ իմ
փրկությանը,

Որ մինչև անգամ երկնային անմահ և օրհնաբա-
նող զվարթուններին պաշտոն հանձնեցիր

Հանուն մարդկության փրկության կարգված

Քահանաներ և քավչապետներ հավիտենական
ի դիմաց մեր երկնավորների,
Թշվառ լքյալիս հաշտության համար պաղատե-
լու քեզ մշտնջենապես,—
«Ողորմիր Երուսաղեմին». որը լուսավոր մի
խորհուրդ ունի,
Թե այս երկրավոր Երուսաղեմի սույն օրինակով
խնդրում են նրանք
Քո մեծ հայտնությամբ ողորմել վերին Երուսա-
ղեմին,
Եվ քեզ կցորդված մարդկանցով՝ ընկած հրեշ-
տակների դատարկը լցնել:


Ժ

Արդարեւ լսեցիր դու, բարեգո՛ւթ, անսացիր,
թագավո՛ր,
Ունկնդրեցիր, կյա՛նք և հույս, ի միտ առար,
երկնավո՛ր,
Հարգեցիր, հզո՛ր, նկատեցիր, ծածկագե՛տ,
Տեսար, խնամակա՛լ, կարեկցեցիր, անպատո՛ւմ:
Խոնարհեցիր, մի՛շտ բարձրյալ, նվաստացար,
ահավո՛ր,
Հայտնվեցիր, անճա՛ռ, ամփոփվեցիր, անսահ-
մա՛ն,
Զափիվեցիր, անքնի՛ն, թանձրացար, ճառագա՛յթ,
Մարդացար, անմարմի՛ն, չոշափեցիր, անքանա՛կ,
Կերպավորվեցիր, անորա՛կ,
Կատարեցիր իսկապես բաղձանքն աղաչողների:

Զվարթունների բերանով եղար թշվառիս՝
Բարի, բարեխոս, միջնորդ կենդախ,
Պատարագ անմահ, սպանդ անվախճան,
Նվեր մաքրունակ, ողջակեզ անծախ, բաժակ
անսպառ:

Ուստի, ողորմած, մարդասեր, օրհնյալ,
Քո կենդանատու կամքով թող որ միշտ բարե-
բախտ լինի հոգիս մեղավոր,
Գովյալ երկայնամիտ, քեզ վայել է
փառք հավիտյանս. ամեն:





Արդի խորժերից խոսչ Սայուծո Հետ

Ա

Արդ, Տե՛ր զորությանց, մեծութուն ահեղ,
 Անտարակույս տեսողություն, կամք ամենաըն-
 դարձակ, առատություն անպակաս.
 Ո՞վ կկարողանա պարերգության հանդեսով
 պատվել ցողի մեկ կաթիլը քո բարության,
 Դո՛ւ, որ հետամուտ ես միշտ միջոցներ գտնել
 իմ փրկության համար:
 Եվ դեռ ավելի պիտի գըեմ, որպեսզի պատմվի
 գալոց:
 Հրեշտակասեր չանվանվեցիր դու, որ հիմնեցիր
 պետությունները նրանց:
 Ոչ էլ ասացիր երբեկցե, թե սիրում ես երկինքն
 իր ջահերով,
 Որոնք քո մատներով հորինեցիր դու.
 Այլ ի պատիվ քեզ՝ մեծագույն գովության արժա-
 նի՝ մարդասիրությունը գերադասեցիր,
 Որով կրկնակի՝ մեծացրիր դու քո անունը ան-
 ձառ սոսկալի խորհուրդներով:

Հուսակերպարան երկրայիններին այն՝ սպասա-
վորներ կոչեցիր

Եվ հատուկ մատակարարումների վերակացու-
ներ.

Իսկ երկրածիններիս մահկանացու՝

Պերճացրիր դու տիրական և աստվածային քո
պաշտելի անվամբ.

Ամեն սահմանից, կշռից ու չափից վեր քո ծայ-
րագույն բարության մաքուր ծորումի հա-
մար

Կտակներ անթիվ և անբավ ճառեր հորինվեցին
քեզ:

Դու ևս, մեկն աստվածային էությունից, մար-
դանալով,

Ոմանց՝ իրենց համար, և ոմանց՝ այլոց,

Զեղեցիր կյանքի պարգևներ առատ, պես-պես
հրաշքներ,

Սքանչելիքներ աստվածագործ և նշաններ
ճշմարտատեսիլ:

Եթե գթալով դու ողորմեցիր թերահավատ
անդամալույծին,

Տեսնելով, որ նրան խնամողները հույսով են
դիմում քեզ¹,

Ո՛րքան ավելի զորավոր պիտի լինի քո խոսքը
ամենակարող

Մաքրելու համար մարմինն ախտալից քեզ հա-
ռաչագին աղաղակողիս:

¹ Սատթ. Ը. 2-4, Դուկ. Ե. 18-20

Քանզի արդարեւ շատ ավելի մեծ հրաշք է սրբել
անմաքուր հոգին,

Քան թե լվացված պատկերը աղտին դարձնել
անենթակա.

Մանավանդ որ ավագանի չնորհն ավելանալով
երկրորդի վրա՝

Ե՛լ ավելի է բարձրացնում հայրենի փառքն ան-
ճառ:

Բ

Դո՛ւ ես, Տեր, որ մաքրում ես մեզ,

Ինչպես առաջուց ցույց տվեցիր գու Մովսեսի
վրա՝ քո ընտրյալի:

Դու վերակացու եղար Հակոբի տոհմին,

Նրա մեղքերի և անօրենությունների մեջ,

Երբ Եգիպտոսում՝ Հեթանոսական խավարում
նրանք խարխափում էին:

Դո՛ւ ես լուսավորում մեղավորներին իրենց ըն-
թացքի մեջ, ըստ երգող Դավթի:

Դո՛ւ ես, որ սրտի քարեղեն կարծրությունը
փոխարկում ես մարմնի կակղության,

Որպեսզի կարող լինի քո խոսքն իր մեջ ընդու-
նելու:

Դո՛ւ ես, որ կարող ես ընձեռել ա՛յլ սիրտ և մեկ
ճանապարհ՝

Երկնչել քեզնից կյանքի բովանդակ տեղու-
թյան մեջ:

Դո՛ւ ես, որ խստամիտների մեջ դնում ես քո
երկյուղը միշտ,
Որպեսզի հավատքով ուշք դարձնեն քեզ, մար-
դարեների խոսքի համաձայն:

Գ

Քո աշխարհաստեղծ բերանի օրհնյալ շրթունք-
ների աստվածեղեն անձրևների կաթիլը
կենարար,

Որպես բանալի՝ լսելիքներիս դռանը մոտեցրու,
Որով խորամանկ բանսարկու օձի թույնը վերց-
նես ու բժշկե՞ս դու:

Քո ամենակալ ձեռքով բռնիր շարժվող գործիքն
իմ խոսողության,
Եվ ազդի՞ր նրան ձայնի զորություն,
Դո՛ւ, որ տալիս ես լեզու բոլորին՝ ընտիր խո-
սելու.

Որպեսզի ես էլ, դաստիարակվելով պատշաճա-
պես,

Զլինի, որ մեր նախահոր նման հանդուգն խոսե-
լով՝ զրկվեմ քո լոյսից,
Եվ անբանության դատապարտվեմ՝ որսողից
քշված:

Քո կենդանաբաշխ աջը երկարելով՝
Լուսավորի՞ր վերստին խավարած աչքերն իմ
հոգու,
Որ չլինի թե վիշապի շնչով մարելով լապտերն
համարձակության՝

Գրվանի ներքո մնամ ծածկված¹:
 Վերցրու անօրենություններն իմ, Տե՛ր, և նե-
 տիր նրանք խորքերը ծովի,
 Որ փոքր է անչափ քո անսահման մեծության
 համեմատությամբ,
 Ուր իմ մեղքերը կարող են սուզվել, ըստ մար-
 գարեի:
 Կործանված հոգուս համար կանգնիր նշան
 վստահության²,
 Որ չլինի թե կառուցվելով վհատության կոթող³
 Ծածկվածները հրապարակ հանի բարձրածայն:
 Բա՛ց բժշկարանիդ կենաց վարդապետարանը,
 հզո՞ր և գթած,
 Որպեսզի մեր մեջ կորուսչի ցանած, մշակած բո-
 լոր որոմները չար՝
 Կամքիդ մանգաղով ընդհուպ արմատից հնձես
 ու թափես:
 Երբ Պետրոսի պես քայլերս ուզեցի ուղղել դեպի
 քեզ, Աստված բոլորի,
 Սուզվեցի և ես այս աշխարհային մեղսածուփի
 ծովի ալիքների մեջ,
 Մոտեցրու աջը քո ազատարար, օգնելու համար
 ինձ՝ սասանյալիս,
 Քանանուհու հետ ձայնակից՝ ե՛ս էլ սրտիս խոր-
 քերից

¹ Հմնտ. Սատթ. Ե. 15

² Եզեկ. Թ. 4

³ Հմնտ. Եզեկ. ԺԶ. 31

Պաղատում եմ քեզ, ահա՛, սովահար որսորդական շան նման նման կաղկանձող.

Քո բազմազեղուն ու ճոխ սեղանից բաժին հան և ինձ թշվառ սովյալիս,

Որպես ապօռուստի կերակուր տալով փշրանք-ներն հացի:

Փրկի՛ր նյութեղեն խորանն իմ, ո՛վ գու,

Որ աշխարհ եկար փնտրելու կորածին և ապրեց-նելու:

Զի քո է մեծություն, հաղթություն և զորու-թյուն.

Դո՛ւ ես քավություն և բժշկություն, նորոգու-թյուն և երանություն.

Եվ քեզ է վայելում փա՛ռք,

Երկրպագություն հավիտյանս. ամեն:





Ա

Որքան էլ շատ լինեն մեղքերս,
Շնորհիդ փրկարար արդյունքներն անթիվ
Եվ հանդիսադրումն այն չարչարանքների,
որոնք հանձն առար
Գերազանցում են նրանց միշտ իրենց առավե-
լությամբ:
Հոգիներն համայն իր մեջ ամփոփող աջդ արար-
չագործ
Մահվան գործիքի՝ Խաչի նշանի վրա գամեցիր,
Որպեսզի կամքիդ դեմ երկարող ձեռքս թուլաց-
նես:
Համընթաց քո զույգ ոտքերդ ազատարար
Իմ անսանձության պատճառով պատժարանի
փայտին կպցըիր,
Որպեսզի զսպես զու գթածաբար փայրագու-
թյունը փախչող թշվառիս:

Բ

ԶՀՐԱՄԱՅԵցիր, որ քո օրհնյալ գագաթը կռվող-
ների ձեռքը գոսանար,
Դու, որ քարերի կարծրությունը ճեղքեցիր,—
Որպեսզի այդ օրինակով՝ և ի՞նձ ներելդ կան-
խավ ավետես։

Քեզ՝ խոստովանված Աստծուդ գանող անպի-
տաններին չապառնացիր,
Դու, որ արուսյակը մթնացրիր¹—
Որ մահացածիս բարությամբ հանդերձ հան-
գիստ չնորհես։

Հայհոյիչների չարախոս բերանը չչորացրիր,
Դու, որ լուսնի պատկերը արյան երանգով գու-
նավորեցիր,—

Որպեսզի քեզ գովելու համար անհամարձակ լե-
զուս զորացնես

Զսաստեցիր քեզ նախատողների մոլեգնու-
թյունը,

Դու, որ տարերքն անգամ սասանեցիր,—
Որպեսզի թշվառ գլուխս գթությանդ օծումով
յուղես։

Քեզ մոլորեցուցիչ անվանող աստվածասպան-
ների ծնոտների հողվածներն իրարից բա-
ժանելով չխախտեցիր,
Դո՛ւ, որ քարերի կարծրությունը ճեղքեցիր,—

¹ Եսայի ԺԴ. 12

Որպեսզի բարուց դատարկ իմ հոգին ընդունայ-
նության հոժարությունից հանդարտեց-
նես:

Պահապանների սրերը իրենց ընդերքը չմիսեցիր,
Դու, որ օձի որովայնը հողի վրա սողալուն
մատնեցիր,—

Որպեսզի ոսկորներն իմ տառապյալ մարմնի,
իբր գանձարանում պահված՝

Հարության կենացն արժանացնես:

Երբ կենդանակիր քո գերեզմանի տապանաքա-
րը կնքում էին,

Նրանց տեղնուտեղը թիկունքի վրա պառկեցնե-
լով՝ երկրի անդունդները չսուզեցիր,

Որպեսզի հոգուս տապանակի մեջ լույսիդ
նշխարը հանգչեցնես:

Երբ քեզ կորած և իբրև երկրավոր մարմին
գողացված էին համբավում,

Դու՝ համայնաջինջ և սպառսպուռ չկրճատեցիր
նրանց սերունդները,

Որպեսզի և ինձ, բարուն հետեւող հիշատակվե-
լու անարժանիս իսկ

Անկորուստ կերպով, անվնասելի՝ փրկվածներին
մասնակից դարձնես:

Երբ ուրացողները մոլեգնաբար, որպես մատ-
նության անարդ գրավական՝

Քո Հոր տաճարի գանձարանից մաս էին հա-
նում, կաշառք տալով արծաթ կրկնակա-
պեն՝

**Չդարձրիր նրանց դու քարե արձան,
Նման՝ Մովաբի տատին¹ պատահած այն հին
Հարվածի:**

**Որպեսզի և ինձ՝ Հաստատությանս մեջ վրիպ-
յալիս**

**Եվ մահվան իշխանությանը վաճառվածիս
թշվառ՝**

**Արյամբ քո փրկելով՝ Հաստատուն վեմիդ վրա
կառուցես:**

Օրհնյա՛լ ես կրկին, օրհնյա՛լ վերստին,

Ամեն ինչի մեջ միշտ օրհնաբանված՝

Հավիտյանս հավիտենից. ամեն:



¹ Ղովտի կնոջը:



Ա

Եկ արդ, թեպետև իմ բարու համար քո ինձ
շնորհած վերոհիշյալ պարգևներից
Շատ քչերն այստեղ ես գրի առա,
Ո՞վ ամենագութ բարերար, գովյալ և ամենա-
գոր,
Բայց և այնպես՝ նրանք արքայազուններ են և
ինքնակալ իշխաններ,
Զորության որդիներ են նրանք և վեհածիններ
մեծափառ, լուսանորոգ և հրաշապատիվ,
Որոնք հռչակված են բարձր բռնած հաղթական
դրոշներով՝ պսակապաճույն գեղազարդ-
ված,
Բերելով իրենց հետ անթիվ օրհնաբան, քաղց-
րահամբույր և հեզ,
Երջանիկ խաղաղասեր և աստվածահաճո պե-
տությունները այն վերին նահանգների,
Որոնց վերաբերմամբ աղոթեց մարգարեն՝ ասե-
լով.

«Տե՛ր, զորություններդ արթնացրու և մեզ
փրկելու փութա՛»,
Դրանք ավելի զորավոր են հալածելու մեր մեղ-
քերը
Եվ հալելու ու հեռացնելու կարկուտն անհու-
սության,
Քան թե զորապետը նախամարտիկ՝ երկնային
պարի—
Գիշերավարը այն խավարասեր¹, որը առաջին
հակառակորդն էր բարի Աստծուն:
Անհնար է թվել այն բոլոր չնորհները, որոնք
բարձրյալի կողմից
Անձրևեցին տկարիս, թշնամուս և ապերախտ
ծառայիս վրա:
Իսկ եթե ոք համարձակվի խոսել կարողանալ,
ամբողջը թողած՝
Շատ քիչը պիտի կարենա հիշել այդ չնորհներից:
Դրանց հետ նաև մտաբերելով առաջին նյութը,
որից ստեղծվեց,
Իբրև մի տկար և նկուն՝ հերքված մեծ զորու-
թյունից պիտի պարտվի:

Բ

Սակայն, թեպետև այսպես գրեցի,
Եվ դարձյալ նույնը պիտի վկայեմ հողիս թերա-
հաս խակության

¹ Յրեշտակապետ Միքայելը, որ զգետնեց ապստամբ Երկնային զորաց պետին, սատանան կամ արուայակը:

Եվ ստեղծողիդ կատարելության ու բարիքների
և իմ անարժանության մասին,—
Բայց ամենալույս և բազմազեղուն, աննախանձ,
գովյալ քո արարչության զորության հան-
դեպ

Կփշրվի բանսարկուի պատճառած սրտի կարծ-
րությունը:

Նա է, որ փորձում է հուսահատ վհատությամբ
բարացնել սիրտս,

Սպառել և խոպանացնել երկու աղբյուրներս,
Որոնք իմ զգայական եղեմի մեջ բխեցրեց
տնկողը,

Որպեսզի նրանցով ոռոգվի առատ ու ծաղկի իմ
մեջ բարեգործության դրախտը կենսա-
տունկ:

Ուստի թող չլինի, որ արտասուքներս ցամա-
քեցնելով,

Աղանդահնար պատրանքներով և չարաչար խո-
րամանկությամբ

Դուրս հանի դարձյալ ինձ իմ նախկին փափուկ
վիճակից:

Իսկ երբ երևա հրաշափառորեն համբարձված
Աստվածն

Իր խաղաղությամբ միջնորդն հաշտության
աստվածների մեջ,

Շնորհաց կտակը բերելով իր հետ,—
Բախվելով նրան, ինչպես վիմեղեն ամրապինդ
լեռան,

Կցնդեն բոլոր վնասակար խարդախություններն
ու կարճամիտ սրտնեղությունները,
Հազիվ թե հոսող փոքրիկ ջրի պես, կամ հողի
նման, որ փշրվելով կփոշիանա:

Գ

Արդ, ոչ թե մարդկանցից են գալիս կշտամբանք-
ներս, ինչպես Հոքն է ասում,

Այլ ամենատես աչքերից վերին հրամայողիդ,
Որի երկյուղից խիղճս տագնապած՝ սոսկում եմ,
սարսում կասկածանքներով:

Եվ սակայն դարձյալ սրտաբեկ՝

Ապաստանում եմ հույսիդ հաստատուն, կեն-
դանի անեղծ.

Որպեսզի ողորմությամբ նայես դու ինձ,

Իբրև կորստյան պատժին արժանու,

Երբ ես երկնայնիդ բարերարությանը ներկայա-
նում ձեռնունայն և ապշահար,

Երախտիքները անպատում փառքիդ բերեմ ես
ինձ հետ ու քեզ հիշեցնեմ.


Քեզ, որ ո՞չ մոռացությամբ տարված ես նիր-
հում,

Ոչ էլ մինչև իսկ ակնթարթի չափ ընդմիջումնե-
րով՝ հեծեծանքներն ես անտեսում վշտի:

Վերցրո՛ւ ինձանից, աղաչում եմ քեզ, լուսավոր
խաչով՝ խեղդը հանցանքիս,

Հոգատարությամբ տարակուսական տիսրու-
թյունը իմ,

Փշանյութ՝ պսակով՝ բողբոջն իմ մեղքերի,
Գանակոծությամբ՝ հարվածը մահիս,
Ապտակի հուշով՝ տանջանքն ամոթիս,
Թքի թշնամանքով՝ գարշությունս անգոսնելի,
Լեզու ճաշակմամբ՝ դառնությունը հոգուս:
Քոնն են այս բոլոր բարությունները անբովան-
դակելի,
Միակ Աստուծո միածի'ն Որդի,
Որոնց հետ և իմ չարությունները հիշատակե-
լով,
Քո ամենօրհնյալ անունն եմ կանչում բարձրա-
ղաղակ՝ հոգեղենների պաղատանքներով:
Մեղապարտությամբ ամոթահարիս զղջման
խոստովանության նայիր
Եվ սատակելու արժանի որդուս ողորմիր՝ ան-
մահ մահով մեռնելու.
Որպեսզի բազում մեղքերիս չափով
Կրկնապատկվելով առավելապես՝ քո ողորմու-
թյունդ ավետարանի
Եվ հռչակվի վեհ ահավոր հնչմամբ երկնքի մեջ
միշտ և երկրի վրա:
Եվ քեզ՝ Հոր և Սուրբ Հոգու
հետ՝ փա՛ռք հավիտյանս. ամեն:



Բան ԼՂ Սրբի խորժերից խոսի Եպոն-Ճո Հետ

Ա

Ինչպես որ նախորդ գլուխներից մեկում գըռության առա

Մարմնական անդամների օրենքի արգասիք համարվող

Մեղանչանքների այն խավարային գլխավոր ծնունդները,

Որոնք տիրեցին մահվան ժառանգորդիս,-

Այդպես էլ և այժմ, այստեղ, հետեւյալ խոսքերիս կարգին

Պիտի հիշատակեմ ես փոքր ի շատե,

Ինչպես անսահման ծովի ջրերից մի կաթիւ առած՝

Հոգեոր կյանքի այն օրենքները,

Որոնք լուսածնունդներին ազատագրում են Հիսուս Քրիստոսով:

Բ

Կայսերական են ոմանք արդարեւ, բազմած բարձր գահի վրա,

Եվ շնորհների պաշարով լցված ու հարստացած:-

Թագավորն իր սիրելիներով,
Արքան իր պատվավորներով,
Պատկավորն իր իշխաններով,
Բարեհոչակվածն իր համբավներով,
Հաղթողն իր փողերով,
Զորավարն իր մարտիկներով,
Գովյալն իր փառքով,
Փեսան իր պարավորներով,
Դշխոն իր օրիորդներով,
Փեսավերն իր հանդերձանքներով,
Ազատությունն իր շնորհներով,
Խոստովանությունն իր քավությունով,
Օգնությունն իր ձեռքով,
Պահպանությունն իր աջով,
Պարգևն իր զարդով,
Կենաց նշանն իր ամրությունով,
Կնիքն իր նկարագրով,
Ամպն իր հովանիով,
Արվեստն իր հրաշքներով,
Հոգին իր անեղծությունով,
Խոսքն իր կատարումով,
Ուխտադրությունն իր լրումով,
Զորությունն իր հրամաններով,
Ավազանն իր սքանչելիքներով,
Մանանան իր անապականությունով,
Կենդանի վեմն իր վտակներով,

Հրեղեն այունն իր ճառագայթներով,
Որոտումն իր ազդումներով,
Վերին հույսն իր փրկությունով,
Օրհնության ծառն իր պտուղներով,
Եվ բարունակն իր բարիքներով:
Եվ որպեսզի, չլինի թե բոլորն ասելով՝ ամբողջն
աչքաթող անեմ,
Ինչպես արևին նայելիս կայլայլվի աչքն ու
կտկարանա,
Պետք է որ լոեմ ես շատն ասելուց և քչին հաս-
նեմ,
Բավականանալով ամենապիկար իմ կարողու-
թյամբ:

Գ

Բայց ավաղ հավետ այստեղ իմ թշվառ, եղկելի
հոգուն,
Քանզի խոսքիս կարգն ստիպում է ինձ
Ավետավոր ձայնի հետ խառնել և՛ գումկան բո-
ղոք.
Քանի որ սրանց հետ և սրանց առընթեր
կան՝ արդարությունն իր կշիռներով,
Վճիռն իր հատուցումներով,
Քննությունն իր լույսով,
Հանդիմանությունն իր լապտերներով,
Մերկությունն իր պատկառանքներով,
Հայտնությունն իր ամոթով,
Անբիծն իր վաստակներով
Եվ սխալվածն իր պատիմներով:

Դ

Դարձյալ և դարձյալ ողբ ինձ կրկնապես,
 թշվառ եղկելուս,
 Քանզի անհնար բարկությամբ, ահա՝
 Գալիս է, հասնում հասակիս հասկին մանգաղը
 նրան հնձելու համար։

Դատավորն՝ ատյանի, և հզորը բեմի համար,
 Սպառնացողը կորուստի մատնելու, բազուկը՝
 դատաստան տեսնելու,
 Պատժիչ գավազանն՝ հարվածելու, սպառազի-
 նումը՝ վրեժխնդրության,
 Եվ հովիվն ընտրություն անելու համար։
 Եվ քանզի վերջին օրը հատուցման դատի պիտի
 ինձ դատապարտյալիս
 Քո այն խոսքը, որ դու ինձ ասացիր,
 Կանխի՛ր այն, բարեգութ, նախընծա քո քաղց-
 րությամբ,
 Եվ ինձ որ վարանական երկյուղով հեծում եմ
 նվազաձայն,
 Զորացրո՛ւ վերջին տագնապման ժամիս քո
 օրհնյալ ձեռքով,
 Առաջին օգնությամբ մխիթարելով, բժշկելով,
 քավելով, և կենդանի պահելով։
 Եվ քեզ փա՛ռք ամեն ինչի մեջ,
 Հավիտյանս հավիտենից. ամեն։



Ա

Եվ քանզի թողի կերպըս առաջին դեհ թելադրանքով

Եվ կորցրի խապառ իմ ծուլությամբ,-

Ուստի այժմ իմ մեջ ցույց պիտի տամ ես կերպարանքը հին.

Դառն ու թախծալից հոգու հեծությամբ

Անաչառ խայտառակումով, հրապարակորեն,

Հավաքված անթիվ և ամեն ազգի բազմությունների

Վերապատմեմ ես պիտի բարձրաձայն և մեծաբարբառ աղաղակելով:

Բ

Շնչավոր մի մատյան եմ ես, որն ունի իր մեջ
Ներսից ու դրսից ողբեր ու վայեր և ձայներ

տիսուր,

իսկ և իսկ նման Եղեկիելի տեսլի տոմարին:-

Քաղաք անպատվար և անմահարձան,
Տուն՝ դռան ամուր փականքներից զուրկ,
Աղ՝ միայն տեսքով, այլ ոչ թե համով,
Զուր աղի, անախորժ՝ ծարավների համար,
Գետին՝ անօդուտ՝ հողագործության,
Դաշտ լքված՝ հեղեղավայր կնյունի,
Անդաստան՝ խոպանացած և տատասկաբեր,
Աստվածախնամ հողս հոգեոր, որ բանսարկուի
պատրանքներով մշակվեցի,
Յուղընձյուղ փայտ եմ պտղակորույս,
Հատանելի մի ծառ ունայնաբույս,
Կրկնամեռ խոսուն մի տունկ եմ անհույս,
Ամբողջովին շիջած ճրագարան անլույս:
Այժմ վերստին սույն նմանությամբ
Այլ ավաղական բազում պատկերներ պիտի
կրկնեմ ես:—
Ամոթի դառն պատուհասն է պահված հեգիս,
Կրծտումն ատամների և աչքերի լաց անվերջ՝
եղկելիիս,
Հայրական անսպասելի ցասում՝ ստահակիս,
Ապականություն աննորոգելի՝ մեղանչած մարմ-
նիս,
Նոր կշտամբություն՝ ախտալից հոգով, չարիք
գտնողիս,
Տարակուսանքի տարտամ տագնապներ՝ մահով
գերվածիս,
Որոնք երկնային զորքերը կտան թշվառիս,


Վկայելով, թե որոմի խրծի պես վառվելու է
վշտակիր հոգիս,
Ահարկու ձայնով ազդարարելով անբժշկությունը հուսալքվածիս:

Գ

Արդարեւ, սրանք կատակերգական նվագներն են
ահա՝
Այն քնարահար շրջիկ պոռնիկի, որ ծեծելով իր
կուրծքը, լալագին
Հնչեցնում է հույժ կսկծեցուցիչ, խղճալի ող-
բեր,
Ինչպես Եսային է ասում առակով՝ Տյուրոսի մա-
սին գրած պատգամում:
Եթե ապառնի դիպվածն այն փոքրիկ, իբրև մո-
տալուտ պատկերացնելով,
Բողոքում էր նա պես-պես, բազմակերպ ավա-
ղումներով,
Լացով ու կոծով պարողների պես,—
Հապա ինձ համար, որ սպասելով Տիրոջ գալստ-
յանն անպայման մնացի անպատրաստ բո-
լորովին,
Որքա՞ն և որպիսի՝ վհատեցուցիչ երգեր պիտի
մրմնջեմ ես:
Արդ, եթե դատաստանի ահավորությունը հիշեմ
վերստին,
Բազմացնեմ պիտի աշխատանքս ես,

Իսկ եթե տանջանքներս իսկությամբ աչքիս
առաջ բերեմ՝ երկյուղս կաճի,
Եվ եթե ճշգրիտ պատկերացնեմ ես տեսարանները՝
Ինձ համար նախատեսված հատուցումները
կավելանան,
Քանզի առաջուց նախատեսելով այդ բոլորը ես,
չապաշխարեցի, թեկուզ անագան:
Բայց դու խնայեցիր ինձ, գթած, մարդասեր,
հզոր, բարերար,
Ամենապարզե Քրիստոս թագավոր,
օրհնյալ հավիտյան. ամեն:





Ամենակալ Աստված բարերար, ստեղծո՛ղ բոլորի,
Ունկնդրի՛ր հառաչանքներիս ձայնին տագնա-
պահույզ.

Եվ ինձ ապագա կասկածանքների երկյուղից
փրկի՛ր,

Կարող զորությամբ ինձ ազատելով մեղքի
պարտքերից,

Քանզի քո անբավ մեծությամբ և իմաստու-
թյամբ անհուն՝

Հնարավոր է քեզ մոտ ամեն ինչ:

Բ

Եվ քանզի հեռվից տեսնելով հոգուս աչքերով
ահա՝

Ահավորափայլ հանդեսը քո հանդերձյալ
դատաստանի,

Նկատում եմ ես արդեն կանխապես

Ցերեկը լուսավոր ու հուսալից՝ սրբերի համար,
Եվ օրը խավար՝ պատժապարտիս պատուհասի
համար,

Ուստի և չկա ոչինչ, որ լինի փախուստիս հա-
մար ապաստանարան.


Ո՛չ անդունդները խորունկ և ո՛չ վիհերն անտակ,
Ո՛չ լեռները բարձրաբերձ և ո՛չ քարանձավները,

Ո՞չ ժայռերը կարծրակուռ, ո՞չ էլ ծործոր ու ծերպ,
Ո՞չ փապարները փոսավոր և ո՞չ հոսանքը հեղիների,
Ո՞չ բավիղները խորշերի, ո՞չ շտեմարանները
հարկերի,
Ո՞չ թաքստոցները սենյակների, ո՞չ էլ ծմակները
հովիտների,
Ո՞չ ծործորները դժվարանց, ո՞չ բլուրները բազ-
մակուտակ.
Ո՞չ քամիները մեծաշունչ, և ո՞չ ծովերն անծայր,
Ո՞չ հորձանքները սահանքների, և ո՞չ ափերը
հեռավոր,
Ո՞չ ողբերի ձայները և ո՞չ հեղեղներն արցունքի,
Ո՞չ շարժումը մատների, ո՞չ ձեռքերը վերամ-
բարձ
Եվ ոչ էլ պաղատանքը շրթունքների:

Գ

Այս բոլորից՝ սաստկագույն և անճողոպրելի՝
Դու միայն, Քրիստոս, կարող ես փրկել բազմա-
մեղ հոգիս,
Քո անդորրությամբ և քո դյուրությամբ ամե-
նահնար:
Ուստի և նայի՛ր ինձ շրջապատող վտանգներին
անզերծանելի,
Դու միայն քաղցրդ բոլորի հանդեպ.
Կենազեն խաչիդ հաղթական սրով կտրատի՛ր
բոլոր ցանցերը վարմիս,
Որոնք ամենուստ պաշարել են ինձ մահու
գերյալիս,

Տո՛ւր հանգստություն սասանյալ ոտքին թյուր
ընթացողիս.
Բուժի՛ր հրատապ ջերմին տոչորումն մղձկյալ
սրտիս,
Մերժի՛ր դիվային և չարահնար շշուկները իմ՝
քեզ պարտավորիս.
Հալածի՛ր անհույս մթությունն հոգու՝ չարին
կենակցիս.
Ցրի՛ր ծխամած թանձրությունները բռնավոր
մեղքերիս.
Կորցրո՛ւ ապական ցանկությունները զազիր
կրքերիս.
Նորոգի՛ր մեծիդ անվան պաշտելի փառքի լու-
սեղեն պատկերն ի հոգիս.
Զորացրո՛ւ շնորհիդ փայլը շողշողուն որպես
շուք դեմքիս,
Մտատեսության ընդունակություն տուր հողե-
ղենիս,
Հարմար հորինմամբ վերահարդարիր, որ տեսնի
քեզ պարզ՝
Լուսազարդ մաքրությամբ զտելով մոայլը մե-
ղավորիս,
Աստվածային կենդանի, անեղծ, երկնավոր լույ-
սովդ ծածկելով երեք պատկերներն անձիս:
Զի դու ես միայն օրհնյալ Հորդ հետ ի գովեստ
Սուրբ Հոգուդ
Հավիտյանս հավիտենից. ամեն:



Սրբի խորժերեց խոսէ Ըստու-ծո Հեղ

Ա

Որդի՛ կենդանի Աստուծո, ամենաօրհնյա՛լ,
Անքնին ծնունդ դու ահավոր Հոր,
Քեզ համար չկա ոչինչ անհնար ու անկարելի:
Երբ ողորմությանդ փառքի անստվեր ճաճանչ-
ները ծագեն,
Կհալվեն մեղքերը, կհալածվեն դեերն ու կջնջվեն
հանցանքները,
Կիսպվեն կապանքները, կիսորտակվեն շղթաները,
Կկենդանանան մեռյալները, կբուժվեն զարկ-
վածները,
Եվ վերքերը կառողջանան.
Կվերանան ապականությունները, տեղի կտան
տիրությունները,
Կնահանջեն հեծությունները, կփախչի խավարն,
ու մեգը կմեկնի,
Կցրվի մառախուղն, ու մռայլը կփարատվի.
Կսպառվի աղջամուղջը, կվերանա մութն, ու
գիշերը կանցնի,
Տագնապը կտարագրվի, կչքանան չարիքները,

Հուսահատությունները կհալածվեն,
Եվ կթագավորի քո ձեռքն ամենակարող, քա-
վի՛չդ բոլորի:

Բ

Դու չեկար կորցնելու մարդկանց հոգիներն, այլ
ազատելու.
Ների՛ր ինձ անթիվ չարիքներս՝ քո բազում
ողորմությամբ,
Զի դու միայն ես երկնքում անձառ և երկրում՝
անզնին,
Գոյության տարրերի մեջ և աշխարհի բոլոր ծա-
գերում,
Սկիզբն ամեն ինչի, և ամեն ինչի մեջ՝ ամբողջ
լըումով,
Օրհնյա՛լ ի բարձունս.
Եվ քեզ՝ Հոր ու Սուրբ Հոգուդ
հետ՝ փա՛ռք հավիտյանս. ամեն:





Սրբի խորժերից խոսել Սայան-Ճող Հետ

Ա

Տե՛ր Աստված գթության, փրկության և ողորմության,
Քավության և նորոգության, բժշկության և
առողջության,
Լուսավորության և կենդանության, հարության
և անմահության,
Հիշի՛ր ինձ, երբ գաս քո արքայությամբ,
Ահավոր, հզոր, բարերար և ամենաստեղծ,
Կենդանի, գովյալ, ամենակատար
Եվ մերձ համորեն արարածների հեծություններին:

Ես էլ եմ ահա՝ պաղատում քեզ խաչակցիդ հետ,
Որը քեզ համար ո՞չ բռնված էր և ո՞չ էլ կապված,

Ո՞չ կախված և ո՞չ բեեռված,
Ո՞չ խոշտանգված էր մեծիդ անունով և ո՞չ
անարգված,

Ո՞չ լկված և ո՞չ արհամարհված,
Ո՞չ խորտակված և ո՞չ մահացած,

Այլ արքայությանը՝ արդարների համար պահ-
ված լույսին արժանի համարված։
Եվ դու հաստատուն ուխտի խոստումով
«Ամեն»-ի երդմամբ,
Հայտնելով տրված բարիքների անփոփոխու-
թյունը,
Փառավորեցիր նրան և փրկության հույս ներ-
շնչեցիր ինձ՝ իսպառ լքվածիս։

Բ

Օրհնյա՛լ, օրհնյա՛լ և դարձյալ օրհնյալ,
Ընդունելով և ինձ նույն հավատքով՝
Փրկի՛ր կործանումից և բաճրացըռ՛ւ, ո՞վ բարե-
րար։
Բժշկիր հիվանդությունների ախտերից, ողոր-
մա՛ծ։
Մահվան եզերքից ինձ կյանքին դարձրու, ո՞վ
կենդանություն։
Քոնն եմ նաև ես, ուստի նրա հետ ապրեցըռ՛ւ և
ինձ, ապավինությո՛ւն։
Կենդանության շունչ ընծայիր դու ինձ՝ հոգով
մեռածիս,
Հարությո՛ւն, դու կյանք և անմահություն,
Անպակաս բարություն, անսպառ շնորհ, անփո-
փոխ ներողություն,
Աջ ամենագոր, ձեռք ամենիշխան, մատ ամենա-
մերձ։
Կամեցիր դու, Տեր, և պիտի փրկվեմ։

Ակնարկիր միայն գթությամբ, և պիտի արդարանամ.

Ասա՛ դու խոսքով, և խսկույն պիտի դառնամ անարատ:

Մոռացի՛ր թիվը իմ չարիքների՝

Եվ անմիջապես համարձակություն պիտի առնեմ ես.

Առատաձեռնի՛ր, և շուտով պիտի պատվաստվեմ քո մեջ,

Փառավորյալդ ամեն ինչի մեջ

Հավիտյանս. ամեն:





Ա

Բժշկության հմտության ամենափորձված հնարավորությամբ

Անախտական կյանքի դու պատճառ, երկնային

զորեղ թագավոր՝ Տե՛ր Հիսուս Քրիստոս,

Աստված՝ իմանալիների բոլոր և տեսանելիների:

Ահա՝ իմ մեջ ես դու, ինչպես մագարեն է ասում,
նոր կցորդությամբ,

Ուստի և ես միացած քեզ հետ խոսքի դաշինքով
այս բարեզարդ՝

Թո՛ղ լուսավորվեմ կրկին ողջացած՝ շնչով ու
մարմնով,

Հստ ամենայնի կարող և անդրդվելի:

Բ

Սպեղանիների կարիք չես զգում դու

Հոգուս վերքերին փաթաթաններ պատրաստե-
լու համար,

Ո՛չ ժամանակի, ո՛չ միջնորդի և ո՛չ էլ երկարաւագիդ օրերի,
Ո՛չ փոփոխական դեղեր տալու և ո՛չ անդամահատման,
Ո՛չ էլ խարելու, վիրահատության.
Եվ այլ երկրավոր դարմանումների,
Որոնք ենթակա են հաճախ վրիպանքի և ամենասահալ տարակուսության:
Բայց քեզ՝ հոգիների և մարմինների Արարչիդ
Ամենայն ինչ լուսավոր է, ամենայն ինչ ակներև,
Ամեն ինչ գրված, ամեն ինչ դյուրին և հնարավոր,
Խորհուրդը գլխավորված է, խոստումը լցված,
կամքը կատարված,
Քո կտակն Ավետարան է, քո վճիռն՝ ազատություն, մատյանդ՝ շնորհ:
Չես կաշկանդված դու օրենքներով, ոչ էլ կանոններով շրջափակված.
Արգելակված չես նվաստությամբ, ոչ էլ հպատակությամբ խոնարհված.
Չես պարփակված փոքրկությամբ, ոչ էլ սահմաններով չափված.
Չես վրիպած բարությունից, ոչ էլ ցասումից այլայլված.
Չես սիսալված խստությունից, ոչ էլ խոռվությունից վրդովված.
Չես դղրդված անդիտությունից, ոչ էլ ողորմությունից՝ փոփոխված.

Զես իջել բարձրությունից, ոչ էլ օգնությունից
ընկրկած,
Ոչ էլ փրկությունից տկարացած:
Սկիզբն ու լրումն ես դու ամեն ինչի, և ամե-
նայն ինչ քեզանից է:
Փա՛ռք քեզ և երկրպագություն
հավիտյանս. ամեն:





Բան ԽոԴ

Սըմիկ խորժերից խոսով Ըստու-ծո Հեղ

Ա

Աստված անսահման, անբացատրելի հարագատ ծնունդ միակ Աստուծո, Արարիչ բոլոր արարածների, Քրիստոս թագավոր,
Լույս՝ խավարի մեջ՝ մթնած սրտերի.
Մեզ հետ՝ մարդ կատարյալ և առաքչիդ հետ՝
իսկական Աստված,
Որ մեր բնությամբ քոնն ես ծանուցում հրաշապես:
Օրհնյալ է Հայրդ երկնավոր և անճառ,
Որ առաքեց քեզ երկնից և որին փառակից ես
դու արարչությամբ.
Տարագիր գերուս փրկության համար նա այն-քան հոգաց,
Որ մինչև անգամ քեզ մատնեց մարդկանց:
Իսկ դու, որ կարող էիր առանց վշտի ավարտել
խորհուրդը տնօրինության,
Հաճեցար մահվան բաժակը ըմպել մեղապարտիս հետ
Անթերի մարդկությամբ և անպակաս աստվածությամբ:

Եվ Սուրբ Հոգին քո կենդանարար, ինչպես որ
քո, այնպես և խսկակից է Հորդ,
Եվ Էռթյամբ համապատիվ՝ ծնողիդ հետ և՝
ծնվածիդ:

Մի Երրորդություն կատարյալ՝ անբաժանելի և
անանջատ երեք դեմքով:

Անսկիզբ և անժամանակ, բացարձակ բարերար,
Համակ կենդանարար, ամբողջապես խաղաղա-
րար,

Ստեղծիչ գոյությանց և հորինող ամենայնի,
Անքակտելիորեն և մի բնությամբ փառավոր-
ված:

Բ

Իսկ եթե գլխած երկնավոր Հայրը հզոր՝ մեկն է
Էռթյունից՝

Մահապարտիս հանցանքների համար զոհաբե-
րեց իր անքնին ծոցի ծնունդը միակ,
Զինայելով իրեն համապատիվ սիրելի Որդուն,
Այլ կամովին նվիրեց նրան մահվան զենքերով
չարչարողներին,

Ըստ Զաքարիայի մարդարեռության,
Թե՝ «Պիտի զարթնի սուրբ հովվի վրա,
Եվ պիտի զարկվի հոտապետն ինքը,
Ու ոչխարների հոտը ցրվի»,
Ինչպես նախագրողի օրինակը նուրբ¹ և ուխտը
խորանի,

¹ Ակնարկում է ամաղեկացոց դեմ պատերազմի միջոցին Մովսեսի
266


Եվ նվիրումն արյան սպանդի,
 Եվ խորհուրդն աբրահամյան պատարագի,
 Որոնք կանխապես նկարագրեցին փրկությունն
 Հեգիս՝ կեցուցչիդ կամքով,—
 Ուրեմն էլ ինչո՞ւ ես տիրում, ա՞նձն իմ,
 Որ քո իսկ գործով և հոժարությամբ ես կործան-
 վել դու
 Եվ ո՛չ Աստուծո կամեցողությամբ.
 Կամ ինչո՞ւ ես դու խռովում, սիրտս՝
 Մտատանջվելով սատանայական հուսահատու-
 թյամբ:
 Հուսա՛ Աստծուն և խոստովանիր,
 Եվ նա քեզ համար կհոգա անշուշտ՝
 Դավթյան սաղմոսի և մարգարեի կենսախրա-
 խույս խոսքի համաձայն:

Գ

Իսկ ստեղծողի խնամակալության չափն ու եղա-
 նակը ավելի վեր է,
 Քան հրեշտակների և մարդկանց մտքի կշռու-
 թյան սահմանն,
 Ու թե բյուր անգամ կրկնվի՝ դարձյալ չափել
 չի լինի,
 Զի բարձրյալ Տիրոջ և՝ բավարարելն է անճա-
 ռելի:
 Մանավանդ որ նա՝ մեկը օրհնված համագոյա-
 կան Երրորդությունից՝

բազկատարած կանգնելը, որը համարում է օրինակ՝ Յիսուսի խաչելության:

Ուղարկեց մյուսին այն օրհնաբանված,
Որը և մեռավ ի հաճություն իր առաքչի կամ-
քին:
Մյուս երրորդն ահեղ երկուսի հավանությամբ
Բարեմաղթում է մեծաջան բաղձանքով:
Իսկ միւսույն բարի իրագործումների մեջ
Նրանց համամիտ միակամության ապացույց-
ներն են՝
Հոգին՝ կենդանու և բանը՝ բանականի,
Պայծառությունը՝ փառքի և կերպարանքն՝ էու-
թյանը:
Փույթ՝ ապրեցնելու, սթափ՝ ողորմելու,
Օգնության ձեռք կարկառելու և փրկելու՝
պատրաստ,
Առատատրությամբ՝ հորդ, շատությամբ՝ զե-
ղուն,
Անբավությամբ՝ լի, աննվազությամբ՝ փարթամ,
Երկայնամտությամբ՝ ճոխ և անհասությամբ՝
բարձր,—
Մի երրորդություն կատարյալ եռանձնյա,
Օրհնյալ հավիտյանս. ամեն:



Բան ԽԵ

Սրբի խորչերից խոսէ՛ Ասպառ-ծո Հետ

Ա

Եվ արդ, ով կործանված իմ անձ, բարի հույսը
տնկած սրտիդ մեջ
Եվ հավատքի գոտիով պնդած երիկամներիդ
մասերն երկու՝
Յանկական գործարանները քո կրկնապղտոր
խորհուրդների,
Խոստովանի՛ր բարերար Աստծուն մտածած-
ներդ՝ որպես թե արդեն գործված մեղքեր,
Խորհածներդ՝ իբրև կատարվածներ,
Անտեսներն՝ իբրև արդեն հայտնի,
Սրտիդ մեջ թաքուն պահածներն՝ իբրև բարձ-
րածայն ասված.
Ակնարկումներդ՝ իբրև իրագործած մեղանչում-
ներ,
Շուրթերիդ շարժումն՝ իբրև չարության գոր-
ծադրություն,
Ոտքերիդ հետքերն՝ իբրև վազք ընդդեմ Աստու-
ծո պատվիրանների,
Զեռքերիդ ցասկոտ երկարումն՝ իբրև արյունա-
հեղություն,

Անվերջ ծիծաղելն՝ իբրև կամավոր լքումն չնոր-
հի,
Երդումն ի դեպ թե տարադեպ՝ իբրև գործակ-
ցություն խաբողին,
Ամբարտավանությունն՝ իբրև հին կործանիչ
նախաստեղծին իր բարձրությունից,
Սրտնեղությունն՝ իբրև թերահավատություն,
Մեղկությունն՝ իբրև պարտություն զորավոր
ամրության,
Վշտակրության համար տրտնջալն՝ իբրև ուրա-
ցություն՝ Տիրոջ հետ արած ուխտի,
Անսանձությունը՝ իբրև մի թոռը անդթության,
Անբարհավաճությունն՝ իբրև վեհերի դեմ
գոռոզացում չնչին բաներով,
Պարծենկոտությունն՝ իբրև կամակոր հարազա-
տություն չարագործի հետ:
Ակամա մեղքերն էլ խոստովանիր կամովին գոր-
ծած հանցանքների հետ,
Բոնիները՝ Հավանությամբ կատարվածի հետ,
Նորամույծները՝ բնածինների հետ,
Անօրենությունը՝ ապաստվածության հետ,
Փոքրերը՝ սաստկագույնների և քչերը՝ շատերի
հետ,
Անասելիներն ասա՝ արդեն իսկ ասված իմացո-
ղին,
Անգրելի մեղքերը՝ իբրև տեսնողի աչքի առջե-
մագնիսաքարի վրա արձանագրված,
Մեղքի համար թեթևագույն համարվածներն՝
իբրև ստվար ու ծանր բեռներ,

Ծածկվածների չափի որոնումը՝ իբրև ճշտիվ
 պահանջումն
 Կետի կորյունից բերանից առած սատերի տուր-
 քի չորեքդրամյան ծանրությամբ¹.
 Անդնդային գործերը՝ իբրև Աստուծո ականջին
 արագ հասածներ:
 Շարունակի՛ր սրանք և կուտակի՛ր կրկնապես՝
 Հանձնառու լինելով պատմելու այստեղ
 վերստին
 Սաստիկ հեծությամբ չեղածներն իբրև արդեն
 եղածներ
 Ցույց տուր Աստծուն պարտությունը քո հա-
 լածյալ անձի,
 Որպեսզի ընդունես դու փոխատուից պարտքե-
 րիդ թողություն,
 Այն մեղավորի նման, որին արդարացրեց Տերը
 և հոչակեց հրաշափառապես,
 Եվ բազմապատիկ ներբողով կրկնեց գովեստը
 զղջման,
 Քան թե պարսավեց մեղքերը նրա:

Բ

Բարդիր և դիզի՛ր, ա'նձն իմ, մեղապարտ հո-
 գուդ հանցանքները,
 Կշտամբելով հույժ՝ խոսքերով սաստիկ և նա-
 խատական
 Քո բազմամասնյա խոհերը և գործերը ժանտ՝

¹ Հմնտ. Մատթ. ԺԵ. 23-26

Չարություն, անօրենություն և սխալանք,
Մարտահանդեսից փախուստ և պարտություն,
Մոլեգնություն, ամբարշտություն և ապշություն,
Թմրություն և քուն՝ արթմնի և նիրհումն ըն-
թանալիս,

Օտարոտի խորհուրդ և նանիր խոսքեր,
Սեր՝ զազիր գործերի և դանդաղում նրանց մեջ,
Տենչեր՝ Աստուծո համար ատելի,
Աներկյուղություն, անսաստություն, անշիտա-
կություն,
Թերություն, թյուրություն, թուլություն, ժլա-
տություն,

Սանձարձակություն, ծաղրածություն, խեղկա-
տակություն,
Եվ շարժուձեեր գայթակղեցուցիչ ու պատրո-
ղական,

Անտեղի քաջություններ, անհարմար մարտն-
չումներ, արիություններ անօրինական,
Հոգու խեղդումներ, տատանողական երկչոտու-
թյուններ,

Բազմոստայն ճյուղեր թափուր, անպտուղ,
Անպատկառ լկտիություններ, գժղմնություն-
ներ և գժտություններ,

Անմիտ ատելություններ և մարմաջումներ դյու-
րին որսացվող,

Անկշռելի փոքրություններ, խոստմնադրժու-
թյուններ,

Ուխտազանցություններ, այլակերպություն
նմաններից,

Կեղծիքների քողարկումներ, փառամոլության
հիմարություններ,
Հավակնություն բարձրահռն, ապիրատություն,
եսասիրություն,
Նախագահական տենչանք, չարով հատուցում
չարագործներին,
Եվ դրանց հանդեպ բարբաջանք և ի զուր ու
փուչ կրքեր,
Գործակցություն բանսարկուի խորամանկու-
թյանը,
Խոսքերի շաղ տալն ու կենաց վաճառք սատակ-
ման գնով,
Ավանդների կորուստ, ժառանգության վատ-
նում, կապանք ձգողական,
Երինջների լծափոկով անխցելի՝ բռնված անօրե-
նություններ¹,
Մշտաթաթավ տղմաբնակություններ,
Լքումն լավերի և ենթարկումն վատերի,
Դարձի գալուց ետ վերադարձ դեպի նույն
դժնություններ՝
Նորամուտ մտքեր, օտար խորհուրդներ և անկա-
յուն կամք,
Հագագային հեքեր, անասնական կրքեր,
Իշխանականի ամենասփյուռ ընդարձակու-
թյուն:
Եվ կան դեռ, որոնք անդրելի են և անասելի,
Կամ անպատմելի, անպատկերելի:

¹ Եսայի Ե. 18

Գ

Եվ հիմա, ինչպե՞ս պիտի բժշկվես, անձն իմ
 եղկելի,
 Դու, որ խոցված ես այսքան տեղերով,
 Երեսից ընկած անողջանալի այր մի տարագիր,
 ըստ մարդարեի,
 Զի միայն մեկն էլ վերոգրյալներից բավական է
 քեզ սատակեցնելու,
 Դեռ թողնենք, որ դու ժանտ դահիճների այս-
 քան խմբերով ես շրջապատված:
 Մանավանդ՝ սոսկ այս օրինակներով չի տրվում
 պատկերը տառապյալիս,
 Այլ, ինչպես վխտացող բազմությունն անթիվ
 կարիճների,
 Որոնք օրհասական թույնը կրում են իրենց պո-
 չի ծայրին,
 Ինչպես մաշկեղեն մի ամանի մեջ ամփոփված,
 որտեղ խայթոցն է նրանց,
 Որոնք արտաքուստ թվում են թեև բարի, անվ-
 նաս,
 Բայց ներքուստ ունեն չարի ամբարներ, կորսո-
 յան պահեստ,
 Կոկծանքի կույտ, սատակման գործոններ, մշակ-
 ներ մահվան,—
 Այդպես են նաև ամբարված դաժան անօրենու-
 թյամբ
 Թշվառաքրտինք թոշակները քո, անձն իմ պար-
 տական կրկին սատակման:

Կամավորաբար ընդունեցիր դու քո մեջ այն,
ինչ որ
Ցանեց թշնամին աշխարհի ազարակում՝ ցորենի
վրա¹,
Ո՞վ այր անմաքուր, ամբարիշտ և ծույլ, իսպառ
ատելի,
Որին սիրելի և դուրեկան են անառակությամբ
լցված ամեն ինչ,
Որոնք թվում է առաքյալն ինքը խիստ կշտամ-
բական՝ իր այն խոսքերով՝ վերջացրած
այսպես՝
«Եվ նրանք, ովքեր գիտնալով հանդերձ օրենքն
Աստուծո գործում են այսպես»
Կամ գործողներին լինում կամակից՝ արժանի են
մահվան»:
Արդ, ես ինքս ինձ արժան դատեցի կրկնակի
պատճի –
Կորչելու իսպառ և սատակելու որպես մահա-
պարտ.
Բայց դու խնայիր ինձ ողորմությամբ, բարե-
գո՛ւթ, հզոր, կենդանի,
Կամարար, կարող և հնարավոր,
օրհնյա՛լ հավիտյանս, ամեն:

¹ Սատր. ԺԳ. 24-28, 37-39



Սբրի խորժերեց

խոսք Ըստուծու Հեղ

Ա

Վրիպյալս ես ամենայն անգամ, ամենապատիժ,
Միշտ դժնյա վայրենաբարո, մահով եմ անձամբ
կշտամբում ինքս ինձ.

Ինչպես արոտական խոզերի զազիր և վայրա-
գասուն երամակներ՝

Գարշելի մեղքեր արածացնող եմ ես նախատելի
վարձով¹.

Ամայաբնակ ուլերի հորանը խնամող հովիվ եմ
ես մի

Տավարածների վրանների մոտ,

Հստ երգ-երգոցի առակի, որ ինձ է վերաբերում,
ինձ, որ չեմ ճանաչում նույնիսկ ու չգիտեմ եր-
բեք,

Թե որի² ձեռքով և ում պատկերով, ինչո՛ւ գո-
յացա:

¹ Ղուկ. ԺԵ. 25

Բ

Ահա՝ մարմինդ կրող երկու միակցորդ ու
 խորհրդակից ոտքերիդ վրա
 Հրեշտակի ձևով ես կառուցվել դու,
 Որպեսզի երկու վերև բարձրացած քո բազուկ-
 ներով վերասլացիկ,
 Իբրև թռչելու համար թև առած՝ դիտես հայրե-
 նի աշխարհը բարձրից:
 Ո՞վ հիմար, ինչո՞ւ ինքդ քո կամքով կորացար
 գետնին,
 Եվ միշտ աշխարհի չնչին ու ճղճիմ հոգսերով
 տարված:
 Անապատական ցիոերի կարգը դասեցիր դու
 քեզ:
 Մարմնիդ աշտանակի վրա իբրև ճրագ բազմա-
 կանթեղյան՝
 Գլխիդ կլորությունը հաստատվեց,
 Որպեսզի այդպիսով, չհեռանալով օրինակելի
 լույսի չնորհից,
 Տեսնես Աստծուն և անանցանելիքն իմաստասի-
 րես:
 Բանականության պատվով կրկնապես ճոխա-
 ցար,
 Որպեսզի վերուստ քեզ տրված բոլոր բարեմաս-
 նությանց
 Հաղթանակը դու պատմես անարգել, անկաշ-
 կանդ լեզվով:
 Մատնելով հարմարապես ճյուղավորված ճար-
 տար քո ձեռքերով

Գործելուդ համար և կառուցելու՝ աստված կոչ-
վեցիր¹

Համացեղությամբ իբրև գործակից ամենա-
պարզև աջին Աստուծո:

Երեք հարյուր վաթսուն հոդերով դու շաղկապ-
վեցիր,

Միացնելով նրանց քո մեջ պատշաճող թիվը
հինգ զգայարանքների²,

Որպեսզի արտաքին առերևույթ նյութեղեն շին-
վածքդ

Զմնա մտքիդ տեսության կողմից անքննադա-
տելի.

Զի ոմանք դրանցից ստվար են և զորավոր,
եվ ուրիշներ՝ փոքր են ու պիտանի,

Կան, որ կարծրակերտ են և՝ զգայուն,

եվ դարձյալ, որ գողտրիկ են ու պատվականա-
գույն,

ինչպես նաև կան, որ կարեոր են և ամոթալի:

Իսկ բացատրություններն այդ բոլորի քո մեջ են
նկարված,

Իբր անջնջելի արձանի վրա, անձն իմ եղկելի.

Որի միտքն այն է, թե ժամանակի մասն ամե-
նափոքը ու տարին կազմող բոլոր օրերի
կարգն հաջորդական

¹ Այս բառի հարաբերական իմաստով՝ հորինող, ստեղծող:

² Իր ժամանակի անդամազննական հասկացողության համաձայն՝
մարդու մարմնի ուսկորների և կազմության զանազան մասերի
քանակը 360. այդ թվի վրա ավելացնելով հինգ զգայարանները՝
համապատասխանում է տարվա օրերի թվին:

Սահմանված՝ մարմնի մասերի թվով
Անսխալ կերպով անայլայլելի՝ պահված են այն-
տեղ:


Գ

Կա և հոգեոր մի այլ օրինակ, –
Սիրո հոգերով շաղկապված ի մի սուրբ եկեղե-
ցու միությունն է այդ,
Որի խորհուրդը դարձյալ քեզանով է մեկնա-
բանվում.
Այնպես որ առանց բոլոր մասերի իրար հետ
ամուր սերտ կապակցության՝
Մեծը փոքրի հետ համաձայնված մի ընդհանուր
լծի ներքո
Քրիստոսի անվամբ հալածանքների շենքի կա-
տարելությունը վնասված կլինի:
Ինչպես որ մարմնին պատվաստված աննշան
անդամներից մեկն եթե կտրվի և կամ պա-
կամի՝
Կրծատված կլինի մարմնի կազմվածքը, որ
գգայական սենյակն է մարդու,
Որով և ահա՛, պատկերն ընտանի կենթարկվի
անարդ մի փոփոխության:
Ուրեմն այսպիսով, ինչպես և բազում այլ անզու-
գական հրաշակերտությամբ ստեղծված՝
Աստուծո հարազատ պատկերն ես դու, հոգի՛դ
իմ գերի, իսպառ կշտամբված:
Թեև առաջին նմանությունիցդ կողոպտվեցիր,

Կենաց դրախտում մեղանչելով պատվիրանի
դեմ,
Բայց ավագանի լուսազարդ շնորհով, Հոգու
փչումն ընդունելով,
Նախկին նույն պատկերն ստացար դարձյալ:
Եվ այժմ ինչո՞ւ կորցրիր դու այդ փառքը երկ-
նավոր,
Ինչպես կորցրեց նախաստեղծն երբեմն վիճակն
երկնավոր՝ Աղեն դրախտում:
Ինչո՞ւ ինքդ քո ձեռքով փակեցիր երկինքը քեզ
համար,
Եվ վերելքի դուռը կողպեցիր քո առաջ.
Ինչո՞ւ խառնեցիր մաքուր ջրի հետ աղտն
արցունքներիդ.
Ինչո՞ւ լվացված ձորձը՝ գարշելի գործերով
զազրելի դարձրիր,
Ինչո՞ւ մեղքերի պատմուճանդ հանած՝ նորից
հագար այն անառակ վարքով.
Ինչո՞ւ ժանտերի ճամփով գնալով ոտքերիդ
մաքրությունն աղտեղեցիր.
Ինչո՞ւ կրկնեցիր իրավադատին ուխտազանցու-
թյունն հին պատվիրանի.
Ինչո՞ւ զրկվեցիր շնորհաց պտղից, ինչպես
Աղամը՝ կենաց ծառից.
Ինչո՞ւ նենգեցիր ինքդ կամովին հավերժու-
թյունը անստվեր հույսի.
Ինչո՞ւ թույլ տվիր, որ անհամարձակ՝ ծածկվի
դեմքդ սաստիկ ամոթից.

Ինչո՞ւ զինվեցիր դու ինքդ քո դեմ հակառակ-
վելով, ո՞վ ընդունարան խելագարության.
Ինչո՞ւ որս եղար մահվան ծուղակին, թողած
արահետը վստահելի.
Ինչո՞ւ պատրանքների կարթով բռնվեցիր, կեն-
դանարարի մարմնին հաղորդակի՛ցդ դու:
Բայց դու վերստին հուսալով նրան՝ պաղատի՛ր
առ նա,
Որ ապավեն է, քավիչ, նորոգիչ, փրկիչ, կեցու-
ցիչ և կենդանարար,
Ողորմած, խնամող, մարդասեր և անոխակալ,
Բազմագութ, օրհնյալ հավիտյանս.
ամեն:





Սըդի խորչերեց խոսք Եսայութեա Հետ

Ա

Եվ արդ, ամաչելով մեծիդ ահավորությունից,
ի՞նչ կարող եմ ասել,
Եթե ոչ համրանալ և բերանս հողին՝ լռել սրտիս
մեջ,
Աչքերս հառած բարի հույսին, ըստ մարգարեա-
կան խոսքի.
Իսկ եթե բանամ փականքը՝ շարժվող իմ
շրթունքների
Եվ կամենամ բոնադատել նրանց, որ խոսեն,
Խղճմտանքիս ձայնը դարձյալ կթելաղբե ինձ
Հյուսել լալագին ու կրկնակական եղերերգու-
թյուն:

Բ

Ուստի ողբակից մեծ մեղավորին,
Որը կամովին մահացու կերպով անօրինացավ,
Նրա գոչն իր հետ կրկընում եմ և ե՛ս:
«Մեղա՛, Տեր, մեղա՛, անօրենություններիս մա-
սին ես ինքս եմ վկայում»:
Դրա հետ մեկտեղ հյուսելով նաև հիսուներորդ
սաղմոսի խոսքերը,

Մեղավոր հոգուս պարտքերի հաշիվը ևս համարում եմ անթվելի,
Ավելի քան հողմից քշված հյուլեները փոշու՝
օդում համատարած:

Գ

Մեղա՛ երկնքի և քո առջեւ.
Անառակ որդու հետ ամոթապարտ և ես
Հայրենի գութիդ վերադառնալով՝ թախանձում
եմ քեզ:
Եվ տիսրադեմ, ահա՛, քեզ մոտենալով,
Զայնը ողորմելի աղերսանքներիս, արտոսածին
ողբերի գոչյունով՝
Քո առջեն եմ տարածում, Հա՛յր գթությանց,
Աստվա՛ծ բոլորի:
Ես արժանի չեմ ոչ միայն որդի կոչվելու,
Այլև անվանվելու անպիտան և անօգուտ վարձկան:
Ընդունիր սովյալ տարագրականիս և հանցապարտիս,
Եվ նեղվածիս ու նվաղածիս տանջող ցավը
քաղցի՝
Կենաց քո հացով դարմանի՛ր դու:
Ընդառաջիր ինձ քո ողորմությամբ, քանզի ես
նախ քեզ եմ ապավինել.
Հագցրո՛ւ, գթա՛ծ և անոխակալ, անօրինյալ մեղապարտիս

Զգեստն այն, որից ես դեռ նախապես կողոպտված էի.

Մեղքերով աղտեղված անվանդակորույս ձեռքիս
Մատուցիր կամքով քո ամենառատ՝ մատանին
կնքով համարձակության.

Ոտքերիս գարշապարների մերկությունը թշվառ
Ավետարանի ամրածածուկ կոչիկներով պատսպարելով՝

Ապահովի՛ր դու օձի թույնի դեմ:

Զգարակդ պարարյալ, երկնային, որ քո միածին
Որդին է օրհնյալ

Ճշմարիտ մարդասիրությամբ՝ իմ բարեկարուտ
Հոգուն նվիրիր:

Մատուցվում է նա միշտ ու չի սպառվում երբեք.

Մորթվելով անթիվ սեղանների վրա՝ անսպառ է
նա միշտ,

Մնալով ամբողջ՝ բոլորի մեջ և բովանդակ՝ յուրաքանչյուր մասում,


Իր էությամբ երկնքում է նա և իսկությամբ
երկրում,

Աննվազ մարդկությամբ և անթերի աստվածությամբ,

Որ փշրվելով բաշխվում է միշտ անհատնում
մասերով,

Որպեսզի բոլորին հավաքի մի մարմնի մեջ՝ ինքը
լինելով գլուխ:

Քեզ փա՛ռք ընդնմին, Հա՛յր
ողորմության, հավիտյանս. ամեն:



Ա

Բարձրյա՛լ, հզոր, անսկիզբ, ահեղ, անբովանդաւկելի,
Ա՛չք աննիրհելի և ամենատես, ծնող անքնին
փառքով Միածնիդ.
Երկնավորների և երկրավորների առջև ճշմարտի՛ր քո ողորմությունն իմ նկատմամբ.
Տոնի՛ր վերապրումը կորուսյալիս՝ վերնականներին պարերգությամբ¹.
Օրհնաբեր խոսքովդ ավետարանի՛ր կենդանությունը մահացյալիս.
Հայտնի՛ր քո կամքի բարեբաստությունը, գովյա՛լ բոլոր արարածներից.
Ստացի՛ր անճառ անուն քեզ համար, իսկ ինձ թշվառիս՝ նորոգ փրկություն.
Կորցրո՛ւ մեղավորիս ամբաստանության մուրհակի գիրը.
Մահավճիռը հոգուս ջնջի՛ր դու սիրելի Որդուդ արյան կայլակով.
Վստահությունը բարի փրկության՝ Քրիստոսի արյամբ նկարի՛ր իմ մեջ.
Բարեգլությանդ հրաշքները ցույց տուր հարսանյաց ճաշկերույթում քո հարազատին:

¹ Դուկ. ԺԵ. 7-10

Մի՛ փակիր քեզ դիմողիս դեմ սրահի առագաստը քո կենաց տան.

Մի՛ բաժանիր ինձ բազմականներից և քո բարիքներից մի՛ զրկիր.

Մի՛ պահիր գանձարանիդ մեջ մեղքերն իմ նյութած անօրենության.

Մի՛ կնքիր բարեմասնություններիդ քսակում գարշությունն իմ զազրությունների.

Մի՛ ծածկիր երկար՝ վերքերն իմ մեղքերի՝ ախտալից մարմնիս մեջ.

Մի՛ դարձնի ինձ տնկակից մահամնա նեխվածքն ու փտությունն իմ ցավերի,

Այլ քո ողորմած խոսքով վերացրո՛ւ ժանտությունն ապականիչ,

Որպեսզի ազատ հյուծող ախտերից՝ առողջությանը պատրաստվեմ.

Խորապես խոցվածիս համար ճարի՛ր զորավոր սպեղանի, ո՛վ գթությանց Հայր.

Տո՛ւր բարի այցելություն կարեվեր կործանվածիս, քանզի քոնն եմ ես, ո՛վ ոգեսեր Տեր:

Եթե մինչև իսկ բյուր հեղ մեղանչեմ, դարձյալ մեղավոր չեմ համարվի,

Ապավինելով քո կենսապարգև չնորհին, ո՛վ բարերար իմ և կյանքի տվիչ.

Զի քեզ ճանաչելը կատարյալ արդարություն է, եվ զորությունդ գիտենալը՝ անմահության արմատ.

Ինչպես որ առաջուց իմաստունն է զրել.

Եվ դարձյալ այսպես է ասում նա.—
«Տիրում ես բոլորին, դրա համար էլ խնայում
ես սրանց».
Եվ նմանապես՝ «Կարող ես դու միշտ, երբ էլ
կամենաս»:

Բ

Հուսատու աղերսն այս՝ Առղոմոնի՝ օրինակ եմ
ես առնում ինձ համար,
Զի ոչ ոք, քան նա, ինձ զուգաշավիդ՝ չեղավ
բազմամեղ.
Երբեմն որդի՝ հետո ատելի.
Երբեմն միջնորդ խաղաղության Աստուծո ժո-
ղովրդին,
Եվ հետո խտրոց պառակտիչ՝ բազում խոփու-
թյունների.
Երբեմն կյանքի օրենքը եղած և ապա փոխված
մահվան մուրհակի.
Երկնավորի պաշտումն ընդունած, և օտարի
անունը ճանաչած:
Անտեղի ցրող, անկարոտ զրկող, անսովելի գող,
Շոյված տրտնջող, փափկացած փախստական,
խրտնած սեղանանենգ,
Պապանձյալ վնասապարտ, քաղցրասնույց հայ-
հոյիչ, հայրատյաց զավակ,
Կտակարանների մատնիչ, Մովսեսի դեմ չարա-
խոս,

Երախտիքներ մոռացող, սխալական իմաստուն,
ամենագետ հանցավոր,
Ամոթապարտ զղջացած, տարակուսյալ աշխա-
տող,
Ամոթապարտ զղջացած, տարակուսյալ աշխա-
տող, աղոթավոր կռապաշտ,
Դարձի գալու մեջ դանդաղկոտ և ընդունվելու՝
երկմիտ,
Կասկածավոր հաշտություն, ապառնի հուշա-
րար, երկբայելի փրկություն,
Անհավատալի գյուտ, մեծության մնացորդ,
Խարդավանված գերի, կիսակտուր պրծած, կա-
մավոր անձնամատնիչ,
Տմարդի հղվացած, բազմավրեպ հանճարեղ:
Նա ինքն իր մասին ասածների մեջ դրել է երկու
տարբեր զգացում՝ իրար հակադիր
ինքնակամորեն կորսայան համար.
Արգահատանքի և երգիծախառն լացի խոսքե-
րով՝
Ամեն տեսակի բարելավության թելաղիր է նա,
Այն ինչ իր կյանքի խոտորումներով
Բոլոր շուրջերին պատճառել է խոր թախծալի
թառանչ:

Գ

Զարմանում եմ ես և հուսահատվում տարա-
կուսյալ ապշությամբ,

Զի եթե նա այնքան գայթեց, հապա ի՞նչ պիտի
պատահի ինձ:

Ինչպե՞ս ընկավ բարձրացածը,
Ինչպե՞ս սասանվեց հաստատվածը,
Ինչպե՞ս կործանվեց կառուցվածը,
Ինչպե՞ս օտարացավ ճանաչվածը,
Ինչպե՞ս կատաղեց գավակն ընտրյալ,
Ինչպե՞ս հեռացավ մերձավորը,
Ինչպե՞ս աղոտացավ փայլողը,
Ինչպե՞ս պատանդվեց ազատվածը,
Ինչպե՞ս անօրինացավ ուսուցիչը,
Ինչպե՞ս անշքացավ հոչակվածը,
Ինչպե՞ս անարգվեց փառավորվածը,
Ինչպե՞ս փոքրացավ մեծատունը,
Ինչպե՞ս ամբարշտացավ բարեպաշտը,
Ինչպե՞ս գոռողացավ ընտրյալը,
Ինչպե՞ս ունայնացավ պատարունը,
Ինչպե՞ս խզեց նա իր ուխտը բարձրյալի հետ:
Ամաչում եմ ասել, թե նաև սանդարամետակա-
նի հետ կապվեց:

Ի՞նչ ուներ նա կուռքերի հետ և ուսկի՞ց նրա
սերը պատկերներին.
Ինչո՞ւ կամակցեց խտրականությանը,
Ինչպե՞ս չհիշեց Սամուելի հանդիմանությունը
Սավուղին,
Թե՛ «Հմայությունները մեղք են, և մարդակերպ
կուռքը պատճառում է ցավ ու նեղու-
թյուն»:

Ինչպես չհիշեց նա հանդիմանությունը հայրենի,

Թե՝ «Հեթանոսների կուռքերն անշունչ դեեր են,
եվ նրանց նման են լինելու պաշտողները
նրանց»:

Մովսեսն ինքն է առաջինը ծաղրում և ամբաս-
տանում սաստիկ, ասելով—

«Տերն էր միայն առաջնորդում նրան,

Զկային նրանց հետ օտար աստվածներ, որոնց
չին ճանաչում նրանց հայրերը»¹:

Ո՞ւր է մահատու այլանդակ արձանը Փագով-
րի²,

Ո՞ւր սիդոնացոց տխեղծ, անպարկեշտ և ամե-
նանզովյալ իգական ձուլածոն³,

Ո՞ւր անգրելի խայտառակությունը զազրակեր-
պարան կանացի սեռի,

Որին անխտիր և անասնորեն անձնատուր բոլոր
մարդարեները պիղծ պաշտամունքի՝

Նվիրվում էին մոլի անաստվածությամբ հա-
նուն չարության անժուժկալ դեի:

Կինը, որ նախահորն ի կորուստ որսաց,

Տարավ և՛ նրա բարեբաստության ստացվածքը
ողջ.

¹ Բ. Օրին. ԼԲ. 12

² Մովսեսցոց աստվածը, որի համար Սողոմոնը մի բարձրա-
վանդակ կանգնեց: «Մահամատույց» է կոչում նրան Սարեկացին,
որովհետև պատճառ եղավ նա 24000 իսրայելացիների կոտո-
րածին (Թվոց. ԻԵ. 9):

³ Գ. Թագ. ԺԱ. 5

Մեծությունն հաղթեց մտքի առավելությանը,
Գոռողությունը գերեց նրան, և փափկությունն
Հիմարացրեց,
Ստրկացնող արծաթը նրան կառավարեց,
Կործանարարի հինավուրց զենքը խոցեց խորա-
պես մարդուն տոնելի,
Աստուծո գրկից հանելով նրան՝ ստամբակի ոտ-
քերի տակ գլորեց.
Մեղկությունը մեռցրեց նրան, ծուլությունը
թմրեցրեց,
Շվայտությունը հարբեցրեց նրան:
Ո՞վ դյուրապատիր մարմին երկրածին, ի՞նչ ողբ
ու կոծով ավաղեմ ես քեզ.
Քանզի ոչ միայն նրան են վերաբերում բանադ-
րանքներն այս,
Այլև կամովին սխալվողներին և մոլորվողներին
բոլոր:
Ուստի և ահա՝ պետք է իմանաք այս օրինակով,
Թե անօգուտ է պարծենալ մարմնական իմաս-
տությամբ,
Եթե Աստուծո դատելով ընտիր չհամարվի ոք:
Այնպես, որ եթե մեկը մինչեւ իսկ հիմար էլ լինի,
բայց հույս դնի ստեղծողի վրա՝
Նա զերծ կմնա այն չարիքներից, որոնց Առղո-
մոնն եղավ ենթակա:

Դ

Բայց Սողոմոնն ունի ինքնապարսավ կշտամ-
բանքով լի
եվ սաստիկ քստմնելի՝ դարձի մի հիշատակա-
րան,
իբրև մեկը, որ մեռցրել է իր մեջ անձնասիրու-
թյան աշխարհը համայն,
Որն, եթե ուզենք ճիշտը նկատել, «ունայնու-
թյուններով» է իմանալի.
Այլև մատյանով քահանաների և սիլոնացի
Աքիայի Գրքով,
Որի մեջ նա իր անցած ողջ կյանքի դառնու-
թյուններն է երգում արցունքով.—
Զուր ջանք, անօգուտ վաստակ, անմիտ հե-
տեանք, անշահ արշավանք,
Անկայուն գործեր, օտար խորհուրդներ, սին հո-
լովումներ,
Բամբասելի բերք, անձիշտ կարծիքներ, սնոտի
սերմեր,
Ավազափուլ շինվածքներ, ապականացու ստաց-
վածքներ,
Քամահրելի տաժանքներ, ինքնամարտ կորիվ, իր
ոգու գեմ դատ,
Ընդունայն քրտինք, վնասակար փափագ,
Կորստյան շավիղ, վրիպակ ճանապարհ,
Կործանարար կրթություն, մոլորապատիր վար-
ժություն,

Մշտամիսալ տեսողություն, ակնահայրատ
պչըրանք,
Պոռնկատիպ կերպարանք, ախտաբորբոք նյութ,
Դմնատեսիլ գույն, հոգնատիսուր գեղ,
Սաստիկ մրոտ ծուխ, ցնդելի շոգի,
Ավարի վաճառք, քանդելի տաղավար,
Ի գուր աղաղակ, անառիթ ծաղրանք,
Արհամարհելի ասպարեզ, անձնավաճառ գիր,
սատակչական ելք,
Անաստված մտածմունք, ստահոդ ճառ,
Զայրացցուցիչ զրույցներ, եպերելի խծրծանք,
Խելագար խույզեր, ամոթանքի ցույցեր, խայ-
տառակ հայտնություններ,
Ապառնի անառակություններ, ապաշավելի
արարքներ,
Հմբոստների պատմություն, ծույլերի օրինակ,
խորխորատ ծածուկ,
Որս խավարային, մահագուշակ վիճ, անհատակ
անդունդ,
Ուղեկցություն սպանողներին, հիմարական
բարբաջանք,
Դարանակալների վայր, խարխուլ հարկ,
Սասանած շինվածք, խախտված կամուրջ,
Խուսափուկ երեսույթ, խաբող շողոքորթ, անոպա
մատնիչ,
Հակառակություն ընդդեմ բարձրյալի:
Խոստովանական խոսքերի բոլոր մասերն այս
որպես կանոնադրություն

Ժողովողն ինքը նախասերմանեց բոլոր,
Զղջումով դարձի եկողների սրտում,
Որպեսզի մարդկանցից ոչ ոք չպարծենա՝ բամ-
բասանքների նետերով զինված՝
իր անձը և իր ընկերոջը խոցոտելով.
Զի կռապաշտ է նա, ով քողով է ծածկված կե-
ղեկի տակ
Եվ ստեղծողին անախորժ գործեր է կատարում:

Ե

Եվ արդ, նա, որ այնքան չմեղանչեց, որքան
զղջաց,
Թող չպախարակվի իսպառ, այլ այդպիսին ի
բարին հիշվի,
Իբրև հիմք հուսագրության բոլոր նրանց, ով-
քեր տերունական ոտքին դիմեցին,
Երբ աստվածությամբ անբաժանելի նա դժոխքն
այցի իջավ իր հոգով՝
Կենսագործելու այնտեղ խոստովանողներին¹,
Որով մեռյալները կենդանիներիս բերին ավե-
տիս անտարակույս:
Եվ ես հանցապարտս, որ հասու չեմ նրա իմաս-
տությանը,
Բայց մասնակից եմ եղել նրա մեղքերին,
Աղոթում եմ արդ նրա հետ ահա և բարեբան-
ված մեծիդ պաղատում:

¹ Ա. Պետ. Գ. 19

Լցրո՛ւ դու համեստ շարադրանքն այս իմ այն
երջանիկի հանճարեղությամբ,
թախանձանքներս թող որ խառնվեն այն հույժ
աշխարող արքայի աղերս-աղաչանքներին
Եվ դառնան թող որ մեծարանք առ քեզ:
Խնդրանքներս այս իմ մի՛ թողնի անտես,
ինչպես խնդրանքներն վեհ արքայորդու, որ իբր
օրինակ տվիր Միածնիդ:
Եվ մենք արենակցին նրա՝ փառակցիդ ճաշակե-
ցինք:
Տո՛ւր փրկություն քո ծառային, ամենահնար,
զորեղ, ահավոր,
Եվ ավելացրու փառքն ստեղծողիդ՝
Զնջելով նրա մեղքերն անքավելի:
Հիշելով բարի խորհուրդները նրա, ողորմյալնե-
րի հետ նորոգիր նրան,
Որ ամենահամեղ, ախորժաճաշակ և բազմապա-
ճույն առակագրությամբ
Աստվածությունդ քարոզեց եկեղեցուն ընծայ-
ված լուսագարդ իր մատյանում,
Յույց տալով բարի ճամփան բոլորին,
Դեպի քեզ գալու խոստովանությամբ, Հա՛յր
ամենեցուն:
Նրա այս խոսքերն ապացուցում են, թե հեռու
չէր նա ողորմությունից,
Եթե եռանդուն նրա սրտի մեջ հուսահատու-
թյուն կաթած չլիներ,

Որ և զղումի աճապարանքը փոքր-ինչ կասեց-
րեց:

Ω

Արդ, ի հուշ բերելով բարեմասնություններդ
անձառելի,
Ողջունի՛ր գթությամբ և քո երանությանն
արժանացրու դարձյալ
Դարերից ի վեր մեղաղրանքների քարածզու-
թյամբ խոշտանգվածին,
Որ առատահոս արտասուքների վտակներով
իր խրախճանքների ապարանքի հատակը հեղե-
ղեց սաստկակսկիծ ապաշավությամբ
եվ ողորմելի հոգու հեծությամբ հոր հուզում-
ներին գերազանցեց:
Արցունքներն այդ քո դու երկայնամիտ ներո-
ղությամբ
Միացրո՛ւ ու խառնիր, գթա՛ծ, Միածնիդ
արցունքներին,
Որ մեր մարմինն առնելով կրեց բովանդակ մեր
վշտերն իր մեջ:
Անվավեր կերպով նրանը կարծված սաղմոսի
բարեբանությունը ի փառս էակից Որդուդ
վճռելով,
Նրանով նրա՛ն ևս փրկիր քաղցրությամբ
աղքատների հետ,
Պուետիկոս մի բարեշնորչ¹,

¹ Գրիգոր Նյուսացի (330-400)

Հիովին վարձք էր համարում իրեն Սողոմոնի
հետ միաբան ձայնակցությամբ՝
Նրա համար իսկ աղերսել առ քեզ,
Որը և լրիվ՝ հավելվածաբար հիշատակված է
հաջորդ տողերով:
Քանզի նրա հորինած օստացու բազմահրաշ,
մարգարեաճառ պատմագրությունը,
Որ աստվածությանն է արդարացնում,
Հաստատում է, թե Սողոմոնն արժանացավ
ողորմության:
Ապա ուրեմն նրա համար աղոթելն ավելի
անպարսավելի է, քան չարախոսելը:

Է

Ուստի և ես եմ աղոթում ահա մեծ վստահու-
թյամբ,
Նրա հետ մեկտեղ գոչյունս ողբի քեզ ընծայե-
լով.
Զի եթե ըստ մեր գործերի դատես ու կորցնես
մեզ
Զի պակասի քո փառքը, քանի որ իրավունք ու-
նես դու,
Իսկ եթե գտնես մեզ՝ կբարձրանաս այնքան, որ-
քան վայել է քո մեծությանը:
Զի դու հավիտյան օրհնաբանելի ես
Ողորմածությամբ, քան թե սաստկությամբ նա-
խահրաման:

Դարձի՛ր, Տե՛ր, դարձի՛ր քո խնամարկու գթու-
 թյան քաղցրությամբ
 Եվ սիրույդ ձրի և ամենառատ պարզեներով
 սփոփիր մեզ,
 Որ համանման անբժշկելի տագնապի տապով
 տոչորված՝ տրտում-տխուր ենք հավետ:
 Փրկարար ձեռքդ դնելով կրկին՝ նորոգի՛ր դու
 մեզ,
 Քավելով և պաշտպանելով մեզ մեղսակործան
 խորտակումներից:
 Եվ քեզ՝ սկզբիդ միակ և անսկզբիդ,
 Եվ սկիզբների սկզբնավորողիդ
 Սուրբ Երրորդությանդ և մի աստվածությանդ
 Փառք և իշխանություն հավիտյանս
 Հավիտենից. ամեն:





Արքի խորչերից խոսվ Սաղմոն-Ճռ Հեղ

Ա

Եկ արդ, անօրենությունները թող չտիրապետեն
Քո երկնային թագավորության կայսերական իմ
պատկերին,

Դու լո՛ւյս բոլորի, Աստվա՛ծ:

Թող որ չկապտի գոռոզն ապստամբ՝ շնոր-
հիդ զարդը իմ կերպարանքից, որ դու ես
ստեղծել:

Զթագավորի մահացու մարմնիս՝ մեղքը խա-
փանված գրավելով ինձ:

Քեզանից բացի չունեմ ես, Քրիստո՛ս, իմ շնչին
իշխող մի այլ թագավոր,

Որ անբռնադատ հնազանդեցնում ես ինձ քաղցր
լծիդ.

Որ ջնջում ես իմ բազում մեղապարտ կրքերը
խոսքովդ ամենակարող.

Որ քո արյամբ ստացար ինձ և քո մարմնով կե-
րակրեցիր.

Որ սահմանեցիր կյանքի ուխտ անդարձ, անփո-
փոխելի.

Որ կնքելով ինձ քո հոգով՝ կցորդեցիր ինձ քեզ
և տվիր Հորդ ժառանգավորապես.
Որ հիշատակով չարչարանքներիդ՝ զոհիդ անու-
նով
Համարձակություն տվիր աղոթել նույն բարե-
րարին,
Ո՞վ գու բոլորի ստեղծիչ ու կյանք:
Դու ես բոլոր հոգիների Աստված:
Քո շնորհների պարգևատրումն այս դու համա-
րեցիր շատ ավելի մեծ, քան հրաշալի գոր-
ծերդ բոլոր:
Ո՞չ երկինքն իր զարդերով համակ և պայծառա-
գեղ հրեշտակներով,
Ո՞չ երկիրն ու մարդկությունը և զարմանաս-
քանչ գործերը նրանց,
Ո՞չ լայնատարած ծովն իր մեջ եղող արարած-
ներով,
Ո՞չ անդունդները իրենց ողջ անբավ գոյավոր-
ներով,—
Ո՞չ այնքան այս վեհ արարչությամբ էր, որ
բարձրացար դու,
Որքան դեպի ինձ կարեկցանք ու գութ ցուցա-
բերելով,
Երբ մարգարեի բերնով ասացիր, ո՞վ քաղցր
հույսի բարեշնորհ Տեր.—
«Ո՞վ կա ինձ պես Աստված, որ կարող է միշտ
ներել մեղքերը և ջնջել անօրենություննե-
րը»:

Եվ ահա՝ խնկված են խոսքերդ, ողորմա՛ծ, և
խոստովանված են բարերարություններդ,
Փառավորված են խորհուրդներդ խորին և
երկրպագված՝ շնորհներիդ առատությունը:

Բ

Արդարեւ, ո՛չ ոք արարածներիդ նյութեղեն լեզ-
վով կարող է մեկնել
Գթություններիդ մի մասնիկն անգամ, որ ցույց
տվիր ինձ, հորինո՛ղ.
Զի ճշմարտապես մեծ է ավելի այն զորությունը,
Որ հնացածը նորոգում է դարձյալ իր առաջին
պայծառությամբ,
Քան թե այն ուժը, որ ոչնչից է ստեղծագործում:
Զի չունես երբեք անկարողություն, զորավորդ
դու ամեն ինչի մեջ,
Եվ քո մեկ խոսքը բավական է լոկ, որ հասնեն
գործերն իրենց լրումին,
Ելի՛ր ուրեմն, փառավորվելու, բարեգործ,
Կրկին ստեղծելով ինձ, որ հույսս կտրել եմ
փրկությունից,
Որ այս ճշմարիտ և հաստատական ուխտի հա-
մաձայն
Մեծապես բարձրանա ձայնդ օրհնաբան և ավե-
տաբար,
Առավել՝ հայտնի քավությանդ շնորհով և ողոր-
մությանդ լույսով առինքնող,

Քան թե գործերով ստեղծողական:

Զի մեկով որպես Արարիչ ես դու ճանաչվում
միայն,

իսկ մյուսով՝ ոչ թե միայն Արարիչ, այլև երախ-
տավոր.

Ոչ միայն ստեղծող, այլ նաև քավիչ,

Ոչ միայն նորոգող, այլև բարերար,

Ոչ միայն հաստող, այլև ողորմած,

Ոչ միայն կամեցող, այլև հնարավոր,

Ոչ միայն հորինող, այլև հեղ, համեստ,

Ոչ միայն նկարող, այլև ամենազոր,

Ոչ միայն առաջնորդ, այլև լույս,

Ոչ միայն խնամող, այլ նաև հովիվ,

Ոչ միայն դարմանող, այլև հոգածու,

Ոչ միայն ողջացնող, այլ նաև բժիշկ,

Ոչ միայն պաշտպան, այլև զորավար,

Ոչ միայն անհաղթ, այլև թագավոր,

Ոչ միայն Արարիչ, այլ նաև քաղցր,

Ոչ միայն պարզեատու, այլև առատաձեռն,

Ոչ միայն համբերող, այլ նաև ներող,

Ոչ միայն չըարկացող, այլև անոխակալ,

Ոչ միայն կարեկից ու վշտակից, այլև ծածկա-
գետ,

Ոչ միայն գթոտ և հոգատար, այլև ապավեն,

Ոչ միայն գերազանցապես գորովող, այլ նաև
Աստված,

Եվ քո անսպառ բարությամբ՝ օրհնված ըստ
ամենայնի:

Գ

Արդ, ինչպես որ ստեղծեցիր ինձ, մինչ ոչ իսկ
էի, և գոյացնողս հանդիսացար,
Այժմ էլ վերստին հարդարիր ահա հոգին մաղթո-
ղիս՝ նրա տաղավարն եղող մարմնիս հետ,
Մաքրությամբ նախկին և ամենասուրբ անարա-
տությամբ, ինչպես որ դեռ նոր աշխարհ
էր եկել,

Որ է՛լ ավելի աճեն, զարգանան և բազմապատկ-
վեն

Նորոգ ներկայիս՝ անսահմանելի քո սքանչել-
յաց շնորհներն առատ,
Քան ստվերական հներն անցյալի:
Եվ երբ պատմելով թվեմ ես մեկ-մեկ մեղքերս
բոլոր,
Հիշատակելով անտանելիներն, որքան որ մտքիս
թևերը զորեն,
Անունովդ, հզո՞ր, թո՞ղ արդարանամ:
Եվ երբ ես ինքս պատմեմ բերանովս բծերն իմ
հոգու,
Ների՛ր ամբարիշտ մեղքերը բազում խոստովա-
նողիս, հզո՞ր ծածկատես, ամենափրկիչ,
Որ չլինի թե ավետումների ամենալրիվ առա-
տության մեջ,
Նախկին վիճակին կարոտեմ դարձյալ՝
Երանի տալով մկրտության շնորհներով
փրկվածներին, ըստ սաղմոսի,
Եվ թող չլինի, որ ես մեղքերի փշերով արդեն
սաստիկ խոցոտված,

Այժմ էլ վերստին քո ձեռքը միսլի մեջս առավել
մեծ ուժգնությամբ,
Ծանրացնելով պարտքերիս բեռը, քան պարզե-
ների քաղցրությունը քո:
Այլ ազատիր ինձ, աղաչում եմ քեզ, Տե՛ր ամե-
նայնի,
Եվ փրկիր մահվան ու մեղքերի խիստ օրենքնե-
րից քո Սուրբ Հոգով օրհնաբանված:
Քա՛վ լիցի, թե տկարանա նվազելով ճշմարտու-
թյանդ լույսն, ինչպես Գիրքն է ասում.
Զի այնտեղից, ուր քավությունն է թագավո-
րում՝ վտարված է մեղքը,
Եվ ուր կենդանի խոսքդ է խրախուսում՝ չկա
հուսահատություն,
Եվ երբ չնորհներդ ավելանան, հանցանքները
կհալածվեն,
Երբ մոտ է ձեռքդ աստվածային՝ չկա անհնա-
րություն,
Այլ կա համորեն լուսավորություն, բովանդա-
կապես զորություն և անպարտելի կարո-
ղություն:
Քոնն են՝ փրկություն, կենդանություն, նորո-
գություն, ողորմություն,
Միանգամայն և քաղցրություն, արքայություն,
անկեղծություն
Եվ փա՛ռք հավիտյանս. ամեն:



Արդի Խորհրդական Խոստ Ասպառ-Ճառ Հետք

Ա

Ինչպես որ առանց Քրիստոս Աստուծո մեր հոգիներին փրկություն չկա,
Եվ ոչ էլ առանց աչքի տեսողության՝ լույսի
զվարճանք,
Եվ կամ արևի քաղցրություն՝ առանց արևածառի,-
Այսպես էլ առանց ծածուկ մեղքերի խոստովանության
Եվ ինքնապարագ մեղաղրանքների՝ չկա քառություն:
Զի քեզ ի՞նչ օգուտ քո մաքրությունից, փարիսեցու հետ եթե դու դատվես,
Եվ կամ ի՞նչ վնաս ինձ իմ մեղքերից, թե մաքրավորի հետ պիտի գովվեմ,
Կամ ո՞ւր պարսավեց Հովել մարգարեն, երիցս կրկնելով եղկությունն անձի,
Կամ մեղաղրել կարո՞ղ է մի սուրբ՝ մեծագույն օրը հաշվելու համար¹.

¹ Յովել Ա. 15, Բ. 11

Եսային ինչպե՞ս և ինչո՞ւ պիտի դիտվի պղծա-
 շուրթ¹,
 Որ իսրայելի տան արարքներից մնաց միշտ հե-
 ռու.
 Եվ Հիսուսն ինչո՞ւ մեղավոր լինի աղամյան
 մարմնով՝
 Կարեկցելով ինձ՝ հանցավորապես Հորը աղո-
 թած լինելու համար.
 Կամ ինչպե՞ս մեկնել միտքն այս առակի.՝
 «Սիրտն իմաստունի՝ սգատան մեջ է,
 Իսկ սիրտն անմտի՝ ուրախության տան»²:
 Զի նա, որ Աղամի սխալն իր անձին չի վերագ-
 րում
 Եվ բոլորի մեղքերը չի համարում իրենը,՝
 Ինչպես Երջանիկն այն արքաներից, որ մեղավոր
 էր համարում իրեն հայրերի գործած հան-
 ցանքների մեջ,՝
 Դրանով իսկ նա մեղանչում է խիստ և կորցնում
 իր արդարությունը,
 Ինչպես մեկը, որ անախտակիր է կարծում
 մարդկային բնությունը իր,
 Եվ սիրտը երբեք չի կարող բերկրել այն զվար-
 թությամբ,
 Որ պարգևում է ավետումն հույսի, եթե Քրիս-
 տոսի առաքյալից սովորած՝

¹ Եսայի Զ. 5

² Ժողով. Է. 5

Զկարողանա տրտմել Աստուծո կամքի համաձայն, ինչպես ասված է¹:

Բ

Արդ, ըղձալի է ինձ այստեղ հիշել հոգեոր այն հանճարեղի

Խրատն հինավուրց, և սակայն միշտ նոր, որ Տերն իսկ կրկնեց².

Ամբարիշտների նանրախորհուրդ ժողովներում Զգնալ նստել հպարտների առաջին բարձին, – Որից հաստատուն ուխտ ու պայմանով՝ հրաժարվեցին Դավիթն ու Երեմիան, –

Այլ իրենց մեղքով խիստ ամոթահար մեծ դատաստանի հատուցման ահով սասանածների սրտանց զղջացածների հետ՝

Եվ խոնարհ կամքով հավասարվել հետիններին այստեղ երկրի վրա.

Սրանցով է, որ բերկրում է բարձրյալ Աստվածն ու պարարվում:

Եվ այսպես ահա, ես էլ նրանց հետ, հետեւելով այդ խրատին,

Համարձակվում եմ նախադաս լինել բազմականների հետ երանելի:

Այսպիսով գերծ կլինենք մարգարեի մեղադրական այս խոսքերից,

Որն ակնարկում է վեսերից ոմանց.

¹ Բ. Կորնթ. Է. 10

² Ղուկ. ԺԴ. 8

«Մի՛ մոտենար ինձ, զի մաքուր եմ ես, և ո՞վ
կարող է նայել ինձ»:

Երջանիկ Դավթի անսահման խոնարհությունից
օգտվելով՝ կարող կլինեմ նրա հետ ասել.—
«Որպես անասուն համարվեցի ես՝ զգայազուրկ
եղած,

Վրա հասան չարիքներն ու ինձ պաշարեցին.
Նեխեցին վերքերս ու փտեցին անբժշկելի՝ անզ-
գամության պատճառով»,

Ինչպես նաև Ասորեստանում՝ ընտիր, անարատ
անձերից ոմանց
ինքնադատական կշտամբանքները մեղապար-
տության,

Որոնցից եզր մեծ քահանայի այս խոսքն եմ
ահա կրկնում ես ինքս.

«Ոչ իսկ երեսն իմ կարող եմ առ քեզ բարձրաց-
նել, Աստվա՛ծ»:

Գ

Արդ, ես ճշգրիտ պատկերս ամենայն մարդկանց,
Խառնելով մեղքերս նրանց մեղքերին,
եվ նրանցով դառնությունն իմ կրկնակի ավե-
լացնելով՝

Հեծեծեմ պիտի նրանց հետ դարձյալ,
Թեպետև պետք չէ դարձ գույնի վրա նոր տգե-
ղություն ավելացնել:

Ահա և հիմա ես մեղանչեցի, զի անմտությամբ
գործեցի քեզ անհաճելին՝ բազում հանցա-
վոր սխալանքներով:

Նայիր ինձ, գթա՛ծ, ինչպես որ երբեմն ուրացության մեջ բռնված Պետրոսին¹,

Զի ծայր աստիճան ես ունայնացա:

Քո ողորմության ճառագայթը ծագիր ինձ վրա,
համա՛կ բարերարություն,

Որպեսզի, ո՛վ Տեր, քո օրհնությունն ընդունելով՝

Արդարանամ, կենդանանամ և լինեմ մաքուր
ինձ լիկող մեղքերից, որոնք դո՛ւ չես ստեղծել:
Մեղապարտ ձեռքերս քեզ պարզելու համար-
ձակություն չունեմ.

Մինչև որ մոտեցնես քո օրհնյալ աջը դատա-
պարտյալիս նորոգելու:

Արդ, հաղթի՛ր դարձյալ համառությանս քո հե-
ղությամբ

Եվ դալով դեպի ինձ մարդասիրաբար,

Եվ քո բացարձակ ու կատարյալ կարողությամբ
Ների՛ր առաջին, միջին և վերջին մեղքերս բո-
լոր,

Ո՛վ անհասներին հասնող, լույս արդարների,
Քրիստոս թագավոր:

Դ

Արժանի չեմ ես քո օրհնյալ անունն հիշելու,
Զի հանցավոր եմ մահացու կերպով բարեգոր-
ծիդ հանդեպ,

Կնիքիդ հանդեպ ու շնորհիդ,

¹ Սաղմ. Ա. 1, ԻԵ. 4-5

Փչումիդ ու պարզեիդ,
Ավանդիդ, ձիրքիդ և անունիդ,
Որդեգրությանդ,
Արքայական պատվիդ ու պատկերիդ,
Դրոշմիդ, օծումիդ ու ճոխությանդ,
Համարձակությանդ և ընտանությանդ,
Կյանքիդ, լույսիդ ու երանությանդ,
Պսակիդ անկապտելի և խոստումներիդ ծածկ-
ված,
Որոնք, Տե՛ր Քրիստոս, բազում ձևերով ավետե-
ցիր ինձ՝
Համառողիս, իժիս և քարբիս, և ամուր խոցված
խուլ ականջներիս:
Քո շարունակ ավելացող բարության դիմաց՝
Բազմապատկվեցին չարություններն իմ և ինձ
կործանեցին իսպառ,
Զատելով կյանքից, կապեցին մահվան,
Ծառա կարգելով ապականության:
Արդ, դու ես միայն իրավակշիռ և ճշմարտա-
դատ, ո՛վ բարերար և օրհնյալդ գթության
մեջ.
Ես մեղանչեցի քո դեմ՝ գործելով անօրենու-
թյուն, եղա անիրավ,
Եվ որի համար եղծվեցի ու զեղծվեցի,
Հանցավորապես ամբարշտացա,
Ու չլսեցի քո խոսքը գովված, խոստովանված ու
երկրպագված:
Դու ինքդ իսկ երևացիր անճառելի քո սիրով,

Որը գրել իսկ դժվարին է խիստ և նշանակելը՝
սարսափելի:

Քեզ արդարություն և փառք, և մշտնջենական
գովություն,

իսկ ինձ՝ ամոթապարտիս քո դեմ, խնամակա՛լ,
Քավություն և ողորմություն և բժշկություն,
Օգնություն և պահպանություն սրտի ու հոգու.
Բարեբանյալդ ըստ ամենայնի
Հավիտյանս. ամեն:





Բան ՏՌ

Սրբի խորժերեց խոսք Շատրւածու Հեղակ

Ա

Արդ, ես մահացուս ամենապատիր՝ Երկրածնի՝
միթե պաղատեցի մի,

Որին ընդունայն է աղաղակել.

Մահկանացուի՝ միթե բանական,

Որից փրկություն հուսալը լինի սնոտի ու սուտ.

Ոմն եղծականի՝,

Որի զորությունն անուժ խոսքի պես լինի զուր,
նանիր.

Երկրավոր գահակալ իշխանների՝,

Որոնց բարիքներն էլ իրենց նման լինեն անցա-
վոր.

Հարազատ եղբո՞ր,

Որն ինքն էլ կարոտ լինի իր անձի անդորրու-
թյանը.

Հո՞րն իմ երկրավոր,

Որի օրերի նվազության հետ խնամքն էլ է պա-
կասել.

Ինձ ծնող մո՞րս,

Որ հրաժարված լինելով կյանքից՝ գութն է ցա-
մաքել.

Արդյոք աշխարհի թագավորների՞ն,
Որոնք մեռցնելու, քան թե կյանք տալու հնարք-
ներ են միշտ մտածում միայն,—
Այլ քեզ դիմեցի, բարերա՛ր Աստված, օրհնյալ
ի բարձունս,
Որ կենդանի ես և կենդանություն կտաս բոլո-
րին.
Եվ մահից հետո էլ անեղծապես կարող ես նո-
րոգել:

Բ

Եթե քեզանից փախչենք, դու մեր ետևից կվա-
գես.
Եթե տկարանանք, կզորացնես.
Եթե շեղվենք, դու մեզ շիտակ շավիղի վրա կհա-
նես.
Եթե պատկառենք, կքաջալերես.
Եթե հիվանդանանք հոգով ու մարմնով, կբժշկես,
Եթե գարշանանք մեղքերով, կմաքրես.
Եթե ստենք, քո ճշմարտութեամբ դու մեզ կուղ-
ղես.
Եթե գլորվենք անդունդներ անտակ, երկինքը
ցույց կտաս մեզ.
Եթե մենք չուզենք մեր կամքից դառնալ, դու
կդարձնես.
Եթե մեղանչենք, կողբաս, եթե արդարանանք,
կժպտես.
Եթե օտարանանք, կսգաս, եթե մոտենանք, կտո-
նես.

Եթե տանք, կընդունես, եթե դանդաղենք, կհամբերես.

Եթե մենք ապերախտ լինենք, դու առատապես կշնորհես.

Եթե թուլանանք, կտրտմես, եթե արիանանք, կխնդաս:

Գ

Հարյուրերկուերորդ սաղմոսն օրհնաբան և հրաշագեղ սփոփում է սիրտն իմ վհատյալի.

Եվ ավետում է ինձ կյանքի մեծ հույս, որպես հավաստիք անձիս փրկության.

Հաղթահարում է դեերին բոլոր և բանսարկուին մատնում վարանքի,

Ինչպես տերունի խաչի նշանը պանծալի, բարեբախտ և հրաշափառ,

Անխոնարհելի բարձրությամբ լուսո և անպարտելի զորությամբ վերնույն

Ախոյան է նա կանգնել անհողողդ անշարժելի հավերժ-հավիտյան

Ընդդեմ բռնության անբարեբարո Բելիարի:

Նա ունի իր մեջ գիտուն, հետամուտ մտքերի համար հոգեշշահ գանձեր,

Որոնք բերում են մահվան՝ պարտություն, մեղքերին՝ լուծում,

Կրկնակի հույսեր՝ ա'յս և անվախճան կյանքերի համար,

Եվ արդարներին՝ անեղծանելի նորոգման խոստում,

Բարեհրավեր և կենդանատու կանոններ՝ գրված
Աստուծո Հոգով:

Եվ ոչ միայն այդ, այլ բոլոր երգերն էլ սաղմոս-
ների՝

Մի-մի կտակ են մարդկության համար կենդա-
նագրված,

Որոնք, արդարեւ, մաքուր սրտերին են տեսա-
նելի:

Դ.

Նախկին օրենքը, որ նոր օրենքի օրինակն էր
թույլ¹,

Որպես առաջին անգամ տեղ հասնող մեծ ավե-
տագիր կյանքի կործանման՝

Երկնակրոն, վերնակենցաղ և մի՛շտ անճառելի
կյանքի ավետիս

Ու վստահություն էր պարունակում,

Եվ սակայն գրվածքն այդ

Ճնջելի էր և նրա օրինակն՝ այլայլելի.

Հուսահատ հանցավորներին դատապարտելու
պաշտոն ուներ նա,

Երկրային մի կտակ էր այն խափանելի և տկար
միջնորդ հաշտարարության,

Եվ որով խոսքերն աղոթողների անկատար էին:

Այդ մասին ստույգ վկայում է փրկությունը
Մանասեի՝

Նրա այնքան շատ և անբուժելի վերգերից հետո.

¹ Եթո. Է. Ը. Ժ. Գլուխմերը և Բ. Կորնթ. Դ. 7-9

Նա, որ արդարների արյունով լցրեց մեծ թագավորին նվիրված

Հրաշանուն քաղաքն հայրենի, ըստ մարդարեագիր անսուտ պատմության¹:

Նա, որ տեսանողներից մեծին իսկ՝ բազմերախտ պաշտպան իր դաստիարակին,

Նախնակերտ հարկի տեսչին սղոցեց մահվան մեքենայով,

Եվ մարմինն երկու կտոր անելով՝ մաշեց դժնդակ չարչարանքներով,

Ապստամբության խորհրդով կտրած փրկանակն հույսի:

Դրա հետ մի այլ չարություն էլ նա գործեց մոլեգին.

Ընդդեմ բարձրյալի հանդգնեց մղել նա քրեական մի աստվածամարտ,

Քանզի չամաչեց երբեք՝ Արարչի պատիվն ու անունը յուրաքնակ խորանից մերժել,

Եվ հալածելով Աստուծո Հոգին՝ ինքը Բելիարի հետ համաձայնեց:

Քանզի նույն այդ տաճարը տիրական՝ Արարչի խնկարկությանը սահմանված,

Երկրային հռչակավոր հանդիսատեղին, ազգերին սարսափ ազդող սրբավայրը,

Որտեղ տեսիլներն հրեշտակային և աստվածային հրամաններն հաղթող՝

Լուսավոր, պայծառ հայտնությամբ էին ծանուցվում,

¹ Ղ. Թագ. ԺԱ. Երեմ. ԺԹ. 4-5

Այդտեղ, այդ երկնանման, սքանչելատես վայրը
 ահազդու քարուքանդ արավ
 Եվ քառաղիմակ ու նախանձարկու Քւան անու-
 նով մի կուռքի համար¹
 Նա հույժ գարշելի պաշտոնատեղի ու դիվաճեն-
 ճեր զոհարան դարձրեց:
 Զրկելով երկնավոր թագավորին իր կյանքից
 արքայական,
 Ամենահարուստին իր ստացվածքներից թա-
 փուր թողնելով,
 Եվ տանուտերին արած անհանգիստ ու տա-
 տանյալ թափառական՝
 Բեեղզեբուղի² ձեղունը նկարազարդեց և ահեղ
 անունը վտարեց նրանից.
 Գերի վարելով գովյալի ավանդը, ողբալի կեր-
 պով նվազեցրեց ողորմածի մասը.
 Լույսի սրահը ապարանք շինեց փոքր աղվեսի
 համար
 Եվ ամեն ինչ ունեցողին ոչ իսկ մի տաղավար
 թողեց՝ իր գլուխը դնելու.
 Հզորի ցանկապատը քանդելով՝
 Արյամբ սրսկված սեղանն այն մեծախորհուրդ

¹ Ս. Գրքի եբրայական բնագրում Քիուն կամ Քիոն է կոչվում այս աստվածը (Ամվս. Ե. 26), որը յոթանանիցը թարգմանում է Ռե-
բան և որը, ըստ ասորաց, արաբացոց և պարսից՝ նոյն ինքը
Երևակ ասողի կուռքն է: Քառաղեն է կոչվում նա, որովհետև
ըստ Եվերիոսի՝ չորս աչք ուներ, կամ, ըստ այլոց՝ չորեքկողմյան
խարսխի վրա էր դրված:

² Ակկարոնի ճանճիկ աստվածն է:

Հատկացրեց բախտագուշակության ու հմայությունների:

Լայն ճանապարհներ բացեց բազմաթիվ՝
գայթակղումների համար,
Դառնալով ինքը կորսայան հովիվ սատակման
հոտին

Եվ մոլորության բուռն վարդապետ.

Եվ այդ բոլորը նա արավ, գիտենալով հանդերձ
կրոնի օրենքները ողջ

Եվ ունենալով Դավթին նմանակից հայր՝ մեծ
եղեկիան:

Ե

Այսպես, նա այնքան չարիքներ գործեց, որ
մինչև անգամ պատիվն Աստուծո,

Որն արքայական փառք ընծայեց նրան, հայՀո-
յեց ու թշնամանեց,

Եվ սրախողխող սպանեց բազում աղոթողների:
Եղավ նա ընտանի դավաճան, մերձավոր վատ-
նիչ,

Հարազատ սատակիչ, մեղսակից սպանող:

Զէր կարող դառնալ նա Աստծուն կրկին, զի ու-
րացել էր նրան.

Զէր կարող հիշել Աբրահամին, զի խորթացել էր
նրանից.

Զէր կարող իսահակով աղոթել, զի նզովված էր
նրանից.

Զէր կարող իսրայելով պարծենալ, զի տարագիր
էր այդ մեծախորհուրդ կոչման շնորհից.

Զէր կարող դավթյան երգը երգել, զի կշտամ-
բիչն էր նրա.

Զէր կարող մոտենալ քավարանին, զի պղծել էր
այն.

Զէր կարող ապավինել աստվածագիծ տապա-
նակին,

Զի այն գարշելի ձուլածոյի հետ էր փոխանակել.
Զէր կարող Մովսեսին դիմել, զի անքավելի էին
իր մեղքերը նրա հանդեպ.

Զէր կարող աղաչել Ահարոնին, զի հանցապարտ
էր նրա առջե:

Զէր կարող դիմել մարգարեների խմբին մերձա-
վոր, զի նրանց սպանողն էր նա:

Սակայն և այնպես նրա մեղքերին քավություն
եղավ


Եվ արքունի իշխանությամբ դարձյալ պարզեա-
տրվեց,

Որպեսզի քեզ համար, ո՞վ բարերար,
Սերնդեսերունդ և դարե ի դար գովեստներ ան-
ճառ և անլոելի ավելացնես դու,

Եվ դարպասն հույսի՝ մտնելու համար միշտ ան-
փակ պահես,

Ի փառս քո բարձրության և ի փրկություն
դատապարտյալիս,

Ո՞վ անմահական պարզեների տվիչ Քրիստոս,
Գովյալդ հավիտյան. ամեն:



Բան ՆՐ

Սրբի խորժերից խոսէ՛ Ըստու-ծո Հեղ

Ա

Օրհնյա՛լ տիրապես էռթյանդ մեջ,
Անսահմանելի, անփոփոխելի, իսկապես բարի,
Պաշտում խնկելի և երջանկություն խոստովա-
նելի ամենայն երկրի,
Հարատե հույսի ամենապատրաստ դու հայտ-
նությունն,
Գթած, ողորմած, որ չես պահում ոխ մի ակն-
թարթ իսկ
Ընդդեմ բազմամյա մեղանչումների:
Անսահման առավելությամբ և հրաշապես
զարմանալի,
Ավելի, քան թե երբեք բոլոր նախահայրերին,
Դու քո երկնահոս և բարեբանյալ վտակները
ողորմության
Նոր չնորհաբաշխությամբ՝ մեկի տեղ կրկնակի
հաճեցիր հեղել:

Երբեմնի անձուկ լուսամուտը¹ այն, որտեղից
 հազիվ, ըստ Սողոմոնի,
 Զափափոր գիտությունների աղոտ նշույլներն
 էին թափանցում,
 Դու, ինչպես նրա, այնպես նաև ինձ՝ թշվառիս
 համար բացիր ընդարձակ,
 Առագաստն այն անջրպետող, որ արգելում էր
 Մուտքն աստվածային ողորմության ձրի պար-
 գևների:
 Անցյալում՝ ավետավոր հիշատակումների հետ
 Պատկերավոր օրինակներով ասացիր դու մեզ.
 «Դարձեք դուք ինձ, և ես ձեզ պիտի դառնամ»²,
 Կամ՝ «Երբ կդառնաս ու կհառաչես, այնժամ
 դու կապրես».
 Եվ կամ թե՝ «Աղջամուղջի սկզբունք դու կփո-
 խարկես ձյան պայծառության,
 Եվ արյամբ ներկված մարդկանց դու կդարձնես
 գեղմի պես մաքուր ըստ Եսայու և Զաքա-
 րիայի,
 Թե՝ բարկությանդ մեջ ողորմությունդ էլ ես
 մտաբերում.
 Թե՝ իսրայելի քաղաքները անապատանան պիտի
 Եվ ապա դարձյալ դառնան բնակելի.
 Թե՝ ճանապարհները պիտի ամայանան առ ի
 չգոյե մարդկանց.

¹ Ակնարկություն՝ տաճարի երկու փոքրիկ պատուհաններից մտնող զոյգ լույսի, որը խորհրդաբար հասկանում է իբր իհն տնօրենության մեջ ծագած նոր շնորհների լույսը:

² Եսայի Լ. 15, Զաք. Ա. 3, Սաղաք. Գ. 7

Եվ ապա դարձյալ դառնան բանուկ.
Թե՝ պիտի թուլանան ոգու սովով և քո ձեռքով
դարձյալ զորանան.
Թե՝ Աստված զայրագին իր տեղը պիտի գնա
Եվ պիտի դառնա դարձյալ ողորմությամբ.
Կթողնի նա մեզ՝ բայց և՝ կների
Կսաստի թեև ու կսպառնա, բայց և կրկին
կպաշտպանի.
Եվ մինչ խոռվահույզ է սիրտը նրա՝ կշարժվի
գութն իր խնամքների:

Բ

Մարգարեների խոռվերն այս խնկելի,
Որոնք քո օրհնյալ գալստյան հրամանն էին
ազդարարում առաջուց.
Եվ որ հնար չէ նյութեղեն լեզվով բոլորը թվել,
քանզի անբավ են,
Օրինակներ են, նմանություններ նվազ, փոքր
ու հին, ժամանակավոր՝
Քո ավետավոր հայտնության և խաչիդ փրկա-
գործության համեմատությամբ:
Դու ամենուրեք կառուցեցիր խորաններ՝ քո ար-
յան ուխտի վկայության,
Որոնք մեծաբարբառ աղաղակում են միշտ՝
Աբելի մահվան դատակնիքից ավելի բարձրա-
ձայն հոչակելով,
Հաղթանակը բարի պատերազմիդ
Հանուն երկրորդ և անմահ կյանքի շնորհների՝

Մկրտության, հարության, նորոգության,
Հնտանության քեզ հետ և քո Սուրբ Հոգու
միավորության,
Քավության, ազատության, լուսավորության,
Մշտնջենավոր մաքրության և ճշմարիտ երանու-
թյան,
Վերնայինների հետ կցորդության, անկապուտ
փառքի,
Եվ մեր շուրթերի՝ բարձրյալին ուղղած աղաչո-
ղական հաշտարար խոսքի:
Եվ այն, ինչ ասելն իսկ ահավոր է,
Գրում եմ այստեղ ես ի հիշատակ մեծ երախ-
տիքիդ.
Կարող ենք լինել մենք աստված նույնիսկ՝
շնորհներով ընտիր
Եվ ստեղծողիդ հետ միանալ՝
Տերունի մարմինդ ճաշակելով և խառնվելով կե-
նաց լույսիդ հետ,
Մինչ ըստ Պողոսի՝ չուներ հին օրենքն այսպես
կատարյալ երջանիկ խոստում:
Իսկ դու, փրկություն, քավիչ բոլորի, եկար
հայրենի քո հարստությամբ
Եվ մեր հույսն առ քեզ անկրծատելի՝ արիր հա-
րատե կատարելապես:
Փա՛ռք, քեզ Հորդ հետ՝ ի գովք Սուրբ Հոգուդ
բարեբանության,
Հավիտյանս հավիտենից. ամեն:



Արդի Խորհերեց խոսք Եսպո-ծո Հետ

Ա

Զորությունների՝ դու Տեր և թագավոր բոլոր
գոյությունների.

Օրհնաբանված ողորմություն և բոլորի Աստ-
ված,

Որ իշխում ես լայնատարած և ընդարձակ
անսահմանության վրա,

Դու ես չափն ու քանակությունը բոլոր մեծու-
թյունների,

Մինչ այն աստիճան, որ կարծը հեղուկ է քեզ
մոտ և լույծը՝ պնդակազմ,

Անհնար ոչինչ չկա քեզ համար, ո՛վ դու հաղ-
թական զորություն ահեղ.

Հուրը զովասուն ցող է քեզ համար և անձրես՝
բոց կիզանողական:

Քարին կարող ես դու կյանք ներշնչել ու տալ
կերպարանք,

Եվ քանականին դարձնել անխոս և անշունչ ար-
ձան:

Պատվի ես արժանացնում դու քեզ ողոքող մե-
ղապարտին
Եվ կարծեցյալ մաքուրին՝ արդար քննությամբ
դատապարտում:
Մահամերձին բարի բերկրությամբ արձակում
ես դու,
Եվ ամոթահարին՝ օծությամբ դարձնում գվար-
թերես:
Ոտքի ես հանում թակարդի մեջ գլորվածին
Եվ սասանյալին ապահով վեմի վրա հաստա-
տում:
Հիվանդին բազմահառաչ՝ երջանկացնում ես դու,
Առաջ գնացածին ետ դարձնում վերստին:
Եվ երբ սպառվում են բարիքները մեզ համար,
Այնժամ դու է՛լ ավելի զարմանաքանչ գործեր
ես կատարում,
Քանզի դու գիտես ներել մեր մեղքերն ու անօ-
րենությունները ջնջել.
Քավիչ լինել անիրավությունների և մեր մեղ-
քերը չհիշել,
Ինչպես գրում են Եսային և Երեմիան:

Բ

Եվ քանզի այս նոր փրկության շնորհներին
գոհաբանությամբ հետեւելով
Եվ տեսնելով նրանց շատությունն անբավ, լռե-
ցի իսկույն ու պապանձվեցի.

Ուստի և ահա՝ հիշելով դարձյալ լույսիդ
անսպառ բարիքներն ամեն,
Որոնք քո կողմից պարգևված են ինձ՝ համառ
թշվառիս,
Քո՝ աղերսով՝ քե՛զ պիտի պաղատեմ,
Իմ այս մատյանի խոսքերին դարձյալ համարեց-
նելով
Թախծությամբ լեցուն հեծեծագին բազմաթիվ
տողեր:
Սակայն ի հաճույս տվողիդ պիտի առնեմ ու
խառնեմ՝
Յավերի հետ՝ դեղ,
Վհատության հետ՝ խրախույս,
Հուսահատության հետ՝ հիշատակն անվան
հաստողիդ,
Տիրությանս հետ՝ սփոփանքը քո,
Դառնությանս հետ՝ քաղցրությունը կենարա-
րիդ,
Օրենքի պատժի հետ՝ քո շնորհը,
Անիծապարտության հետ՝ օրհնությունդ ազա-
տարար,
Մարմնի մահվան հետ՝ նորոգությունդ կատար-
յալ:

Գ

Հավատում ես ես հզորիդ խոսքին և հաստա-
տում այն.
Լսի՛ր դու սրտիս լոռությունը, Տե՛ր Հիսուս,

Որը դեպի քեզ մեծաձայն հնչումն է երկարագություն:

Մարմնակից ու պատկերակից լինելով մեզ հետ, ինչպես անօրինակ քահանայապետ, օրինակի լուծը խորտակելով.

Անասունների տեղ մահվամբ զենված,

Բարեբանված մարմնիդ նվիրումով

Անմահապես մատուցվում ես միշտ և քավություն շնորհում աննվազորեն

Ոչ միայն սակավ մեղանչողներին, այլ նաև նրանց.

Որոնք փրկության ոչ մի հույս չունեն:

Կյանքը մեղքի մեջ մեր մարմնի համար ինչքա՞ն կարող է տեսական լինել,

Եթե մինչեւ իսկ բյուր-բյուր տարիներ երկարաձգվի,

Երբ դու Աստվածդ զենումն հոժար կամքով հանձն առած,

Մահն համբերությամբ տարար՝ բաշխվելով ի քավություն մեզ:

Աղբյուրդ մաքրության, ոչ թե մահապարտ լինելով ես դու զոհվում օրեցօր.

Այլ որպեսզի մեզ հաշտեցնես Հորդ հետ՝ հաճեցնելով նրան,

Քո կամքով, Հոգուդ գործակցությամբ՝ մատուցվում ես միշտ:

Իսկ դու, բոլորի Աստվածդ անքնին, իմ պատկերով՝ ինձ՝

Փրկությանս համար, իմ անունից,
Որպես թե ես ինքս կցորդվելով՝ միացած լինեի
Նույն մարմնով պարունակված էությանդ հետ,
Ո՞վ բարերար, ինձ համար և իմ կերպարանքով,
Փոխ առնելով իմ պարտքերը և անպարտելիով
մահ ընդունելով
Մահապարտիս պատիճն ու պատուհասը
Որպես թե կամավոր կերպով քո փոխարեն ես
կկրեմ,—
Բազմիցս մեռնելով՝ մնում ես դարձյալ կենդա-
նի:
Ոչ թե ուրացողների ձեռքով, այլ հավատացող-
ների հավատքով է,
Որ նվիրվում ես դու աստվածորեն ու բաշխ-
վում անհատնում մասերով:

Դ

Ոմն աղոթավոր¹, կուռքերի մի պաշտոնատար
Այս մասին մի մեծ և անկշռելի դատողություն
էր անում,
Հույս տալով իրեն անհարմարագիր խոսքով
այսպիսի.
«Հավատում ես ես տիրանալ վառքի և երջան-
կության,
Երբ հասնի վախճանն անցավոր մարմնիս»:
Այդ նույն խորհրդի միջոցով, քան թե մարտի-
րոսությամբ,

¹ Դարձի եկած կռապաշտը
328

Եվ կամ ուղղելով ընթացքս թշվառ։
Բայց նկատեցի, որ նա անճառությունն այս
խորհրդի դավանում էր այնպես,
թե մաքուրներն իսկ, առանց նվիրման այս հի-
շատակին,
թե գոնե հոգով խառնվելով այդ մեծ հրաշակեր-
տության հետ՝
Զեն կարող իսկապես բոլորովին կատարյալ
դառնալ։

Եվ ապա ասում էր նա հուսալով վստահապես՝
«Մեղավորիս համար դու կրկնապես մատուցվե-
ցիր և եղար իմ եսը ճշմարտապես՝
Քո համեղության փոխարեն դառնությունն իմ
առնելով,
Եվ քո իսկ մարմնով՝ լուսեղեն կյանքի նշխա-
րովդ դու պատարագվեցիր»։

Եվ սակայն, քանզի վերնատան մեջ, առաջին
անգամ,

Բարեշնորհ հաղորդության խորհրդի ժամանակ,
Որպես անհնար և անբուժելի մեղքերի դարման՝
Նա բաշխեց մարմինն ու արյունը իր որպես քա-
վությունն՝

Ուստի և, ահա, հաղորդությունն այս վեր է դա-
սում նա,
Քան թե վկայվածի նահատակությունն արյամբ
կատարված։

Այս օրինակով համոզված էր նա և հավատաց-
նում էր միանգամայն,

Թե այս փրկանքով հնարավոր է հասնել հար-
գանքի և փառքի տիրանալ,
Քան թե քավությամբ և ողորմությամբ կամ
շնորհումով.
Զի աստվածային զորությունը վեր է, քան թե
մարդկայինը,
Եվ աստվածախառն տիրական մարմնի կամա-
վորական նվիրումն է վեհ,
Քան անասնական սպանդի մատուցումը.
Անմահը, քան թե մահկանացուն,
Լույսը ահավոր, քան թե խավարը,
Հավիտենականը, քան թե անցավորը,
Բարձրյալը, քան թե երկրավորը,
Անստեղծը, քան թե եղածը,
Իսկությամբ բարին, քան թե բնությամբ վատր.
Մանավանդ որ իր ձեռքն է կամենալն ու կեն-
սագործելը,
Տալով օրհնության առիթ և ոչ թե պատճառ՝
դառն անեծքների:

Ե

Աղաչում եմ, դթա՛ծ, տուր հոգով-սրտով խոց-
վածիս
Երկնուց ընծայված կենաց դեղը քո:
Քաղցրությամբ, Տե՛ր, մոտեցիր դու ինձ՝ բա-
զում մեղքերով ախտավորվածիս.
Զնջի՛ր պարտքերս, ամենակատա՛ր բավակա-
նություն:

Եվ ճշմարիտ է ինձ համար, իրոք, իմաստն այս
խոսքի,
թե՝ ստեղծիչդ ամենայնի՛ սրբերի մեջ ես բնակ-
վում.
Ճիշտ է արդարեւ, թե ինչ որ ցանես, նույնը
կհնձես,
ինչպես Պողոսն է ասում Հիրավի՝
Յավագին աչքերն արեի տապին տոկալ չեն կա-
րող:
Իսկ դու, բարերար, ստեղծիչդ ամենայնի՛ ոչն-
չությունից,
Գնահատում ես հավետ իսկապես դավանելը
քեզ,
Որպես կարող ուժ՝ կյանք տալու համար:
Օրենքով դու չես սահմանափակված, այլ վեր ես
ամեն մի սահմանումից,
Եվ մանավանդ թե կարող ես խզել կանոնի ամեն
տեսակ կապանքներ,
Մնալով միայն ի՛նքդ ավետյաց պայման ու
խոստում
Հույժ տարակուայալ հանցավորների համար
համորեն:
Եվ քեզ՝ Հոր ու Սուրբ Հոգու
հետ փա՛ռք, իշխանություն
հավիտյանս. ամեն:



Սրբի խորժերից խոսէ՛ Ըստու-ծո Հետ

Ա

Եվ այսպես ահա՝, ողորմում ես դու բոլոր քեզ
վրա հույս դնողներին,
Ո՞վ սկզբնալույս աչքի տեսողություն և սրտի
գիտության Հիսուս,
Դո՛ւ ես բարերարում, դո՛ւ ես տալիս կյանք և
անմահություն։
Դեպի ինձ դարձիր քո գթությամբ, և պիտի
պատրաստես իմ դարձը առ քեզ կրկնակի՛
բերկրությամբ,
Զի առանց քո կամքի չեմ կարող լինել վերանո-
րոգված։
Եվ եթե չկամենաս գթալ, չեմ կարող փրկվել
մահապարտս ես։
Եվ կառավարիչդ եթե չհարթես դեպի քեզ բե-
րող ճանապարհը

Աջից ու ձախից խորունկ վիճերն ինձ կորուստ
կսպառնան:

Բ

Չեմ պարծենում ես՝ նախատյալս ամեն կողմից,
Չեմ պանծա պարսավյալս,
Չեմ խրոխտում լքյալս,
Չեմ մեծաբանում պապանձյալս,
Չեմ ըմբոստանում ծաղրյալս,
Չեմ երջանկանում եղկելիս, և չեմ արդարանում
ամբարիշտս,
Քանզի, ինչպես առանց սանձակալի երիվարն
ուղիղ ընթանալ չի կարող,
Ո՛չ էլ նավն առանց ղեկավարի կշարժվի առաջ,
Ո՛չ արորն ուղիղ ակոս կըանա առանց մաճկա-
լի,
Եվ ո՛չ զույգ լծերն հարմար կընթանան առանց
հոտաղի,
Ո՛չ ամպը առանց քամու կչվի,
Ո՛չ աստղերն անժամանակ կցնդեն ու կդումար-
վեն.
Եվ արեն առանց տարրեղեն օդի իր շրջանը կբո-
լորի, —
Այդպես նաև ես այդ բոլորի հետ չեմ կարող
անել ոչինչ, ոչ մի բան
Առանց բարեգործիդ ակնարկության և հրա-
մանի:

Զի դու ես միայն, որ կյանք ես տալիս բանականներին

Ու խնամք տանում արարածներին բոլոր-բովանդակ,

Եվ քո ձեռքումն է իմ փրկությունը, ըստ սաղմոսողի:

Դու ես հնչեցնում ամեն հասակի մարդկանց ականջին

Քո ավետարեր ձայնը խնդալից,—

«Իմ հանգստին եկեք, սաստիկ հոգնածներ, և ես ձեզ պիտի մաքրեմ մեղքերից»:

Իսկ ինձ ի՞նչ օգուտ լվացումից, եթե պիտի դարձյալ դառնամ զազրելի,

Եվ կամ ի՞նչ օգուտ ճաշակումից, եթե գեհենի պիտի մատնվեմ.

Ինչպես պարծենամ ես Աբրահամով, երբ խորթացել եմ նրա գործերից,

Գարշելի որդիս ամովրացի հոր և մոր՝ քետացի կամ քանանացի,

Ըստ մարդարեական խոսքի՝ կարծես թե ինձ համար ասված¹.

Ժառանգս մերժելի՝ եթովպացի և ո՛չ Սառայի արգանդի ծնունդ,

Ըստ այն առածի, որով տեսանողն ինձ է ակնարկում.

Ես եղբայրս Շամբինի կամ Գոմորի²,

¹ Եզեկ. Ժ. 3, 45

² Եզեկ. Ժ. 46

Անլվա և անաղելի
Ծնունդս՝ Ոողի և Ոողիբայի խակակութ և տհաս
պորտի,
Հստ Եզեկիելի կրկնանախատ կշտամբության:

Գ

Ինչպես ոմն, որ Հողմակոծ ծովի ծփանքների մեջ
Սաստկապես ծեծկված, Ակված ուժգին ու խիստ
տագնապով
Կտարվի՝ ընկած հեղեղագնաց հախուռն Հոսան-
քում,
Որ ձեռքի մատներն այս կողմ ու այն կողմ տա-
րուբերելով,
Զերթ գարնանազայր գետերի հուժկու հորձան-
քից քշված,
Ակամա վագքով և թավալգլոր խղճալիորեն,
Ու խառնախոփիվ, պղտոր, գարշահոտ, տղմա-
խառն, մամոռտ ջրեր կուլ տալով,
Շնչասպառ իսպառ կքշվի մահաբեր սաստիկ
ցավերով
Ու կիսեղդվի ուղխերում սուզված,—
Այդպես եմ և ես՝ եղկելիս, ահա,
Խոսում են՝ ու չեմ իմանում,
Գոչում են՝ ու ոչինչ չեմ լսում,
Զայն են տալիս՝ ու չեմ արթնանում,
Կանչում են՝ ու տեղիցս չեմ շարժվում,
Փող են հնչեցնում՝ և չեմ գումարվում,
Վիրավորվում եմ՝ ու չեմ զգում,

Ու գարշատեսիլ կուռքերի նման թափուր եմ
իսպառ բարի մտքերի ներգործությունից:
Բերված օրինակն, արդարեւ, պատկերն է իմ
իսկական,
Բայց ավելի քան ատելի, վատթար և մեղադրելի
եվ Քրիստոսի կողմից արժանի դատապարտ-
վելու:

Դ

Եվ քանզի անդարձ ճանապարհի համար իմ այս
կտակը,
Որպես հիշատակ աշխարհում գործած մեղքերի՝
թողի ընթերցողներին,
Որ իմ խոսքերով հանապազ աղոթք կարդան առ
Աստված,—
Թող որ այն մնա իբր ընդունելի խոստովանու-
թյան
Ողբաձայն աղերս-աղաղակ ընդմիշտ, ո՞վ ամե-
նակալ,
Եվ գիրն այս՝ մարմնիս, և խոսքը՝ հոգուս տեղ
թախանձեն թող միշտ անսահմանելուդ,
իբր անեղծական անմահ մաղթողից ընդունելով
այս աղերսն իմ ձայնով.
Բարեգո՛ւթ, մարդասեր,
օրհնյալ հավիտյանս, ամեն:



Բան ԾԵ

Սրբի խորշերից խոսէ Ասպո-ծո Հեղ

Ա

Հոգուս թևերով շրջեցի մարդկանց անթիվ
անհամար սերունդների մեջ
եվ ինքս իմ մեջ կշռադատելով՝ չգտա ոչ ոք ինձ
չափ մեղավոր.
Եվ դրա համար Դավթյան սաղմոսի խոսքերով
սաստիկ,
Որ նմանում է դառն կշտամբող գավազանավոր
կառավարչի,
Պախարակում եմ ինքս ինձ ահա.-
«Ո՞վ կհավասարվի ինձ չարության և անօրե-
նության մեջ»:
Վկայում եմ և ես, կրկին անգամ հաստատելով,
թե այս խոսքերն իսկապես ինձ են վերաբերում.
Ուստի գտնում եմ ես իրավացի համարել միայն
մեղավոր ինքս ինձ,
Քան թե իմ խոսքերով շատերի դատապարտել:
Այսպիսով, իմ դեմ մեղանչողներին ներելուս
համար
Գուցե դու էլ ինձ շնորհես ներում:

Բ

Եվ արդ, այս անգամ հաճոյական ի՞նչ աղա-
 չանքներ
 Եվ ընդունելի խունկերի անուշ ծուխեր մատու-
 ցեմ,
 Գովյա՛լ երկնավոր թագավոր Քրիստոս,
 Եթե ոչ խնդրել, որ օրհնես ինձնից անիծված-
 ներին,
 Արձակել կապվածներին և դատապարտվածնե-
 րին ազատել,
 Բարիք անել նզովվածներին և պսակել թշնա-
 մանվածներին,
 Սփոփել տրտմածներին և դարմանել խորտակ-
 վածներին,
 Խնամել խրտնածներին և պատսպարել նենգ-
 վածներին,
 Եվ մարմնով վիրավորվածներին բժշկել հոգով:
 Եթե օրհնությամբ մոտեցա մեկին՝ լսի՛ր,
 Իսկ թե անեծքով՝ մի՛ ընդունիր, գթա՛ծ:
 Ես տառապյալս ամենաթշվառ, հետինս այս
 մատյանով աղոթողների մեջ՝
 Բովանդակ հոգով ներեցի իմ դեմ մեղանչողնե-
 րին:
 Դո՛ւ արգելեցիր իղձը դժնդակ չար անեծքների,
 Եվ ես խղճալով իմ հանդեպ բոլոր նենգավոր-
 ներին՝
 Իմ ամբողջ սրտով ցանկացա նրանց՝ հաշտու-
 թյուն գտնել բարիների հետ,

Եվ որոնց համար ծունը դնելով՝ պաղատեցի ես:
Հապա դու, որ ինձ այցի ես գալու,
Որքա՞ն ավելի պիտի ողորմես, ըստ քո մեծու-
թյան,
Գովյալ խնամակալ, կյանքով մահկանացուիս,
Հզորդ՝ տկարիս, ամենակարողդ՝ վարանյալիս,
Աղբյուրդ իմաստության՝ հիմարիս և թմրյալիս:
Քանզի սխալվելով սաստիկ, ինչպես խավարին
անընտել սուզակ,
Անզգայապես ես ինքս մահվան ծուղակը ընկա,
Զհասկացա կորուստը, որոգայթն անգիտացա,
Զտեսա որսացող ծածուկ մեքենաները,
Զկասկածեցի կեղծավոր վարմի խաբեռությանը,
Զնկատեցի գայթակղությունը ինձ շրջապատած,
Զշոշափեցի պատանդիչ ցանցարկը կարթի,
Զարիքները վրա հասան ինձ,
Եվ ես չկարողացա ճանաչել նրանց, ըստ սաղ-
մոսողի:

Գ

Եվ արդ, ինչպես որ մի հեթանոս իմաստասերի¹
չիմացված մահը չարիք համարել թվաց
իսկ որ ճիշտ,
Ես էլ իմ խոսքով հաստատում եմ այդ.
Քանզի անզգա անասունների պես մեռնում ենք
ու չենք զարհուրում,

¹ Ըստ Եղիշեի՝ «Որպես և ասաց ոմն ի հնույն. «Մահ ոչ իմացյալ՝
մահ է, մահ իմացյալ՝ անմահություն է» - Պլատոնը հավանաբար
կամ Կյուրիիոն:

Կորչում ենք՝ ու չենք սարսափում,
Թաղվում ենք՝ ու չենք խոնարհում,
Տարագրվում ենք՝ ու չենք տագնապում,
Եղծվում ենք՝ ու չենք զղջում,
Մաշվում ենք՝ ու չենք հասկանում,
Պակասում ենք՝ ու չենք վերալրվում,
Քայլում ենք՝ ու չենք զգուշանում,
Գերվում ենք՝ ու չենք զգում:
Իսկ Հոբ երանելին հանգիստ է անվանում վախ-
ճանը մարդու,
Նույնը սուրբի հետ և ե՛ս կասեի,
Եթե մահացու գործերի բեռը ես չունենայի
վրաս ծանրացած:
Մանավանդ որ որոգայթը գաղտնի է, և այն լա-
րողն աներևույթ,
Եվ ժամանակի տարրը ոչնչից,
Անցյալը անհայտ, և ապառնին կասկածելի,
Ես անհամբեր, և բնությունս թերահավատ,
Ոտքերս անհաստատ, և միտքս ցնդած,
Կրքերս բռնավոր, և բարքս անժուժկալ,
Մարմինս մեղսամակարդ, և ցանկություններս
երկրասեր,
Դիմադրությունը տնկակից է ինձ և խառնվածքս
ներհակական,
Բնակարանս է կավեղեն, և անձրևներն ուժգ-
նակի,
Կարիքներս անթվելի, և պատահարներն ամե-
նագրավ,

Միտքս չարախնամ, և տենչերս չարակամ,
Կյանքս է միօրյա, և զվարճությունները վաղանց,
Խաբկանքներն են հիմարական, և խաղալիքնե-
րը տղայական,
Աշխատություններն ընդունայն, և վայելքներն
երազական,
Ամբարները ոչնչությամբ են լի, և պահեստները
քամով,
Ստվերի եմ նման, և կերպարանքս է ծիծաղելի,
Զի, ըստ Պողոսի, երբ պատվիրանը վրա հասավ,
Ինձ անպատրաստ գտնելով իրեն,
Կենդանացան մեղքերն արդարության երևումով,
Եվ ես մահացա կյանքի համար ու կորստյան
համար կենդանացա:

Դ.

Օտարներն ու չարի գունդերը գողացան սրտիս
ստացվածքները,-
Համաձայն Գրքի կանխաբանության,
Որով սկսեց պակասել իմ մեջ իմաստությունը,
ըստ առակողի,
Եվ ավելանալ ո՞չ բարու ցանկությունը:
Հոգուս աչքը չհառեցի կյանքիս գլուխը եղող
Քրիստոսին,
Որպեսզի ուղիղ ճամփով գնայի:
Կամենալով ուժգին վազել՝ սուզվեցի սաստ-
կապես,

Անչափելիին ձգտելով՝ չկարողացա հասնել իմ
չափին,
Փորձելով բարձրանալ մեծագույնին՝ գլորվեցի
ցած,
Երկնային ուղուց՝ անդունդ գահավիժեցի,
Զգուշանալով առավելապես՝ խիստ վնասվեցի,
Ուզելով մնալ ամբողջական՝ մանրապես մաս-
նատվեցի,
Զախի դեմ մրցել կարծելով՝ աջից գայթեցի,
Երկրորդը փնտրելով՝ առաջինը կորցրի,
Անշանի հետեւից գնալով՝ կարևորից զրկվեցի,
Ուխտը պահել ուզելով՝ դաշինքը դրժեցի,
Սովորություններիցս կտրվելով՝ կորուսիչները
գտա,
Փոքրերից փախչելով՝ մեծամեծների մատնվեցի,
Ինչ որ ես ինքս էի ստեղծել՝ դաժան դատախազ
կարգեցի իմ դեմ:
Սրանց բոլորին մատնված գերուս՝ դու ինքդ
միայն կարող ես փրկել,
Մահվան ընծայված հոգիս վերստին կյանքին
դարձնելով,
Զի դու միայն, Տեր Հիսուս, ճանաչվում ես բա-
րերար,
Անսահման փառքով Հոր և Սուլբ Հոգու հետ
Օրհնյա՛լ հավիտյանս. ամեն:



Բան Ծ.Զ.

Սրբի խորժերից խոսել Եպոս-ծո Հեղ

Ա

Իսկ իմ՝ մահառիթ մեղքերի դժոխարմատ ծառիս
դառն պտուղները,
Որոնք ընտանի թշնամիներ են, հակառակորդ
հարազատներ և որդիներ դավաճան¹
Ստորև պիտ նշեմ մանրամասն ու ցույց տամ
իրենից իսկ անունով,
Որոնք են ահա՝—

Բ

Սիրտ նանրախորհուրդ, բերան չարախոս,
Աչք հայրատատես, վրիպալուր ականջ, ձեռքեր
մահաձիգ,
Երիկամունք անփորձ, մոլորաշավիղ ոտքեր,
Ընթացք աներկյուղ, խոտորնակի հետք, ծխա-
խառն շունչ,
Գնացք խավարային, լյարդ քարահանգույն,
Դատարկ խորհուրդ, անկայուն կամք, անփո-
փոխ չարիք,

¹ Երեմ. ԺԲ. 8

Բարեմասնություն սասանյալ, հոգի տարագիր,
վաճառված ավանդ:

Վիրավոր գազան, նետահար թռչուն,
Փախստական քարավեժ, բռնված հանցապարտ,
ծովակուր ավազակ:

Նենգավոր զինվոր, անպատրաստ մարտիկ,
անժույժ սպառագեն,

Անաշխույժ մշակ, անխրախույս աղոթավոր,
ստորաքարչ բեմական,

Քահանա անկնդրուկ, օրենուսույց աննվեր:
Դպիր կշտամբված՝ խելագար իմաստակ, անճոռ-
նի ճարտասան:

Կերպարանք անպատկառ, անամոթ դեմք և
լպիրչ երես,

Գույն անհրապույր, տմարդի տիպ, ծանակված
գեղեցկություն,

Խանգարված խորտիկ, գարշելի ճաշակ,
Դաղձախեղդ այգի, որդնահար որթ, փշաբեր
պարտեզ,

Հասկ ուտիաճակեր և մեղր՝ դարձած մկների
ճարակ,

Անպաշտպան անկյալ, սնապարծ հուսահատ,
անհամոզ նզովյալ,

Անհաշտ բաժանված, ունայնաբան շաղակրատ,
անասնամիտ գոռող,

Անասնորեն ապիրատ, դժոխային ագահ, հան-
դուգն ապերասան,

Մոլեգնություն անաստված, ձեռնձգություն
սպանիչ,
Տատասկացան երկրագործ, երջանկություն
եղկելի,
Վատթարացած մեծություն, անշքացած վայել-
չություն,
Տկարացած կարողություն, խոնարհված բարձ-
րություն,
Ոտնակոխ փառավորություն, պատվիրանա-
զանցություն մշտական և ինքնակամ
սխալանք,
Մատակարար խարդախ, նենգավոր խորհրդա-
կից,
Բարեկամ գժտված, հազարապետ գողամիտ,
Մերձավոր կծծի, բաշխող ժլատ, վերատեսուչ
կարկամ,
Ոգի անկարեկիր, ըղձանքներ անսեր.
Մարդատյաց բարք և անգութ աղիք,
Ընթացք անխոհեմ, աներեռույթ ախտեր,
Անիծյալ գաղտնիքներ, նախատելի դիպվածներ:
Վաճառական վատնող, չվայտ շահարար, արքե-
ցող պաշտոնյա,
Խարդախ գանձապահ, բանսարկու պատգամա-
վոր, գոնապան քնկոտ:
Աղքատ հպարտ և զլացող մեծատուն:
Դիվանապետ անօրեն, պահապան մատնիչ,
բնակակից չարախոս,
Սուրհանդակ անժաման, մեղապարտ թղթաբեր,

Խոռվարար առաքյալ և միջնորդ անմիտ:

Արքա արտալած, թագավոր թարմատար, կայսր
հոգեկործան,

Իշխան տիրադավ, զրկող զորավար,

Աչառու դատավոր, ինքնագլուխ ռամիկ:

Նախատողի ծաղը, սիրելիի լաց,

Բանագրի պարսավ, հանդիմանողի դատախա-
զություն:

Քանզի վեհագույն այդ կոչումները ես էի կրում
երբեմն իրոք,

Իսկ հետո վատթար որակումներին այդ արժա-
նացա:

Սրանք են ահա և այլ բազմաթիվ խարդախու-
թյուններն այն վնասակար,

Որոնց մի քանիսից խաբվեցի ես որպես հիմար,
Եվ ոմանց կողմից տկարաբար տիրվեցի,

Ինքս ինձ կամովին մատնելով մահվան:

Գ

Արդ, քեզ ատելի և ինձ դեպի կորուստ տանող
Վերոհիշյալներից որո՞նք ընծայեմ քեզ ի սպաս
պաշտամունքի.

Ապականությամբ պաշարվածիս որպիսի՞ք ներ-
կայացնեմ քո ամենասուրբ մեծությանը.

Եվ կամ դու որքա՞ն երկայնամտությամբ պիտի
համբերես այսքան մեղքերիս.

Որքա՞ն ներես, ինչպե՞ս պիտի լոես,

Եվ մանավանդ ինչպե՞ս պիտի հանդուրժես.

Մահու սատակման արժանուս ինչպե՞ս չենթար-
 կես գանակոծության:
 Բայց անճառագայթ մթությամբ խավարամած
 հոգիներին
 Քո ողորմության լույսո՞վ հանդիպի՛ր դու,
 Բժշկելու, քավելու և կենագործելու համար
 նրանց.
 Ո՞վ զորեղություն անվթարելի,
 քեզ փա՛ռք հավիտյան. ամեն:





Սրբի խորժերից խոսք Ըստություն Հեղ

Ա

Քրիստոս Աստված, անուն ահավոր,
Մեծության տեսակ, տիպար անքնին, բարձրու-
թյան պատկեր,
Անսահման զորություն, կերպարան փրկարար
լույսի,
Պաշտպան դու կյանքի, դո՛ւռ արքայության վե-
րին հանգստի,
Խաղաղության ճանապարհ,
Ապավինություն նորոգ և անտխուր երանու-
թյուն,
Ամենակալ ինքնիշխանություն բոլոր էությանց,
Օրհնության կոչումն, ավետարար ձայն, բերկ-
րության բարբառ,
Անմահության դեղ,
Որդի՛դ դու անճառ միակ Աստուծո,
Ինչ որ անհնարին է ինձ՝ դյուրին է քեզ համար.
Ինչ որ անհասանելի է ինձ՝ քեզ համար սահ-
մանված է.
Ինչ որ անանց է ինձ՝ մոտիկ է քեզ համար.

Ինչ որ ծածկված է եղկելույս՝ մերձավոր է քո
երանությանը.

Ինչ որ անկարելի ինձ՝ քեզ համար կատարված.
Ինչ որ ինձ համար անկշռելի է՝ քո անճառու-
թյան համար չափված է.

Ինչ որ հուսահատեցնում է ինձ՝ քեզ սփոփանք
է բերում.

Ինչ որ անբժշկելի է ինձ՝ անվտանգ է քեզ հա-
մար.

Ինչ որ հեծություն է պատճառում ինձ՝ քեզ հա-
մար խնդառիթ է.

Ինչ որ ծանր է ինձ՝ թեթևագույն է քեզ համար.
Ինչ որ ստեղծված է ինձ համար, զորեղությանդ
համար գրված է.

Ինչ որ ինձ համար կորած է, քո ձեռքումն է
այն,

Ինչ որ անթվելի է ինձ՝ քեզ համար համարված
է.

Ինչ որ ինձ համար մռայլ է, քեզ համար ճառա-
գայթ է.

Ինչ որ ինձ համար անհաշվելի է, բովանդակ-
ված է օրհնյալ ձեռքերիդ մեջ.

Ինչ որ սոսկալի է ինձ՝ հեշտալի է քեզ համար.
Ինչ որ փախչելի է ինձ՝ քեզ համար վանելի է:
Ինչ որ անմատույց է ինձ՝ դյուրամատչելի է
քեզ համար.

Ինչ որ մահաբեր է ինձ՝ քո աստվածային զորու-
թյան համար անգոյություն է:

Բ

Բայց դու, ողորմած Աստված բոլորի, Տեր Հիսուս Քրիստոս,
 Եթե գթաս ինձ, կարող ես ելքի մի հնար գտնել:
 Հանուն քո օրհնյալ Հոր վսեմ փառքի և քո
 Սուրբ Հոգու կամքի գթառատ՝
 Տե՛ս տառապանքներն իմ տաժանելի՝ քեզ հայտ-
 հանդիման,
 Եվ սրտիս խորքից դատախաղ լինելն ինքս իմ
 անձի դեմ:
 Իմ ամենացրված բնության խկությանը նայիր
 դու
 Եվ բժշկություն պարգևիր իմ վերքերին,
 Տո՛ւր հնարավորություն՝ կորուստից դուրս գա-
 լու,
 Զերծումն՝ բազմամասնյա մահից և կենաց շա-
 վիդ՝ ապականվածիս,
 Նորոգություն եղջյալիս և հույսի մուտք
 ամբարշտիս,
 Եթե ես, հակառակ իմ բնությանը, կամք ցուցա-
 բերեցի այս բոլորն ասելու,
 Հապա դու որքա՛ն ավելի պիտի բարերարես
 ինձ, ինչ որ բնածին և հատուկ է քեզ:
 Եթե փշերից քաղցրահամ պտուղ քաղվեց,
 Քո կենաց ծառից ո՛րքան ավելի անմահական
 համ պիտի ստացվի:
 Եթե ես իմ ատելիների համար քո ողորմությու-
 նը խնդրեցի,

Դու ինչպե՞ս պիտի կրկնակին չտաս քո անսա-
պառ առատությունից ինձ, որ քոնն եմ,
ո՞վ ամենազոր:

Գ

Արդ քո մեծությունը տե՛ս, բարձրյալ, և նայե-
լով իմ փոքրության վրա,
Ընդունի՛ր սակավ խոստովանությունն անթիվ
մեղքերիս,
Ո՞վ դու, որ տեսնում ես բոլորը:
Եվ ինչպես որ հաշվի չառար Վեմի գլորվելը¹,
Անտեսի՛ր նույնպես սասանվելը դու փոքրիկ
ավագիս.

Ինչպես որ իսկույն վերացրիր Դավթի պատժա-
պարտությունը, երբ ասաց՝ մեղա,
Նույնն արա՛ և ինձ, ո՞վ երկայնամիտ, լսելով
ձայնն իմ հեծեծանքների.

Դու, որ բոլորին անաչառությամբ և առատորեն
Տալիս ես, որպես հաղթող բարի, բազմիմաստ
Եվ չես նախատում հետին ստրուկիս, որպես
ողորմած և ամենաստեղծ,
Ստացի՛ր կրկին և մի՛ կորցնի ինձ՝ քո արյունով
բուժվածիս, գթա՛ծ.

Զի դու կարող ես քավել ու փրկել,
Եվ քեզ վայել է փա՛ռք ամեն
ինչում հավիտյանս. ամեն:

¹ Ակնարկություն՝ Պետրոսի ուրացությանը:



Բան ՇԲ

Սրբի խորչերեց խոսք Եսայոն-Ճռ Հետ

Ա

Օրհնյալ ես դու, Տեր Հիսուս, Հոր հետ՝ բարեհաճ կամքով Սուրբ Հոգու,
Եվ բոլոր օրհնվածներն օրհնյալիցդ օրհնվեցին,
Դու միայն օրհնյալ Որդիդ օրհնյալի:
Քեզանից բացի չի՞ք շնչիս իշխող թագավոր,
Քրիստոս:
«Հակոբն,- ասում է Եսային,- օրհնված կլինի
այն ժամանակ,
Երբ կվերցնեմ մեղքերը նրա»:

Բ

Եվ արդ, ողորմի՛ր ինձ, Տե՛ր բարեգութ, համաձայն նախնի քո սովորության,
Եվ օրհնի՛ր անոթդ այս բանական, ըստ Դավիթի
և ըստ Մովսեսի,
Որպեսզի խոսքովդ փրկության հասած՝ քավություն գտնեմ քեզնից օրհնվելով:

Հրաշագործի՛ր ինձ աստվածապես, ողորմած
 արքա երկնավոր,
 ինչպես որ արիր Բեթհեղդայի սրահում հավաք-
 ված
 Եվ երկար ժամանակ մահիճը ընկած ախտավոր-
 ներին:
 Դրանցից մեկը այն կրկնակի թերահավատն էր
 և երեսունութ տարվա անդամալույթը,
 Եվ դու չզլացար նրան քո բժշկաբար օգնու-
 թյունը,
 Գիտենալով նույնիսկ նրա չարությունն անուղ-
 ղելի,
 Որ նյութեց նա քեզ՝ երախտավորիդ, մեծիդ և
 բարերարիդ
 Մատնության օրը, տիրամարտության դառն
 այն գիշերը:
 Թեև դու նրան նախօրոք զգուշացրիր,
 Թե՛ մի՛ մեղանչիր, որպեսզի կրկին չարիք չգա
 քեզ,
 Բայց չղաղարեց լինել ձեռներեցն ու առաջինը
 այն ժամտ մարդկանց մեջ,
 Որոնք քեզ խաչին դատապարտեցին¹:
 Եվ դու այդպես կախարդ ջատուկի, անհարիր
 ընկած
 Եվ մահվամբ չոքած չարաշուք մարդուն ողոր-
 մեցիր,

¹ Ակնարկություն 38 տարվա այն անդամալույթի, որը մատնության գիշերը ապտակեց Յիսուսին իրեն բժշկողին:

Անճա՛ռ բարություն, սիրալի մարդասիրություն,
Սարսափելի ներողամտություն, սոսկալի երկայնամտություն,
Անբավելի քաղցրություն, փառատրելի հեզություն,
Որ միշտ հաղթվում ես գլխությունից ու չես
թշնամանվում,
Պարտվում ես ողորմությունից ու չես պարսավ-
գում,
Բռնադատվում ես մարդասիրությունից ու չես
արհամարհվում,
Հարկադրվում ես բարությունից ու չես հայհոյ-
վում,
Ստիպվում ես սիրուց ու չես բամբասվում:
Պաղատում ես դու քեզ դարձիս համար ու չես
ձանձրանում,
Վագում ես ապերասանիս հետևից ու չես հոգ-
նում,
Զայնում ես չլսողիս ու չես սրտմտում,
Շտապում ես մեղկացյալիս մոտ ու կանգ չես
առնում:
Զարիս համար բարի ես և ամենապարտիս հա-
մար ներող,
Քավիչ ես մեղավորիս համար և խավարյալիս
լույս,
Եվ մահացածիս համար կյանք ես դու:

Գ

Այսպես են ասում բոլոր հոգեշունչ գրքերն օգտակար,
 Եվ որոնք հաճախ ծնում են անճառ և զարմանալի երկնավոր պտուղներ:
 Ասա՛ նաև ինձ՝ թշվառիս, օրհնյա՛լ ամենապարգև, –
 «Վե՛ր կաց ու վերցրու մեղքերի մահիճը կործանվածիդ,
 Եվ իմ հետեից արի, որ հասնես անհոգնում
 կյանքի խաղաղ հանգստին»:
 Քո հրամանի ամենակարող սուսերով կտրի՛ր
 Կապանքները պիրկ և դժոխային երիզապատվածի
 իմ մահազգեստի
 Եվ մահասարսուռ սաստկությամբ խեղդող
 հանգույցները քանդի՛ր,
 Ուղարկելով ինձ՝ մահվան արժանուս, քո աստվածային կենսաբեր խոսքով
 Դեպի վեր՝ անանց, հավերժ բերկության ազատության մեջ:
 Մի՛ կենագործիր տակավ-տակավ և մի՛ ձգձգիր
 օրեցօր երբեք,
 Որ հետզհետե մեղքերի բեռան ծանրությունն
 ստվար
 ԶՃՆՉԻ ազդրերս ու չկռացնի ինձ ի վար՝ դժոխւքին նայելու,

Եվ ուժգնակի գոռող բռնությամբ հոգեորական
զենքերս ի դերև հանելով մահվան ծառա-
յեցնի ինձ:

Այլ դու օգնիր ինձ, բարի՛ վշտակից,
Մահվան երկունքի այս իմ ցավագին հեծեծանք-
ներում,


Սատակման փայտը վրայիցս առնելով, ինչպես
երբեմն՝ պահակի ուսից,

Որով վայելուչ կոթող կառուցես քո հաղթանա-
կի արի զորության,

Ամուր հավատքով, հաստատուն հույսով ինձ
բեեռելով քեզ հետ՝ անսայթաք:

Եվ քեզ՝ Հոր և Սուրբ Հոգու
հետ փա՛ռք, իշխանություն
հավիտյանս. ամեն:





Արդի իոնիկերից իոնակ Սայառ-Ճո Հետ

Ա

Հավատում եմ ես և վկայում գիտակցաբար՝
Քեզանից ազդված մտատեսությամբ,
Թե ըղձալի են քեզ, բարերա՛ր,
Աղաչանքները մեղավորների, քան թե խնդրանք-
ներն արդարների:
Զի մեկն իր մեղքերը խոստովանելով շնորհիդ է
սպասում
Եվ ճանաչելով չափն իր բնության՝ ծառանում
ինքն իր դեմ,
Որպես մեծ կշտամբիչ և ինքնոգոր մարտակից,
Դառն հանդիմանող ու ծածկատես դատախազ:
Իսկ մյուսն իր բարի գործերին նայելով՝ հանձ-
նապաստան վստահությամբ՝
Մոռանում է սահմանն իր բնության և պարգև-
ներ է ակնկալում, քան թե ողորմություն:
Եվ այդ պատճառով մեկի մոտ հորինվում են
անթիվ ճառեր,

Որոնք բարձրածայն քո ողորմությունն են
փողահարում,

իսկ մյուսը լոռում է դրանց մասին, ո՞վ անքննե-
լի, ահավոր և ամենախնամ:

Ամաչում եմ ասել, թե երկրավորիս գործերի
պատմությունն իսկ քոնից էլ առաջ է ան-
ցել.

Ուստի արա՛ այնպես, ո՞վ Տեր,

Որ քոնից ավելի չզորանա աջն հողեղենի.

Մարդկանց ջանքերը թող որ չկռեն ողորմու-
թյուններդ:

Բ

Առողջ անդամներ ունեցողներն անկարոտ են
բժշկության,

եվ աչքով տեսնողներն առաջնորդի պետք չու-
նեն,

ինչքով փարթամները լիացածների դռների
շուրջը չեն դեգերում,

եվ կուշտ ու կուռ կերածները չեն սպասում հա-
ցի սեղանի փշրանքներին,

եվ վարքով մաքուրները ողորմության անկա-
րոտ են:

Ուստի ինձ գթա և ողորմիր, բարձրյա՛լ երկնա-
վոր հզոր,

ինձ՝ վարանյալիս ամենատխուր:

Զի եթե Հոբին ես նմանվեի,

ինքս էլ նրա պես կասեի՝ արդար և անարատ եմ.

Եթե լինեի ես Մովսեսի պես՝ ինքս էլ նրա պես
կասեի վստահ՝

«Տերը պիտի ճանաչի նրանց, ովքեր իրենն են»,
Եթե լինեի ես Դաւթի նման, կասեի նույնպես՝

«Արեցի իրավունք և արդարություն».

Եվ դարձյալ մարդկային բնությունից վեր այս
խոսքը հոխորտ՝

«Եթե սրտիս մեջ անօրենություն տեսնեի, Տերն
ինձ չէր լսի».

Եթե Եղիային նմանվեի ես՝ պիտի կոչեի ինձ
«ա՛յր Աստուծոն».

Թե Երեմիային՝ ճշմարտությունդ կօրինակեի.

Եթե լինեի Եղեկիայի պես՝ ինքս էլ իրավամբ
կպարծենայի՝

«Քո աչքի առաջ ես արդարությամբ քայլեցի».

Պողոսի նման եթե լինեի, կանվանեի ես ինձ՝
Բնակարան, ներշնչարան և ընդունարան Աս-
տուծո խոսքի՝

Բայց ես անօրենս, օրենքին գիտակ լինելով մեկ-
տեղ,

Ոչ միայն չեմ կարող ներկայացնել քեզ անձս
նրանց պես վստահ խոսքերով,

Եվ չարս իսպառ, բարիների պես՝ այդ նույն
խոսքերը քո առջև հիշել,

Այլև չեմ կարող՝ բովանդակ արարածներից բա-
րեհոչակված

Անունդ, հզո՞ր, ամբարշտացած իմ լեզվով գո-
վել:

Իսկ դու, որ կարող ես ամեն բանում և հնարավոր,
Տուր ինձ ոգի փրկության, պաշտպանության
աջ և օգնության ձեռք,
Բարության հրաման, ողորմության լույս, նորության խոսք,
Քավության պատճառ և կյանքի նեցուկ՝ օգնող
գավազան:

Քանզի դու ես հույս ապավինության, Տե՛ր
Հիսուս Քրիստոս,
Օրհնյա՛լդ Հոր և Սուրբ Հոգու
հետ հավիտյանս. ամեն:





Ա

Արդ, քանի որ ինձ հայտնի է ճշգրիտ առակով
արդեն,
թե՝ չի վայելում մեղավոր բերնին օրհնաբանու-
թյուն,—
ինչպես պիտի նույն գովությունը քեզ կրկնեմ
վերստին աղաչավորս խիստ ամոթապարտ,
Որ անեծքներ եմ ընդունում անվերջ՝ սաղմոսա-
րանում, ինձ համար ասված:
ինչպես ինձ համար երգեմ վտանգներ և նա-
խատինքներ արձանագրեմ
Ու մերկ գրկիս մեջ շուշանի տեղակ փշեր հա-
վաքեմ.
Եվ ինչպես պիտի համարձակվեմ ես Դավթի
պես ասել,
թե՝ «Պիտի փշրես մեղավորների ատամները
դու»,
Եվ դարձյալ ինչպես՝ «Անօրենները չպիտի
բնակվեն քո աչքի առջե».

Ինչպե՞ս, թե՝ «Դատիր ինձ, Տեր, ըստ արդարության քո և իմ՝ անբծության»։

Եվ կամ թե ինչպե՞ս՝ «Զարիքները մեղավորների վրա պիտի կատարվեն»,

Ինչպե՞ս, թե՝ «Պիտի խորտակվեն չարի և մեղավորի բազուկները»,

Եվ ուրիշները հետեւյալ կարգով.

Ինչպե՞ս կարող եմ ասել, թե՝ «Մեղավորների վրա տեղան պիտի հուր, ծծումք, որոգայթ»։

Ինչպե՞ս, թե՝ «Տերը կթուլացնի նենդավոր շրթունքներն ու լեզուները մեծաբանող»։

Ինչպե՞ս, թե՝ «Միրտս քննեցիր և չգտար այնտեղ անիրավությունն»։

Եվ ինչպե՞ս դրան հաջորդող խոսքն այս,

թե՝ «Զգուշացա խստասիրտների ճանապարհից ես»։

Եվ ինչպե՞ս ապա, թե՝ «Արդարությամբ ես քո երեսը պիտի ելնեմ»¹.

Ինչպե՞ս, թե՝ «Ես էլ անբիծ պիտի լինեմ նրա հետ»։

Ինչպե՞ս և մյուսը, թե՝ «Տերն ինձ ըստ իմ արդարության և ձեռքի մաքրության պիտի հատուցի»։

Ես ինքս ինչպե՞ս իմ ստությունը պիտի ծանակեմ, ասելով սուրբի հետ, թե՝ «Զեռքերս սրբությամբ պիտի լվանամ»։

¹ Այսինքն՝ «Ես արդարությամբ կերևամ քո առաջ» (Սաղմ. ԺԶ. 15) - ծնբ. հրատ.։

Մնութիների մեջ նստածս ինչպե՞ս ամբարիշտների աթոռները բամբասեմ.
Ինչպե՞ս թշվառս երջանկի պարծանքն ինձ վրա առնեմ,
Թե՛ «Դատիր ինձ, Տեր, զի անմեղությանս մեջ
քայլեցի ես».
Ինչպե՞ս օտարս բարի գործերից՝ պիտի շարժեմ
գո՛ւթը գաղտնագետիդ,
Թե՛ «Մի՛ դասիր ինձ ամբարիշտներին».
Ինչպե՞ս ես ինքս լինելով անիծապարտ, ուրիշների համար ասեմ
«Տո՛ւր նրանց, Տեր, ըստ նրանց գործի»,
Եվ համարձակվեմ շարունակելու:

Բ

Մնացածներն էլ եթե գումարեմ առաջիններին,
Կրկնապես պիտի ծանրանան ցավերս ու դառնություններս աճեն,
Բայց արցունքների շեղջերից միայն դույզն-ինչ
առնելով,
Առայժմ պիտի բավականանամ սաղմոսարանի
Ընտանի ձայնի հանապազօրյա հանդիմանությամբ,
Որ ամբարիշտիս կշտամբում է միշտ:
Դրանց հետ նաև քառասունիններորդ գլխի վերջին հատվածի հանդիմանական տողերը,
Որոնք գարշելի համարելով ինձ՝ խայտառակում
են միշտ և հանապազ:

Խցելով բերանս, որպեսզի չփառաբանեմ՝ անձս
եղկելի են ներկայացնում.
Եվ աստվածային ձայնով ինձ ամբաստանելով՝
զրկում են կյանքի հույսից,
Միաժամանակ, ինչպես պատնեշի վրայից, քա-
րեր են նետում վրաս:
Եթե ծանր է ուրիներից անեծք ընդունել,
Ապա կրկնակի ծանրածանր է անձամբ ինքն
իրեն անիծելը:
Իսկ եթե օրենք է մերձավորներից նախատիքներ
չառնել,
Ապա ուրեմն ամենատեսիցդ սպասել դրանք՝
Արյունալից ցավ, սարսափելի վիշտ ու մտալլ-
կանք են պատճառում մեզ:
Բայց ով որ նրանց խոնարհությամբ անձնա-
տուր լինի,
Եվ գավազանով ծեծի ինքն իրեն, կշտամբի ու
դառն անեծքներ կարդա,
Այդպիսին պիտի օրհնվի Վերնայնի խոստովա-
նած և ամենաիշխան բերանի շրթունքնե-
րով.
Զի նա ճշգրիտ կերպով բացատրեց դարձն իր
դեպի նա, կյանքի ճիշտ ճամփից չհեռա-
նալով.
Սիրո օրենքով նա իր մեղքերի արմատը կտրեց,
Չնվաճելով չարախոսների խարդավանքից,
Քրիստոսի հոտի բժշկված ոչխարը եղավ նա,
Դիմելով աղիքների խոցերը բուժող աղին:

Բայց անբանների բարքին է հատուկ ասուն
կենդանիների
կենսաձիր խոսքի դալար, ծաղկածին դաշտա-
վայրում
Մտքի թմրությամբ մահացու արոտներ ճարա-
կելը:

Գ

Արդ, քանզի իսկ և իսկ ինձ համար է ասված
վերջին օրինակն այս կշտամբողական,
եվ չար դիպվածներն ու պատահմունքներն ինձ
են ակնարկում,
Որոնք նյութեցի ես ինքս որպես սաստիկ տոչո-
րող կիզիչ կրակներ,
Նրանք երկնքից թափելով իմաստությանս ճրա-
գարանի՝ գագաթի վրա:
Այլևս սաղմոսն ինձ ի՞նչ օգուտ կարող է բերել,
Երբ ինքս նրա բազմերանգությունից մնացի
անպտուղ,
Ու չնվագեցի հոգով այն, ինչ որ Պողոսն է թե-
լադրում:
Ինչպե՞ս կարող եմ մեծագույնս ես մեղավորնե-
րից և պիտանիներից նկունս
Մարդարեի երգերին խառնել Տիրոջ խոսքերը և
ասել սուրբի հետ.
«Հեռացե՞ք ինձնից բոլորդ էլ, որ գործում եք
անօրենություն»:

Ես, որ չեմ կատարել օրենքի և շնորհի բազում
պատվիրաններից և ոչ մեկը՝
ինչպե՞ս բարբառեմ երջանիկի հետ,
Որը մեզ համար սահմանածը նախ ինքը գոր-
ծադրեց,
Թե՛ «Ես՝ քո ծառան, պահեցի այս», և դրանց
հետևող խոսքերը:
Կյանքի կատարյալ իմաստությունից թափուրս
ինչպե՞ս
Տիրոջ երկյուղածների հետ օրհնեմ.
Ինչպե՞ս պիտի մաղթանքներից մեծագույնին
իմոնքն էլ կցեմ,
Թե՛ «Մի բան խնդրեցի ես Տիրոջից՝ տեսնել իր
վայելչությունը
Եվ իր տաճարի հրամանատարը լինել».
Ինչպե՞ս ձեռնամուխ լինեմ այն բանին, որ
արգելված է ինձ,
Երբ լսում եմ, թե՛ ուղղամիտներին վայել է
միայն օրհնություն կարդալ:
Ես իմ սեփական շուրթերովս ինչպե՞ս ինքս ինձ
անիծեմ,
Ասելով, թե՛ «Տիրոջ աչքը չարագործների վրա է,
Զնջելու համար նրանց հիշատակն երկրի երե-
սից».
Ինչպե՞ս՝ և մյուսը, թե՛ «Չարերը շուտով պիտի
ջնջվեն».
Ինչպե՞ս այն խոսքը, որ արդարև ինձ է վերա-
բերում,

ԹԵ՝ «Բազուկները ամբարիշտների պիտի խորա-
տակվեն».

Ինչպե՞ս պաղատեմ սատակման համար,

ԹԵ՝ «Պիտի կորչեն մեղավորները»:

Ինչպե՞ս թաթախեմ թափառող լեզուս օրհնյալ
խոսքի մեջ,

ԹԵ՝ «Հսկեցի ես կյանքիս ընթացքը, որ չմեղան-
չեմ ինքս իմ լեզվով».

Ինչպե՞ս մեղքերի փշերով խեղդվածս պարծե-
նամ խոսքովն անարատի,

ԹԵ՝ «Իմ անբծության մեջ ընդունեցիր ինձ».

Ինչպե՞ս ես մեղավորս և կրկնակի պատժա-
պարտս

Պարսավեմ պիտի իմ նմաններին, նրանցից
ազատվելս մաղթելով,

ԹԵ՝ «Մեղավոր ու նենք մարդկանցից ազատի՛ր
ինձ, Աստված»:

Դ

Ինչպե՞ս, որպես ոչ կռապաշտ, անպատկառո-
րեն խրոխտամ ունայն պարծանքով,

Դավթի հետ ասելով՝ «Մի՞թե մոռացել ենք մենք
անունն Աստուծո,

Եվ կամ օտար աստվածներին աղոթելու ձեռք
ենք երկարել»:

Զի նա, որ գարշելի մեղքերի մեջ կընկնի,

Այդպիսին կառուցած կլինի պաշտելու համար

Անասնական, ախտարծարծ և պոռնկապատիր
 կերպարանքներ
 Աստարտի, Քամովսի, Մեղքոմի¹ և թարմատար
 Թարահատի² արձաններ արու,
 Ինչպես նաև կանացի զագիր ու աղծապիդ
 կուռքեր
 Եվ իշանդամ առականքների անծածկույթ ծա-
 նակություններ:
 Ինչպես չամաչեմ ասել նահատակի հետ, որ
 բարության էր միշտ հետամուտ,
 Թե՝ «Ամեն օր մեռնում ենք քեզ համար»,
 Եվ հետեւյալ տողերն այդ սաղմոսի:
 Ինչպես հիմարս մարդկանց մեջ և վատթարս
 հանդգնեմ ասել,
 Թե՝ «Բերանս իմաստություն պիտի պատմի, և
 սիրտս՝ հանճար»:
 Ինչպես ես՝ մարդակորույս կեղծավորս երես-
 պաշտների ոսկորների ցրումը մաղթեմ.
 Ինչպես կրկին երկրորդված մեծանուն բարու-
 թյունն այն,
 Թե՝ «Հաճելի պիտի լինեմ Տիրոջը կենդանյաց
 երկրում»:
 Ինչպես ես անբավ մեղքերի տերս, արդարից
 առած՝ բարբառեմ այսպես,—

¹ Սողոքը՝ Ամնոնացոց կուռքը, որի համար տուն կանգնեց Դավիթը (Գ. Թագ. ԺԱ. 7):

² Անծանոթ է այս դիցաբանական անունը: Դավանական չէ ոմանց այն կարծիքը, թե Աբրահամի հոր՝ Թարայի պաշտած կուռքերից լինի (Դեսու ԻԳ. 2): Խորենացին ևս հիշատակում է Թարաք անունով մի կուռք, բայց դա լինել չի կարող:

«Ոչ մեղք ունեմ ես և ոչ էլ հանցանք, ընթացքս
եղավ անմեղ և ուղիղ»:
Ինչպե՞ս ինքս ինձ մատնեմ կորսայան այսպես
ասելով՝
«Անօրենություն գործողներին մի՛ ողորմիր»:
Եվ կամ թե ասեմ. «Ինչպես մոմը, որ հալվում է
կրակի դիմաց,
Այդպես էլ պիտի լինեն մեղավորներն Աստուծու
առջե»:
Ինչպե՞ս՝ ապականացու փափկությամբ շոյվածս
այս ինձ անվայել խոսքը հաստատեմ,
Թե՛ «Ես ընկճեցի իմ անձը ծոմով».
Ինչպե՞ս նաև այս խոսքը նույնիմաստ,—
«Նրանց նեղության մեջ ես քուրջ էի հագնում
եվ, ինչպես սգավոր ու տրտում խոնարհ էի».
Ինչպե՞ս հանդարտվեմ իմ նմանների պատիմն
հիշելով,
Թե՛ «Աստուծու բարկության մրուրը չի սպառվի,
Եվ պիտի խմեն նրանից երկրի բոլոր մեղավոր-
ները»:
Ինչպե՞ս՝ սրա հետ և մյուսը, թե՛
«Մեղավորների բոլոր եղջյուրները պիտի փշրես
դու».
Ինչպե՞ս, Հակոբի ապերախտության մասին
պատմելով, կարող եմ հեգնել նրան
Ես, որ ստվերի տեղ ծամարտությունն ընդունած,
նրանց հետ և նրանց թերությամբ
Մոռացա Քրիստոսի երախտիքները՝ աստվա-
ծահրաշ խաչի փրկանքով,

Եվս առավել, քան նրանք, որոնք չուզեցին
Զորությունն Մովսեսի սքանչելագործ ցուպի,
Որ տերունական տնօրինության մի օրինակն էր:
Ինչպես կարող եմ ցույց տալ մեզ վրա խուժող
դևերի –

Խմբերի խուժողուժ և օտարացեղ՝ աղետները ողջ,
Ասելով, թե՝ «Մեր մեջ գտնվող բարիների դիակ-
ներն իբրև կեր

Զգեցին գիշատիչ թռչուններին, այսինքն՝ օդա-
յին դևերին»:

Ինչպես կարող եմ ճանապարհի վրա ընկած
խոսքի սերմը

Եվ չարի հետ միաբանված կամքը անվանել
սուրբ¹,

Ինչպես սուրբ կոչեմ պատերազմի հետ նույն
շավղով գնացող՝

Իմ ճանապարհից դուրս եկած մտքի գուպարը
գաղտնամարտ,

Որ ես զորացրի՝ գործակցելով բանսարկուի
Հնարքներին:

Զեմ կարող աղերսել քեզ, թե՝ «Մի՛ լոիր և մի՛
դադարիր, Աստված»,

Ինչպես և՝ «Խորհեցին քո սուրբերի վրա և
ասացին», –

Եվ մյուս խոսքերը՝ սաղմոսարանի այս աղոթքի
մեջ:

¹ Սատր. ԺԳ. 4

Զի հույժ տեղին է, որ այս խոսքերով ճանաչենք
մոլեկան բռնությունը դևերի,
Եվ նրանց հետ նաև իրենց արբանյակներին,
Որոնք մղում են ճակատամարտ միշտ, խռովե-
լով ներկան:

Ե

Այդ բոլորից, Տեր Քրիստոս, Որդիդ դու բարձր-
յալ և մեծ Աստուծո,
Պահե՛ս ու պահպանես երկնային զորքիդ շրջա-
փակությամբ,
Բոլոր հողմերից ու խաբողների հարձակումնե-
րից
Լուսեղեն խաչովդ պաշտպանելով մեզ:
Զի թեև իմ մեջ գտնվեն անօրենություններ բա-
զօրինակ,
Սակայն ո՛չ երբեք հայհոյություններ:
Զհանգստացա՛ր դու ինձ նման ամբարիշտների
կորուստով,
Այլ ամենագորով թախծությամբ, ջրհեղեղով
ջնջված
Զազրագործների վրա մինչև իսկ կրկնապես
վշտացար,
Նրանց այդպիսի մահն համարելով անհանդուր-
ժելի և հույժ անհաճու:
Լսողներին զարմանալի այս խոսքն ասացիր դու,
Թե՛ «Այլեւ մարդկանց գործերի պատճառով
երկիրը չպիտի անիծեմ»:

Միմիթարվում ես դու մեծապես ու պարարվում՝
Անմաքուր ու սատակման արժանի մարդկանց
կենդանացման համար.
Ինչպես որ երբեմն, դդմենու առակով ցույց
տվեցիր դու¹
Կործանվելու արժանիներին խնայելդ, ողորմա՛ծ.
Եվ մի ուրիշի² վրա նեղացար, սաստիկ վշտա-
ցած,
Երբ նա անձրեն ուշացնում էր, որպեսզի ուրա-
ցողները ապրուստ չունենան²:
Եվ բազմապիսի հիշտակարժան և անճառելի
Բարություններ ցուցաբերեցիր դու վերջին օրե-
րին.
Քո կողմից՝ առաքյալներիդ միջոցով հրամայե-
ցիր ողջույն տալ քաղցրահամ՝
Հասարակաց բոլոր և անհամբույր հեռավորնե-
րին:
Նաև ի՞նձ վրա ցողիր հայրական սերդ գթա-
ռատ, կենդանի Աստված,
Որպեսզի ես էլ գտնեմ փրկություն՝
Քավված մեղքերից ամենաառատ քո այցելու-
թյամբ:
Եվ քեզ Հոր և Սուրբ Հոգու
Հետ փա՛ռք հավիտյանս. ամեն:

¹ Եղիայի

² Գ. Թագ. ԺՈՂՈՎՐԴԻ



Ա

Եվ ինչո՞ւ համար պիտի մեջ բերեմ և իմ տավի-
ղով երգեմ անդադար,
Սաղմոսարանի խոսքերն այն բոլոր,
Որոնք իմ դեմ են միշտ և շարունակ, որպես նա-
խատինք և որպես նզովք:
Ինչպե՞ս կարող եմ շուքը երջանկի հարմարեց-
նել ինձ դատապարտվածիս,
Այսպես ասելով նրա հետ մեկտեղ, թե՝ նենդա-
միտը ինձ չմոտեցավ:
Եվ ինչպե՞ս դարձյալ զարհուրեցուցիչ, հաջորդ
տողերում կարգով թվարկված՝
Բարեմասնություններն այն բոլոր, որոնք հին
օրենքի թագավորի, զինվորական մարգա-
րեի
Եվ մարմնական հրամանատարի նկարագիր
գծերն են,
Երկնայիններին անդամ ցանկալի՝ կրկնեմ և
կյանքից չհուսահատվեմ,
Ես, որ նոր օրենքի ավետարանիչ և շնորհների
աշակերտ լինելով հանդերձ

Այդ երկնահաճու արժանիքներից անմասն եմ իսպառ։

Հստ իրավախոհ արդարի՝ ինչպե՞ս պիտի զինվեմ մեղավորների դեմ,

Պատրաստ լինելով առավոտյան վաղ արթնացածի¹ պես

Սպանել նրանց, ըստ առակողի։

Ես, որ իմ մարմնի անդամներն անգամ գանահարելով չխրատեցի։

Ինչպե՞ս արդ մեծի արիությունը օրինակելով՝ Կարենամ ջնջել անօրեններին Տիրոջ քաղաքից, Երբ իմ հոգու մեջ բուսած մեղքերն իսկ չմեռցը լի ես։

Ինչպե՞ս սուտ խոսեմ նրա մոտ, որին ծածկվածները հայտնի են արդեն,

Ասելով՝ «Մոխիրն իբրև հաց կերա»։

Ես, որ երգողի աղբերակների հստակ արցունքին իմ հուզումներից պղտոր մի կաթիլ իսկ չմիացրի, ինչպե՞ս նրա հետ կարող եմ ասել՝

«Հմապելիքս խառնեցի ես արտասուքներով Եվ անկողինս արցունքներով թրջեցի»։

Եվ ապա, որո՞նք վերագրեմ ես ինձ՝ մեղքերով մահացյալիս,

Երբ աստվածասերն ի բոլոր սրտե նախնյաց հանցանքներն

Իրենն է համարում, ասելով այսպես։—

¹ Սաղմ. 6Ա. 8

«Մենք մեղանչեցինք մեր հայրերի հետ, անօրինացանք և հանցանք գործեցինք»,
Եվ այս սաղմոսի հետագա բոլոր տողերը, որոնք
իրավամբ ինձ են հարմար ավելի, քան իսրայելին:

Ինչո՞վ արժանի լինեմ դասվելու բարիների հետ,
Երբ չգտնվեց իմ մեջ այն դեղն իսկ, որ հարգվեց
որպես մարդկային մի գյուտ,
Այսինքն գարշելով կերակուրներից՝ մահու չափ
քաղցել,
Եվ երկարատես ճգնություններով՝ հոգով նվազել,
Հստ տարակրոն հրեաների և հեթանոսների
երբեմնի սովորության:
Արդարությունն իմ ինչպե՞ս կարող է մնալ հաւայան, որը ես երբեք ի գործ չդրի:

Բ

Բայց, որպեսզի երկարաբանությամբ չդառնամ
տաղտկալի,
Պիտի աշխատեմ խոսքս համառոտել:
Ի՞նչ կարող ես ասել այն խոսքերի տեղ,
Որոնք նվագեց օրհներգ ու Դավթի ձայնն աստ-
վածաշունչ,
Թե՛ «Բոլոր սրտովս ես քեզ վնտրեցի»:
Ինչպե՞ս սրա հետ ասեմ ավելին,
Թե՛ «Ամեն տեսակ չար ճամփաներից ոտքս
կտրեցի»:
Ինչպե՞ս սրա հետ ասեմ ավելին,

ԹԵ՛ «Իմ սրտի մեջ պահեցի խոսքերդ, որպեսզի
քո դեմ չմեղանչեմ»:
Ինչպե՞ս ունայնություններս որպես կատարե-
լություններ ճառեմ մաքուրների հետ,
ԹԵ՛ «Քո պատվերներից դաս առնելով, ատեցի
բոլոր ճանապարհները չարագործների»:
Ինչպե՞ս ես հեզի ճշմարտությունը՝ իմ խաբերա-
յի մշտնջենական
Սուտ երդումների հետ համակարգեմ, ուխտե-
լով հավատարմի հետ,
ԹԵ՛ «Հաստատապես երդվեցի պահել դատաս-
տանդ արդար»:
Ի՞նչպես կկնեմ ես այն պատգամը, թե՝ «Փրկու-
թյունը հեռու է մեղավորներից»:
Որը իմ վերջին վճռի մահագույժ հրեշտակն է:
Ինչպե՞ս չարս իրոք, բարիների պես,—
Որոնք Տիրոջից առնում են իրենց հատուցումն
արդար,
Հեղեղելով այս տողը ասեմ, թե՝ «Տերը բարիք
կանի ուղղամիտներին»:
Ինչպե՞ս այն անաչառ և կտրուկ փոխատրու-
թյունը մոլորյալիս,
ԹԵ՛ «Սխալվածներին հափշտակելով կտանի
նրանց հետ, ովքեր գործում են անօրենու-
թյուն»:
Ինչպե՞ս պարծանքը Աստվածազգեստի պատ-
վաստեմ ես ինձ՝ ամոթահարիս,
Նրա խոսքն ասելով. «Զբարձրացավ սիրտս, Տեր,
եվ աչքերս երբեք չզվարճացան»:

Ինչպե՞ս ընդունեմ մարմնականից վեր խոսքն
անձառելի,
Որպես քաջալեր հուսահատվածիս, գանձիս գե-
հենի,
Ասելով Աստուծո Հոգով օծյալի հետ,
«Առաջուց տեսար, որ լեզվիս վրա նենգություն
չկա»,
Եվ սաղմոսի այս մարգարեական գլխի սկզբից
մինչև վերջ գրված խոսքերը բոլոր:
Եվ ինչպե՞ս ինքս, որ համաբան եմ դժնասիրտ
մարդկանց և դասակից նրանց,
Ես, որդիս մահով ջնջվելու արժան՝ բարեշնորհի
խոսքը բարբառեմ.՝
«Զէ որ, ահա, Տե՛ր, քեզ ատողներին ես ատե-
ցի»,-
Եվ մնացածներն ապա այս կարգի:
Ինչպե՞ս դու, ա՞նձն իմ, որ աշխարհի ամենեն
աշխարելին ես,
Տոնելի Վեհի վստահությամբ
Չստուգված հոգիդ առաջ մղելով, պանծաս ինք-
նագով պսակվածի հետ,
Թե՛ «Փորձիր ինձ, Տեր, և տես՝ կա՞ միթե անօրե-
նություն իմ ձեռքերի մեջ»,
Դրա հետ նաև հավելվածները:
Չար լինելով ես՝ ինչպե՞ս չարերից ազատվել
մաղթեմ,
Իրենց հույսն Աստուծո վրա դրածներին ձայ-
նակցելով,

ԹԵ՛ «Պահիր ինձ, Տեր, մեղավոր և չար մարդու
ձեռքերից»:
Ինչպե՞ս վեր կենամ՝ փառավորյալի հետ աղո-
թելու Աստծուն,
ԹԵ՛ «Դու ես իմ հույսն ու բաժինը կենդանյաց
երկրում»:
Ինչպե՞ս, իբրև թե ճգնավորի հետ մրցման
դուրս եկած,
Հաղթանակի մրցանակը թագավորիդ մատուցե-
լով,
Այս աննմանակ աղոթքն անեմ ես աղերսագին.—
«Արդարներդ պիտի սպասեն, մինչև դու հա-
տուցես ինձ»:

Գ

Բարեբանյալ է նաև հոգեւոր այս միտքը,
Որով ամեն ինչ արհամարհելով,
Արարածների սկզբնապատճառին է ընտրում
միայն ասելով՝
«Երանի՛ այն ժողովրդին, որի տերը իր Աստ-
վածն է».
Եվ այս նման է Տիրոջ վարմունքին, որով նա
փորձչին հանդիմանեց նրա անպատկա-
ռության համար:
Մեծ է նաև այն շնորհը երանությամբ լի հա-
մարձակությունն այն երկյուղած,
ԹԵ՛ «Քո սուրբերը պիտի օրհնեն քեզ»:

Հղձալի է նաև հոգեոր հաղորդության ընտառությունն այն մտերիմ,
Որով մարդ իր հույսը դնում է միայն Աստուծության
կրած
Եվ նրա մեջ էլ մնում հաստատուն սաղմոսի
խոսքերով քաջալերական,
Թե՛ «Տերը կատարում է իր երկյուղածների կամքը»,
Եվ ապա թե՛ «Տերը պահում է բոլոր նրանց, ովքեր սիրում են նրան,
Եվ զնջում բոլոր մեղավորներին»:
Պատգամներ տիսուր և ուրախական Սաղմոսարանի վերջին գլուխների մեջ,
Որոնք ցույց են տալիս արդարների ու մեղավորների վերջին հատուցման օրինակները:
Իմաստով միմյանց հաղորդակից են և այն երգ-վածները,
Թե՛ «Տերն հեղերին իր մոտ կընդունի
Եվ մինչև գետին կխոնարհեցնի ամբարտավաններին»:-
Ուրեմն որքա՛ն եղկություններ կան իմ առաջ:
Իսկ եթե՝ «Տերը սիրում է իր սուրբ ժողովրդին
Եվ հեղերին բարձրացնում է փրկելով նրանց», -
Հապա ես զուրկս արժանիքներից՝ ի՞նչ հույսով
ամրանամ:
Իսկ եթե Աստված սրբերից է օրհնվում իսկապես,

Հապա ես օտարս մաքրությունից՝ որո՞նց կար-
գը դասվեմ։

Իսկ եթե սրանց մոտ դնեմ իբրև հանդիմանու-
թյան հիշատակարան,
Կանխերգածներից այս տողը, թե՝ «Սիրեցեք Տի-
րոջը, ո՞վ նրա սուրբեր,
Զի ուղղություն է ուղում նա և կրկնակի կպատ-
ժի գոռոզներին»,—

Հապա ո՞ր գնդում պիտի լինեմ ես,
Գերիս գրավված՝ գաղտնի մեղքերի գյուտարար
չարին։

Քանզի, ինչպես որ կտատանվեն տագնապով
տերեները եղենու դալար տունկերի
Ու շարժվելով ուժգին հողմերից՝ կթափվեն գե-
տին,—

Այդպես էլ ջանաց ջարդել չար ոգին իմ վարք
ու բարքի

Բարեբեր ճյուղերն՝ ի վեր բարձրացած,
Եվ որոնք անեղ մշակիդ ձեռքով էին հորինված,
Կրկին ու կրկին արմատացնելով հաստատի՛ր
ամուր

Նո՞ր անապական պտղավորությամբ զարդարե-
լով այն

Քո խնամատար կամքին հանձնված՝ կյանքի
անդաստանում,

Ամենապարզե թագավոր Քրիստոս,
Օրհնյա՛լ հավիտյան. ամեն։



Ա

Բայց արդ, ես ինչո՞ւ վերոհիշյալ կանխագուշա-
կող սաղմոսի վրա

Մարդարեներից ուրիշ հատվածներ էլ չավելաց-
նեմ:

Սակայն ի՞նչ ճաշակ ստանամ պիտի այն կերա-
կուրից,

Որն ուտելու եմ ցավերիս մեջ անզգայացած.

Եվ կամ ի՞նչ օգուտ կտա սաղմոսն ինձ, եթե
չըմբռնեմ իմաստը նրա:

Զի նզովում եմ ինքս ինձ նրանով՝ ու չեմ հաս-
կանում,

Լվացվում եմ՝ ու չեմ պայծառանում,

Ծագում է արևն՝ ու չեմ լուսավորվում,

Մեղր եմ ճաշակում՝ ու չեմ քաղցրանում,

Դեղերով լցվում եմ՝ ու չեմ բժշկվում,

Դիմում եմ նույնին՝ ու դատարկ դուրս գալիս,

Ծաղրվում եմ միշտ՝ ու չեմ խրատվում,

Հորդորվում նույնպես՝ ու չեմ զգաստանում:

Բ

Արդարեւ՝ իմ մեջ են մեղքերն ու անօրենությունները,

Եվ ես նրանց մեջ մաշվում եմ,

Ինչպես որ մարգարեն է ասում ի դեմս հանցապարտների,

Մեկնաբանելով առակն հին տիկերի և նոր գիւնու¹:

Զի եթե, ինչպես Եսային է ասում՝

«Անօրեններն ու մեղավորները միասին պիտի սատակեն»,

Ապա և ինձ դժնիիս համար էլ նույնն է վիճակված:

Քանզի հիշում եմ սաղմոսի այն խոսքը, թե՝

«Կհատուցի նրանց, որոնք ավելի են գոռողանում»:

Մյուս ընթերցվածն էլ կցում եմ սրան.—

«Տիրոջ օրն հպարտ և ամբարտավան մարդկանց վրա է»²,

Ինչպես և՝ «Մեղավորներն իրենց մոր արգանդում իսկ օտարացան».

Եվ նմանիմաստ տողերն ըստ կարգի:

Կցում եմ սրան, թե՝ «Անօրենները երկրի պիտի կործանվեն»,

Եվ՝ «Ամբարիշտն երկրից պիտի վերանա»,

Եվ՝ «Պիտի մերժվեն անիրավները»:

¹ Սատթ. Թ. 17

² Եսայի Բ. 12

Ողբացեք վրաս այս խոսքի համար,
թե՝ «ինչպես եղեգը կվառվի կրակների մեջ,
Այնպես էլ մեղավորները այրվեն պիտի բոցե-
րում բորբոք»:

Լացեք սաղմոսի այս խոսքի համար,—
«Կրակի կայծեր պիտի թափես դու նրանց վրա»:
Ողբեր կարդացեք դուք աստվածային այն վճռի
համար,

Որ մարդարեի բերանով է զարդարված.—
«Եթե չկամենաք լսել ինձ, սուրը ձեզ պիտի ու-
տի»:

Կոծեցեք այն սաղմոսի առթիվ,
թե՝ «Մահը պիտի հովվի նրանց»:
Աղի արցունքներ խառնեցեք դուք իմ հեծու-
թյուններին հառաջանքներով,

Երբ բարձրյալն ինքը՝ իսրայելի հետ՝ սաղմոսի
խոսքով նաև ինձ ասի.—

«Իմ ժողովուրդը ձայնս չլսեց»:

Ավաղ ասացեք դուք ինձ թշվառիս, երբ նույնն
է կրկնում մի այլ մարդարե.—

«Վա՛յ նրանց, զի հեռացան ինձնից»:

Տիրամած սրտով նոր աղաղակի փող հնչեցրեք
դուք,

Երբ Աստուծո տեսանողը, ամաչեցնելով ինձ,
Կշտամբի սաստիկ Հակոբի տոհմի հետ ապերա-
սան,

Թե՝ «Տեսեք, ո՞վ արհամարհուներ, զարմացե՛ք
և ջնջվեցե՛ք»:

Գ

Բայց դու, որիդ երեսից փախել եմ սարսափա-
հար, հետ տար ինձանից
Եվ պատյան դիր ահավորիդ բարկության վրաս
բարձրացած սուրն սպառնալից,
Եվ քո բարեբաշխ, խնամոտ աջովդ ինձ հասնե-
լով,
Կյանքի օծումը պարգևիր ինձ՝ քեզ աղաչողիս:
Եվ քեզ փառք բարձր երկնայիններից և երկրա-
յին բոլոր մահկանացուներից,
Սահմանների մեջ բոլոր ազգերի,
Հավիտյանս. ամեն:





Սբուն Խորհերից Խոսէ Ըստու-ծո Հեղ

Ա

Բարերար և բազմագութ, մարդասեր և երկայ-
նամիտ միակ թագավոր,
Հորըդ հետ պատվիած և օրհնաբանված Տե՛ր
ամենայնի,
Որդի՛դ կենդանի Աստուծո,
Դու, որ ինձ երբեք կորչելու տեղիք չես տալիս,
Եվ ամենակին չես փորձվում չարից.
Ու մեղավորի մահն իսկ չես ուզում,
Եվ կամքդ փրկություն է բերում բոլորին,
Մեղքի մրրիկը քավության մեղմաշունչ զեփյու-
ռի ես փոխում դու
Եվ բարկության հուրը փոխարկում անձրեի:
Դու, որ քո բարի հրամանին չանսացող կնոջն
հետ դարձրիր իր ընթացքից,
Նույն արձանի մեջ կերպավորելով զույգ գոյա-
ցությամբ երկու բնություն,-
Ո՛չ անմեղների և ո՛չ էլ իսպառ պատժվածների
կարգը իրապես դասելով նրան:

Դու, որ ծովի լույծ ջրերն հորձանուտ՝ քարակույտի պես իրար վրա դիզեցիր բարդ-բարդ¹

Եվ անապատի կարծրանյութ վեմն իբրև հոսող վտակ բխեցրիր²:

Դու, Հորդանանի սրբնթաց վայրէջքը կանգնեցրիր հրաշապես,

Դարձնելով այն որպես լվացումի ավագան հեթանոսների հետնորդների համար:

Երիքովի պարիսպը պնդակուռ —

Մատանայի բռնության կործանման որպես օրինակ —

Թեթև հարդի պես օդ ցնդեցրիր դու,

Եվ այդ քաղաքի ջուրը վնասակար, այլաբանորեն,

Որպես օրինակ քանանացոց փրկությանը, դեպի բարին փոխվելուն՝

Դու խորհրդավոր աղով համեմելով՝ անուշացրիր:

Մեռայի դառնությունը-նշանակ անհավատության՝

Դու կենաց փայտով պիտանի դարձրիր, քաղցրացրիր քեզ պես³ միացնելով քեզ հետ:

Գետից առնված ջուրն ինչպես արյուն մակարդեցիր դու ցամաքի վրա,—

¹ Ելից ժԵ. 8

² Ելից ժԵ. 6

³ Ելից ժԵ. 22-25

Իբրև նշանակ անհուն հաճությանդ, որի համաձայն,

Անփոփոխ պիտի գունավորվեր նոր երանգով
բռսորային¹:

Անկենդան գավազանին անթույն վիշապի նմանություն ու տիպ տվեցիր,

Ի պատկերացումն քո ըստ մեզ ձևակերպմանն ու ընտրությանն օտար ազգերի:

Մովսեսի երջանիկ աջը պահպանելով անեղծ ու անփոփոխ՝

Ցույց տվիր դու մեզ նախապես ապագայի հրաշքներդ, բարձրյալ,

Որոնք մարդեղությանդ ընթացքին պիտի կատարեիր,

Եվ ապա, քեզանով՝ ախտավոր մարմնիս մաքրագործվելը գուշակեցիր:

Եվ դու այս բոլորով, ահա՝ ամենուրեք,

Մեղավորներին կորսայան ենթակա, բարեխնամորեն,

Սիրույդ հրաշքով կատարվող անակնկալ գյոււտը գուշակեցիր,

Օրհնյալդ ամենագութ:

Բ

Ծլեցնում ես դու երկրից կանաչ խոտ ու կյանքի կոչում անշունչ մեռյալին,

Անշարժին կառավարում ես որպես ընթացող,

¹ Ելից Դ. 9

Անարդ արգանդից դուրս ես կոչում քեզ պատ-
կերակիցներ,
Պատանիներին սեղանատամներ տալիս ըմբոշի-
նող
Եվ նրանց մաքուր այտերի վրա մազ ես աճեց-
նում,
Եվ սևասաղարթ վարսերը ձյան պես զարմանա-
գործում,
Յույց տալով, թե քո կարողությունը անցնում է
ամեն սահմանից, հզո՞ր,
Շրթունքների բնազդական թոթովանքները,
ինչպես Հոքն է ասում,
Փոխարկում ես դու հարազատ ու պարզ արտա-
բերության,
Սասանում ես դու երկրին ու նրա այուներ՝
հիմքից,
Յույց տալով թե, դո՞ւ կմնաս միայն անկորնչե-
լի:
Դու թափալում ես տարերքը, որպես անցավոր
իրեր
Եվ դարձյալ նույն տեղ հաստատում դրանք որ-
պես մնայուն.
Այսպես՝ հայտնելով, թե կարող ես դու նույն
այդ դյուրությամբ
Կապել մեր բազում մեղքերը և կամ արձակել:
Անզգա էությունն արուսյակի սանձահարում
ես կարծես թե երասանով,

Այդպես՝ ցույց տալով, թե մեր բնության հա-
կումները չար
Կարող ես դյուրավ դու հանդարտեցնել, երբ էլ
կամենաս:

Անբարբառ լուսնի բոլորակը դու մերթ ունայն
ես անում և մերթ պատարուն,
Ապացուցելով, որպես ավետիս, այդ տեսնողնե-
րիս,
Թե բարիքներից նվազած մեր մեղապարտ մար-
մինները
Դու նախաստեղծ հարստությամբ կամբողջաց-
նես դարձյալ:

Անխոս աստղերի բազմությունը դու իբրև փոք-
րաթիվ հոտերի խմբեր,
Բաժանում ես իրարից և հավաքում դարձյալ,
Ի խորհուրդ կենաց հաստատուն հույսի, ո՛վ
քաղցրահայաց տեսություն,
Թե դու չաղաչող լեզուններին էլ կարող ես լրիվ
նույնպես ողորմել:

Ծովում, դու կյանքի ու մահվան միջև ճամփա-
ես բացում ուղիղ ապահով,
Այդպիսով հաստատ հավաստիացնելով, թե
վտանգավոր վայրում էլ նույնպես
Կարող ենք լինել անդայթակղելի՝ քեզնով
պաշտպանված:

Ինչպես կաթսայում կրակի վրա եռացող ջուրը,
Այդպես՝ մեղքերի պղտոր մրրիկն էլ քո կամքի
խոսքով կդադարեցնես:

Նայում ես երկրին ու շարժում ես այն,
Որպեսզի անբան այդ զանգվածով զգաստաց-
նես մեզ՝ մտավորներիս:
Ալիքների վրա տատանվող փոքրիկ մակույկի
նման

Դղրդում ես դու հողագանգվածի թանձրու-
թյունն անբավ,
Որով բովանդակ արարածներին ծանուցանում
ես, թե կաս աներկբա,
Եվ որ քո զորեղ խոսքով ես հիմնել տիեզերքն
համայն:

Սերմանում ես դու մեր անշնչացած մարմին-
ներն հողում,
Եվ այնտեղ նրանց անկորուստ պահելով՝ կեն-
դանացնում կրկին,
Ապականելին հողին պահ տալով անեղծն ստա-
նում,
Դու մահկանացու նյութի հետ կենաց նշխարդ
ես խառնում:

Դու քո ակնարկող մի հրամանով ստեղծվածնե-
րին ողջ անկերպարան

Փոքրինչ վայրկյանում ձևակերպեցիր ամեն
մեկն իր պես:

Քոնն են զորությունն ու կարողությունը,
Զի դու օրերի հոլովումներով շրջանակում ես
տարվա եղանակները,
Յուրաքանչյուրն իր ժամանակին, բազմապիսի
գեղեցկությամբ՝ մեր տեսողության համար:

Անմոռւնչներին ձայն ես տալիս դու իբրև կեն-
դանու.

Ներշնչում միայն, ու քայլում են նրանք.

Դո՛ւ ես լոկ հինում հնարագիտության անճառ
արվեստով մեզն ու առավոտը:

Առաջնաստեղծ գոյացության նախակարգ հո-
րինվածքից հետո,

Հստ երանելի մի գրվածքի կանխահիաց
զարմացման,—

Երբ դու մարդացար, կատարեցիր մեծամեծ
փառավոր հրաշագործություններ,—

Որոնց թիվ չկա, ստեղծելով նոր ու նվիրական
Մի ուրիշ աշխարհ ավելի անեղծ, քան առաջինը:

Գ

Դու, որ մեր հանցանքը քոնը համարեցիր և
արդարությունդ շնորհեցիր մեզ,

Որ մեր հաշտության փրկանակն ինքդ քեզ վրա
առար,

Որ դու չես դադարում ողորմելուց,—

Դարձրո՛ւ ամբարշտիս երկյուղածությանը բա-
րեպաշտի,

Թմրածիս՝ զգաստացուցիչ արթնությանը սրտի,
Անմաքուրիս՝ պայծառ ու մաքուր կերպարանքի,

Բազմամեղիս՝ անբծությանն համեստ սուրբ
պատկերի,

Կոտրվածիս՝ առողջության անխորտակելի,

Լացածիս՝ զվարթ ուրախությանն անտխրելի,

Հուսահատվածիս՝ միացնող սիրո անլուծելի,
Ամոթահարիս՝ հաստատուն վստահության
անշարժելի,
Խավարածիս՝ երանության լույսին անմեկնելի,
Մահվան գերուս՝ կյանքին անապականելի.
Որպեսզի խոստովանված անունդ, Հիսուս,
Փառավորվի Հոր և Սուրբ Հոգուդ հետ՝
Երկնքում և երկրի վրա և նրանց բոլոր բնակիչ-
ներից.
Հավիտյանս հավիտենից. ամեն:





Արդիշ Խոստերեց Խոստ Սաղուն-Ճռ Հետ

Ա

Արդ, ամեն ինչում բացարձակապես ուղիղ ես,
Աստված,
Իրավունքով դատում ես և արդարությամբ
կշռում,
Ճշմարտությամբ չափում ես և օրհնությամբ
հետեւում,
Ընթանում ես ուղիղ և ստուգություն ես սիրում,
Հստակություն ես կամենում դու և լուսավո-
րություն համբուրում,
Փորձելով հանդիմանում ես, երկայնամտու-
թյամբ քննում:
Զունես նենգություն և ոչ էլ գոռոզություն,
Այլ հեզություն համակ, հանդարտություն և
ողորմություն:

Բ

Արդարացար, ո՞վ անայլայլ, վերին իմաստու-
թյուն հանճարեղ քո Հոր,
Ինչպես որ անզիղջ գովեստով վկայեցին շնոր-
հովդ քեզ որդեգրվածները,

Քո՝ մեզ պարգեած Ավետարանի այն սուրբ խոսքի համաձայն, թե՝

«Զողբացի ես, երբ կոծեցին, ոչ էլ կաքավեցի,
երբ փող հնչեցրին»¹:

Մի՛ անօրինիր, ասացիր անօրենիս,

Բայց ես ամրացա նույն չարությունների մեջ.

Մի բարձրացնիր եղջյուրդ դեպի վեր, մեղավորիս ասացիր,

Եվ ես քեզ հակառակ գործեցի.

Զզգացի խոտորյալս երբեք, թե քո ձեռքումն են
Բարձրամիտ հպարտների եղջյուրներն արքայական

Խոնարհեցնել կամ բարձրացնել, ըստ Ամբակումի,

Դավթի և Զաքարիայի.

Դու ինձ օրհնություն կամեցար, ողորմա՛ծ,

Իսկ ես անիծյալս՝ մեծ տարագրությամբ խոտորվեցի դեպի ինձ արժանին:

Սիրեցի բարկություն և ո՛չ բարություն.

Շոշափեցի խավարն ու ոչ թե լույսը.

Կենդանի ձայնիդ, գլուխա՛ծ, անզգամորեն պատասխանեցի.

«Որդն անմահ է» և «Կրակն անշեծ»²,

Կշտամբանքն անվերջ, տեղը հավերժական, և
օրինակը սոսկալի է,- ասացիր խոսքով
Եսայու,

¹ Սատթ. ԺԱ. 16-17

² Եսայի ԿԶ. 24

Եվ ես չիմացա, ըստ սաղմոսողի, ու չըմբռնեցի,
Այլ ընթացա մտավոր մոայլ կուրության մեջ:
Դու մարդարեի խոսքով ցույց տվիր,
Թե՛ օրհնություն կստանա նա, ով օրենք է դնում,
Եվ ես փութացի այդ համառոտել:
Դավթին իր խոսքերով, Տե՛ր Հիսուս Քրիստոս,
Հոգեոր վեմի վրա քո մատով արձանագրված՝
Կանգնեցիր որպես հիշատակարան, ինչպես որ
նաև ինքն է վկայում,
Թե՛ «Ես պահեցի քո օրենքները ամեն ժամա-
նակ, հավիտյան».
Այդ միենույնը հաստատում է նա երկրորդ
անգամ՝
Վերջին բառի անդրադարձությամբ «Եվ հա-
վիտյանս հավիտենից».
Որոնց հետ և այլ պանծալի խոսքեր խրախու-
սեցին ինձ,
Բայց ես անզգա՝ աճապարեցի տոնին Բահաղու
և ո՛չ Աստուծո,
Եվ երկմտությամբ զույգ ճամփաների վրա կա-
ղացի,
Զեռք վերցնելով բարի գործերից, ինչպես ծաղ-
րելով ասում է Եղիան:
Ունեմ Մովսեսին իր օրենքներով՝ մեռելների
աշխարհից եկած,
Նաև գրքերը մարդարեների՝ հոգուս մեջ գրված,
Եվ մատյանները առաքյալների, շարված իմ
մտքի մատների վրա,

Եվ Տիրոջդ՝ բոլորովին հավասարապես՝ ավետ-
 յաց կտակով¹,
 Թաղվելուց հետ հարություն առած՝ անթիվ-ան-
 համար ննջեցյալներով:
 Բայց ես ավելի՝ անհավատ, քան այն մեծատան
 եղբայրները հինգ²,
 Որոնք մի տեսակ իսկապես հարմար օրինակներ
 են
 Ողորմելի հղփացածների զգայարանքներին,—
 Դարբնի սալի պես մնացի անոստ իմ անչափ
 համառ քարացած սրտով.
 Բելիարի նման և չապաշխարեցի:

Գ


Բայց դու վերստին չնորհի՛ր քո ողորմությունը
 լքվածիս,
 Ո՞վ բարի, ահավոր, մարդասեր, խնամակալ,
 Կենդանի, սուրբ, լուսավոր և անվախճան թա-
 գավոր,
 Պանծալի խաչիդ խորհրդի ազգելով
 Հիմար երիկամներիս և հուսալքված անպտուղ
 սրտիս
 Մեղերով կորդացած անբերրի անդաստանիս
 վրա,
 Որպեսզի հզոր ամենակալիդ գլխառատ կամքի
 օժանդակությամբ

¹ Ավետարանով

² Ղուկ. ԺԶ. 28

Որոտա հոգիս, և վշտագնածիս աչքերից հորդեն,
Վազեն ոռոգող արտասուքների վարար վտակ-
ներ,
Եվ ինձ մեղքերից մաքրելով՝ փրկեն,
Քեզ մոտ հաճելի և ընդունելի լինելու համար,
Ամենապարզե Տե՛րդ բոլորի,
Փառավորյալու հավիայան. ամեն:





Սըդի խորհերեց խոսք Ըստության Հետ

Ա

Եվ արդ, ես նախնիս ամբարիշտների,
Գլխավորս մեղավորների, պետս անիրավների,
Առաջնս պարտավորների, պատկերս հանցավորների,
Ատտիկեցիս¹ ըստ վատթարության և ո՛չ ըստ
բարեբաստության,
Անպատումներն իմ պատմեցի ահա՝,
Ամոթալի արարքներս նշավակեցի,
Գաղտնիքներն հրապարակեցի,
Ծածուկներն հայտնեցի,
Թաքցրածներն ի ցույց հանեցի,
Ամփոփածներն տարածեցի,
Դառնության մաղձը ժայթքեցի,
Գործակցությունս չարին՝ մատնեցի,

¹ Ատտիկեցի կամ աթենացի - հունաց համար նույնպես թե՛ ընտիր և թե՛ հորի է նշանակում, որովհետև Ելլադայի ոստանիկ գավառի բնակիչները որքան անվանի էին իմաստությամբ և գիտությամբ, նույնքան էլ անառակ և անպարկեշտ վարք ու բարքով էին հայտնի:

Վերքիս թարախն ամբարված՝ քամեցի,
Մեղքերիս խորությունը ծանուցեցի,
Կեղծիքների ծածկույթը մի կողմ քաշեցի
Տգեղության քողը վերցրի,
Ամոթանքի զգեստը մերկացրի,
Գարշելիներն ի հայտ հանեցի,
Մրուրը մահվան փսխեցի,
Պալարներն հոգուս խոցերի քահանայապետ
Քրիստոսիդ բացի:
Անձս անխնա չարչարեցի,
Մարմնիս նկատմամբ սեր ցույց չտվի,
Հին արմատներն ի տես հանեցի,
Բնությանս կարիքներին չընդառաջեցի,
Միաբանության կապը նրանց հետ խզեցի,
Մրտիս դղյակը քանդեցի,
Որսացված կամքիս հետ, իբրև մահվան դարա-
նակալի հետ, կռվեցի,
Պահուստն անհայտ իմ մեղքերի արտաքս հա-
նեցի:
Մթերված ախտերի գանձը մեծիդ առջև դրեցի,
Դատախազին դատավորի հանդեպ կանգնեցրի,
Ապառնիների փորձն այժմից առա,
Կործանողի հետ դաշինքն իմ բեկանեցի,
Խաբեբայի հետ ուխտս խափանեցի,
Մարտի հաղթական ավարտը, Հիսուս, քե՛զ
վստահեցի,
Ուազմիկ գնդերը շարժման մեջ դրի,

Հարձակումներին դիմադրելու հույսն Աստուծո
խոսքի վրա հիմնեցի,
Խավարասերների փաղանգը լուսեղենների զեն-
քին մատնեցի:

Բ

Եվ արդ, ամենայն արարածների ստեղծիչ Քրիս-
տոս,
Որդիդ բարձրյալ Աստուծո,
Մի՛ մեղադրիր ինձ՝ դատելով խստիվ մեծ օրն
հատուցման,
Ինձ որ ա՛յժմ արդեն պարսավված եմ խիստ
խոսքերով այսպես
Եվ ստացել եմ գանակոծության այսքա՛ն հար-
վածներ:
Ուրեմն, հզո՞ր, անքնին, անճառ. բարերար թա-
գավոր անմահ.
Այսպիսի ամոթալից ինքնապարսավ խոնարհու-
թյանս համար,
Որով ինքըս ինձ անողոք կերպով դատափետե-
ցի, —
Նվագներով այս մատյանի,
Ծածկի՛ր սատանայի դեմքն ամոթի անարգան-
քով
Եվ խաչիդ նշանով զորացրո՛ւ երեսն ամոթա-
հարիս:
Լուսեղեն կնիքդ տեսքիս գեղեցկությանը թող
միանա,

Նշանդ ամրության թող որ դրոշմվի իմ կերպարանքին,
թող կենաց փայտիդ ձևը պատկերվի այտերիս
վրա,
Արվեստն հրաշքներիդ որպես շուք թող որ
տպվի ճակատիս,
Թո՞ղ չաղափաղվի քո լուսապաճույճ դրոշմն
ինձ վրա,
Աչքիս բիբերից թող չվերցվի ճաճանչդ օրհնության,
Զհեռացվի գլխիցս քո վստահության առհավատչյան,
Տյառնազրությանդ փառքը բերանիս ամուր սեմերիցն թո՞ղ չսասանվի,
Երկրպագելի պահպանակդ թող միանա սրտիս
զգայարանքին,
Գոյակցությանս չորս նյութերի մեջ քառաթեկիդ
լո՞ւյսը թող թափանցի,
Փրկչիդ իշխանությունն օժանդակի թող կարկառվող ձեռքիս,
Մատուցման համար ստեղծված մատներիս
Համարձակության խորհրդարանդ թո՞ղ բարեգործե:
Աշխարհից մեկնելիս՝ սրբությունդ ինձնից թող
չհեռանա,
Երբ պատանեն պարտապանիս՝ պատիվս թող
չպակասի,
Փրկությունդ անդավաճան թող չլքի հոգիս,

Ու չջնջվեն քոնը համարվող շնչիցս գրերն կեն-
դանատուիդ,
Զորեղ արյունիդ նկարը թող չեղծվի խորանից
իմ աստվածատիպ,
Եվ բնակվի ինձ հետ գերեզմանիս մեջ:
Թշվառ մարմնիս մաշվելուց հետո շնորհիդ
օծումն ինձ մոտ թող պահվի,
Որ նորոգության օրը նրանով ես ներկայանամ
փառաց փեսայիդ,
Ճանաչվեմ թող ես այդ նշաններովդ ու վաս-
տակներովդ պճնվեմ,
Ու մեծագույնիդ երախտիքներով գնահատվե՛մ
թող,
Եվ ողորմությամբդ քավված՝ ավազանի զգես-
տով պերճանա՞մ,
Տո՛ւր ինձ, բարեգութ, վերարկուդ անապական,
Որ տառապում եմ մարմնիս մեղքերով:
Թող որ քոնոնց դեմ չելնի՛ բանսարկուն,
Հոգիս հնացնողը թո՛ղ ոչնչանա,
Խավարաբնակների խարկանքները թող հանդես
չգան,
Թող քո անունով օրհնվի, գթա՛ծ, վիհն իմ
հանգստյան,
Թող ողորմությամբդ լցվի լիուլի գուբն իմ
գերության,
Թող որ քեզանով ընդարձակվի տեղն իմ թշվա-
ռության,
Թող խաղաղ լինի, խնամո՛ղ, ինձ համար բանտը
բարկության,

Թող արգանդը մութ՝ սնի իր մեջ հանուն հա-
րության,
Հույսովդ թող ինձ իր մեջ ամփոփի տունը անձ-
կության,
Թող ես քո ձեռքով պահվեմ խշտյակում այդ
տարտամության,
Թող որ ընդունվեմ ես քո թևերով տագնապի
տան մեջ,
Եղի՛ր դու, գովյա՛լ, ինձ հետ վտանգով լեցուն
սենյակում,
Ավա՛ղ ինձ այստեղ բյուր-հազար անգամ,
Զի երբեմն վերնային էի և այժմ անդնդային,
Տոնելի երբեմն և այժմ եղկելի:

Գ

Բայց և դու դարձյալ օրհնված ես բոլոր արա-
րածներից՝
Երկնայիններից, երկրայիններից և մեռելներից
սանդարամետի,
Անպարտականդ այս տարագըռության:
Ե՛ս վրիպեցի, ե՛ս օտարացա, ե՛ս հիմարացա,
Ե՛ս պարտվեցի և դարձա խոտան:
Ե՛ս վհատվեցի, ե՛ս կարկամեցի և կործանվեցի.
Ե՛ս մոլորվեցի, ե՛ս մատնվեցի, ե՛ս մերժվեցի.
Ե՛ս խորթացա, գերվեցի և գայթակղվեցի.
Ե՛ս նղովվեցի, ե՛ս թշվառացա, հարբեցի և վատ-
թարացա,
Ե՛ս ընկղմվեցի, ե՛ս խաբվեցի, ե՛ս անօրենացա.

Ե՛ս ապականվեցի, մահացա և խսպառ եղծվեցի:
Այս բոլորի մեջ դու չարության մատ չունես,
Մնում ես դու միշտ միայն ու միայն անփոփոխ
բարի:

Երբ կամքդ ինձ հետ է՝ խավարը ճառագայթ է
ինձ համար.

Հույսիդ ճրագն երբ կա, գիշերն արշալույս է.
Հաղորդվելով մարմնիդ՝ կասկածների ամոթան-
քից զերծ կլինեմ.

Իսկ ես ինքս ինձ կենդանի չեմ համարում, հիշե-
լով վախճանն անխուսափելի,

Եվ ոչ էլ կորած եմ կարծում ես ինձ,

Քանզի անկասկած հավատում եմ ես նորոգման
հրաշքին:

Կյանքիդ դուռն առջես համարում եմ փակ՝ իմ
անքավելի մեղքերի համար,

Բայց ես տեսնում եմ միաժամանակ դրախտն իմ
առջե բաց,

Որ ավետում է փրկությունդ ինձ:

Քանզի ո՛չ այնքան վհատության գույժն է տագ-
նապեցնում,

Որքան փրկության համար կարկառած ձեռքդ է
խրախույս քաջալերական:

Ուստի, տո՛ւր դու, Տե՛ր, տո՛ւր ողորմություն
Գոհաբանություն կարդացող բոլոր բանական-
ներին,

Օրհնյա՛լ հավիտյան. ամեն:



Բան Կ.Զ.

Սրբի խորժերեց խոսք Ըստու-ծո Հեղ

Ա

Արդ, ով որ առնի այս համեստ մատյանի մաղ-
թանքների սպեղանին,
Նրանով աղոթելու համար, եթե այդպիսին մե-
ղավոր է մի՝
Ե՛ս էլ թող նրան մասնակից լինեմ իմ այս խոս-
քերով.
Իսկ եթե երբեք լինի ոմն արդար այր աղոթար-
կու,
Ես էլ նրա հետ թող այս մատյանով գտնեմ
գթություն։
Եվ ապա, եթե այդպիսին իրեն զգա երջանիկ,
ինձ համարելով միայն եղկելի,
Այդ նույնը նաև հաստատում եմ Ե՛ս,
Բայց նա էլ հիշի թող Սողոմոնին և այս հոգե-
չունչ խոսքերը նրա,—
«Ո՞վ վստահորեն կարող է ասել, թե ունի սուրբ
սիրտ,
Եվ կամ պարծենալ, թե մաքուր է մեղքերից».
Եվ թե՝ «Չի եղել երկրածին մի մարդ՝ զերծ իրեն
համար պատասխան տալուց».

Ինչպես և ոչ ոք՝ հաղթող համարված՝ ինքնարշավ վազքով,
Եթե մինչև իսկ ունենա թևեր նա բարձրաթոփէ¹:
Ուստի նաև նա՛ թող զգուշանա, երկյուղ կրելով,
Որ հաստատ վեմի վրա է նույնիսկ, Պողոսից ուսած.
Որպեսզի միգուցե գետին ընկնելով՝
Նմանվի այս իրավադատ կանոնը սահմանողին:
Այլ նույնիսկ և նա՛, որ մաքուր է, թող այս
կշտամբանքը դաս անի իրեն,
Զիջնելու համար անխոհեմ կերպով իր բարձրությունից.
Իսկ պատժապարտն էլ թող ընդունի այն՝ առիթ
ազատության:
Որով հոգեոր մահվան կործանումից վեր բարձրանալով՝ ապրի լիահույս:
Իսկ ինձ համար այս պատգամները թող լինեն
փորագրված արձանագրություն հավերժ
անեղծանելի,
Որ իմ եղկելի և մահկանացու անձի փոխարեն՝
Հեծության, լացի անդադար հնչմամբ, առանց
լոելու միշտ աղաղակի:
Եվ թող որ լինի, որ բեկբեկված ոսկորներս հողապատյան շիրմի ծածկույթի տակ
Անմոռունչ ձայնով՝ խոստովանական այս աղոթք-
ներս եղանակեն.

¹ Ժող. Թ. 11

Ինչպես և հողում լուծված մարմինս անլուր
բարբառով
Այս պաղատանքներս թող որ առաքի քեզ՝ ծած-
կատեսիդ:

Բ

Տե՛ր գթությանց, աղբյուր ողորմությանց պար-
գևաբաշխ բարի,
Որդիդ բարձրյալի Տե՛ր Հիսուս Քրիստոս,
Ողորմի՛ր, խնայիր, մարդասիրիր,
Նայիր վշտերիս և տե՛ս սրտաբեկությունս,
Խոնարհվի՛ր թշվառությանս վրա,
Տե՛ս տարակուսական տագնապս անձեռնհաս,
Կարեկից եղիր ի կորուստ տանող ցավերիս մեջ
ինձ,
Շոշափի՛ր բժշկապես վերքերն իմ թշվառագույն,
Ականջ¹ դիր քաղցրությամբ ողորմագին հեծե-
ծանքներիս,
Լսի՛ր գերեզմանի խորունկ անդունդից հնչող
անմոռունչ հառաչանքներս,
Թող քո ամենալուր ականջներից ներս մտնի
Հյուծված անդամներիս ձայնը պաղատագին:
Եվ քանզի անապական է կենդանությանս գրա-
վական հոգին,
Ուստի թող անփոփոխ լինի սիրույդ գթու-
թյունը նաև,

¹ Սատր. ԻԶ. 39

Կցորդ եղիր դու հեզությամբ՝ տկարությանն իմ
տաժանելի:

Մեռյալ պատկերիս դեմ ոխ մի՛ պահիր,
Անշունչ կերպարանքիս հետ մի՛ մտնի դատա-
քննության,
Մահով տանջվածիս դու նոր հարվածներ մի՛
ավելացնի,
Կոտրված խեցեղեն անոթիս հետ մի՛ մարտնչիր
ուժգնությամբ,
Վճռով խոշտանգվածիս վրա մի՛ բարկանա
կրկին,
Կործանված շինվածքիս մի՛ տար նոր պատու-
հաս,
Սպանված շանս վրա քարեր մի՛ արձակիր,
Ջախջախված լվիս վրա մի՛ որոտա սաստկա-
պես,
Անարդ հողիս դեմ իբր անբարհավաճի՛ մի՛
մոնչա ուժգին,
Մոխրիս մերժել մի՛ կանչիր դատաստանի քննու-
թյան,
Ցնդելի փոշուս մի՛ համարիր դու քեզ ընդդի-
մամարտ,
Տիղմս տաղտկալի մի՛ կարծիր դու քեզ որպես
ոսոխ,
Գարշությանս անգոսնելի մի՛ վանիր իբրև
բռնամարտիկի,
Դուրս շպրտվելիք կոճղիս մի՛ պահիր գեհենի
համար որպես վառելիք,

Այսքան խոսքերով բազմաթիվ անգամ կշտամբ-
վածիս
Դու էլ վերստին մի՛ հանդիմանիր:

Գ

Սրանք են ահա՛ այն սրտաբեկիչ ու հոգնաթա-
խիծ աղաչանքները,
Որոնք իմ թշվառ ու խավարագել շիրմից պիտ
հնչեն.

Եվ թող քո օրհնյալ խոսքը հաստատի, թե աղո-
թողիս սրտի համաձայն

Պիտի մնամ ես անայլայլելի:

Քանզի հիմա էլ, մինչդեռ խոսում եմ դեռևս
կենդանի՝

Մեռած եմ արդեն անհասիդ համար.

Ինչպես և մահվամբ կորչելիս անգամ

Անեղծ կմնամ ես իմ հավատքով, ըստ հրամանի
ամենազորիդ:

Արդ, աղաչում եմ, Տեր Հիսուս Քրիստոս, ողոր-
մությամբ նայիր դու ինձ

Եվ մի՛ թողնի, որ բնակակից լինեմ Բելիարին:

Թշվառիս թաղման ժամանակ, տապանի անկեն-
դանական թնդյունը մահազեկույց,

Որպես աղաղակ լալահառաչ՝ քեզ ինձ հետ հաշ-
տեցնող,

Արժանացրու քո լսողությանը, միա՛կ բարե-
գործ,

Հոգեսեր, հզոր և մի՛շտ մարդասեր.

Եվ քո բարի հոգին թող բնակվի ինձ հետ, լույս
տալով ինձ խավարի մեջ,
Թող մնան ինձ հետ քո կենարար չարչարանք-
ների մասունքները պաշտելի,
Որպեսզի, իբրև գանձարանի ավանդ, պահելով
ինձ քո մեջ, կենսանորոգեն.
Որպես զինվորական սարք անվատնելի թող
պատկանեն ինձ
Ու մնան ինձ հետ իբրև մնայուն պարսաքարեր՝
հոգու հնարքների,
Զարի գնդերը հալածելու համար՝
Նրա իմ դեմ մղած մարտը թո՛ղ քեզանով վան-
վի, Տե՛ր,
Զի եթե նա ելնի իմ դեմ պատերազմելու,
Տեսնելով քաղաքն առանց զինվորի և ազդարա-
րող գործիքը՝ անձայն,
Քե՛զ կունենամ, Տե՛ր, անքուն պահապան
մշտնջենապես:

Դ

Զի եթե շտապի չարն այժմ ևեթ, առաջ քան օրը
կատարածի,
Եվ պատրաստի ինձ համար անելանելի արգե-
լարան,
Ես տերունական աղոթքն իմ կուղղեմ նրա դեմ,
որպես մահացու հարված.
Եթե կարենա ինձ գցել գետին,

Արարչին արած իմ ծնրադրությամբ նրան կխո-
ցեմ.

Եթե հաջողի երկրի մոխրի մեջ գլորել նա ինձ,
Աստուծո երեսնիվայր ընկնելը թող հալածի
նրան.

Եթե տանջալից ցավեր նյութե ինձ,

Աշխարհի փրկչի քրտինքը առատ արյամբ շա-
ղախված՝ թող նեղի նրան.

Եթե շունչս նա պատանդ վերցնի, որպեսզի բա-
րի ճամփով չընթանամ՝

Ամենաստեղծի կապանքը թող ինձ ազատ
արձակի.

Եթե բռնադատի ինձ ուրանալու լույսի պարզե-
ները,

Համբերությունդ՝ աստվածամարտների հայհո-
յության դեմ՝

Թող որ նրան էլ նրանց հետ մեկտեղ պապան-
ձեցնի.

Եթե գաղտնապես հարված հասցնող զենքերի
նետեր արձակի վրաս,

Կապարձների հոր շքեղ աղեղի խոցող սլաքը
թող դիպչի նրան.

Եթե խավարած լույսի շղարշով անամոթաբար
աչքիս մեջ մտնի,

Ամենակատարյալի ծածկված գլխի կռփահա-
րումը թող տանջի նրան.

Եթե մոլեգնի ձեռքիս վստահությունը կաշկանդել,¹
Թող ստեղծողի ձեռքը տրված եղեգնը չարչարելով նրան լռեցնի².
Եթե անամոթ ծաղը ու ծիծաղով ինձ հետ կատակի,
Ամենազորի՝ ծաղրանք տանելը թող հեգնի նրան³.
Եթե պես-պես հուռութքների բժժանքով խորամանկի,
Հզոր Աստուծո երեսին տրված ապտակը նրան ամաչեցնի թող⁴.
Եթե գիշերվա մութը իջնելիս խաբեռության խավարով կռվի լկտիաբար,
Տե՛ր, լույսիդ պայծառ ճառագայթման հետ՝ թող խայտառակվի.
Եթե հավակնի, թե կկարենա փորձությունների արեգակնակեղ
Վատնիչ խորշակի կեսօրվա տապով ինձ բոլորովին արմատից խախտել,
Թող քո լուսեղեն նշանի զորությամբ արմատախիլ՝ չորանա.
Եթե փորձի նա փչումով տրված շնորհից ինձ զրկել.

¹ Սարկ. ԺԴ. 65

² Սատթ. ԻԵ. 29

³ Սարկ. ԺԵ. 31

⁴ Յովի. ԺԸ. 22

Այն թուքը, որ մեղավորիս փոխարեն քերոքեների Տերն ընդունեց,
թող ամոթահար անի նրան.
Եթե կծոտող ժանիքներ ցույց տա ինձ,
Երկնավորի բերանի լռությունը թող նրան պապանձեցնի¹.
Եթե ցանկական խայթվածքներ պատճառի հոգուս,
Ամենաստեղծին զարնված բևեռները նրան
կսկծեցնե՛ն թող.
Եթե անիրավ խորհուրդների ճանապարհով ինձ
մոլորեցնի,
Անհասանելու ոտքի մեխերը թող նրան կապեն.
Եթե հարբեցնի ինձ դժնաբարո հրապույրներով,
թող բարերարին տրված լեղիով խառնված քացախը նրան դառնացնի.
Եթե ծառի առաջին պտղի ճաշակման մեջ գտնի
ինձ,
Խաչի սոսկալի խորհուրդով բռնված՝ թող իսպա՛ռ դատապարտվի.
Եթե Տիրոջ հրամանին հնազանդվելու դեմ
ընդգույք սովորեցնի ինձ,
Անսահմանելու պարանոցի բերումն թող կործանի նրան.
Թե սատակամահ անելու համար հալածի նա
ինձ և վիրավորի,

¹ Մատթ. ԻՉ. 63

Աղամին ստեղծողի կողքը մխված ահագին տե-
գը թո՛ղ պատոի նրան.

Եթե դժոխային վշտերի երկունքներով պաշարի
նա ինձ,

Ամենակալի պատանքի կտավը թող կաշկանդի
նրան.

Թե խարդախությամբ փորձի ինձ մահվան հա-
տակը ձգել,

Մահվան վեմի մեջ կենդանի Աստուծո բնակվելը
թող նրան մեռցնի.

Եթե մարդկային իմ գայթակղության վրա նա
խնդա,

Թող կարկամ կամքով կորանա կրկին.

Զի Աստվածն անմահ հարության փառքով՝
Բոլոր մեռելներին նորոգեց իր հետ:

Թե հազարամյա փոքր կապանքի լուծումով
բերկրի,

Բայց թող որ իսկույն դողա վերստին

Անվերջ-անվախճան տանջարանի մեջ սաստիկ
կաշկանդող հուսկ շղթաների անզերծ
տագնապից¹

Եթե առաջին իսկ հարվածի հետ նա դժվարանա,

Մեծ դատաստանի մեծ օրը ահեղ, կորստյան
գո՛ւյժը թող տրվի նրան՝

Նրա և իր հրեշտակների համար պատրաստված
անշեջ գեհենով:

¹ Հայտն. Թ. 2-3

Ե

Իսկ ինձ, որ քեզ եմ ապավինել, Տե՛ր Հիսուս,
 Միակ թագավոր, ինքնակալ, զորեղ, Արարիչ
 երկնի և երկրի,
 Եվ նրանց մեջ եղած բոլոր զարդերի,
 Ինձ, որ աչքս քո գալստյանն եմ հառել
 Եվ փրկչիդ ողորմությանն եմ սպասում հույ-
 սով,
 Քո ոտքն եմ ընկնում և համբուրում եմ հետքե-
 րը գարշապարիդ,
 Պարտությունս եմ խոստովանում և մեղքերս
 հրապարակում,
 Կշտամբանքների քարերով ծեծկվում եմ և
 սրտիս հառաչանքներով այրվում,
 Խղճիս խայթերով խոցոտվում եմ և չնչիս բոցով
 տոչորվում,
 Այրվում եմ արցունքներիս աղի ցողով ու երի-
 կամներիս կակծանքով կիզվում,
 Հուսակտուր հոգով ցամաքում եմ և դառնա-
 շունչ հողմով մարում.
 Թախանձանքի խոսքերով երերվում եմ և կող-
 կողագին հեծությամբ դողում,
 Տաժանելի տանջանքներով տվայտում եմ և հո-
 գուս տագնապներով տատանվում,
 Մըրիկների կոծով ծփում եմ և ալիքների բա-
 խումից սասանվում,
 Ի լուր համբավի սարսում եմ և վախի հիշատա-
 կով՝ կորչում,

Ատյանի տեսարանով հալվում եմ և մեծիդ
սպառնալիքներով մեռնում,-
Հսի՛ր, բազմագո՛ւթ, քավիչ, մարդասեր և
երկայնամիտ,
Քաղցրություն անճառ, օր բարի և տիվ տեն-
չալի,
Զի կարող ես դու ամեն ինչի մեջ
ինչպես և վերջին շունչս փչելիս ինձ փրկագոր-
ծել:
Քեզ Հոր և Սուրբ Հոգուդ հետ
փա՛ռք հավիտյանս. ամեն:





Սրբի խորժերից խոսել Ասպո-ծո Հեղ

Ա

Եվ սակայն Քրիստոս Աստուծո իրավունքի
խոսքը արդարացի է հույժ իմ նկատմամբ,
Քան սատանայի, որ սկզբնահայրն է չարիքնե-
րի.

Քանզի հայտնվեց նա նրա համար, որպեսզի
քանդի գործերը նրա,
իսկ ինձ համար, որպեսզի իմ հնացած պատկե-
րը նորոգի

Աստուծո կերպարանքով,
Առնելով մեր իսկ նմանությունը կատարելապես
Եվ միացնելով իր բնությանը խառնվածքը մեր:
Բազում շնորհներից ոչինչ չտվեց նա սատանա-
յին,

Այնինչ ինձ վրա հեղեց առատորեն.

Նրա համար երբեք չչարչարվեց,
Իսկ ինձ համար զոհվում է նա հանապազ.

Սատանան անհաղորդ է կյանքին,
Իսկ ես փրկություն եմ վայելում միշտ.
Նա հալածված է խաչով,
Իսկ ես զորացած եմ այդ նույն նշանով.

Նա մերժված է լույսից,
իսկ ես միացած եմ նրա փառքի հետ.
Նրան երկրի վրա անդամ հանդիստ չխոստա-
ցավ,
իսկ ինձ երկինքը տվեց սեփականություն.
Կտրեց նրա հույսի առհավատչյան,
Եվ իմը հաստատեց առանց խզելու.
Նրան խոզերի երամակում արգելափակեց,
Եվ իմ մեջ ի՞նքը զորացավ.
Կարիճների հետ համեմատեց նրան,
Եվ ինձ ճառագայթ հայտարարեց.
Սողունների նմանեցրեց նրան,
Եվ ինձ իր անունով կնքեց:

Բ

Իսկ ես լքեցի երախտիքն այսքան բարիքներ
անող Աստուծո
Եվ չարին հետևեցի՝ նրա հետ մեկտեղ դժոխքի
հատակն հայելու համար:
Ուստի անարժան եմ բարիքների ապերախտո
անշնորհակալ և անընդունակ սիրո,
Մեղքի պարանով եմ ձգված՝ երիկամունքիցո
խոցված խորապես.
Ճյուղակոտոր ծառ եմ արմավենու,
Քացախացած գինի, հեղեղված ցորեն,
Զնջված մուրհակ, պատոված վճիռ, աղավաղ-
ված կնիք,

Զե այլափոխված, վերարկու կիզված, կորած ըմպանակ,
Ընկղմված նավ, մանրված մարգարիտ, սուզված
անգին քար,
Տունկ եմ գոսացած, նեցուկ խորտակված, փայտ
իսպառ փտած,
Խամրած մանրագոր, փլատակված տուն,
Խարխլված խորան,
Բույս արմատախիլ, ձեթ՝ թափված աղբոտ հրա-
պարակում,
Մոխրակույտերի վրա հոսած կաթ,
Քաջերի գնդում մահապարտ եմ մի,
Զի անձն իմ ողբալի, Բաքելոնի առակի համա-
ձայն՝ մարգարեներից ասված՝
Երուսաղեմի հետ և նրա նման հորդոր լսեց
միշտ և չխրատվեց¹:
Պատճառն այն է, որ այստեղ անգոսնված եմ,
այնտեղ խայտառակված,
Այստեղ պարսավված և այնտեղ կշտամբված,
Այստեղ ծաղրված և այնտեղ նախատված,
Այստեղ անարգված և այնտեղ հանդիմանված,
Այս կողմը ապշած և այն կողմը՝ լքված,
Այստեղ հեծություն, այնտեղ հառաչանք,
Այստեղ կասկածներ և այնտեղ վախճան,
Այստեղ վախ ու վիշտ և այնտեղ հատուցում,
Այստեղ արկածներ և այնտեղ դատաստան,

¹ Եսայի ԺԳ. 19

Ուր ո՛չ խոսելու իրավունք կա և ո՛չ պաղատե-
լու,
Ո՛չ օրերը թիվ ունեն և ո՛չ ժամանակը վախճան,
Ո՛չ հույսի կամուրջ և ո՛չ ողորմության դուռ,
Ո՛չ աջ պաշտպանող և ո՛չ օգնող ձեռք:
Սակայն ապավեն ես դու, դու ինքդ փրկություն,
Դո՛ւ այցելություն, դու քավություն, դու երա-
նություն,
Դո՛ւ ես բժշկում, դու ես ողորմում, միա՛յնդ
հզոր,
Կենդանի անճառ, Տեր Հիսուս Քրիստոս բարե-
րար Աստված,
Օրհնյա՛լ, օրհնյա՛լ և դարձյալ օրհնյալ,
Հավետ բարձրացած քո Սուրբ Հոգու հետ
Մեծիդ իսկակից Հոր փառքի համար՝
Հավիտյանս հավիտենից. ամեն:



Բան ԿԸ

Սրբի խորհերից խոսել Ասպո-ծո Հեղ

Ա

Եվ արդ, հիշելով ահարկությունը
վերոգրյալների,

Որոնք Աստուծո կողմից ինձ հասած սպառնա-
լիքներ են ահազնապես

Ինչպես դադարեմ նոր ողբերգության տողեր
հյուսելուց,

Եվ կամ ինչպես ցամաքեն հեղեղներն արցուն-
քիս:

Զի եթե քառավտակ գետերի ճյուղավորումնե-
րը բոլոր,

Որոնք հորդահոս ծավալվելով ոռոգում են ողջ
եղեմն ու երկիր.

Լիառատ, լրիկ բավականությամբ ջուր տալով
նրանց.

Իրենց ուղիսերով ու ակունքներով աչքերս լցվեն,
Զեն կարող երբեք զովացնել սաստիկ բոցն իմ

մեղքերի:

Կամ եթե նույնիսկ, ըստ մարգարեի ըղձակա-
նության¹,

¹ Երեմ. Թ. 1

Գլուխս լցվի ջրերի առատությամբ,
Եվ տեսողությանս ճրագարանները աղբյուրներ
կայլակեն՝
Զեն կարող չափել վշտերն անպատում կոտր-
ված հոգուս.
Եվ ոչ էլ սրտով կարեվեր խոցված, եղերապա-
տում բանահյուսությամբ
Լալկան կիների ջայլերը բոլոր՝ կարող են ցա-
վերս
Ու աղետներս երգի վերածել և կամ նվազել
ձայնով ողբական:

Բ

Ի՞մ աշխարհ գալու օրն է նզովված և ոչ թե Հո-
քի կամ Երեմիայի¹.
Զի տոնելի է նրանց ծննդյան օրը բարեբախտ և
ո՛չ մերժելի,
Եվ աշխարհն ամբողջ չարժե նրանցից թեկուզ
և մեկին:
Ապա ուրեմն ինձ է վերաբերում նրանց անիծած
օրը,
Երբ ես՝ անարժանս լույսի և ամեն տեսակ բարի-
քի՝ աշխարհ եմ եկել,
Դառնալով այստեղ կորստյան որդի և մահվան
դրկից,
Մշակ մեղքերի և արբանյակ անօրենությանց:

¹ Յոբ Գ. 3

Եղո՛ւկ ինձ, զի ես չմնացի հաստատ կյանքի
այն ուխտին,
Որ, ո՛վ բարերար, դո՛ւ սահմանեցիր:
Չհետեւեցի քո կենդանարար և անմահացնող
պատվիրաններին,
Զաշխատեցի ես արմտիք հնձել,
Որ խռովալից ձմռան օրերին ուտեստ ունենամ.
Ո՛չ ամուր պատեր կառուցեցի ես և ոչ էլ ձեւ-
ղուն կապեցի հարկիս,
Որպեսզի մրրկաշունչ քամիներից պաշտպան-
վեմ.
Երկար ճանապարհի համար նշխար մի պաշար
ես չամբարեցի,
Որ դարմանեի տագնապը սովի.
Աղերսագին աղոթքներ չպատրաստեցի քեզ հա-
մար,
Որոնցով քո առաջ ելնել համարձակվեի.
Չհավաքեցի փրկության պաշար մաքրակյաց
վարքով,
Որ նորոգությունս երաշխավորեր¹.
Աշխարհում հաշիվս ճիշտ չբռնեցի իմ մատնի-
չի հետ,
Որ դատավորի ձեռքից այժմվանից իսկ պրծնեի.
Օրհնալիր ձեռքով չներկայացա,
Որով սրբվելով մասնակից լինեի օրենսդրին.
Ո՛չ դեմքս պահպանեցի, ո՛չ էլ թիկունքս
պատսպարեցի,

¹ Մատթ. ԻԵ. 8

Ո՞չ աջ ձեռքս զենք առա և ո՛չ էլ ձախս՝ վահան,
 Որ պատերազմում մնայի անվտանգ,
 Զբահ չհագցը երիվարիս, ոչ էլ մարտիկներիս
 սպառազինեցի,
 Որ կարենայի ճակատ հարդարել.
 Վաղահաս պտուղը չքաղեցի, և ուշհասուկին
 չժամանեցի
 Եվ ահավասիկ շվարել եմ ես բարիքներից զուրկ:
 Չունեմ մաքրության ծաղիկ և ոչ էլ յուղ ողոր-
 մության,
 Եվ գիշեր է մութ, մուայլ ու անշող.
 Մահվան նիրհով եմ քնել ես,
 Եվ կոչողի փողի տագնապն ստիպում է ինձ¹.
 Զարդը հարսանյաց մերկացը կրկին և ձեթը
 վարքի լքեցի դարձյալ²
 Եվ հարսանիքի դուռն ահավասիկ փակվում է:

Գ

Եվ արդ, այսքա՞ն վշտերի մեջ ես ինչպե՞ս միսի-
 թարվեմ,
 Կամ խավարամած տարակույսներիս կենսավետ
 հույսին որքա՞ն լույս խառնեմ.
 Եվ կամ ո՞ւր արդյոք ոտքս հաստատեմ,
 Ո՞ր վստահության աչքերս հառեմ,
 Եվ կամ ո՞ւր տեսնեմ անդորրությունը իմ
 ծփանքների,

¹ Սատթ. ԻԵ. 5-6

² Սատթ. ԻԲ. 11, ԻԵ. 3, 10

Կամ ո՞ր ըղձալի հանգստությանը ձեռք կար-
 կառեմ:
 Եթե երկնքի բարձր ձեղունին պարզեմ ձեռքս
 ես,
 Այնտեղից տեղաց հուրը Սոդոմի, ինչպես աս-
 ված է:
 Իսկ եթե երկրի խորունկ հատակին՝
 Նա՛ բացեց երախն իր հափշտակիչ ու կուլ տվեց
 Դաթանին՝
 Արիրոնի բանակներով¹:
 Եթե հանդգնեմ փախչել բռնողից՝
 Գուցե բռնի ինձ վիշապն ահագին:
 Գազանների հետ եթե թափառեմ՝
 Նրանք առավե՛լ շտապեն պիտի Արարչի վրեժն
 ինձնից առնելու,
 Քան մի ժամանակ Եղիսեինը՝ Բեթելացի մատա-
 ղատի քրմորդիներից²:
 Եթե աչքս ամենատարած օդի պարզությանն
 հառեմ՝
 Եղիպտացոց համար շոշափելի խավար դարձավ
 այն³.
 Թե թռչուններին՝ բարձունքում ճախրող՝
 Մորթված զոհերի արյունաբոսոր դիերն ուտելու
 են կոչված նրանք:
 Տկարների դեմ եթե խիզախեմ՝

¹ ԹՎԾ. ԺԶ 32

² Ղ. Թագ. Բ. 22-23

³ Ելք Ժ. 21

Կսպառվեմ պիծակներից, և ինձ ի՞նչ պետք են
առյուծներ այլևս:

Պատառոտող արջերից եթե ճողոպրեմ՝
Արյունածարավ մժեղները ինձ պատահեն պի-
տի:

Եթե ինչ-որ տեղ ես անհոգ նստեմ՝
Ամենաչնչին մժղուկները վառվող կրակի մո-
ծիրների պես շուրջս կմաղվեն:

Միեղջուրանու եղջյուրից եթե փախչեմ ու
պրծնեմ՝

Մորմոքեցուցիչ մանր մուների ճիրանները ինձ
պիտի կեղեքեն:

Շտեմարանի մի խորշը եթե թաքնվեմ, կուչ գամ՝
Մեղքի նմանակ գարշ ու տաղտկալի գորտերը
պիտի ինձ զզվեցնեն

Անդաստաններում եթե ինչ-որ տեղ գտնեմ ինձ
համար ու տեղավորվեմ՝

Շնաճանճերի տարմերը պիտի իմ շուրջը պա-
տեն:

Մի կողմ եմ թողնում մորեխն ու մարախ - զոր-
քեր զորավոր,
Ժանգը անկենդան, ուտիճը անտես, թրթուր
թունավոր,


Ճուր թվացող կարկուտով ու ոչնչացնող եղյա-
մով հանդերձ,

Որոնք մեր աչքին թվում են թեև անզեն ու ան-
զոր, չնչին, չքոտի,

Բայց և Աստուծո մի ակնարկությամբ նրանք
խիստ գոռող և ուժգնաբար
Զարկեցին, դուրս հանեցին ու հալածեցին հաղ-
թականորեն
իր գավազանով հպարտ և ամբարտավան բռնա-
վոր փարավոնին:
Սրանք են ահա մահացու խոցող, գաղտնի վնա-
սող, լլկող ու թաքուն
Տեսակները այն հոգեոր անտես չարարանքնե-
րի,
Որոնք որպես պատիժ ուղարկվեցին եգիպտա-
ցոց՝ նրանց անօրեն գործերի համար:

Դ

Բայց դու, ամենազո՞ր, Արարիչ և Տեր բոլորի,
Հաղթող հանդիսացիր թշնամիներիս՝ հալածե-
լով նրանց.
Եվ ինձ ողորմի՞ր կրկին գթությամբ՝ փրկարար
ձեռքդ մոտեցնելով ինձ,
Որ վարանած եմ և տարակուսած, խոշտանգված
և մահապարտ.
Զի դու ես միայն ճանաչվում Աստված՝
Միշտ փառավորված Հոր և Սուրբ Հոգու հետ
Հավիտյանս հավիտենից. ամեն:



Ա

Եվ քանի որ ես, իմ գոյացության ամենահնար
արվեստավորիդ՝
Տիրոջդ ու Աստծուդ ձեռքով, քո սիրո մեջ, ինչ-
պես զտող քուրայում,
Եռում եմ շարունակ ու չեմ պարզվում երբեք,
Խառնվում եմ միշտ ձուլվելու համար ու չեմ
միանում,—
Ուստի երկնավո՞ր դու արծաթագործ, ճարտա-
րապե՞տ իմ,
Ի զո՞ւր ես հոգնում և ընդունայն ես ջանում
ինձ համար,
Հստ մարգարեի հայտնի առակի՝ չարությունս
չհալվեց,
Եվ ահա, ես ինքս կամովին չարաչար մոլեգնե-
լով,
Մի ողորմելի և դիվահար խելագարի պես
Խոսում եմ հանդգնաբար անկարդ՝ ավելի մեղ-
քերս աճեցնելու,

Քան թե հաշտության մի ճար գտնելու:
Եվ որպեսզի հանդերձյալում պատրաստվող
տանջանքները
Զերևան ինձ անընտել դեպքեր, անսովոր պա-
տահարներ և անօրինակ հանդիպումներ,—
Ընդմիշտ անմոռաց պահեց իմ մարմնում, այս-
տեղից իսկ,
Նախկին անեծքներից մնացած հազիվ նկատելի
հետքերը,
Որպեսզի փոքր ու չնչին տարրերից մեծին սո-
վորենք:

Բ

Որովայնի մեջ են առաջանում ինքնաբերաբար
ու բազմանում
Շարժուն ու պես-պես ճապուկ ճճիներ,
Աղիքների գաղտնակուր որդեր, այրող այտուց-
ներ,
Բշտիկներ բազում բոցի պես կիզող
Եվ անկերպարան, անձև անիծներ,
Եվ այլ քրտնածին ու զազրաթորմի՝
Կսկիծ, եռ ու քոր պատճառող անիծ, և՝ լու,
և՝ ոջիլ,
Ու վայրենական այլ ասպատակներ,
Որոնք գիշերամարտ դևերի և խավարասեր,
գինված բարբարոս գնդերի նման,
Եվ արաբական քանասար գայլերի գազանու-
թյամբ,

Կորակոր ընթացքով, արջնաթույր գույնով,
Կրկնոլոր ու կեռ կտուցով՝ կարիճի խայթոցի
նման,
Խոցելով, ինչպես դժնիկ փշով՝ ծծում են, քա-
շում արյունը մեր թաց
ԵՎ Հանգստարան անկողնում չարչարում են
մեղ:
ԵՎ երբ մեկը իր ձեռքը երկարի նրանց՝ արժանի
պատիժը տալու,
Զգում են իսկույն մարդուն պատճառած վնասը
իրենց
ԵՎ իսկույն ևեթ, լերկամարմին ու փոքրիկ հա-
սակով
Թռչում են, կարծես թե թևեր առած,
ԵՎ մարախի պես ոստոստելով՝ այս ու այն կողմ
ընկնում,
Աղվեսների նենդ ու խաբեպատիր բարքի հա-
մաձայն
Փախուստ են տալիս ամեն ուղղությամբ խորա-
մանկելով
Մտնում ծակուծուկ, մահվան երկյուղից փրկվե-
լու համար:
ԵՎ իրենց չնչին չքոտի տեղով ոչ միայն ուամիկ-
ների ու խառնիճաղանձների,
Այլև ահագին հզոր թագավորների կփախցնեն
նրանք,
Կհանեն վերը՝ դստիկոնը բարձր ապարանքների
ԵՎ կամ բացօթյա կբնակեցնեն:

Շատ քաջեր անգամ, որոնք իշխեցին ամբոխների վրա
եվ ժողովուրդների տիրեցին, և ազգերի քաշաքներ առան,
Խոստովանում են պարտությունն իրենց զորեղ
ձեռքերի,
Թե՛ «Որովհետև չկարողացանք մեզանից հզոր-
ների բռնությանը դիմադրել,
Այդ պատճառով էլ խույս տվինք ահա և հա-
սանք այստեղ»:

Գ

Բայց ինչո՞ւ եմ ես խոսում այդ չնչին, աննշա՞ն
այնպես ու ծիծաղելի գոյությանց մասին,
Նրա համար, որ նրանք զորավոր և անհերքելի
ջատագովներ են աստվածության
եվ հանդերձյալներն են հիշեցնում ինձ,
Որոնք անօրեն իմ մարմնի մեջ ծնվում են իբրև
դառն պտուղներ:
Դրանց նման են և դրսից եկող ախտերն սպա-
նիչ
եվ ուտիչների կույտերն անողոք, որոնցից անհ-
նար է ազատվել,
Որոնց մեր մարմնին պատճառած ահարկու ցա-
վերով
Կարողանում ենք գալիք տանջանքներն իմաս-
տասիրել:
Եվ կարելի չէ գտնել որևէ ապաստանարան,

Որ կարողանանք խույս տալ նրանցից և ազատ
մնալ.

Զի առանց կամքիդ և ակնարկությանդ
ի չիք են անցել մարդկային բոլոր ճար ու հնա-
րանք:

Իսկ դու, բարերա՛ր, կյանքի ամեն դեղ ու
դարմանն ունես բավականապես,
Եթե կամենաս փրկել, նորոգել, քավել, բժշկել և
կենագործել:

Եվ քեզ փա՛ռք համենայնի
Հավիտյանս հավիտենից. ամեն:





Բան Հ

Սրբի խորչերից խոսէ Ըստու-ծո Հեղ

Ա

Ստեղծվածների մեջ անդասելի այս մանրուքներից հետո երկրային՝

Խոսքիս ընթացքը բարձրացնեմ պիտի մինչև
մեծագույն արարածները,

Ահավորի արդար և անաչառ գործերի մասին
ճառաբանելով,

Բայց եթե նույնիսկ շատ մոտիկ լինեն նրանք
Աստուծո,

Ինչպես որ էին նահապետները մեր աստվածա-
մերձ

Եվ կամ մաքրագույն, ինչպես եղել են մարդա-
րեները,

Կամ անբծագույն, ինչպես առաքյալները,

Կամ ընտրելագույն, ինչպես մարտիրոսները, —

Զո՞ւր է նրանցից հոգու փրկություն հուսալ
ինձ համար,

Եթե դու, ո՞վ աննվազ բարի և անփոփոխ խնա-
մակալություն

Եվ անպակաս ողորմություն, ցույց չտաս ինձ
քո մարդասիրությունը:

Բ

Զի եթե նույնիսկ Աբրահամին իրե՛ն ձայն
արձակեմ,
ինչպես ընչեղի ողորմագին առակն է ինձ ու-
սուցանում,
Տապից պապակվելիս անգամ նա մի կաթիլ ջուր
չի կարող տալ ինձ,
Քանի որ նա էլ մարդ է՝ մարդկային անճարա-
կությամբ:
Եթե Մովսեսին դիմեմ՝ նա էլ է համակված դարձ-
յալ նույն տկարությամբ,
Զի անզոր եղավ փրկել այն մարդուն,
Որն իր վառելիք ցախի պաշարը շաբաթ օրն էր
հավաքում¹:
Եթե Ահարոնին՝ նա ևս ուրիշին աղաչելու կա-
րիք զգաց,
Իսկ եթե Դավթին իր բոլոր բարի գործերով
հանդերձ՝ նա էլ չմնաց անմեղադրելի.
Իսկ եթե Նոյին, Հոբին դիմեմ ես, կամ Դանիե-
լին՝
Եզեկիել մարդարեն նրանց անուններն հիշա-
տակելով,
Այսպես խոսեց նրանց մասին՝ Աստծուց ներշնչ-
ված:—

¹ ԹՎՈՂ. ԺԵ. 32-36

«Կենդանի եմ ես, ասում է Տերը, թե նրանք չպիտի կարողանան
 Ազատել իրենց ուստրերին ու դուստրերին վերահաս բարկությունից,
 Այլ միայն իրենք պիտի ազատվեն»:
 Իսկ եթե դիմեմ հավատքի վեմին՝ Պետրոսին,
 Քո խնամքներից դույզն-ինչ խորթացած՝ նա՛ ևս ենթարկվեց իմ մոլորանքին¹,
 Թողնում եմ այստեղ հիշել մեկ առ մեկ այն շատ-շատերին,
 Որոնք անձնատուր եղան զանազան տեսակ կրքերի,
 Թեև հավիտյան երջանիկ լինեն:
 Դրանցից մեկն է Հովաս անունով ոմն մարգարե, Որի աստվածառաք սպասավորության մեջ մարդկորեն գայթակղությունը
 Անբացատրելի է մնում շատերին, ինչպես էլ որ մեկնաբանվի²:

Գ

Եվ քանզի սահմանափակ է մարդկանց փրկության կարողությունը,
 Նրանք իրենք էլ ողորմություն գտան բարերարիդ կողմից և ամենակալիդ չնորհիվ զորացան,

¹ Ակնարկություն հավատքի այն թուլության, որ առաջալն ունեցավ Յիսուսի՝ ծովի վրա քայլելու ժամանակ և մատնության գիշերն ուրանալիս:

² Գ. Թագ. ԺԳ. 1-ում ոմն մարգարեի անձի շուրջ մեկնաբանությունների մասին է:

Կոչվեցին պաշտպանողիցդ և հնարավորիցդ
քավկեցին,
Ներվեցին ազատարարիցդ և անախտականիցդ
բժշկվեցին,
Կենսագործվեցին անապականիցդ և նորոգո-
ղիցդ լուսավորվեցին:
Հետևապես, գիտենալով չափն ու սահմանը հո-
ղածին ընությանս,
Որպես հարազատ նմանակիցներ՝
ի վստահություն հուսահատներին և ի խրա-
խույս
Ահա և քեզ եմ դիմում ես միայն,
Որդի՛դ կենդանի Աստուծո՞ւ Քրիստոս, օրհնյալ
ամեն ինչի մեջ:
Եվս առավել կճշմարտվեն վերոգրյալ օրինակ-
ները,
Եթե այստեղ, այս աղոթքի մեջ հիշենք նմանօ-
րինակ
Եվ այս խոսքն արդար, որ երջանիկ իմաստուն-
ներից մեկն է ասել,
Թե՝ «Բարի է Տիրոջ ձեռքն ընկնելը, և ոչ թե
մարդկանց.
Զի, ինչպես որ մեծ է նա, այդպես էլ մեծ է նրա
ողորմությունը»:
Ու թեև այս խոսքով Դավթին էր ակնարկում,
Բայց երբ որ երեք աստվածային հարվածներ
էին առաջադրվում նրան,

Նա ինքը հոժար, կամավոր կերպով սատակիչ
 մահվան դատավճիռն ընտրեց¹,
 Ընդունելով այն իբրև կենդանություն, որ
 Քրիստոսի հավատքով կաճի և կզորանա,
 Քան թե մյուս երկու այն հարվածները, որոնք
 տանջում են ու չեն ողորմում:
 Եվ սակայն անհարմար չի լինի, որ ես էլ այդ
 խոսքից օրինակ վերցնեմ իմ կորած հոգու
 համար,
 Որ տոչորվում է ապրելու հնար գտնելու տեն-
 չով:
 Այսպիսով, սակայն, իմ ողբերգական այս մատ-
 յանի մեջ,—
 Առանց որի չի կարելի մոտենալ Տիրոջը,—
 Ես ոչ թե նվաստացնում եմ փրկվածներին, այլ
 փրկչի անունն եմ պսակում
 Եվ նրա շնորհն եմ բարեհոչակում բոլորին.
 Ու խոստովանում եմ հաստատ խոսքով, թե
 նույնիսկ նրանք,
 Որոնք շատ բարձր են թոչում իրենց սուրբ
 վարքի թևերով,
 Կարոտ են դարձյալ քո ողորմության դեղ ու
 դարմանին:

Դ

Ուստի և ահա, դու կյանք, փրկություն ու
 բժշկություն,

¹ Բ. Թագ. ԻՌ. 14

Դու անմահություն, լուսավորություն ու երա-
 նություն,
 Անդորրացրո՛ւ ինձ իմ մեղքերի չարչարանքնե-
 րից,
 Որպեսզի ինքս ինձ ընդմիշտ մեղադրող հեծու-
 թյունների
 Զանձրացուցիչ թախանձանքներից հանգստա-
 նաս և դո՛ւ,
 Որ ոչ այլ ինչով, այլ միայն մարդկանց փրկու-
 թյամբ ես պարարվում,
 Օրհնյա՛լ հավիտյանս. ամեն:





Սրբի խորչերից խոսդ Ասպառ-ծո Հեղ

Ա

Երջանիկ և փառավորյալ են սրբերի դասերը,
Որոնցից ոմանք դուզնինչ գայթեցին թեև, բայց
ավելի հաճախ հաստատվեցին.
Սասանեցին փոքրինչ, բայց վառված՝ հոգու շո-
ղերով պայծառ
Մաքրությամբ դարձյալ լուսավորվեցին:
Մեկը ցույց է տալիս նրանց խառնվածքի տկա-
րությունն հասարակաստեղծ,
Իսկ մյուսը՝ բնության օրենքին հաղթող վարքն
առաքինի, հրեշտակային:
Ուստի և նրանք օրհնված են Քրիստոսի Հոր
ամենիշխան և աստվածային բերանով,
Եվ ընտրյալներ են հոչակված, խնկված ու բա-
րեբանված,
Պաշտված են իբրև անդամներ Քրիստոսի,
Եվ իբրև Սուրբ Հոգու օթևաններ են պատ-
րաստված.
Չունեն իրենց մեջ խավարի նշմարներ կամ հետ-
քեր անդամ,

Այլ անկեղծություն են ամբողջովին և լուսավոր
արդարություն՝
Եվ որքան հնարավոր է Աստուծո մարդուն
Աստծուն նմանեցնել,
Պարզերես են նրանք և վարքով, բարձր ու
անխոնարհելի,
Նրանց կյանքն զգաստ է և անըստգյուտ,
Աստվածպաշտությունն ամուր, անհեղի,
Ընթացքն արիական և անկասելի,
Ճշմարտությունը միատարր և անցնդելի,
Դիմագրավությունը զորեղ և անհաղթելի,
Տեսողությունը պայծառ և անապչելի
Իմաստասիրությունը երկնային և անկոխելի,
Պատկերը մաքուր և անաղարտելի:
Նրանց անուններն հիշատակել և աղոթքը հայ-
ցել՝
Աստված ինքն էր, որ մեզ սովորեցրեց:

Բ

Իսկ ես անպետք եմ ամեն ինչի մեջ,
Եվ պարսավելի, որքան հնար է ասել խոսքերով,
Նիրհում եմ՝ մինչդեռ արթուն եմ,
Թմրում եմ՝ մինչդեռ զգաստ եմ երեսում,
Բարեպաշտությանս մեջ գայթակղվում եմ,
Եվ վրիպում՝ մինչդեռ աղոթում եմ,
Ընթանալիս՝ հանկարծ կանգ եմ առնում,
Հազիվ արդարացած՝ մեղանչում եմ,
Ու դեռ նոր խաղաղված՝ վրդովում դարձյալ,

Մինչդեռ արշավում եմ առաջ՝ դեպի ետ եմ հա-
կամիտում,
Ու քայլելիս՝ կրունկիս վրա դառնում եմ ետ,
Լույսի հետ՝ մի մաս խավար եմ կցում,
Օշինդը եմ խառնում քաղցր համի հետ,
Բարիքների կուղի հետ և՝ չարիքներ եմ հյու-
սում,
Հազիվ կանգնած՝ կրկին գլորվում եմ,
Ծաղկում եմ ու չեմ տալիս պտուղ,
Ասում եմ ու չեմ գործադրում,
Խոստանում եմ ու չեմ կատարում,
Ուխտում եմ ու չեմ վճարում,
Կարկառում եմ ձեռքս ու ետ քաշում դարձյալ,
Ցույց եմ տալիս ու չեմ ընծայում,
Մոտեցնում եմ ու չեմ մատուցում:
Վերքս հազիվ դեռ դարմանած՝ վիրավորվում
եմ նորից,
Հաշտեցնում եմ ու վերստին խռովում,
Դատի եմ դիմում հանիրավի՝ և իրավամբ
դատապարտվում,
Գրվում եմ և խսկույն ջնջվում,
Նավում եմ ու շեղվում գծից,
Սկսում եմ ու չեմ հասնում հանգստի:
Հաստատվում եմ և սասանվում դարձյալ,
Լցվում եմ ու կրկին թափվում,
Շարակարգվում այստեղ՝ և այնտեղ վար հոսում,
Բարդվում եմ ու տեղնուտեղ վառվում:
Հիմնարկում եմ ու չեմ հանում գլուխ,

Վաստակում եմ սակավ և վատնում եմ բյուր,
Դյուզն-ինչ գանձում եմ ու սպառում անհաշիվ,
Խրատում եմ ուրիշներին, և ինքս անփորձ եմ,
Սովորում եմ միշտ, և ճշմարիտ գիտության չեմ
հասնում երբեք:

Մարած չարիքները արծարծում եմ նույնչափ,
Քաջալերվում եմ փոքր-ինչ և առավելապես
հուսալքվում,

Լարվում եմ և խսկույն թուլանում,
Կարկատում եմ այս՝ և այն պատառոտում,
Եղինջը հանում եմ և տնկում եմ տատասկ:
Հաղիվ վեր բարձրացած՝ ցած եմ իջնում դարձ-
յալ,

Մտնում եմ բույնն իբրև աղավնի ու դուրս գա-
լիս այնտեղից իբրև ագռափ,
Գալիս եմ սակավ-ինչ սպիտակ և գնում եմ բո-
լորովին սև,

Ասում եմ, որ քոնն եմ ես, և սպանողին եմ նվի-
րում ինձ,

Հաղիվ եմ ելնում քո դեմ-հանդիման և ահա՝
թիկունք եմ դարձնում քեզ:

Մաքրվում եմ, և սակայն դարձյալ մրոտվում,

Լվացվում եմ և աղտոտվում խսկույն,
Դավթի կերպարանքն առած, և Սավուղի գոր-
ծերն եմ կատարում:

Շուրթերովս շիտակ եմ խոսում և սրտովս ստում,
Աջ ձեռքովս տնտեսում եմ և ձախովս՝ ցրում:
Ցորեն ցանելու հետ սերմանում եմ՝ որոմ,

Իմաստության բարձունքից ի վայր իջնելով,
դառնում եմ ես այն, ինչ էի առաջ,
Հրեշտակ եմ դառնում երեսանց և խորհուրդնե-
րի մեջ դիվանում,
Ոտքերովս մնում եմ հաստատ և մտքովս տա-
տանվում եմ,
Սուտ ձեւեր եմ առնում և իրոք խոտորում եմ,
Արդարություն եմ կեղծում և ամբարշտանում
եմ գործերով:
Հեզերի դասն եմ դասվում և դեւրի հետ կաքա-
վում եմ,
Գովաբանվում եմ մարդկանցից, և տեսանողիցդ
պարսավվում:
Հողածիններից երանվում եմ, և լույսի որդինե-
րից ավաղվում,
Հաճոյանում եմ հետին ռամկին և աչքից ելնում
մեծ թագավորիդ:
Դատավորի ատյանը թողած՝ խառնակրոններին
եմ աղերսում:
Վեհերից վոնդվելով՝ խաժամուժների մեջ եմ
սպրդում:
Արտաքուստ մարմնովս պճնվում եմ, և հոգովս՝
ճայի գույնով եմ ճանաչվում.
Մոտենում եմ դաշն հաստատելու, և ուխտակո-
րույս դուրս եմ վտարվում:
Այսօր մաքուր հոգեկիր՝ և վաղը մոլի խելագար.
Տերունի պատվերը թողած՝ հետեւում եմ օձի թե-
լադրանքին.

Արիանում եմ հզորապես, և ընկրկում եմ վատթարաբար.

Վերցնում եմ օրվա ծանրությունը, և վարձքի ժամին մնում անմասն¹.

Խոսում եմ հեռվից ճռոռմ, և պատասխանելու պահին պապանձվում եմ.

Արևածագին հարուստ եմ երեսում, և արևամուտին դատարկ դեգերում եմ:

Ծերերի աթոռին բազմած՝ խելահեղնեի հետ եմ ընկերակցում.

Ննջում եմ կասկածներով՝ և արհավրալից զարթնում զարհուրած:

Անդաստանները կամքիս հերկում եմ վատթարապես

Զարիքների մեջ փութաջան եմ ես՝ մշտապես անառակ որդիս,

Տարագրյալս անդարձ և մոլորյալս անզղում,

Տրտումս անմխիթար, ինքնազրավ գերիս

Մահվան և ապականության ծառաս,

Անողոքելի տանջվածս, մատնվածս անփրկելի,

Անպատվաստելի կոտրվածս անարծարծելի հանգածս,

Անկազդուրելի խորտակվածս, անվերականգնելի կործանվածս:

Եվ եթե պետք է ավելի սաստիկ նախատել այստեղ հոգիս անօրեն,

¹ Սատթ. Ի. 12

Գրում եմ ահա՛, գրում անխնա գեհենի խոխվ-
 ներ պատրաստելով ինձնից,
 ես երկնայինի՝ նոր Աղամի նախանձու ծնունդը
 հանդիսացա,
 ինչպես Կայենը առաջնին՝ հնին և հողեղենին:
 Ուստի նաև ե՛ս այստեղ հոգուս մեջ կրում եմ
 նշանը ամբաստանության,
 Ոչ թե շնչառությունս, այլ կշտամբանքը իմ այս
 խոսքերի:

Գ

Եվ արդ, ո՞ւր փնտրեմ փրկությունս ես,
 Երբ որ հավատքի սկզբնահայրը հուսահատու-
 թյան վայրում
 Իմ անգթության չարիքներն է հիշեցնում ինձ¹.
 Մարգարեների մեծը² խոսքի քարերով է ինձ
 կոչկոճում,
 Արին բարեփառ՝ նիզակի սայրով է սատակեց-
 նում ինձ³.
 Ճշմարտի պատկերն է⁴ բնաջնջում ինձ Աքարի
 հետ,

¹ Ղուկ. ԺԶ. 25

² Մովսեսը

³ Եղիազարի Փենեհես որդին, որ սպանեց պոռնիկներին (Թվոց. իւ)

⁴ Յեսուն, որը ոչ միայն անունով, այլև հոգով նմանվում է Յիսուսին: Աքարը Քարմի որդին էր, որին իր ընտանիքով բնաշնչեց Յեսուն, Երիքովի ավարից գողանալու համար (Յեսու Է.)

Վեհն աստվածարյալ հարագողների վրեժին է
 մատնում ինձ¹,
 Մարգարեածին տեսանողը² ամաղեկացու հետ
 Տիրոջ առջեւ է սպանում ինձ,
 Աստուծո նախանձավորը՝ երկնատեղաց բոցով
 է սպառում³.
 Հնի լրումն ու նորի սկիզբը⁴ դատաստանի հե-
 ծանոցով է երանում,
 Առաքյալների պետը Սափիրայի հետ է կենազ-
 րավում⁵,
 Զարմանալին քննող՝ հոգով՝ կյանքի քարոզին
 մահվան բուրմունք է խառնում ինձ հա-
 մար⁶:
 Արդ, անաչառ են իմ նկատմամբ նաև կաճառ-
 ներն երջանիկների,
 Որոնք վերնայնի ուժգին հրամանի սպառազեն-
 ներն են արիակամ.
 Հրեշտակների հետ նաև մարդիկ,
 Տիեզերքի հետ երկրի՝ և՝ տարերքը,
 Անզգաների հետ և՝ շարժունները,

¹ Դավիթը (Բ. Թագ. ԻԱ. 8-9)

² Սամուելը, որ տապանակի առջև սպանեց ամաղեկացոց Ազագ թագավորին (Ա. Թագ. ԺԵ. 35)

³ Եղիա մարգարեն (Դ. Թագ. Ա. 10)

⁴ Յովիաննես Մկրտիչը

⁵ Պետրոսը (Գործք առ. Ե. 5, 10)

⁶ Ակնարկություն՝ «Դու ի մահուանե ի կեանս» խոսքի (Բ. Կորնք. Բ. 16): Իսկ զարմանալին՝ Պողոսը, որովհետև անունն այդ է նշանակում:


Որոնցով ես միշտ դատապարտվում եմ Ակիչ
տանջանքների,
իբրև օրինակ և հիշեցուցիչ գալիք սոսկալի
չարչարանքների.
Եվ իմ այս կյանքի անդորրը խաղաղ
ինչպես հողմակոծ փոթորկումներից հավետ
մրրկված՝ միշտ կալեկոծվի:
Եվ եթե մեկն իմաստությամբ քննել ուզենա
Եվ հետազոտել մանր ու մեծամեծ և բազմատե-
սակ, զանազանակերպ
Անթիվ-անհամար լուղակներն ամեն, որոնք
խլրտում են երամներով,
Սուրում-սլանում են եռուղեռով մարմնիս ծովի
մեջ,—
Վկայի պիտի և հաստատի, թե
Ճշմարիտ է այն ամենը, ինչ որ այստեղ գրեցի:

Դ

Բայց դու, ո՞վ հզոր և օրհնաբանված անմահ
թագավոր,
Բարի, երկնավոր, մարդասեր Քրիստոս,
Կենդանի Աստուծո միածին Որդի,
Բարձրյալ անքնին, քավիչ ահավոր և անճա-
ռելի,
Սաստի՛ր ձեռքովդ խոռվահույզ հոգուս ծփանք-
ները.
Դադարեցրու վրդովված սրտիս մոլեգին հուզ-
ման ծավալումները,

Զսպիր ամրապինդ սանձահարումով վայրագությունը իմ ցնդած մտքի:
Թող խաղաղվի մեծիդ հրամանով սասանող բուքը ամենավարան,
Զնջիր, խափանիր գաղտնի, ուրվային և ամութալի և բազմագլխյան
Անդամներս ողջ այդ երկրակենցաղ հեներին բոլոր,
Համարիր աղոթք մշտամատույց՝ ողորմադերս տողերն այս նորընծա,
Որ ողբերգական թախծագին ձայնով կան այս մատյանում:
Հանիր ինձ մահվան խոր անդունդներից,
Որպեսզի փրկված՝ մարդարեի¹ հետ վերապրեմ և ես գեղեցիկ կյանքով:
Ընդունիր խոսքերն իմ այս անձնադատ խոստովանության, որպես անուշ հոտ,
Շնորհիր սփոփանք դառն վշտերին ուժգին հեծությամբ հուսահատվածիս:
Եվ քեզ՝ քո Հոր և քո Սուրբ Հոգով՝
Փա՛ռք, պատիվ և իշխանություն
Հավիտյանս. ամեն:

¹ Յովնանի



Արդի խորժերեց խոսք Ըստու-ծո Հեղ

Ա

Զե՛զ եմ ասում արդ, ո՛վ մենակյացների խմբեր
Եվ աշակերտներ մենաստանների,
Դուք, որ անբավ բարի պարգևների հուսալից
ակնկալությամբ
Զեր ձեռքերի մերկ մատներով զինվորագրված
Եք Տիրոջը՝
Զե՛զ ընծայեցի խոսքի խորտիկներով պատ-
րաստված սեղանն այս ահա՛,
Ընդունեցե՛ք ավանդն այս խոստովանության՝ ի
նորոգություն և ի փրկություն հոգիների:
Ճանաչեցե՛ք սրանով մարմնի պարտությունը,
Հիշեցե՛ք առաքելականի հետ միասին՝ մարգա-
րեական խոսքերը մեզ ի խրատ,
Թե՛ «Ոչ մի մարմին թող չպարծենա Աստուծո-
առջե»,
Ինչպես և՝ «Զկա ոչ իսկ մի արդար»:
Մի՛ մոռացեք նաւ այս խոսքը տերունական,
Թե՛ «Պատվիրանը կատարելիս էլ համարեցեք
ձեզ անպիտան ծառա՛»,
Եվ թող չլինի, որ խաբողը ձեզ կարենա որսալ:

¹ Ղուկ. ԺԵ. 10

Հիշեցեք դուք այն գրվածքը նաև,
թե՝ «Հնտիրներն են նրա կերակուրները»:
Զի մինչև իսկ ես, որ այս մասնավոր, նվազ
պտուղը ձեզ մատուցեցի,
Վկայում եմ, թե ես ինքս էլ ունեմ բյուր բամ-
բասանքի,
Ինքնադատության արժանի մեղքեր անբժշկելի,
Սկզբնահորից սկսած մինչև սերունդները հուսկ.
Հոժարակամ մի հանձնառությամբ՝
Բոլորիդ գործած հանցանքները ես վրաս առնե-
լով:

Բ

Լսեցի անպարտ մեկի բերանից ու չհավանեցի
Խոսքն այս անհարմար՝ ուղղված նրան,
Որի առաջ ոչ մի երկրածին չի կարող արդարա-
նալ,—
Թե՝ «Զշնացա երբեք ու չպոռնկացա,
Ոչ էլ աշխարհիկ մահաբույր քաղցրություններ
ճաշակեցի»:
Աս էլ է կոչվում անօրենություն,—
Թող ների Աստված այդ խոսքը նրան,—
Զի եթե նույնիսկ ճիշտ լինի ասված՝ սայթաքում
է դարձյալ:
Այդպես նաև Զաքարիայի՝ ի դեմս իսրայելի ժո-
ղովրդի ասված
Խոսքն այս անվայել, որ փարիսեցու խոսքին է
նման¹,

¹ Դուկ. ԺԸ. 11-12

ԹԵ՝ «Օրհնյալ լինի Տերը, զի հարստացանք»¹:
 Բայց քանի որ ես ամենագետ Աստուծո դատաս-
 տանին եմ հանձնել ինձ,
 Որը սրտի աներեռույթ մեղքերը կշռելով՝
 Ուզում է դատել ինձ նրանց համար ամենաի-
 րավ հատուցմամբ,—
 Զպիտի ձևանամ տեսանողի առաջ,
 Զպիտի կեղծեմ քննողի մոտ,
 Զպիտի ստեմ ամենայն ինչ նկատողին,
 Զպիտի մտնեմ խարեբայությամբ Մեծի աչքը ես,
 Զպիտի ցոփություններս քողարկեմ առերեռույթ
 բարությամբ,
 Զպիտի երբեք ապիկարիս ներկայեմ որպես ըն-
 տանի պատկեր,
 Զպիտի խենեշանամ օտարոտի զարդարանքով,
 Զպիտի պճնվեմ ուրիշների պայծառությամբ,
 Ոչ էլ տգեղությունս պիտի պարտակեմ պաճու-
 ճանքներով:
 Զկա ոչ ոք մեղավոր ինձ պես, ոչ ոք՝ անօրեն,
 Ոչ ոք ամբարիշտ, ոչ ոք անիրավ, ոչ ոք չարա-
 գործ,
 Ոչ ոք խոտորված, ոչ ոք սխալված, ոչ ոք մո-
 լեգնած,
 Ոչ ոք խարդախած, ոչ ոք շաղախված, ոչ ոք
 ամոթահար,
 Ոչ ոք դատապարտված,—
 Ես ինքս եմ միայն և ուրիշ ոչ ոք.

¹ Զաք. ԺԱ. 5

Ես եմ այդ բոլորը, և բոլորի հանցանքներն իմ մեջ են:

Ո՞չ հեթանոսները, զի չգիտեին,

Ո՞չ հրեաները, քանզի կուրացան,

Ո՞չ տղետներն ու գոեհիկները, քանզի զուրկ էին իմաստությունից:

Վարժապետ կոչվեցի ես, որ ամբաստանություն է իմ դեմ.

Դաքքի, ուաքքի անվանվեցի ես, և Աստուծո վայել գովեստը եղծեցի.

Բարի ասվեցի՝ եղկություն ժառանգելուս համար.

Սուրբ վկայվեցի մարդկանցից, որ անմաքուր եմ Աստուծո առջեւ.

Արդար ճանաչվեցի՝ ամբարիշտս ամեն ինչով.

Հրճվեցի մարդկանց գովեստով, որ Քրիստոսի ատյանում ծաղրելի լինեմ.

Ավազանից Արթուր¹ կոչվեցի, և ննջեցի մահվան քնով,

Հսկող հորջորջվեցի փրկության² օրը, բայց զգաստության դեմ աչք փակեցի:

Ահա՝ դատաստան, ահա՝ հանդիմանություն,

Ահա՝ նոր կշտամբանք և հին դատապարտություն,

Ահա՝ ամոթանք դեմքի և տագնապ հոգու,

Ահա՝ քննություն մանր մեղքերի, որոնք մեծամեծների կշիռ ունեն:

¹ Ակնարկություն՝ իր Գրիգոր անվան, որ արթուր կամ, ինչպես հաջորդ տողում՝ հսկող է նշանակում:

² Զեռնադրություն

Գ

Բայց դու, միայն Տեր Աստված մարդասեր, անու-
խակալ և երկայնամիտ,
Ինքնադատական կակծեցուցիչ նախատինքներն
այս, վերջին օրն ահեղ՝
Մեղապարտիս դատապարտության փոխարենը
համարիր,
Քանի որ դրանք ինքս իմ բերանով ինձ վերագ-
րեցի,
Թող որ չլսեմ այդ բոլորն այլևս քեզանից, գթա՛ծ,
Արդ, վերցրու իմ վրայից դատապարտությանս
պահակին,
Զի ես քեզ հետ եմ կապված հոգուս տենչանք-
ներով:
Հանի՛ր խայտառակությանս նախատինքներն
ամոթալի.
Քո կարող աջով ծածկի՛ր մերկ մարմնիս տգե-
ղությունը.
Հանգիստ պարզեիր մեղքերի բեռով սաստիկ
հոգնածիս,
Բարի մի ճամփա սահմանիր դու ինձ՝ դեպի քեզ
գալու.
Հիշիր անմոռաց՝ ինձ ողորմելու, տալով հետ
մահու կյանք ամեն կերպով:
Օրհնյալ ես դու երկնքում և գովյալ՝ երկրի վրա.
Եվ բարեբանված միշտ ամեն ինչում,
Հավիտյանս. ամեն:



Արդի խորհերեց խոսք Շահումյան Հետո

Ա

Թագավոր, բարձրյալ, հզոր, ահավոր,
Օրհնյա՛լդ միայն, Տեր Հիսուս Քրիստոս,
Լոկ դո՛ւ կարող ես հուսահատ կյանքի անհու-
սության մեջ
Սատակիչ անեծքներն ապրեցնող օրհնությա՛ն
փոխել,
Եվ վհատեցուցիչ պարսավանքները զվարթա-
րար գովքի.
Ամոթի փոխարեն համարձակություն շնորհել,
Պատկառանքի փոխարեն՝ պատիվ,
Տարագրության փոխարեն՝ բարության հույս.
Բաժանման փոխարեն՝ միության ակնկալու-
թյուն,
Սպառնական խոսքի փոխարեն՝ ողոքական սփո-
փանք
Եվ մեկ անգամ դատապարտության փոխարեն՝
կրկնակի ազատություն¹:

Բ

Ողորմիր, Տե՛ր, մահվան արժանի մեղապարտիս,

¹ Այսինքն՝ ազատություն մեղքից ու մահից:

Ողորմի՛ր այնօր, երբ կենդանության շունչս
կարձակեմ.
Երբ նայվածքս խեղճ դեպի վեր կուղղեմ ես կող-
կողագին,
Հույժ տանգնապահար հոգուս տեսությամբ աշ-
քի առջև բերելով
Այն վտանգավոր ճամփան, որտեղ անխուսափե-
լի կերպով անպայման պիտի ընթանամ.
Եվ բնակելի իմ տան երդիկից ելքիս շավիղը
դիտելով թշվառ կիսամեռությամբ,
Այլայլված դեմքով, մատների տարտամ տատա-
նումներով,
Կարկամ հառաչմամբ, նվազ հեծությամբ, ձայ-
նով նվաղած,
Եվ բազմապիսի տարակույսներով լի տիսուր հո-
գով՝
Սրտիս խորքերից իմ գործած բազում մեղքերի
համար ողբով հառաչեմ:
Բայց դու, բարեգո՛ւթ, կարող ես նույնպես և
այդ ժամանակ
Զորավորապես հրաշագործել, ասելով ինձ.—
«Թող փրկվի հոգին քո խորտակումից և առող-
ջանա»,
Եվ կամ՝ «Թող ներվեն քո մեղքերը քեզ»,
«Գնա՛ խաղաղությամբ՝ մեղքերից մաքրված»:
Այն պաղատանքները, որ չպիտի կարողանամ
հասցնել քեզ այդ ժամին,
Հնդունիր այսօ՛ր մարդասիրաբար,

Ո՞վ երկայնամիտ և բազմաշնորհ ամենակեցույց:
Եվ մինչդեռ այժմ պերճախոս եմ ես խրոխտա-
ծայն, սիդացող և բարձրապարանոց
Այնժամ դիակի պես պիտի պառկեմ ես անկեն-
դան, անխոս,

Կաշկանդված ձեռքով, թույլ անդամներով,
Խուփ շրթունքներով, փակված աչքերով,
Իբրև տախտակ անշարժ, կոճղ կիսավառ,
Արձան անզգա, պատկեր անբարբառ, անշունչ
գոյություն,

Ողորմելի տեսիլ, ողբալի կերպարանք, տիսրալի
տիպ,

Եղկելի դեմք, արտասվելի նմանություն, համ-
րացած լեզու,

Չորացած խոտ, թոթափիված ծաղիկ, ծյուրած
գեղեցկություն,

Շիջած լապտեր, դատարկ կոկորդ, խոպանացած
սիրտ,

Թալկացած մարմին, քայքայված որովայն,
Քանդված տաղավար, կոտրված ոստեր, անջատ-
ված հողեր,

Կտրված ծառ, սղոցված արմատ,

Լքված տուն, հնձված արտ, արմատախիլ բույս,
Օտարացած բարեկամ, մոռացված պահեստ,
թաղված գարշություն,

Մերժված ատելի, վերացված խոչընդոտ,
անարդված կմալսք,

Եվ իբր անպիտան ոտնակոխ եղած՝ կարոտ ու-
րիշների աղոթքներին,

Որոնք թշվառիս հավատքի ձայնով հառաչալից
աղերս նվագեն պիտի
Արցունքի ցողով տարածելով այն քո բար-
ձունքն ի վեր՝
Բարերարիդ գթությա՞նը:
Նրանք լալագին զղջումով պիտի երգեն դարձը
գեպի քեզ, որ օրհնում եմ ես,
Նշանը փրկարար խաչիդ, որին երկրպագում եմ,
Ճշմարտությունը հարության, որին հավատում
եմ,
Փառքիդ հայտնությունը, որը փառավորում եմ,
Դատաստանիդ ահավորությունը, որ խոստովա-
նում եմ,
Խոսքերիդ հանդիմանությունը, որից զարհու-
րում եմ,
Սուրբ Հոգուդ ուղեկցությունն ինձ, որ պաշ-
տում եմ,
Մկրտությունը քո օծման, որ և համբուրում եմ,
Քեզ հետ թագավորելը, Տե՛ր Հիսուս, որի հա-
մար պաղատում եմ:
Եվ այսպես ահա՛, թեև թուլացավ, հեռացավ,
վերացավ,
Մասնատվեց, փախավ, սլացավ
Եվ տեղի տվեց կենդանությունն իմ կենցաղի,
Բայց քո պարզեած հույսը հաստատուն՝ պահ-
փած է իմ մեջ,
Որպես մնայուն և անջնջելի հիշատակարան:

Գ

Տե՛ս ողորմությամբ տարակուսանքները վտանգ-
յալիս,
Միա՛յն բարեգութ ու փառաբանված Որդիդ
Աստուծո,
Որպեսզի քավես, բժշկես դու ինձ և կենագործես,
Պաշտպանես, նորոգես, նկարես, կանգնես, հաս-
տատես
Եվ վերստին ստեղծագործես երջանիկ անարա-
տությամբ։
Քոնն են կարողությունը, փրկությունն ու ողոր-
մությունը.
Զունես դու անկարողություն, այլ՝ լիուլի գորու-
թյուն.
Բարձրություն, իշխանություն, անվախճան թա-
գավորություն,
Իսկություն, ինքնություն, ամենուրեք բացար-
ձակություն,
Բարերարություն, լուսավորություն։
Փառավորյալ ես դու տիրապես, անպակաս և
անհավելված,
Ինկված՝ խորհուրդով անբացատրելի Սուրբ Եր-
րորդությամբդ,
Նաև առհավետ գովաբանված՝
Հավասարազոր և համապատիվ համագոյու-
թյան երկրպագությամբ,
Երեկ և այսօր և հավիտյանս
Հավիտենից. ամեն։



Բան ՀԴ

Սրբի խորհիւց խոսէ Ասպո-ծո Հեղ

Ա

Արքա՛ երկնավոր, դու Տե՛ր բոլորի,
Ամեն բանի մեջ և ամեն դեպքում միշտ երկայ-
նամիտ,
Կենդանի Աստուծո անքնին Որդի:
Այնտեղ պետք է ողորմել իսկապես,
Ուր կտրված է հույսը վաստակի.
Այնտեղ պետք է բարեգործել,
Ուր խափանված է մտքի տեսողությունը.
Այնժամ պետք է մարդասիրել,
Երբ տկարության վտանգն է պաշարել ներ-
քուստ և արտաքուստ.
Այնտեղ է անհրաժեշտ ձեռքիդ բժշկությունն
աստվածային,
Ուր տեղի է տվել բոլորովին անդամների կեն-
դանությունը.
Այնտեղ պետք է լինի այցելությունը,
Ուր ելքի հնար չկա.

Այնժամ է քո մեծությունը,
Երբ անհուսալի վերքն առողջացնես.
Այն է հարազատ քո բնությանը,
Որ անակնկալ ժամին փրկության համար հրա-
շագործես,
Այն ժամանակ հանդես կդա քո հաղթանակը,
Երբ վերջին չնչիս՝ կյանքի փակված դուռն իմ
առջև բանաս.
Այն են շնորհներդ վայելչական,
Որ մոռանալով իմ չար գործերը՝ քո բարիները
հիշես,
Նրանով ես դու անոխակալ,
Որ ապերախտիս երախտագետի հետ խնամար-
կես.
Այնժամ ես միայն պիտի հասկանամ,
Թե ընդունեցիր բանավոր նվերս՝ նախկին գթու-
թյամբդ,
Եթե վերացնես իմ չար սովորությունները:

Բ

Այս պատճառով են հյուսվում ճառեր ու նվա-
գերգություններ եղանակվում,
Երբ Տերը բարի՝ բարեգործներին հասանելիքից
պարգևատրում է և՛ չար ծառային:
Այնպես որ մինչ նա բանտի է սպասում իրա-
վամբ՝
Տերը նրան արքայական ապարանքի մեջ է
նստեցնում.

Մինչ կանչված է նա տղմուտ գուրի մեջ բնակւ
վելու,
Նրան ամեն տեսակի կոչունքների մեջ դահերի
վրա է բազմեցնում.
Մինչ նայում է նա, որ աչքերը փորեն,
Նայվածքը նրա ուղղում է դեպի ուրախ բար-
ձունքներ.
Մինչ սպասում է նա իր մատների ծայրատումին,
Համարձակության մատանի է մատուցում
նրան¹.
Մինչ վախենում է գանակոծվելուց,
Նրան գթառատ իր գիրկն է առնում.
Մինչ կորսայան է պատրաստվում ահով,
Բազմության առաջ, ի տես բոլորի՝ վեր է բարձ-
րացնում.
Մինչ նա սատակիչ մահվա՛ն աչք ունի,
Նրան կյանքի հետ տալիս է և՝ փառք.
Մինչ սպասում է իրեն գլխատեն,
Նրան պսակով է պայծառացնում:
Սրանք են, գթա՛ծ, պտուղներն օրհնյալ քո
սքանչելարմատ շառավիղների.
Սրանք են կյանքի արգասիքները քո արարչա-
կան հրամանների.
Սրանք են ըղձալի խորհուրդները քո խոստո-
վանված տենչանքների.
Սրանք են լույսի ճաճանչները քո ամենասպիյուռ
ճառագայթների.

¹ Ղուկ. ԺԵ. 22

Արանք են ախորժելի ճաշակները քո բարեբան-
յալ քաղցրության:

Գ

Եվ այս բոլորը քոնն են միայն, Տե՛ր,

Քո ներշնչումով եմ գրել սրանք.

Ուստի ես, օրհնյալ, աղաչում եմ քեզ, այդ պար-
գևներիցդ ի՞նձ էլ չնորհիր.

Բա՛ց, Տեր, քո բարիքների գանձարանը, ըստ
առակողի աղերսանքների:

Բարիքներիդ ամբարներում չխառնես դու իմ
չարիքներից.

Զշտեմարանես քեզ համար սիրելի գթության և
ողորմության հետ ատելի ոխեր և բարկու-
թյուններ.

Քո պաշտելի ստացվածքներում չպահե՛ս քեզ
համար անախորժ մթություններ ու դժնու-
թյուններ,

Եվ ինձ վնասող մեղքեր ու թշվառություններ:

Կյանքիդ մատյանում քո օրհնյալ աջով չգրե՛ս
դու պարտամուրհակն իմ անեծքների,

Այլ ինձ համար անհնար համարվածները դյու-
րին ու հեշտ ցույց տալով՝

Կրկնակի անգամ և է՛լ ավելի մեծացնես դու քո
անունը, ո՛վ Տեր:

Տալիքներս շատ են և անհաշիվ,

Բայց քո հրաշալի ողորմությունն անհամեմատ
ավելի է.

Բազում են մեղանչանքներս,
Բայց ներողությանդ հետ համեմատած՝ շա՛տ
քիչ են նրանք,
Հաճախակի են չարություններս,
Բայց հաղթող է միշտ ամեն բանի դեմ մարդա-
սիրությունդ, ո՛վ ամենակալ.
Անձիս արատներն ի՞նձ համար են ծանր և անթ-
վելի,
Բայց քեզ համար խիստ թեթև են նրանք և սահ-
մանափակ.
Ամոթապարտիս պտղաբերած մեղքերի գենքերն
այնքան զորեղ չեն կենդանանալու,
Որքան հիշատակն անմահիդ մահվան՝ կործանո-
ղի բռնությունը վանելու համար:
Փոքրիկ խավարն ի՞նչ կարող է ազդել Աստ-
ծուդ լույսին.
Դույզն աղջամուղջը ինչպե՞ս դիմանա ճառա-
գայթներիդ.
Քո խաչելության չարչարանքի հետ ինչպե՞ս
կշռվի
Իմ տկար մարմնի հեշտասեր խակությունը.
Ամենակալիդ առատության աչքին ի՞նչ են որ
մեղքերի կույտերը ողջ տիեզերքի,
Եթե ոչ հողի դյուրափխրուն կոշտ, որ խակույն
ևեթ կփոշիանա քարի հարվածով,
Եվ կամ անձրեկի պղպջակ, որ կամքիդ հորդա-
ռատ հոսմամբ կպայթի իսկույն և կչքանա:
Քո ամենազոր և ամենահնար կարողությունը

Իմ հանցանքները քավելու համար ժամանակի
պետք չունի բոլորովին,—
Ո՞չ ակնթարթի,
Ո՞չ թռուցիկ ակնարկի տևողության,
Ո՞չ կայծակնային կարճատև նայվածքի,
Ո՞չ ամենափոքր ուշացման,
Ո՞չ փութագնաց ոտքի քայլափոխի,
Ո՞չ կանգունաչափ բարձրությունից կաթիլի
անկման,
Ո՞չ մտքով քաշված մի գծի,
Ո՞չ լույսի արագության,
Ո՞չ շնչառության չափ միջոցի:
Այս բոլոր անձեւ, աննշան և անկայուն օրինակ-
ներից
Ո՞չ մեկը այնքան առժամյա արագ և փութան-
ցիկ չէ,
Որքան մեղքերիս կուտակված սառույցների
հալվելը, ցնդելն ու վերանալը քո գորու-
թյամբ,
Աստված բոլորի Տեր Հիսուս Քրիստոս,
Որդիդ անքնին՝ կենդանի Աստուծո:
Դու, որ քաղցր արե ես պարզեռում բարիների
հետ նաև չարերին,
Եվ անձրեռում ես ամենքի վրա անաչառորեն,
Կշռում ես իրավամբ և չափում նրանց վշտերն
ու հոգսերն հավասարապես.
Փորձության փոքրիկ խթանով ես դու վճարել
տալիս պարտքերը նրանց այստե՛ղ իսկ,

Որոնք մեծ համբերությամբ սպասում են վերին
հանգստին:

Իսկ ովքեր երկրային կենցաղն ընտրեցին,
Դու ողորմությամբ ներո՛ւմ ես նրանց,
Սրանց էլ տալով դարման նրանց հետ՝ սպասում
ես դու միշտ նրանց դարձին:

Փա՛ռք ամենազորիդ՝
Բարեխնամ երկայնամտությամբ գործած քո բու-
լոր հրաշքների համար,
Օրհնյա՛լ հավիտյանս. ամեն:



Բան ՀԵ

Սրբի խորչերեց խոսէ Ըստո-ծո ՀԵԹ

Ա

Այժմ ընկղմված, զմայլված
Եվ իսպառ ծածկըված մեծիդ երախտիքների
առավելությունից

Բազմամասնյա, շարունակական և անճառելի,
Որ աջուձախից առատագույն ու անվագելի
լրումով,

Դիմացից ու թիկունքից կուտակված են անբա-
վորեն,

Մատուցում եմ, վերընծայում
Ճշմարիտ դավանման գովեստի ավանդ:
Որովհետև ինչպես երբեմն հերձվածի չարափա-
ռությամբ,

Ամենապատիր խաքեռությամբ նենգողի կարթով
զատված՝ մերժվեցի,

Ելնելով դրախտից,

Այժմ միավորիչ այս ուղիղ անբծությամբ
Իրական չնորհի ավանդման համար
Երկրորդ անգամ վերստին համբարձած,
Լույսի թեերով թռչելով, ահա, երկինք կհաս-
նեմ:

Բայց քանզի արգանդից, ուր հղացա,
 Ծնված հոգեսոր երկունքով,
 Մեծ և երջանիկ անարատ դշխո,
 Իսկուհի բոլոր կույսերի,
 Գովելի ու պանծալի իմ մորը հարկ է
 Սահմանված կարգով արձանագրել այս մատյա-
 նի մեջ,
 Որպեսզի ծնվի և ցուցադրվի,
 Նաև այլ գալիք ազգերին պատմվի
 Խնկելի փառքի որքանությունը՝
 Արժանի պաշտումով պատվված՝
 Իբրև մաքուր մարմին
 Բան-Աստծու մարդեղության գլխի հետ¹
 Ի հիշատակ հավատի այս ճառի
 Երրորդության դավանության:

Բ

Հոգենկար բանի պատկերի այս օրինակով,
 Որ հարմարվում է լույսի խորանին,
 Գթած, օրհնյալ, ընդունի՛ր ինձ՝
 Քավված ու սրբված սրա մեջ:
 Հանի՛ր սրանով հոգուցս մեղքի նախատինք-
 ները,
 Բազմեցրու սրա հովանու ներքո՝ անմեղ ու ան-
 բիծ,
 Տկարիս Դավթի տանը գումարիր,
 Այնտեղից Աստուծո տունդ փոխադրիր,

¹ Եփես. Ե. 23-27

Հստ մարգարեի, Հիսուս, որ քեզ է ակնարկում¹,
Սոսկ մուտքի և անօդուտ ելքի չհետեւս,
Զերմությունն հավատիս քեզ պաղ չթվա,
Եվ ողջույնի համբույրս անարդ չհամարես:
Պաշտամունքս ապաշնորհ չորակես,
Երկրպագությունս իբր անխորհուրդ չլքես:
Պատկերի տեսիլն անպտուղ չլինի,
Իսկ սքանչելի կերպարանքը՝ աննշույլ:
Չմոռացվի սպանդն անկրակ ողջակեզի,
Ճառիս ուխտի պատարագը վտարվելով չցրվի.
Լույսի ճաշակդ ինձ մահ չըերի,
Կողերիդ արյան բաժակը
Դատապարտություն չլինի:

Գ

Աղաչում եմ քեզ, Տեր Հիսուս, մեկդ այդ էու-
թյունից,
Որի ճաշակմամբ քո Հոր և Սուրբ Հոգու
Գիտությունը ճանաչեցինք,
Զի կարգերը ամենապարզե [սուրբ] եկեղեցու
Հենց քեզանից սովորեցինք
Կյանքի փրկության ու բարիքների
Աղոթանըվեր այս լուսարանում,
Տարածելով սիրտս, ձեռքերս պարզած՝
Խոսքի կնդրուկն այս, սրանում ընակվողիդ,
Ամեն ինչի տիրողիդ,
Երեքսրբյանիդ մատուցելով՝

¹ Զաք. ԺԲ. 8

Հավերժ ընծայում ենք բարեշնորհության այս
բարբառով:

Դ

Հավատո պաշտամունքին,
Օրհնության երգերի վերաձայնած նվազներով
Փառաբանում ենք եղածների բարեհրաման
պատճառին՝
Անսկիզբ երրորդությանը, անհամեմատ բարձ-
րությամբ,
Անհաս խորհուրդների ու անըմբոնելի իմաստ-
ների,
Անզննելի զգայությունների,
Անբերելի արարածների,
Որ իր մեջ ամփոփում է վերնական երկնքի
Եվ անսահման ներքին խորությունների քանա-
կությունը,
Սպառումների վերջն ու սկիզբների նախադրու-
թյունը,
Մեկը երեք անշփոթելի կերպարներից,
Եվ երեքը մի անբաժանելի իսկություն,
Վեր քան մտքի ազատությունը՝
Հրաձգված ամենուր բովանդակապես:
Անփոփիս բարի, անսասանելի ուղղություն,
Սիրո անխառն կերպարանք, անհաջորդ մեծու-
թյուն,
Անխոնարհելի բարձրություն, անվատնելի տե-
սություն,

Աննվազելի բարերարություն,
Կայուն կամք, կենդանի հրաման,
Փրկչյան ակնարկություն, ճշմարիտ երանու-
թյուն,
Հավաստի ակնկալություն, անստելի խոստում,
Արգասավոր ավանդ, ըստույգ ավետիս,
Աներեակայելի բարձրություն,
Անձեռնարկելի վերասլացություն:
Մի Հայր միակ Որդու՝ միակ Հոգով պատված,
Ամենահարուստ բարությամբ, ամբողջովին չա-
րից զերծ,
Օրհնածայն գոհաբանությամբ,
Անքնին ներբողով գովերգված:

Ե

Միակ բարձրյալ ահավոր անուն՝ կցորդությանց
համապատիվ,
Ազգականություններին անպատում,
Եռալույս զուգակցություն,
Անհավելվածը կատարելություններից,
Ինքնիշխան կամավորությամբ պատվասիրված
Հանգունատիպ Հոր մոտ,
Երկնքից իջած
Խոնարհվելով Սուրբ Հոգու գործակցությամբ,
Ընտանի փառքից աննվազ,
Հաճեց մտնել մաքրության կույս
Աստվածածնի մայրական արգանդը,
Ուր օրհնության բույսն աճեցրեց

Անարատության լուսասահման անդաստանում:
 Համասնունդ ամենակատարյալ է ությանը՝
 Անանջրպետ միասնությամբ,
 Թափանցիկ խառնումով աստվածության Ոգուն,
 Հրաշապես բաղկացրեց շնչիս գոյությանը,
 Անստամբակելի կրթության սանձերի այդ երա-
 սանով
 Ստահակությունս հանդարտեցրեց
 Եվ կամովին նվիրվելով [սուրբ] խաչին՝
 Անմահական տունկի լրության ծայրը բարձրա-
 ցավ
 Կյանքի պտղի ծաղիկը,
 Վիրավորվեց մահացու մերազնյա մարմնով¹
 Անընդմիջելի աստվածությամբ,
 Դատապարտման գործիքին դրանով կյանք
 տվեց,
 Արարչական իսկության՝ նրա վրա
 Հավետ անբաժանորեն վշտացած
 Նյութական մարմնի հետ:
 Իջավ խավար դժոխքի վայրերը՝
 Իր ավարն հանեց խոտորողի կապանքներից,
 Եվ ասես քնի նիրհից արթնացած,
 Մահվան դիմեցումն իր մեջ նահանջեց,
 Կանգնեց, կենդանացավ աստվածորեն,
 Ելավ երկրից կյանքի հացն ու բանական հոտե-
 րի հովիվը²:

¹ Յայտն. ԺԳ. 3

² Յովի. Զ. 35. 48, Եբր. ԺԳ. 20

Հավատարիմ եղավ աշխարհում¹
 Եվ երեաց նույնությամբ, բոլորովին աննվազ,
 ինչպես եկավ ամբողջական,
 Նույնպես և համբարձավ,
 Բազմեց գերունակ գահույքին՝
 Նախնական պարզությամբ և արարչական
 փառավորությամբ:
 Ում որ բարերար Աստված և բոլորի Տեր ենք
 ճանաչում²
 Մեծ օրը կդատի ամբողջ երկիրը արդար ընտ-
 րությամբ,
 Ինքն է սկիզբը և ինքը՝ կատարածը,
 Նույն և առաջինը, նույն և գալիքը,
 Անպակաս բովանդակությամբ
 Թագավորելով անմատույց լույսին³:

Q

Օրհնում ենք Հոր և Որդու հետ
 Նաև բխումը անբաժանելի՝
 Նրանց փառակից Հոգին տերունի,
 Որ ստեղծեց ամենը և կենդանագործում է բո-
 լորին,
 Որ սկզբից ևեթ շրջում էր
 Համապարփակ աշխարհակալ մեգի մեջ³,
 Նկարում էր, կերպավորում

¹ Ա. Տիմ. Գ. 16

² Ա. Տիմ. Զ. 16

³ ԾԱՆԴ. Ա. 2

Երկրատարած ծովի անբավության ամենունակ
 ջրերով՝
 Լույսի սուրբ ավագանը
 ի կատարումն այժմյան խորհրդիս:
 Նախ ստեղծեց և այժմ գործում է,
 Գոյացրեց և մշտապես կատարում է հրաշքներ,
 Աքանչելիքներ, սրբակյացների կանխատեսում-
 ներ,
 Աստվածային ներշնչումներ, զարմանալի զորու-
 թյուններ,
 Մարգարեններ, առաքյալներ, վարդապետներ՝
 Հանձարի կրթության վարժողներ:
 Հարդարեց Քրիստոսի արյան մատուցման
 սրբարանը,
 Անձերի քափությունները, մարմինների առող-
 ջությունը,
 Քրիստոսի նման ողորմությամբ կարգադրեց
 Մարմինների առողջություն:
 Մկրտեց և՝ ջրից գերազանց,
 Իրմով միայն նորոգեց ու լուսավորեց¹,
 Մշտապես նույն բարեգործությամբ է զորանում:
 Հորդանանի հոսանքի մեջ վկայեց Միածնի
 աստվածությունը,
 Ամպի տեսիլով ցույց տվեց
 Թափոր լեռան վրա, Հոր ձայնով:
 Համանման եղանակով հովանի եղավ

¹ Գործք Ա. 5

Հակոբի տոհմի ելքին Եգիպտոսից¹
 Մովսեսի զորավարության ուղեգնացությանը
 Սաստիկ հողմով ընկղմեց փարավոնին²:
 Նվիրագործում է քահանաներ, իմաստուններ
 կազմում,
 Թագավորներ զորեղացնում,
 Քավություն ընձեռում,
 Մահացածներին շնորհում է կյանք՝
 Նորոգվելու հարությամբ:
 Նույն ինքը մարդացած Աստծու օծումն է³,
 Մշտնջենական հավասարությամբ
 Երկրպագված Հոր հետ՝ ի պատիվ Որդու մեծու-
 թյան,
 Անսահման փառավորությամբ օրհնյալ հավիտ-
 յանս:
 Ամեն:

և

Դավանում ենք ուղիղ, անշեղ, անբիծ հավա-
 տով,
 Ողջունում ենք մեր շրթունքի համբույրով
 Աստծու ընակության եկեղեցին,
 Անշունչ վեմերով կառուցված խորանն այս,
 Որ կատարելապես զարդարված՝ երկնքից գերա-
 զանց եղավ,

¹ Ելք ԺԳ. 21

² Ելք ԺԴ. 28

³ Եսայի ԿԱ. 1

Որ հենց նրանցից՝ առաքելական դասերից
Հիմնվեց,
Եվ խնկվեց բարձրյալի աշակերտներից,
Պաշտվեց Բանի սպասավորներից:
Կյանքի այս գանձը
Իր սկիզբն առավ վերնահարկ սրահից,
Այն վայրից, ուր խորհուրդը կատարվեց,
Որը լցրեց Աստծու Հոգին,
Նրանում զորություն փայլեցնելով
Հոգեգալստյան մեծ օրը.
Նախ՝ բարետես տունը՝ նախամեծար առավելու-
թյամբ,
Իբրև օրինակ այս եկեղեցում
Սրբությունների շնորհաբաշխման,
Եվ ապա նրա բնակիչները բարեզարդվեցին նո-
րոգ մի լույսով:
Ուր հզոր Աստծու արյունն է բաշխվում,
Առավել քան մահ գուժող Հաբելի [արյունը],
[Որ] սրանում մեծագոչ բարբառով
Ավետում է հավերժական կենդանության բերկ-
րանքի ձայնը⁴:
Քանի որ ոչ ոք զորություն չունի ծառայելու
այս ահեղ խորհրդին,
Երկնքի տակ և արեին հանդիման,
Թե չապավինի սրա թևերին,
Անգամ երկինքը չի բավարարի տերունի մարմ-
նի այս սրբությանը,

⁴ Եբր. ԺԳ. 24

Թե իբրև ծածկույթ օրհնության ձեղունը այս
չունենա:

Որովհետև ըստ օրենքի մահվան անեծքի նա
կարժանանա,

Ով այս խորանի վկայարանից դուրս

Աստվածային պատարագը մատուցե:

Եվ մանավանդ արյունապարտ կհամարվի՝

Հոգու օրինակ արյունը այստեղ եթե չընծայե:

Աստ մեկ անգամ է լոկ լվացումը արյամբ Քրիս-
տոսի¹,

Որ անգիտաբար չանարգվի աստվածությունը²

Կրելով մկրտությունն հավատացյալի,

Մեկ անգամ է և ձեռնադրությունը

Ի պատիվ լույսի օծության,

Որ անբծությանը խաբեություն չխառնվի.

Մեկ է և քավությունը շնորհքով, քան ապաշ-
խարությամբ,

Որպեսզի ճշմարտությունը խորամանկությամբ
չկերպափոխվի.

Մեկ է հավատը գալիքի ընտրության,

Որ հատուցումի սպառնալիքը

Օտարահամբավ զրույց չկարծվի:

Մեկ է մեր երկու գոյությունների կշտամբու-
թյունը իրավացի,

Որ չկարծվի, թե բարի և կամ չար հատուցման
համար

¹ Հռովմ. Զ. 3

² Եփես. Դ. 5

Ներքին մարդն անջատ է արտաքինից,
Որ արժանանա արքայական որդեգրության,
Որպեսզի նաև երկրային մարմնի հաղորդակ-
ցությամբ
Ակնհայտորեն հաստատվի առավելությունը
վերին թագավորության,
Մեկ է և հույսը կենդանության՝ անեղծությունը
սրբերի,
Որ ունկնդրողները առանց կասկածի հավատան:

Ը

Պաշտելի այն դշխոն՝ անշունչ եկեղեցին,
Կյանք է բաշխում և իշխում է մահին,
Ինչպես պտուղը Աղամի ճաշակելիք¹,
Անշունչ է, բայց բանականից էլ գերազանց
Հրաշքներ է գործում, որ դարձնում է կատար-
յալ
Եվ հաստատում է վերստին,
Փառքի լույսի կերպարանքը դրոշմելով մեր մեջ:
Գրված է նաև վերին կամարի մեծության կերպը,
Որ սկզբնական է, և նախակառույց
Քան իր բնակիչ հոգեղեն զորքը:
Նա նոր թռիչք է նվիրում մարմնին՝
Հոգեկան ինչոր մի թեթևությամբ,
Այս պատվավորի հարստությունով
Անարգը դարձնում է հարգելի:
Ինքնակիր մեղքով չի զազրանում նա,

¹ Ծննդ. Գ. 22

Եթե չար մարդիկ, անհավատները չոտնահարեն:
Նա ինչոր տիպ է մի զարմանալի,
Որ հաղթում է մեր պատկերացումը,
Անբան՝ կառուցված է բանականից,
Օգնում է նրան, ինչպես վեհագույն՝ անչափ
նվաստին:

Մեծ է քան մարդը¹,
Հաղթող ցուպի պես ընտրյալ Մովսեսի.
Բարձր՝ առավել, քան բանականը,
Ինչպես խորհրդավոր ծաղկած գավազանը՝
Ահարոնի²,
Եվ գերազանց է, քան մտավորը,
Ինչպես Եղիայից ու Եղիսեոսից՝
Աքանչելահրաշ արվեստով փայլած
Մաշկյակը, որ գետը հերձեց³:
Սրբասուն ձեռքին օգնում է կրկնակ կատարե-
լությամբ,
Ոչ թե զինելով քարից ու հողից նյութված մար-
մինը,
Այլ հարազատ ու գոյակից է նա
Թե զգայականներին և թե սրբերին:
Ինչպես կենդանի և անմահ վեմը⁴
Թե կործանող է, և թե կանգնեցնող⁵,
Ինչպես դատավորն ամենայն հոգվոց՝

¹ Ելք Դ. 1-5

² Թվոց. ԺԷ. 8

³ Դ. Թագ. Բ. 8

⁴ Ա. Պետր. Բ. 4

⁵ Դուկ. Բ. 34

Հրաշապես օրհնող և անիծող է¹,
 Աներևույթը տեսնողի նման՝
 Մեկին կշտամբում, մյուսին խնամում,
 Կանչում է իր մոտ, արձանագրում²,
 Որպես հրամայողն արարածներիս:
 Դիմամարտներից անհարվածելի,
 Հավիտենական [այն] լեռը ինչպես³.
 Մեծի հրաշագործ ուռկանի նման⁴
 Հոգի է որսում.
 Առանց մեղքերի ու վրիպանքի
 Նա Քրիստոսի հետքով է գնում⁵
 Բարձր ճոխությամբ ու բաց ճակատով,
 Գլուխը բարձր՝ ինչպես Գովյալը:

Ո.

Եվ այնքան մեծ է իր սրբությունը՝
 Աստուծո պատկերով ստեղծվածներին
 Զանազանում է ըստ իր կանոնի.
 Ընտրության բազում փորձերից հետո
 Սիալված մեկը թե համարձակվի
 Գավիթը մտնել՝ չի պղծվի [բնավ],
 Այլ դժկամում է անպատրաստների թերու-
 թյուններից.

¹ Սատթ. Ե. 34. 41

² Սաղմ. ճԽԶ. 4

³ Սաղմ. ճԻԴ. 1

⁴ Սատթ. ԺԳ. 47

⁵ Եփես. Ե. 24-27

Նա չի նգովվում, այլ զիջանում է
 Շնորհի չափը չիմացողներին.
 Զի վհատվում իր մեղքն համրելով,
 Այլ մեր գործերից մթագնում է լոկ
 եվ չի թողնում, որ կրկին մոտենան,
 Փարվեն ոտքերին կենդանատուի¹,
 Ինչպես տիրական խորհուրդը անձառ
 Միևնույն օրը կրկնել չի լինի,
 Որ չապականվի անխոհեմաբար:
 Նա զորեղապես կարեկցում է մեզ՝
 Ազատ լինելով մեր արատներից,
 Դատում է անձայն, Տիրոջ հրամանով, առանց
 խոսքերի:

Ժ

Նաև տապան է նա մի մաքրական
 Եւ երջանկագույն,
 Որ պահպանում է կյանքի ալյաց մեջ մեզ՝
 չխեղդվելու.
 Ոչ թե բազմաթիվ անբան գազանների
 Եվ սակավ մարդկանց,
 Այլ հավաքում է երկրայիններին ու վերիններին,
 Հավասարապես ամփոփում իր մեջ,
 Զի տրվում ջրի ալեկոծության,
 Այլ բարձունքներն է ելնում երկնքի:
 Իբրև աշակերտ,
 Որ հրահանգված է Աստուծո Հոգուց,

¹ Սատթ. Ի՛Ը. 6, Յովի. Ի. 14

Խուսափում է նա նենգություններից¹,
 Զի բողոքում նա մահու հարվածից,
 Բոնում տանում է կյանքի ավետման²,
 Ոչ թե Նոյի ձեռնարկումով է կազմվում,
 Այլ Հաստողի հրամանով է կառուցվում,
 Ոչ Մովսեսն ու Բեսեղիելը,
 Այլ Աստուծո Միածինն է
 Սուրբ Հոգու հետ պատրաստում,
 Ոչ թե հարաշարժ կամ հարափոխ,
 Այլ մշտակառույց անսասան հիմքով
 Հաստատում է այն:
 Ինչպես փայտեղեն տապանակն անխոս –
 Զի տեսնում, բայց մեզ առաջնորդում է,
 Իբրև անքանակ էի կերպարանք առաջ գնալով
 Հանդերձյալի մեջ լուսավոր կյանքի տեղ է
 պատրաստում:
 Ողիելի հետ կսատկի այնտեղ,
 Թե խաչի նման հոգիների մեջ չղբոշմվի,
 Տեղնուտեղը, նույն պահին կսպանի՝
 Երկրասիրաբար և անասնային մի լծակցությամբ
 Գետընթաց սայլով, իբրև մի անոթ՝
 Թե վերցնեն տանեն³:
 Մարմնի լեզվով չէ, այլ հրեշտակների⁴
 Նման է խոսում:

¹ Իմաստ. Ա. 5

² Առակ. Թ. 6

³ Ա. Թագ. Զ. 10

⁴ Ելք Ի. 22

Եվ ոչ ականջով¹,
Մտքի շարժումով լսում է արագ.
Չունի հստակ ձայն խոսքի ու բանի,
Բայց պատգամները Հիսուսի գործի
Պատմում, հասցնում է բոլոր ազգերին²,
Չունի խոսափող ու ձայնալարեր,
Բայց և ազդում է մի աստվածային կենդանի
շնչով.

Առանց ջիլերի ու ոսկորների՝
Եվ երկու հազար կանգուն լայնությամբ
Ինչպես անհամար գնդից բարձրյալի,
Այն երրայական զինյալ ամբոխի վերապրած
գունդը³

Առաջ էր գնում, այժմ նրանց հետ,
Ինչպես և նրանք, որ պիղծ են, անսուրբ,
Մեղքերի աղտով այրված, հեռացած,
Տաժանակրությամբ աղյուս սարքելուց ազատ-
վածներին

Ուղեկցում է նա:
Մարմնացած Աստուծո էությունն անգամ
Ահա այս վեմի անունով կոչվեց,
Կողի պատումով խմեցրեց բոլորիս:
Ոչ երակների արյան ընթացքը,
Այլ վերին Լույսի շառավիղները
Թափանց միությամբ կենդանացնելով

¹ Գ. Թագ. Ը. 29

² Ա. Թագ. Գ. 11

³ Հետու Գ. 1-6

Նորոգ է պահում: Կանխանշում է
 Ոչ Սողոմոնի, Զորաբաբելի հսկողությունը,
 Այլ իմաստությունն Ամենակալի.
 Նա չի պարուրվում աննվիրագործ ու սովորա-
 կան
 Յուղով՝ Հակոբի կողմից¹:
 Այլ փառքով Մեծի և Ահավորի արյամբ է օծ-
 վում:
 Երկրային նյութից տուն չէ, այլ մարմին երկնա-
 յին լույսից,
 Սրա զավակներին Աստված կնքում է ու ձեռ-
 նադրում,
 Ոչ թե երկրածին հղացումների,
 Այլ երկնային արքայության ժառանգներ է
 պատրաստում,
 Որ իր ծոցում գրկվածներին
 Աբրահամի գոգին նվիրաբերե:
 Սրա հարսնության փեսան է Որդին կենդանի
 Աստծու
 Հայրապետների խմբերն են նրա հարսնաքույ-
 րերը.
 Սա կմոռացնի կռամոլության բարձունքը դի-
 վոտ,
 Քանզի ծանոթ է երկնային Աստծուն,
 Ամբողջապես մերժելի են արձանները կուռ-
 քերի,

¹ Ծննդ. Ի. 18

Եվ Քրիստոս է երկրպագվում նրա բոլոր քարերի մեջ.

Ակնհայտ քակտումն է անտառների ուրվական իղձի,

Քանզի աշխարհի ողջ մայրիներից

Կենաց փայտի նմանությամբ

Տերն այստեղ է զոհաբերվում:

[Եկեղեցին] խորտակումն է

Դիվապատիր հմայական արձանների,

ԶԷ՞՞ որ գովական կարկեհան քարն Է՝

Ապրող վեմերով ու գոհարներով

Իր մեջ հաստատվում:

ԺԱ

Այս աստվածընկալ և չքնաղ հարկը

Ազատ է ամեն ծառայությունից²:

Օրինակը չէ Վերին Սիոնի,

Այլ նրանով է, որ ճանաչում են ճշմարտությունը.

Ո՛չ կապված բագին կռապաշտության,

Եվ կամ պատժարան օրենքի լծով,

Այլ՝ պարզեարան Տիրոջ բարության,

Երկրպագում ենք:

Երբեք չի սասանվում ձեւափոխվելով,

Այլ փառքի նույն շուքով ընդարձակվում է.

Սա երկինքն է երկնի, և՝ երկոի վրա,

¹ Եսայի ԾՂ. 11

² Գաղ. Դ. 21-31

Հոչակվում է նա շողարձակելով:
 Ինչպես չէ հնար Քրիստոս առանց Հոր,
 Նույնպես առանց այս մոր արգանդի
 Կատարյալ Հոգի հնարավոր չէ:
 Անընդգրկելին շրջում է անտուն,
 Եթե այս տան մեջ չտաղավարվի.
 Գլուխ դնելու տեղ անգամ չունի Տերն ամենայ-
 նի¹,
 Թե կյանքի այս կայարանում չօթևանի:
 Հպարտանում է ավելի շատ այս նյութեղեն
 տնով,
 Քան թե երկնային վերին կամարով:
 Աստվածային լույսի անբավությունը
 Մարդարեի դեմքի նման
 Օրինակն այս նույնպես ծածկեց².
 Եվ ինչպես փախան երեսի փայլից,
 Այս նմանությամբ տաճարի մարդիկ չհան-
 դարտվեցին,
 Մեծ գովերգության տոնահանդեսին,
 Երբ որ դասերը բանականներիս
 Ի մի հավաքված նվազերգում են,
 Այստեղ են կրկին բաղձանքով օրհնվում,
 Քան վայելչական այն դրախտի մեջ:

¹ Մատթ. Ը. 20

² Գ. Թագ. Ը. 11

ԺԲ

Այս մայրն երկնավոր, երկնային լույսով
Ավելի քան մայրը երկրավոր,
Շնչող, մարմնավոր, ինձ գգվեց որդու պես:
Նրա կրծքի կաթն արյունն է Քրիստոսի:
Եթե մեկը սա պատկերն համարի [սուրբ] Աստ-
վածածնի՝
Օրենքին դեմ չէ:
Որպես փրկական խաչի գորության
Զարմանազան նշաններ ու սքանչելիք է հրա-
շագործում,
Եվ դատաստանի բեմը այստեղ է հաստատված
ահա,
Սրանով է, որ խորթ բարք ունեցող հերձվածող-
ների
Մոլեգին ճառող բերանն է սանձվում:
Նա ունի նաև իմանալի և բանական քարեր,
Որոնցով անսուրբ գազանամիտներ
Վտարում է նա, դարձնում տարագիր¹
Նաև աստվածներ է ծնում եղական²
Միակ Աստծու՝ Քրիստոսի պատկերով:
Եվ դարձած դեպի մեզ խոստացած
Ունի և գիրն իր արևելք հայող՝
Նախ մեզ խոստացված բնակատեղի,
Կարծես թե ձեռքով նա հստակորեն մեզ ցույց
է տալիս

¹ Ելք ԺԹ. 13

² Սաղմ. ԶԲ. 6, Յովի. Ժ. 34-35

Աստծու գալստյան ճանապարհները,
 Մեզ քարոզում է փայլակի տիրական առակը¹,
 Հիշեցնում բոլոր արարածներին,
 Թե արևելքից պիտի հայտնվի փրկությունը մեր:
 [Նա] հալածում է ցավերը, բուժում ախտաժետ-
 ներին,
 Հաղթահարում է բռնությունը դեերի:
 Նրա արգանդը ավազանն է կենդանարար,
 Եվ նրա հարսանքին առաքյալների դասերն են
 պարում:
 Այնքան է ճոխացել բարգավաճ երանությամբ,
 Մինչև իսկ վայելչապես Տիրոջ անվամբ հոր-
 ջորջվեց.
 Լույսի Տիրամոր տիտղոս ստացավ
 Միածին Որդու մերձավորներից:
 Նա հանդարտիկ նավահանգիստն է
 Խռովահուզյալ մեղավորների,
 Եվ վերին դասուց խրախճանարան,
 Եվ տարակուսյալ հանցապարտների անվրեպ
 բուժարան,
 Անպատճելի Երրորդությունն իր մեջ է, որ
 Փառաբանվում է՝ բոլորից օրհնվելով:

ԺԴ

Իսկ եթե մեկը չարության ձեռքը
 Հանդգնի պարզել վերին արքայության
 Եվ մարմնավոր գյուտ, մարդկային հնարք,

¹ Սատր. ԻՂ. 27

Կամ երկրակենցաղ արվեստ համարի
 Զեռակերտ տաճարի վերաբերյալ ավանդները
 Եվ ոչ՝ առավել կյանքի մի շնորհ և աստվածա-
 յին ակնկալություն,
 Եվ կամ Սուրբ Հոգու հայտնած նորալույս նա-
 խագրություն,
 Եվ բարձրյալի երախտիքի ամենատուր լրիվու-
 թյուն,
 Եվ խնկարկված խորհրդարան արարչական
 կամքի,
 Առաքյալների աջի բարեհանձար հիմնարկու-
 թյուն,
 Կարճ՝ երկնքի դուռ և կենդանի Աստծու քա-
 ղաք¹,
 Եվ անպարտ ողջերի մայր՝ ճշգրիտ պատկեր բա-
 նական կերպիս²,
 Հոգուս խորհուրդն իմանալի,
 Իսկ շոշափելին՝ պատկերը մարմնիս,
 Այնտեղի անձառ սրբությունները գերազանցող
 Մի նոր սրբություն.
 Եվ Քրիստոսի փառաշուք նշանով պսակված,
 Այդպիսի չխոստովանողներին զրկում է իր տե-
 սությունից
 Հայրն ամենակալ իր էակից Բանի ձեռքով,
 Վերցնելով նրանից և փառակից Հոգու շնորհի
 ավանդը,

¹ Ծննդ. ԽԸ. 17, Եբր. ԺԸ. 22

² Գաղ. Ղ. 26

Եվ փակվելու է կյանքի առագաստի դուռը նրա
առջև:

Իսկ մենք վկայում ենք այն՝ որ գրեցինք,

Հավատալով մեր ասածին¹

ի փառս և հանուն ամենակալ Երրորդության²,


Եվ մեկ աստվածության,

Հավիտյանս հավիտենից, ամեն:



¹ Բ. Կորնթ. Դ. 13

² Սաղմ. ճժե. 10



Սըստի խորժերեց խոսք՝ Ըստուն-Հով Հեղ

Ա

Աստված ողորմած, բազմագութ, հզոր,
Ահավոր, մարդասեր, օրհնյալ, կենդանի, ան-
ճառ,
Զկա ոչ մի բան քեզ համար բնավ անձեռնար-
կելի,
Նույնիսկ եթե նա մեր մտքի համար լինի
անհնար:
Դժնի փշի տեղ դու քաղցր պտուղ կարող ես
տալ,
Սկզբնահաշարդ այս նոր ու զարմանալի կենաց
կանոնի.
Քանզի բարիք անել ատելիին և աղոթել հալած-
չի համար,
Փրկություն հայցել խոցողին և սպանողին նե-
րումն խնդրել՝
Դու էիր, որ ընծայեցիր մեզ պտուղն այս հրա-
շալի,
Որի քաղցրությունն է անճառելի և անօրինակ,
Քո բարեբանված կամքին հաճելի

Եվ ճաշակելի գովյալ շուրթերիդ։
Հոգի՛դ մեր երեսի և զորությունդ մեր գեղեց-
կության,
Դու Տե՛ր Քրիստոս, օրհնյալ ի բարձունս։
Բայց ամենավրեպ երկրածին մարդիկ
Քո բարեմատույց ձեռքերին անգամ չարու-
թյամբ հատուցեցին։
Իսկ դու լինելով լույս ու լուսատու,
Զես լսում անեծք ու չես ախորժում չարից.
Զես ուզում կորուստ, չես ցանկանում մահ,
Զես հուզվում խոռվությունից,
Զես ենթարկվում ցասման,
Զես հարկադրվում բարկությունից,
Զես մթագնում սիրուց,
Զես այլայլվում գթությունից,
Զես փոփոխվում բարությունից,
Ո՛չ թիկունքդ ես շուռ տալիս և ո՛չ էլ երես ես
դարձնում,
Այլ լո՛ւյս ես համակ և փրկություն ամբողջո-
վին։


Բ

Եթե ուզենաս քավել՝ կարող ես.
Եթե բժշկել՝ զորավոր ես.
Եթե կենդանացնել՝ ձեռնհաս ես.
Եթե շնորհել՝ առատաձեռն ես.
Եթե առողջացնել՝ հնարավոր ես.
Եթե պարգևել՝ ամենալեցուն ես.
Եթե արդարացնել՝ ամենարվեստ ես.

Եթե միսիթարել՝ ամենիշխան ես.
Եթե նորոգել՝ ամենակալ ես.
Եթե հրաշագործել՝ գերահզոր ես.
Եթե վերստեղծել՝ Արարիչ ես.
Եթե կրկին դոյացնել՝ Աստված ես.
Եթե հոգալ կամենաս մեզ՝ ամենատեր ես.
Եթե մեղքերից կորզել՝ գթասիրտ ես.
Եթե անարժանիս ընձեռել՝ օրհնյալ ես.
Եթե որսացողից ազատել՝ փրկիչ ես.
Եթե չնորհներդ մեր մեջ զեղել՝ հարուստ ես.
Եթե նախքան մեր խնդրելը ձեռք կարկառել՝
անկարոտ ես.
Եթե նեղվածիս լայն տեղ դուրս բերել՝ անդորրիչ
ես.
Եթե հետ մնացածիս կոչել՝ խնամակալ ես.
Եթե սասանյալիս հաստատել՝ վեմ ես.
Եթե ծարավյալիս հագեցնել՝ աղբյուր ես.
Եթե ծածուկներն երևան հանել՝ լույս ես.
Եթե օգտակարին ինձ ծանոթացնել՝ բարի ես.
Եթե արատներն անտեսել՝ երկայնամիտ ես.
Եթե փոքրիս հետ դատի չմտնել՝ բարձրյալ ես.
Եթե ծառայիս ձեռք տալ՝ ստեղծող ես.
Եթե աջովդ պաշտպանել՝ հոգածու ես.
Եթե վհատածիս դարման մատուցել՝ կերակրող
ես.
Եթե անգետիս մտքին հագուրդ տալ՝ վարդա-
պետ ես.
Եթե քեզ դիմողիս ընդունել՝ ապավեն ես.

Գ

Արդ, այս բոլորը քո ձեռքումն են լոկ, Տե՛ր
ողորմության,
Ոչ միայն գրված, այլև կատարված ու գլխավոր-
ված,
Ով առաջամարտիկդ համբերության նահա-
տակների մեջ,
Որ իմ փրկության համար՝ հզորաբար հանդես
եկար ճակատամարտի ասպարեզում,
Որպեսզի գոռող մարմնիս բռնության կարծրու-
թյունը դու
Վշտի և տառապանքի վարժություններով կակ-
դացնես:
Մեր բնության հատուկ տույժի տագնապը տա-
ժանագին
Քո անմեղորեն չարչարված մարմնով չափեցիր
դու,
Որպեսզի այն քո մեջ որպես օրինակ ունենալով՝
Գթությունդ մեր նկատմամբ առավելապես ցու-
ցաբերես,
Օրհնյա՛լ հավիտյանս. ամեն:



Սրբի խորչերեց խոսք Եսայոն-Ճռ Հետ

Ա

Օրհնյալ և լուսանորոգ օր է¹ մեծ պասերի ուր-
բաթը սարսափելի,
Երբ եղան երկու արդարակշիռ ընտրություննե-
րը սասանած բոլոր արարածների՝
Վերածելու նրանց անփոփոխելի ու երկնակեն-
ցաղ մի այլ էության,
Բարձրացածներին խոնարհեցնելով ու վեր հա-
նելով ընկածներին:
Եվ բարեպատեհ ժամն եկավ հասավ,
Գրելու ինձ այս նվազն ողբածայն՝ զվարճա-
խառն երկյուղով.
Զարչարանքներիդ մասին եմ ուզում խոսել
այժմ ես,
Որոնք կրեցիր դու իմ փոխարեն, Աստված բո-
լորի:

Բ

Կանգնեցիր իմ կերպարանքով՝ ստեղծածիդ
ատյանի առաջ
Զիսոսեցիր դու տվիչդ խոսքի,

¹ Զաք. ԺԴ. 7

Չբարբառեցիր՝ ստեղծո՛ղդ լեզվի,
Զայն չարձակեցիր՝ սասանիչդ երկրի,
Չմոնչացիր՝ ամենաազդու փո՛ղդ մեծաձայն,
Ո՛չ երախտիքովդ հանդիմանեցիր
Եւ ոչ էլ նրանց իրենց չարությամբ պապանձեց-
րիր.
Չմատնեցիր դու նրանց ամոթի, որ քեզ մատնե-
ցին մահվան տանջանքին.
Չդիմադրեցիր, երբ կապեցին քեզ, ոչ էլ նեղա-
ցար, երբ ապտակեցին.
Չնախատեցիր, երբ թքեցին ու չխոռվեցիր, երբ
բոռւնցքներով խփեցին քեզ,
Չսրտմտեցիր, երբ կատակեցին, չխոժոռվեցիր,
երբ ծաղրեցին:
Պատմուճանը քո վրայից հանեցին, իբրև տկա-
րից
Ու դարձյալ հագցրին, իբր կալանավոր անզեր-
ծանելի:
Եթե լեղիով խառն քացախը չխմեր կամա նա
երկու անգամ,
Զէր թափվի մաղձն իմ նախկին դառնության:
Համտես արավ նա հուսահատությամբ ու մի
կողմ տարավ տարակուսանքով.
Առան նրանից այն մոլեգնաբար և տվին դարձ-
յալ անպատկառորեն.
Եվ խառնիճաղանճ ամբոխի առջև գանահարե-
լով նրան սաստկապես՝
Խիստ անարգանքի դատապարտեցին.

Ծնրադրեցին՝ ծաղրելու և պսակ դրին հեգնելու
համար:

Գ

Հանգիստ չտվին կենդանարարիդ,
Այլ պատրաստեցին քեզ համար գործիք, որ
կրես:

Ընդունեցիր այն իբրև երկայնամիտ, առար իբ-
րև հեզ,

Ու վերցրիր այն որպես համբերող,
Եվ շալակեցիր փայտը վշտալից, իբրև հանցա-
պարտ:

Տարար ուսամբարձ այդ գենքը կենաց, գերթ
հովտաշուշան,

Որ գիշերային արհավիրքներից պահպանես դու
մեր՝ քո ձեռքով կերտված գահը մարմնե-
ղեն՝

Դատապարտության վայրում, որպես թե խրախ-
ճանքի մեջ:

Դուրս հանեցին քեզ որպես ողջակեզ.

Կախեցին, ինչպես Սաքեկա խոյը, որին քարշ
տվին իր եղջուրներից.

Տարածեցին խաչի սեղանի վրա իբրև պա-
տարագ,

Բևեռեցին որպես չարագործի, կապկապեցին
իբրև ապստամբի

Երկնավոր խաղաղությանդ՝ իբրև ավագակ,
Անկապտելի մեծությանդ՝ իբրև խղճալի,

Քերովքեներից պաշտվածիդ՝ իբրև քամահրելի,
 Կենաց պատճառիդ՝ իբր արժանավոր՝ սատակիչ
 մահվան,
 Ավետարանի նկարչիդ իբրև օրենքի հայհոյիչ,
 Մարդարեների Տիրոջդ ու կատարելությանդ՝
 իբրև գրվածքներն համառոտող,
 Փառքի ճառագայթներիդ և Հոր անքնին խոր-
 հուրդների կնիքիդ¹ իբր հակառակորդ
 ծնողիդ կամքին,
 Իսկապես օրհնյալիդ՝ իբրև տարագրյալ.
 Օրենքի կապն արձակողիդ՝ իբրև այր նզովյալ²,
 Սպառող կրակիդ³ իբր հաղթահարած մի կալա-
 նավոր,
 Ահավորիդ երկնի և երկրի՝ իբրև հավաստի
 պատժապարտ,
 Անմատույց լույսով պարածածկյալիդ՝ իբրև հո-
 ղածին մի ձերբակալված:

Դ

Ո՞վ դու քաղցրություն և երկայնամիտ բարե-
 րարություն,
 Գթառատ ողորմածություն և Տե՛ր բոլորի,
 Որ ինձ ապերախտ և անօրեն ծառայիս համար
 Այդ ամենը կամավորապես և սիրահոժար հա-
 ճությամբ

¹ Եբր. Ա. 3

² Գաղ. Գ. 13

³ Բ. Օրին. Դ. 24

Հանձն առար այն մարմնովդ, որ միացըիր քեզ՝
 քո աստվածային էությանը,
 Եվ մինչև քնարանը շիրմի՝ անպակաս լրու-
 թյամբ,
 Ամբողջական նույնությամբ մնալով Աստված
 անքնին՝
 Կրեցիր դու նույն նախատինքները՝ անճառելի
 համբերությամբ,
 Եվ ապա դարձյալ հարություն առար՝
 ինքնիշխան բարձրությամբ ու պսակված լույ-
 սով,
 Աննվազ մարմնով և անթերի աստվածությամբ,
 Օրհնյա՛լ ես փառքով, գոված գթությամբ
 Եվ բարեբանված միշտ ողորմությամբ
 Հավիտյանս հավիտենից. ամեն:





Արդի Խորհրդական Աստվածաբանություն

Ա

Եվ արդ, հողանյութ կերպարանքովս ընկնելով
երեսն ի վայր,
Եվ ծնրադրական երկրպագությամբ գլուխս խո-
նարհած՝
Ողորմած բարեգործիդ կենդանարար ոտքն եմ
համբուրում
Եվ այս աղոթքն եմ ընծայում մեծիդ:

Բ

Աղաչում եմ քեզ, միա՛կ խնամակալ, մարդա-
սեր, գթած,
Կեցուցիչ, հզոր, այցելու, պաշտպան,
Թող ի զուր չանցնեն ինձ համար մարդացած
Աստծուդ փրկարար չարչարանքները,
Ոչ էլ ընդունայն՝ մատնության գիշերը թափած
քրտինքիդ կաթիլն արյունախառն.
Թող չստվերանա երախտիքը լույսիդ,
Որ ձրիաբար, առանց փրկանքի պարգևեցիր
ինձ թշվառացածիս.
Թող չջնջվի շնորհներիդ ավետիսը,

Որ քո կողքից բխած կայլակները նորոգեցին.
 Թող անօգուտ չլինեն չարչարանքներիդ պտուղ-
 ները,
 Որ մատուցեցիր ինձ՝ կարոտյալիս.
 Թող չպարծենա արտաքսված բանսարկուն,
 ինձ՝ ստեղծածիդ սեփականելով.
 Հաղթիր քո կամքով չարի իդերին,
 Թող դարձյալ ապշի մի անգամ արդեն զարհու-
 րածը,
 Թող կրկին դատապարտվի իսպառ դատա-
 պարտվածը,
 Մի՛ խնայիր խոսքդ ազատարար,
 Որ ինձ՝ ստեղծածիդ ընծայելով քեզ, նորից քեզ
 դարձնի:
 Ցույց տվիր անճառ բարերարությունդ՝ հուսա-
 հատության չսպասված ժամին,
 Երբ բոլորովին կտրված արդեն և օտարացած էր
 շարժումը կենդանության:
 Մեռար անմահդ և նորոգեցիր մահացածներին.
 Համաձեռության օրենքի կարգը եթե փոխեցիր¹,
 Ուրեմն դյուրինն ու հեշտագույնը, առավել և
 հնարավորը մի՛ արգելիր դու,
 Ո՞վ սկզբնաձիրդ ողորմածության,
 Բարեմիտ, օրհնյալ և երկայնամիտ թագավոր:
 Ներգործի՛ր խոսքով քո ամենազոր,
 Որով առաջին օրը դու լույսն ստեղծեցիր,

¹ Այսինքն եթե փոխեցիր օրենքի այն կարգը, որ հանցանքի չափով
եր պատժում...

Եվ ես անմիջապես դեպի լա՛վը պիտի փոխվեմ.
Եվ եթե ինքս ջանադիր չեղա հետևել լույսիդ՝
Դո՛ւ ել ինձ այցի, հայրական լույսից ծագած
ճառագայթ:

Թող կանչվեմ քեզ մոտ վնասապարտ ծառաս՝
Քեզանից շնորհ և ողորմություն գտնելու հա-
մար.

Պարտքերս հատուցելու համար ժամանակի
երկարագման կարիք չկա,

Շնորհ արա ինձ՝ տառապյալիս տեսնելու երեսդ՝
Լույսդ՝ խավարում վհատ սրտերի:

Արգելի՛ր, փակիր այն ճանապարհը, որտեղից
զեղուն բարիքները քո

Խույս են տալիս միշտ իմ հիշողության տեսո-
ղությունից.

Քո միշտ մնայուն գանձերի շնորհն ամենապայ-
ծառ պահիր ինձ համար,

Որ ես դառնալով ընտիր, պատվական՝ քո՛նը
անվանվեմ՝

Պաշտպանված քեզնով, անսահմա՛ն բարի:

Գ

Փութա՛ ինձ շուտով ողորմել, գլխած, աղաչում
եմ քեզ,

Ողորմի՛ր հզոր, կրկի՛ն ողորմիր:

Մի՛ փոխարկիր դու չարիքներս երկունքի ցավե-
րի, ո՛վ համակ բարի,

Մի՛ վերցնիր վտանգվածիս քո կողմից պարզե-
ված չնորհը.

Մի՛ խլիր փշումն ամենաօրհնյալ հոգուդ.

Մի՛ լուծիր խնկելի կնիքն արքունական քո
պատկերի:

Սրբված սրտիս մեջ թող չհայտնվեն մեղքերի
փշեր:

Մի՛ խզիր քեզ հետ սիրույս ամրապինդ կապը
միության.

Մի՛ զլանար ինձ լեզվի ճարտարություն՝ վայե-
լուչ ու ճոխ ճառելու համար.

Մի՛ պակասեցնի արժանիքն աջիս, որպեսզի
լույսիդ մասունքը բաշխեմ:

Մի՛ գրիր ծանր մահացու մեղքերս կյանքի
դպրության քո մատյանի մեջ.

Մի՛ պահիր, մի՛ համարիր իմը,

Մի՛ հիշեցնի, մի՛ ամաչեցնի,

Մի՛ նախատիր, մի՛ ոտնահարիր,

Մի արձանագրիր մեղկություններս,

Մի՛ կորստաբեր գործերս ամբարիր,

Մի՛ որպես մեղադրյալ ամբաստանիր ինձ,

Մի՛ աճեցնի ինձ հետ ծառն անեծքների,

Մի՛ արձակիր իմ մեջ վնասակար սաղարթ.

Մի՛ ընձյուղիր մեղքերի ծաղիկ և մի՛ թողնի, որ
պտուղ բերի նա.

Մի՛ դնիր իմ առաջ պարտքերիս թուղթը:

Մի՛ թվիր երկնաստեղծ մատներիդ ճյուղերի
վրա՝ գործած մեղքերս.

Մի՛ ահեղորեն ընդդիմախոսիր՝ անօրենությունս
հիշատակելով.

Մի՛ հանձնիր կամքիս հոգուս ավանդը՝ գերե-
վարելու.

Մի՛ փառավորիր ինձ այստեղ, որպեսզի այնտեղ
չդատապարտես.

Անցավոր կյանքի այս նվազագույն, սին հա-
ճույքներով՝

Մի՛ տուժել տա ինձ՝ հավիտենական բարիքներն
անբավ.

Մի՛ չափիր փառքը անվերջանալի՝ այս ժամա-
նակի կարճատեռությամբ.

Մի՛ գրավ դնի կյանքըդ անարատ՝ իմ վշտահա-
ռաչ հովտի փոխարեն.

Մի՛ փոխանակի քո անճառելի լույսը՝ մթամած
այս ստվերի հետ.

Մի՛ թողնի մտքիս երասանը դու, որպեսզի չեր-
թա՝ մ զարտուղի ճամփով.

Մի՛ համարիր բավ հանգստիս համար՝ կամուրջն
աշխարհի.

Մի՛ պահիր հովիտն իմ խոհեմության ստվերի
ներքո, որ հանդերձյալում չհրապարակ-
վեմ:

Եթե ամբարես չար գործերս անթիվ, կմեռնեմ
ողջ-ողջ.

Եթե սրտիս մեջ շտեմարանես՝ այժմվանից ան-
բոց պիտի այրվեմ.

Եթե անօրեն արարքներս դու քննության առնես՝

Առանց քո առջև ելնելու՝ պիտի հալվեմ ես իսպառ
Եթե մեղքերս թողնես, որ ինձ հետ տնկակից
աճեն՝ նրանցով պիտի մաշվեմ, սպառվեմ:

Դ

Ի՞նձ նայիր, զորե՛ղ ամենակարող,
Որ չարություններս փախուստ տան ինձնից, և
գա քո բարին փոխարինելու:
Հրամայիր, գթա՛ծ, խնամակալ, գովյալ, լո՛ւյս
անշիջելի,
Որ զորությամբդ անհուն նորոգվի հաստատա-
պես
Բնական կառուցվածքն անդամների՝ մարմնե-
ղեն իմ տան,
Որպեսզի այնտեղ անհեռանալի բնակվես բազ-
մած
Եվ հանգստանաս հաճո տենչանքով՝ քեզ հետ
իմ հոգու ամուր միությամբ:
Ապականությունն իմ մեղքերի իսպառ հեռաց-
նելով,
Անարատությա՛մբ վերակազմես ինձ,
Ամենակեցույց թագավոր անմահ, Տե՛ր Հիսուս
Քրիստոս,
Օրհնյալ հավիտյանս. ամեն:



Բան ՀԹ-

Սրբի Խորհերից խոսէ Ըստություն ՀԵՐ

Ա

Հիշի՛ր, Տե՛ր գթած և արդարասեր, Աստվա՛ծ
ճշմարիտ.

Նայի՛ր վերստին քո ստեղծածին, որ սխալական
է իր բնությամբ.

Զննիր ինձ դարձյալ՝ շրջանառությունն իմ ար-
յան, ահա՛,

Որ տարածվում է ամեն ուղղությամբ:

Մոտեցիր դու ինձ բժշկի նման

Եվ տե՛ս, որ մարդ եմ խակամիտ, թերի իմ խոր-
հուրդներով,

Ինչպես որ ինքդ վկայեցիր¹, չեղածներն անդամ
տեսնող սրտագետ,

Դո՛ւ միայն անմաս՝ ստության մութին:

Ապա ուրեմն իրավացի է, որ դասվեմ կարգն
այն մեղավորների,

Որոնք իբրև երկրածին մարմին մահականացու
Վրիպել են մարդկորեն սխալվելով և դատա-
պարտված են կրկնապես,

¹ Ծննդ. Ը. 21

Քան թե ուզենամ՝ խոսքդ սուտ դուրս գա:
Քանզի արդարև դու ինքդ էլ գիտես,
Թե չար է ի բնե մեր ծնունդն արդեն և ընդա-
բույս է չարությունը մեր,
Եվ մեր խորհուրդներն անփոփոխ են միշտ,
Հստ հոգեհանճար իմաստունի կանխազեկույց
առակի:

Բ

Թեթևացրո՛ւ սաստկությունն այն տանջանքնե-
րի,
Որոնք պատրաստված՝ սպասում են ինձ՝
Գեհենի որդուս հավիտենական մահվան համար
զարդ դարձնելու ընդմիշտ.
Վերացրո՛ւ մեջտեղից մեղքերս ամոթալի,
Որոնք պահված են՝ վերջին ատյանին հայտնի
դառնալու թշվառականիս:
Ընծայի՛ր խրատդ խաղաղարար¹ նախապարգև
քո ողորմությամբ,
Որպեսզի ահեղ անտանելիներն իր մտքի առաջ
չպատկերանան,
Կենարար զղջման փոխարեն՝ անհույս ապշու-
թյան առաջ կանգնեցնելով ինձ,—
Դատաստանն ահավոր և դատավորն անկաշառ
ու անխաբելի,
Սոսկալի ամոթն ու կշտամբանքը սարսափելի,
Հանդիմանությունն անխուսափելի,

¹ Եսայի ԾԳ. 5

Տագնապն անճողոպրելի,
Պակուցումն անխրախուսելի,
Դողումն անվերջանալի,
Լացն անսփոփելի,
Ատամնակրծտումն անբժշկելի,
Ապականությունն անողջանալի,
Սարսափելի անեծքն աստվածային խոսքիդ,
Փակումն գթության և արգելումն ողորմու-
թյան:
Կգալարվի երկինքն այն ժամանակ,
Եվ կդղրդվի երկիրն իր հատակով
Խռովահույզ ծովի բազմակուտակ կոհակների
պես,
Որոնք փախչում են նախ խուճապահար,
Ապա դառնալով մեկ-մյուսի վրա՝
Խափանում են խոլ ընթացքն երկուստեք ու
կանգ են առնում:
Եվ լայնատարած գետինը այնժամ տարուբերվե-
լով ու տատանվելով՝
Թնդագին բախմամբ կցնցի ուժգին իրենց հի-
մունքից
Լեռները բոլոր ու փուլ բերելով՝ կհարթի նրանց:
Կհալվեն համակ ու կհրդեհվեն քարեղեն նյու-
թերն ու տարրերն ամեն.
Կայլայլվի երկինքն անեղծանելի մի փոփոխու-
թյամբ,
Եվ արարածներն իրենց տարերքով կառնեն մի
նոր ձեւ ու նոր կերպարանք:

Ծածուկ գործերը կհրապարակվեն, ու կհայտնվեն
մեր կրքերն անտես.

Մեր վարքն ու կենցաղն ու ներքինը ողջ՝
Պարզ կնկարվեն մեր մարմնի վրա:
Երկնի թագավորն ատյան կնստի՝ հատուցման
վճիռն իր ձեռքում պատրաստ:

Ուստի և ահա՛, վա՛յ ինձ յոթն անդամ՝ կրկին
եղկությամբ,

Զափով ու կշռով այս նույն համրանքի,
Որը թվերի անբավություն է պարփակում իր
մեջ¹:

Ի՞նչ պիտի անեմ ողբալի հոգիս՝ այդ մեծ օրվա
մեջ ամենաահեղ.

Քանզի առաջուց հիշելն ավելի սաստիկ է, քան
թե հանդիպել նրան:

Ոմն մարգարե² այդ տագնապալից փախուստի
խուճապն անզերծանելի

Պատկերացնում է մեզ առակավոր այս օրինակով,

Թե՛ մի մարդ փախչում է առյուծի ձեռքից,
Եվ պատահում է նրան արջը.

Եվ երբ արջից էլ խույս տալով հասնում և
մտնում է տուն,

Եվ ձեռքը հենում է պատին՝ օձն է խայթում
նրան³:

¹ Հմմտ. «Նարեկ», ԳԼ. ԼԱ

² Ամովս

³ Ամովս Ե. 19-20

Եվ ապա, ավելի սաստկացնելով տեսիլն այդ
քստմնելի,
Ավելացնում է դարձյալ ասելով.-
«Ո՞չ ապաքեն խավար է Տիրոջ օրը»,
«Օր խավարի և մութի, օր ամպի և մառախու-
ղի»¹:

Գ

Երբ կենակից պահապան հրեշտակը՝ հզոր ոս-
տիկանն² իրավամբ կամբաստանի,
Եվ ահավոր հատուցողը կհանդիմանի արդա-
րությամբ,
Թագավորի սպասավորները կաճապարեն
առանց խնայելու
Ոմանց կյանքի հրավիրելով և ոմանց դատա-
պարտելով ամոթի,
Ոմանց ծիծաղկոտ և ինձ ահարկու ու քստմնելի
երես ցույց տալով,
Ոմանց լուսապաճույժ պսակներ մատուցելով
Եվ այլոց՝ վճիռ մահվամբ կորսայան.
Արդարներին ավետավոր լուր և ինձ գույժ
տխուր՝ անվերջ վշտերի:
Մինչդեռ բարիների համար կմեռնի իսպառ
մահվան հաղթանակը,
Ինձ՝ չարագործիս համար կմնա ընդմիշտ տես-
կան.

¹ Սովոն. Ա. 15

² Սաղմ. ԼԳ. 8

Դուռը բախելն այլևս ի զուր կդառնա,
Ու կդադարի գութն իմ նկատմամբ¹:
Զարմանահրաշ գրքերն երբ բացվեն,
Ուր գրված են մեր մինչև հիմա ծածուկ մնացած
բոլոր
Գործերը պես-պես այս կյանքում վարած մարդ-
կային բնության,
Որի համար և գոյություն առան էակներն ամեն,
Այնժամ յուրաքանչյուր մարմնի վրա իսկույն
երեան կզան լրիվ դրշոմված
Եվ երկրավորներիս հասկացողության հանդեպ
կնքված ու փակված բոլոր
Անպատմելի խորությունները, և մեր աչքի
առաջ կպատկերանան²:
Այստեղ է, որ ողբ ու արտասուքով գնվում է
երկինքը:
Իսկ այնտեղ նրանք իբրև ուշ մնացած ունայ-
նություններ՝ կարհամարհվեն ու կմերժ-
վեն.
Այստեղից նախօրոք չառաքված հեծեծագին
հառաչանքները
Այնտեղ լսելի չեն լինի երբեք.
Կշեռքով ցանված ողորմությունները պայծառ
ճրագով ճամփա չեն բանա³.
Այնտեղ տապանը նախահանցավորների և կտա-
կարանը տիրանարգների

¹ Սատթ. ԻԵ. 11-13

² Հայտն. Ի. 12

³ Բ. Կողմթ. Թ. 6


Եվ ահավոր նշանն հիմիկվաններիս՝¹
Հանդես գալով՝ մեծաձայն պիտի դատախազեն:
Այդ նույն սոսկալի վայրում՝
Մեկը հայրենի հաղորդության ուխտը,
Մեկն էլ անտեսների վկայության խորանը,
Մյուսը՝ մեծագործ արյունն Աստուծո
Իբրև իրավացի ամբաստանողներ՝ իմ առջև պի-
տի տարածեն:
Բազմապիսի տանջարաններ ես ինքս անձամբ
այստեղից իսկ պատրաստեցի ինձ համար,
Այլևս ինչպես հուսակտուրս միսիթարվեմ:
Զի եթե նույնիսկ լուսեղեն զորքերն արդարնե-
րի հետ,
Որոնք փառավորված են երանությամբ, սար-
սում են ու դողում
Եվ սիրտ չեն անում նայել ահավոր դատաստա-
նին,—
Ես՝ եղելիս, ավանդակորույս սատակման որ-
դիս, որտեղ կմնամ,
Ես, որ ոչ միայն չպիտի լինեմ պսակի արժան,
Այլև պատուհասն իմ անտանելի և կորուստս
պիտի լինի անսպառ:

Դ

Բայց դու շտապիր, ամենապարգև, անճա՛ռ զո-
րություն,

¹ Այսինքն՝ խաչը, քրիստոնյաներիս

Փրկարար ձեռքդ երկարելու ինձ՝ կորսայան
մատնված գերուս,
Որպեսզի քեզնով օգնություն գտած՝ կրկին ետ
դառնամ դժոխքի դռնից
Եվ բոլորովին ամենապատրաստ՝ պատիմներից
զերծ մնամ, անվտանգ:
Գալիքներն այստեղ մտքի աչքերով նախատե-
սելով,
Բավ համարելով լսել տագնապած՝ տանջանքնե-
րի ձայնն ահեղահամբավ,
Քո բարի կամքով ազատվեմ իսպառ և չմատն-
վեմ առյուծների կորյուններին,
Որոնք խնդրում են քեզանից՝ տալու ինձ իրենց
որպես կերակուր,
Խժուելու գազանային ատամներով,
Որպեսզի լցնելով որովայնը մահվան՝
Այստեղ պարարվածիս քաշեն ու հալեն այնտեղ,
Ուր պահվում են անսպառ մնացորդ մթերքնե-
րը՝
Հավիտենապես լափվելու համար:
Քանզի դու միայն կարող ես կորզել այդ սպա-
ռիչ ժանիքներից
Եվ տանել գեպ կյանք ու երանություն,
Ապավե՛ն բոլորի՝ լույսի թագավոր Տեր Հիսուս
Քրիստոս,
Օրհնյա՛լ հավիտյանս. ամեն:



ԱՐԴԻ ԽՈՐԴԵՐԻ ԽՈՍՔ ԼԱԿԱՆ-ՃՌ ՀԵՅ

Է

Եվ արդ, այսքան հուսահատությունների և
ահարկու սրտաբեկության,

Ահաբեկիչ սաստկությամբ աստվածային բար-
կության ենթարկվելուց հետո,

Թախծալից ոգով, իսպառ տագնապաձ՝

Քեզ եմ աղաչում, սուրբ Աստվածածին,

Հրեշտակ մարդկանց մեջ, մարմնատեսիլ քե-
րովբե,

Երկնավոր արքայուհի.

Անխառն, ինչպես օդ, մաքուր, ինչպես լույս,

Անշաղախ՝ նման բարձր արուսյակի պատկերին
պայծառ,

Գերազանց, քան սրբությունների բնակարան
անկոփելի,

Խոստացված դու վայր երանավետ, եղեմ շնչա-
վոր,

Անմահ կենաց ծառ՝ բոցեղեն սրով պարունակ-
ված¹,

¹ Ծննդ. Գ. 24

Բարձրյալ Հորից զորացած և հովանավորված,
Հանգստությամբ Հոգու պատրաստված և մաք-
րագործված,
Բնակությամբ Որդու հարդարված և տաղա-
վարված¹,

Հոր համար միածին և քեզ՝ անդրանիկ,
Որդիդ՝ ծնունդով և Տերդ՝ արարչությամբ,
Անաղտ մաքրությանդ հետ և՝ անբիծ բարի,
Անարատ սրբությանդ հետ և՝ բարեխոս խնա-
մակալ,
Ընդունի՛ր աղոթքն այս աղերսալից քեզ դավա-
նողիս,
Եվ այն ընծայիր Աստծուն իբրև պաղատանքը
քո,
Խառնելով նրան՝ մեծիդ մատուցված իմ պաղա-
տալից ներբողն առաջին.
Հյուսիր, միացրու դառն հեծությունն իմ մեղա-
վորի
Քո երանելի և նվիրական խնդրվածքի հետ,
Կյանքի տունկդ դու օրհնված պտղի,
Որպեսզի քեզնից միշտ բարերարված
Եվ ապավինած մաքուր մայրությանդ ու լուսա-
վորված՝
Ապրեմ ես Քրիստոս Որդուդ միածին և Տիրոջդ
համար:

¹ Դուկ. Ա. 35

Բ

Օգնի՛ր թեավոր քո աղոթքներով, ո՛վ խոստու-
վանված մայրդ ողջերի.

Որ երբ դուրս ելնեմ այս երկրի հովտից,
Առանց տանջալից չարչարանքների գնամ դեպի
կյանք,

Դեպի պատրաստված օթեաններդ:

Թող թեթև լինի վախճանն իմ, զի ես ծանրացել
եմ խիստ անօրենությամբ,

Օրն իմ տագնապի դարձրու ինձ համար տոն
ուրախության,

Դու, որ բուժեցիր երկունքն Եվայի:

Խնդրի՛ր, աղաչիր ու բարեխոսիր,

Զի անձառելի մաքրությանդ համար հավատում
եմ ես՝ խոսքդ կընդունվի:

Արցունքով օգնիր դու վտանգվածիս, գովյա՛լդ
կանանց մեջ.

Ծնկաչոք խնդրիր հաշտությանս համար, ծնո՛ղդ
Աստուծու.

Հոգատար եղիր թշվառիս հանդեպ, խորա՛ն
բարձրյալի.

Զեռք տուր ընկածիս, տաճա՛ր երկնային.

Եվ փառավորիր Որդուդ քեզանով,

Որ աստվածորեն հրաշագործե ինձ ի քավու-
թյուն և ողորմություն,

Ո՛վ դու Աստուծու աղախին և մայր.

Բարձրանա պիտի պատիվդ ինձանով

Եվ փրկությունն իմ՝ ցույց տրվի քեզնով:

Գ

Եթե ինձ գտնես, տիրամա՛յր,
 Թե ինձ ողորմես, սրբուհի՝,
 Թե կորուսյալիս շահես, անարա՛տ:
 Եթե խրտնածիս խնամարկես, երջանի՛կ,
 Եթե ամոթահարիս առաջ տանես, բարեշնո՛րհ,
 Եթե միջնորդես հուսահատվածիս համար, մի՛շտ
 սուրբ կույս,
 Եթե մերժվածիս ընտանեցնես, Աստծո՛ւց մե-
 ծարված,
 Եթե ցույց տաս ինձ գթությունդ, լուծի՛չդ
 անեծքների,
 Եթե տատանյալիս ամրապնդես, հանգի՛ստ,
 Եթե հուզումներս ու խոռվքներս հանդարտեց-
 նես, խաղաղարա՛ր,
 Եթե մոլորյալիս մի ճար գտնես, գովյա՛լ,
 Եթե ինձ համար մտնես ասպարեզ, մահվա՛ն
 նահանջիչ,
 Եթե դառնությունս անուշացնես, քացրու-
 թյո՛ւն,
 Եթե բաժանման արգելքը քանդես, հաշտու-
 թյո՛ւն,
 Եթե անմաքրությունս վերացնես, եղծմա՛ն ըն-
 դուտնիչ,
 Եթե փրկես ինձ՝ մահվան մատնվածիս, կենդա-
 նի՛ լույս,
 Եթե իմ լացի ձայնը կտրես, բերկրությո՛ւն,
 Եթե խորտակվածիս կազդուրես, կյանքի՛ դար-
 ման,

Եթե կործանվածիս մի ակնարկ գցես, Հոգելի՛ց,
 Եթե ողորմությամբ ինձ պատահես, նվիրակա՛ն
 կտակ,
 Օրհնյալդ միայն երջանկալեզու անբիծ շուրթե-
 րից,
 Ահա կաթիլ մի կուսությանդ կաթից
 Մեջս անձրեւելով՝ կյանք է տալիս ինձ,
 Ո՞վ դու մայր բարձրյալ Տիրոջդ-Հիսուսի,
 Երկնի և համայն երկրի արարչի, որին ծնեցիր
 դու անձառորեն,
 Բովանդակ մարմնով և ամբողջովին իր աստվա-
 ծությամբ,
 Որ փառավորված է Հոր և Սուրբ Հոգու հետ
 Էությամբ համակ և անքննությամբ մեր բնու-
 թյան հետ միացած,
 Ամենայն է նա և ամեն ինչում, երրորդությու-
 նից մեկը,
 Նրան փա՛ռք հավիտյանս
 Հավիտենից. ամեն:





Բան ԶԵ

Սըդի խորհերեց խոսէ Ասպո-ծո Հետ

Ա

Աստվածածնի մաղթանքների հետ ընդունիր,
ո՛վ բարեգութ,

Ե՛վ աղերսագին խնդրանքներն, ահա՛, անմահ,
լուսակերպ հրեշտակների,

Որոնք ինձ համար մաքուր բերանով գոչում են
անլուռ

Հանապազօրյա բարեխոսությամբ:

Բարի են նրանք բարերարիցդ միշտ բարեգործ-
ված,

Եվ ամենիշխան էիդ հրամանով ստեղծված՝ հա-
վետ անընդել չարին:

Նրանք բարձրյալիդ զորքերն են հզոր՝ խոսքիդ
միշտ պատրաստ.

Սուրբ են ու մաքուր, անարատ, օրհնյալ,

Վայելուչ, հաղթող և անպարտելի,

Եվ արագաշարժ՝ մտքի տեսության ընթացքի
նման:

Բ

Բարեխոսներ են նրանք, մատակարար և խնամակալ,—

Աշխարհիս այգում արմատավորված
Եվ երեք երկար ու ձիգ տարիներ դատարկ մնացած,

(Որ հավերժական ժամանակն է պարունակում իր մեջ՝

Անցյալը, ներկան ու ապառնին),

Այն թզենու, որ պաղագուրկ էր, պաճուճված միայն սին սաղարթներով,

Որ ձիշտ պատկերն է թշվառ մարդկության:

Նրանք մեր շուրջը դեգերում են միշտ, կարեկ-
ցելով մեզ

Եվ ուզում են, որ լինենք բախտավոր.

Եվ կենդանությամբ հավիտենական՝ աղոթում
են մեր փրկության համար,

Այս խոսքն ասելով՝ «Քո ձեռքի գործը մի՛
անտեսիր դու»:

Արդարեւ մերն է այս աղաչանքը,

Բարերար Աստծուդ կողմից մեզ համար՝ նրանց
սահմանված.

Զի նրանք ստեղծված են խոսքով,

Իսկ մենք ձեռքով ենք ստեղծագործված:

Նրանք հատուցման ահավոր դատաստանին
գալու են որպես վկաներ՝

Միածնիդ հետ՝ ճշմարտաբան դատախազներ լի-
նելու երկրայիններիս հանցանքներին,

Եվ ահավորի ատյանի առաջ՝ իրավախնդիր՝
Հաշվետու պիտի լինեն մեզ համար.
Թեև այնտեղ էլ մեզ կարեկցելով՝
Հնչեցնեն պիտի իրենց մշտանվեր երգն հառա-
չաձայն.—
«Ողորմիր, ո՞վ Տեր, դո՛ւ ստեղծեցիր, դու մի՛
կորցնի»:

Գ

Արդ, անմահների գոհաբանության խնդրանք-
ների հետ
Մեր հեծություններն էլ հոտոտիր, Արարի՛չ
ամենայնի,
Որ քո գթությամբ գերազանցում ես երկնային-
ներին ու երկրայիններիս,
Զի դու ես բարերարում թե՛ մեզ և թե՛ նրանց:
Եվ արդ, անախտներն այդ ահա՛,
Հրակերպներն հրաշատեսիլ, մաքուրներն
անխառն,
Անմեղներն ու բոցեղենները, հոգեղեններն ու
անհաղթները,
Շնորհիվ իրենց անարատ բարեզարդության,
Բարձր ազնվության ամենազարդացած առավե-
լությամբ
Եվ գերափայլ ու ճոխ գիտությամբ,
Որպես ջերմեռանդ աստվածասիրության ինք-
նաբուն տապի
Անցուրտ ջերմությամբ ջեռուցանողներ,

Իրենց պես և մեր սառը սրտերի անբորբոք շիւ
ջումն են հրահրում հար,
Որպեսզի նրանք այրվեն անաղոտ՝
Մեծախորհուրդ սուրբ սեղանի վրա՝ այս խորա-
նի մեջ,
Առանց նիրհելու և դանդաղելու, սպասելով
միշտ
Ամենաստեղծիդ կեցուցիչ կամքի երանելի հրա-
մաններին,
Աստծուն միացած անբաժանելի՝ քերովբեական
առաքինությամբ:
Պետություններ են նրանք երկնավոր,
Եվ զինվորներ են ահավոր, անբիծ,
Երկնավոր Աստծուդ պաշտոնյաներն են ազա-
տագնյա,
Լուսեղեն ամպիցդ շողերի ցոլքեր:

Դ

Ուստի հողեղեն մեղավորիս էլ մարդասիրաբար
ողորմիր, Հիսուս,
Աղաչանքներովն իմ հրեշտակի, դարձնելով
ինձ, Տե՛ր,
Դեպի քո բարի, լուսավոր ճամփան,
Որպեսզի հոգուս ավանդը, որի պաշտպանու-
թյունը նրա տեսչությանը վստահացար,
Որը նա քեզնից ընդունեց այստեղ, այս աշխար-
հում դեռ,

Ինձնով բերկրալից և ուրախ սրտով, քեզնից
 օրհնված,
 Անմեղադրելի, խնդալից դեմքով ու կենսա-
 զվարթ՝
 Քեզ՝ անհաս փառքով բարձր արքայիդ,
 Հավերժ կենդանի հրեշտակներիդ ամենաուրախ
 խրախճանքներում
 Ընծայաբերի, գովյալ ողորմած:
 Քեզ՝ անքննելուդ, Հոր և Հոգու հետ անհաս և
 անճառ
 Վայելում են փառք, պատիվ,
 Երկրպագություն հավիտյանս. ամեն:





Բան ԶԲ

Սըմի խորժերեց խոսէ Ասպածու Հետ

Ա

Տե՛ր Աստված բարերար, բազմապարգև թագաւ-
գոր,
Կենաց պատսպարան, լուսո կերպարան, լայն
հանգստարան.
Որ մեղավորիս համար մարմնացար,
Անպատում գործեր կատարեցիր դու ու շատ
հրաշքներ,
Մինչև հասցըիր կատարելության՝ մարդեղու-
թյունդ
Քո ամենալիիր աստվածության հետ:

Բ

Արդ, հանուն երկնաստեղծ ձեռքովդ ձեռնադր-
ված
Եվ քո Սուրբ Հոգով օծված սրբազան առաքյալ-
ների,-
Որոնց արժանի գովեստն ես արի մի այլ գրված-
քում, ըստ կարողությանս¹,

¹ Ակնարկություն «Ներբողյան գովեստի ասացյալ ի համորեն

Քո փառքի համար,Տե՛ր ամենայնի,-
 ի՞նձ էլ ողորմես, հիշելով սելըդ, որին դու
 նրանց արժանացրիր:
 Նրանցով ելքի շավիդ ցույց տուր ինձ դեպի
 երանությունը փափագելի:
 Նրանց հովվության բարի ձայնը թող քաղցր
 հնչի ինձ, զերթ կենաց ողջույն:
 Անեղծ փրկության հույսի մեջ ե՛ս էլ բաժին ու-
 նենամ՝
 Կյանքի առաջնորդների հետ,
 Պատվի այդ շնորհն առաջին անգամ ստացող-
 ների,
 Փառավորյալ խմբերի,
 Բանական գետերի,
 Բարձրաձայն ավետողների,
 Պանծալի իշխանների,
 Լուսապայծառ թագով պճնվածների,
 Զորավոր շնորհի անկապուտ զարդով պայծա-
 ռացածների,
 Տիրական լույսի զվարթարար յուղով կատար-
 յալների հետ:

Գ

Եվ արդ, ո՛վ բարձրյալ Քրիստոս Աստված,
 Մեծ պատվիրանիդ աշակերտների հետ,

գունդս առաքելոցն երկոտասանի» իր ճառի, որը գրել է նախքան
 «Մատյան ողբերգութ.»:

Հարգելով նրանց աղոթքներն հաճու և ընդունելի,
 եվ արյունընծա, վաստականվեր ու քրտնա-
 կնդրուկ
 Աղերսանքները նահատակությամբ ընտիր
 ճանաչված մարտիրոսների,
 Որոնք մահացու և մշտաչարչար մարմնով
 իրենց,
 Վտանգավոր և ամենակիր անդամներով,
 Երկրավոր և հողազանդված բնությամբ
 Բոլոր նյութեղեն գոյությունների ու տարրերի
 հետ կոխվ մղելով՝
 Պսակվեցին, բարձրացան և կենդանացան հոգե-
 պես,
 Եվ արիաբար ելնելով երկրից, ըստ մարգարեի¹,
 Դարձան ճշմարիտ վկաներ ամենափորձ մահ-
 փան,
 Եվ աշխարհում իսկ նրանք նկատել կարողա-
 ցան պարզ՝
 Իմանալի, անտեսանելի ու ծածուկ,
 Բայց և աներկբա հույսով տեսնվող բարիքներն
 ամեն.
 Նրանք՝ աշակերտ և չարչարակից առաքյալնե-
 րին,
 Իրենց գործերով, կատարյալ լրմամբ նրանց հա-
 վասար՝

¹ Եղիայի (Բ. Թագ. Բ. 11)

Պարում են հիմա խրախճանքներում, անսահմանափակ երանության մեջ,—
Ըստունիր և ի՞նձ, որպեսզի ես էլ նրանց պես
ընդմիշտ
Հաստատվեմ քո մեջ անեղծ փրկությամբ:

Դ

Նրանց հետ, որոնք արյունով ներկված՝ անցան
կը ակի ու սրի միջով՝
Կան քեզ հետևող, Որդի՛դ Աստուծո, և սրբակենցաղ հայրեր մենակյաց,
Որոնք անպարտելի քաջությամբ և անպատիր
զգաստությամբ
Արիաբար մարտնչելով դժնյա և գոռոռող մարմնի բոնության դեմ,
Անմարմին Բելիարին հալածեցին.
Եվ աշխարհային կյանքի ասպարիզում, մշտամարտ մրցությամբ,
Առանց ծանրաբեռնվածության տաղտկության,
Լայնածավալ աշխարհի ալեծուփ ծովից
Թոցնելով թեթև հոգիներն իրենց մարմնի ծանր
տապանակով՝
Նավահանգի՛ստն հասան կյանքի.
Եվ, որպես վերին վիճակի սիրահարներ, առանց
հետինների վրա մտածելու¹,
Հաղթանակի թագն իրենց գլուխուղի դրին համարձակորեն,

¹ Փիլիպ. Գ. 13

ՊՃՆՎԱԾ ԽՍԿԱՎԵՍ պայծառ ճոխությամբ:
Այդ սուրբ հայրերի աղոթքներով արժանավոր և
խնդրանքներով նվիրական,
ՆՐԱՆՑ հետ՝ քեզ մոտ ընդունիր նաև ինձ՝ մե-
ղավորիս:

Ե

Արդ, վերոհիշյալ երջանիկների փառաբանա-
կան աղերսների հետ,
Որոնք ինձ համար են գոչում, բարձրյա՛լ, քեզ ի
հաճություն,
Ահա ես էլ իմ անմաքուր խոսքերն եմ խառնում՝
այնպես,
Ինչպես քաղցրության հետ տրված դառնու-
թյուն,
Կամ փուշ՝ փափկության հետ,
Տգեղություն՝ վայելչության հետ,
Տիղմ՝ գեղեցիկ մարգարտի հետ,
Կամ հող՝ զուտ ոսկու հետ,
Կամ անարժեք քարեր՝ պայծառ արծաթի հետ,
Բացասություն ճշմարտության հետ,
Կամ ատամնառու ավագ՝ հացի փափուկ զանգ-
վածի հետ:

Արդ, լսիր, հզո՛ր, ձեռնհաս, գովյալ,
Նրանցը ինձ համար, իմը՝ նրանց,
Նրանց ի գովեստ, ինձ ի փրկություն՝ քո փառ-
քի համար,
Ամենագութ, բարերար, օրհնյալ և երկայնամիտ,

Կարող, անքնին, անեղծ, անստեղծ և անճառելի,
Քոնն են պարզեներն ու շնորհները,
Դու ես սկիզբն ու պատճառը բոլոր բարու-
թյունների:

Չե՛ս դատապարտիչ, այլ ազատարար.
Չե՛ս դու կորուսիչ, այլ գտնող.
Չե՛ս մահացուցիչ, այլ ապրեցնող.
Չե՛ս տարագրիչ, այլ ժողովող.
Չե՛ս մատնիչ, այլ փրկող.
Չե՛ս ընկղմիչ, այլ վեր հանող.
Չե՛ս գլորիչ, այլ կանգնեցնող.
Չե՛ս անիծիչ, այլ օրհնող.
Չե՛ս վրիժառու, այլ ներող.
Չե՛ս թշվառացուցիչ, այլ մխիթարող.
Չե՛ս ջնջում դու, այլ գրում ես.
Չե՛ս սասանեցնում, այլ հաստատում.
Չե՛ս ոտնահարում, այլ սփոփում.
Չե՛ս հորինում դու պատճառներ մահվան, այլ
հնարներ ես փնտրում կենաց.
Չե՛ս ձգտում սատակեցնելու, այլ՝ փրկելու
ողորմածաբար:
Չե՛ս մոռանում այցելությունդ,
Չե՛ս լքում բարին.
Չե՛ս արգելում գթությունդ.
Չե՛ս տալիս վճիռ կորստյան, այլ ազատության
կտակ:
Չե՛ս թշնամանվում առատաձեռնությանդ հա-
մար,

Եվ շնորհներիդ համար չես բամբասվում.
Չե՛ս հայհոյվում պարզեներիդ համար,
Եվ ձրի ընծաներիդ համար չես նախատվում.
Չես անգոսնվում երկայնամտությանդ համար,
Եվ ներելուդ համար չես պարսավվում.
Չես բանսարկվում բարությանդ համար,
Եվ քաղցրությանդ համար չես անպատվվում.
Չես արհամարհվում հեզությանդ համար:
Եվ սրանց համար ոչ թե տրտունջներ,
Այլ անլոելի գոհաբանություններ են առաք-
վում քեզ:

Վերցրու մեղքերս, հզո՛ր.
Լուծիր անեծքներս, օրհնյա՛լ.
Քավիր պարտքերս, ողորմա՛ծ.
Ճնջիր հանցանքներս, գթա՛ծ.
Օգնիր ինձ մատովդ, և իսկույն պիտի լինեմ կա-
տարյալ.
Ի՞նչ կա քեզ համար, Տե՛ր իմ, սրանցից ավելի
դյուրին,
Եվ մեղապարտիս համար ավելի կարևորագույն:
Ուստի քո ստեղծած պատկերիս վրա, ո՛վ բա-
րեխնամ,
Կենդանագրի՛ր դու նորոգող դարձյալ և լուսա-
վորող,
Մաքրագործ շնորհիդ փչումն շնչի,
Բազմամեղ հոգին իմ պաշտպանելով:

Ω

*Մի՛ արագացնի, ողորմա՛ծ, կարճ ժամանակում,
օրս տարաժամ,*

*Որ չլինի թե անպաշար ու ձեռնունայն ընկնեմ
ես երկար ու անվերջ ճամփա.*

*Մի՛ տար ինձ բաժակ դառնությամբ լեցուն՝ ծա-
րաված ժամին.*

*Մի՛ փակիր իմ դեմ հաջողությունը հոգեոր օգ-
տիս,*

*Եվ հանկարծադեպ ասպատակների նման ահա-
վոր՝*

Թող չպատահի մահվան գիշերն ինձ.

*Տապը տոթակեզ, անպատրաստ պահին, թող
չկտրատի արմատներս ու չչորացնի,*

*Ոչ էլ լուսնական դիպվածները թող վրաս հա-
նելով՝ գաղտնի վնասեն.*

Թող իմ մեջ մեղքի սառույց չպահվի,

*Ոչ էլ աշխարհիկ կյանքի ուղիսերի հոսանքները
ինձ ողողեն, տանեն,*

Թող որ հանգիստն ինձ մահ չբերի,

Եվ ոչ էլ նինջը սատակման առաջնորդի.

Թող քունն ինձ կորստյան պատճառ չլինի,

Եվ ոչ էլ նիրհը ապականություն առաջ բերի.

*Թող որ վախճանը անպատեհ ժամի չարշավի
վրաս,*

*Եվ ոչ էլ շունչս վեր բարձրանալիս՝ ցած ընկնի
ինչ-որ արգելքի առած:*

Է

Դո՛ւ ես Տեր, դո՛ւ գթած, դո՛ւ բարերար,
Դո՛ւ երկայնամիտ, դո՛ւ ամենակարող,
Դո՛ւ անճառորեն զորավոր՝ ամեն անհուսու-
թյան,

Քավելու, փրկելու, կենագործելու,
Լուսավորելու և վերստին ամրացնելու,
Գաղանների գիշատիչ ժանիքներից կամ վիշապ-
ների ատամներից ի կյանս կորզելու,
Խոր անդունդներից բերկրալից լույսին բերելու,
Եվ մեղքի հորձանքներում խեղդվելուց ազատե-
լով՝

Երջանիկ արդարների հետ փառքով բազմեցնե-
լու:

Ամենայն հոգի ակնկալու հույսով քեզ է սպա-
սում՝ կարոտ քո շնորհին,


Թե՛ երկնայինները և թե՛ երկրավորները,
Թե՛ մեղքով ընկածները և թե՛ արդարությամբ

ոտքի ելածները,
Թե՛ տեր, թե՛ ծառա, թե՛ տիրուհի և թե՛ աղա-
խին.

Եվ քո ձեռքումն է բոլորի կենդանական շունչը:

Եվ քեզ՝ Հոր և Սուրբ Հոգու

հետ փա՛ռք հավիտյանս. ամեն:



Բան ԶԳ

Սըրի խորժերից խոսէ՛ Ըստու-ծո Հետ

Ա

Բարձրյալ անքնին, զորություն ահեղ, Տեր արա-
րածոց,
Թագավոր երկնի, ստեղծիչ հրեշտակաց, մտքի
գոյարան,
Հաստիչ հրեղենների, հոգիների բարի պետ,
Ապավինության աջ, հանգստավետ անդորրու-
թյուն,
Լուսալիր տեսություն, պայծառություն բերկ-
րալից,
Երանության ճամփա, կեդանության պատճառ,
Բանականության առիթ,
Անվտանգ փրկություն,
Առաջնորդ խաղաղության,
Պարիսպ ամրության, պահպանության պատվար,
Յանկապատ բոցեղեն՝ մեծագույն օրհնություն¹,
Անոխակալության սահման,

¹ Զաք. Բ. 5

Այս ողբերգության մատյանում գրված խոսքե-
րովն իմ խոստովանական՝
Մարդկային ազգի մեր թշնամիներին նույնպես
բարությամբ հիշիր,
Եվ տուր կատարյալ քավություն նրանց և
ողորմություն։

Մի՛ բարկանար, Տեր, դու նրանց վրա, որպես
սրբերին բամբասողների,
Դեպ ինձ ունեցած մեծ սիրույդ համար և իմ
պատճառով,
Այլ իբրև չարեր կշտամբողների և իրավաբար
նախատողների՝
Ների՛ր նրանց հանցանքները։
Թե՛ ես, թե՛ նրանք եթե միասին ելնենք քո
առաջ, ով արդարադատ,
Գուցե և ոմանց մեղքերը մեր դեմ շա՛տ սակավ
լինեն
Եվ բամբասանքները՝ իրավացի.
Իսկ իմ՝ դեպի քեզ, ամենապարզե, ուխտազան-
ցության օրինակները
Բազում են, անթիվ և անկշռելի։

Բ

Արդ, նայելով, Տեր, անարգիս վրա, հիշի՛ր մե-
ծությունդ.
Եվ երբ քեզանից բարիք խնդրեմ ես իմ ատող-
ներին,

Դու նրանց համար, որ քոնն են դարձյալ, ըստ
քո մեծության,
Հրաշապես անճառ բարիքնե՛ր գործիր:
Չսատակեցնես ինձ խայթողներին, այլ ուղղի՛ր
նրանց,
Գյլելով խոտան բարքերն երկրային,
Բարիներն արմատացնես դու թե՛ իմ և թե՛
նրանց մեջ:
Մանավանդ որ դու լույս ես ու հույս,
Իսկ ես խավար ու խենթ.
Դու ի բնե բարի ու գովելի,
Իսկ ես՝ չար համակ ու ապիկար,
Դու Տեր համորեն երկնի և երկրի,
Իսկ ես չեմ իշխում չնչիս և հոգուս
Դու բարձրյալ ազատ՝ կարիքներից զերծ,
Իսկ ես ենթակա տաժանքի, վշտի.
Դու վեր երկնային կրքերից բոլոր,
Իսկ ես կավ անարգ ու գարշելի.
Դու հար կմնաս անհասանելի բարձրության
վրա, ըստ մարգարեի,
Իսկ ես, ըստ նույնի, կկորչեմ ընդմիշտ.
Քո մեջ նենգություն կամ խավար չկա,
Իսկ ես, որ ավանդն իմ չպահեցի, այդ բոլորն
էլ եմ:
Հանի՛ր ինձ բանտից, արձակի՛ր կապանքներից,
Պոկի՛ր ինձ պրկող իմ շղթաներից,
Փրկի՛ր խեղդվելուց,

Ազատի՛ր տագնապներից, քանդի՛ր երկաթներից,
Հա՛ն ինձ պաշարումներից, դուրս բեր երկմտությունից,
Հանգստացրու նեղություններից.
Փարատիր վշտերս, սփոփիր տիսրություններս,
Հանդարտեցրու խռովություններս,
Ամոքիր լացս, ցրիր հեծություններս,
Հեռացրու ինձ իմ ողբերից ու կազդուրիր լաւուց,
Աստվա՛ծ ողորմության և պարգևատու քաղցրության,
Հզորիդ արյան գնով փրկվածիս անտես առնելով՝ զուր մի՛ կորցնիր.
Կանգնեցրո՛ւ դու ինձ, որ բազմավտանգ հիվանդությունից մահվան ա՛փն եմ հասել:

Գ

Ահա՛ բարդվեցին և կուտակվեցին ընդունայն անցած տարիներն իմ ողջ Ա՛յն օրից, երբ որ աշխարհ եկա ես, որպես անպիտան,
Դեռ անդաստանից իմ մոր արդանդի՛ մեղքերի դժնիկ փշեր ծլեցնելով.
Մի՛ լինիր ինձ խայթոց խոցոտիչ, ինչպես որ եղար Հուդայի տոհմին և կամ Եփրեմի զավակի համար¹:

¹ Ովսեն Ե. 12

Եվ քանզի հոգուս մեջ բարեսերմ ցորենի փոխարեն,
Խայթող, թունավոր ու թմրեցուցիչ խոտեր
բուսացը ու տնկեցի ես,—
Հստ գրոց խոսքի՝ Ավետարանից էլ առաջ ասված,—
Ինչպես չկոչեմ անձն իմ գարշելի դաշտ ու
անդաստան՝
Խեղդված՝ մեղքերի անիծաբեր փշերով:
Արդարություն չմերմանեցի ես, ըստ Ովսեի,
Էլ ինչպես պիտի հնձեմ կենաց բերքն ու այն
հավաքեմ,
Մաքուր իմ հոգու կուսական ստինքները թառամեցին,
Ինչպես որ մարդարեն իսրայելի համար է
ասում,
Բայց դու կարող ես, Տեր, նրանց կրկին նախկին
տեսքը տալ:
Հուղայի մոլի բարքի համաձայն
Ընդարձակեցի կամքիս մահիճը հոմանի դևերի
համար¹.
Քո ձեռքն է դարձյալ ամփոփել այն, Տե՛ր, նույն
զգաստությամբ:
Եթե մարմնապես կցորդությունը տեսնողի հետ
պոռնիկին դարձրեց անբիծ, անարատ²,

¹ Եսայի ԾԷ. 8

² Ովսեն Ա. գլուխ

Իսկ դու, փրկությո՛ւն, միանալով ինձ հոգեպես՝
կրկի՛ն կմաքրագործես:
Եթե արեգակն այս անկենդան,
Որ ստեղծել ես դու մատակարար մեր երկրի հա-
մար,
Ցամաքեցնում է ճահիճների ցեխն ու խակ
պտուղներ է հասցնում,
Իսկ դու ստեղծի՛չդ ամենայնի, Հոգիդ Աստուծո,
Ո՞րքան ավելի պիտի կարենաս չարիքների
տիղմն աղտեղի
Եվ մեր մեղքերի աղծապիդ թարախն իսկույն
սպառել:
Դրա համար է, որ ես խոսքերիս կարգին շտա-
պեցի
Թշնամիներիս համար նույնպես բարին հայցել
քեզանից,
Որպեսզի մահապարտությամբ հեռացված հան-
ցավորիս
Զգցե՛ս հզորիդ ամենախնամ աչքից, օրհնյա՛լ
գթություն:
Արդ, կենագործիր ամենամեղիս՝ մարմնիս
անդամներով, հոգուս բնության հետ,
Որպեսզի ես միշտ քեզ վրա խորհեմ:
Բարեգործներին բարիք խնդրելը օրենք է բնու-
թյան,
Եվ մենք այդ բանը անում ենք կամքով մեր
անբոնադատ:

Քանզի արդարեւ այդ մի պատվերդ կարող է
ամեն հասակ կատարել,
իսկ երկրորդի գործադրումը նույն սիրով հո-
գատար՝
Նշանակում է նմանվել Աստծուդ:
Այդ իսկ պատճառով գերադասեցի թշնամինե-
րիս բարիք ցանկանալ,
Քան երախտավոր բարերարներիս համար
աղերսել:

Դ

Եվ արդ, մեկի տեղ կրկնակի անդամ հիշեր դու
նրանց,
Որոնք անարժանիս քո բարձրագույն անունով
ընդունեցին.
Եվ տուր դու նրանց, Տե՛ր ամենառատ, բարե-
րար և անոխակալ,
Վարձը արդարի և մարգարեի¹,
Թեպետև զուրկ եմ ես բոլորովին արժանիքնե-
րից,
Բայց նրանք ըստ իրենց հավատքի և հուսալիր
ակնկալության,
Ողջամիտ կամքով են նայում ինձ պես պատժա-
պարտ գերուս,
Որպես թե հոգուս փակ պահարանում կեցուցիչ
մասունքդ ունենամ լրիվ:

¹ Սատթ. Ժ. 41

Եվ դու անսահման գթությամբ մոտենալով մեղավորիս,-

Որ անկարող է պահվել քո տեսողությունից
Եվ կամ խույս տալ կշեռքից ուղիղ, անխարելի,-
Մաքրե՛ս, որպեսզի չխայտառակվեմ մեծ դատաստանում:

Եվ ինչպես որ ինձ ուզում են պատվել վայելուչ
շուքով սիրելիներդ քո անվան համար,

Կրոնափորի գգեստիս բարեձեռությանը նայելով,
Անգիտակ գաղտնի իմ արատներին՝ երանի են
տալիս եղկելուս,-

Դո՛ւ էլ, հնարավո՛ր, ամենապարգև, օրհնյալ
մարդասեր,

Ողորմո՛ղդ բոլոր արարածներին հավասարա-
պես,

Ամենաթշվառիս հեծության համար հաշտվիր
նրանց հետ, ըստ իրենց հավատքի,

Ընծայիր նրանց, տուր որպես պարգև մեծու-
թյունդ անեղծ

Եվ քո պսակը հավերժ անթառամ՝

Ամեն ինչ քննող ու պարզաբանող մեծ դատաս-
տանի վերջին օրն ահեղ:

Ե

Ահատնում ու անվատնելի գանձերի մեծ ու
փրկարար

Գրավականն ես դու ստրուկիս համար ու սով-
յալիս,

Եվ մենք այդ գանձերն հոգուդ երկնքի ի գործ
դնելով՝ հարստանում ենք խոսքիդ համա-
ձայն¹:

Տեղ սահմանիր ինձ հանդարտ ջրի մոտ²,
Ամրացրու իմ մեջ, անփոփո՞խ, հաստատուն
վստահություն.

Կարգիր ինձ համար, օրհնաբանվա՛ծ, անկաս-
կածելի հույսի ամրություն.


Տուր ինձ, ամենախնա՛մ, անաչառ պաշտպանու-
թյուն,

Սասանյալիս՝ բարի անդորրություն,
Տարակուսյալիս՝ լուսո ապավինություն,
Ողբալուս՝ մեծ երջանկություն,
Վհատյալիս՝ կենաց օգնություն,
Լքյալիս՝ հաստատուն օժանդակություն,
Նահանջածիս՝ անսայթաք վերընթացություն:
Զի քոնն են բոլորն, ու դու ես տվիչն ամենայնի.
Եվ քո ձեռքով է բաշխվում այն ամենն, ինչ
անհրաժեշտ է մեր կյանքի համար:



¹ Դուկ. ԺԹ. 13

² Սաղմ. ԻԳ. 2



Արդի Խորհերից խոսչ Ըստու-ծո Հեղ

Ա

Երկնավո՛ր արքա, բարձրյալ թագավոր,
 Տե՛ր գու բոլորի և ամենքի հույս,
 Արարիչ տեսանելիների և հոգեղենների հաս-
 տիչ,
 Պատճառ եղածների և կազմող լինելիների,
 Տվիչ լույսի, առիթ առավոտի, պատրաստիչ
 վաղվա,
 Երևացնո՛ղ երեկոյի, հորինող խավարի,
 Արվեստավոր բարեհնար, իմաստության գոր-
 ծիչ,
 Քավարան օրհնյալ, հալիչ մեղքերի, հալածիչ
 ցավերի,
 Լուծիչ դառնության, պահպանարան հանգստի,
 Հնարիչ նիրհի, կարգավորիչ քնի, պարգևիչ
 նինջի,

Կարգավորիչ շնչառության, զգայության տևողությունն,

Ցրիչ ցնորքների, բարեկարգիչ անուրջների,

փոխարկող գարհուրանքի,

Փոփոխիչ տիսրություն, խափանիչ խայթումների,

Կասկածների փարատիչ, ծփանքների հանդարտիչ,

Ահաբեկություն խարդախների, դեերի հարվածիչ,

Ախտերի փախուցիչ և ընկղմիչ գայթակղությունների:

Բ

Պաշտպանի՛ր ձեռքովդ երկնաստեղծ,

Զորացրո՛ւ աջովդ բարձրացած,

Ամփոփի՛ր թեերովդ ամենակալ,

Ծածկի՛ր խնամքովդ աստվածային,

Ամրացրո՛ւ վերնայիններիդ վերակացությամբ,

Շուրջանակի պարսպիր անմահներիդ գումարտակներով,

Ընդդիմամարտին իմ կանիր զվարթուններիդ

զինվորներով,


Պատսպարի՛ր սասանյալիս Աստվածածնիդ

մաղթանքներով,

Անդրանիկներիդ բանակներն ինձ բարի պահապան կարգիր:

Բաց արա աչքերիս հետ նաև տեսանելիքները
մտքիս,
Զգաստացրու շնչիս հետ նաև դանդաղությու-
նը ծանրաբեռն իմ կրքերի,
Վերացրու թանձրամած հիմարությունն իմ
զգայարանքների, Տե՛ր,
Վերցրու թանձրությունն իմ ծածկույթի¹, միա՛կ
բարեգործ:
Լույսը բացվելիս՝ ողորմությունդ էլ ծագիր ինձ
վրա,
Եվ արևի հետ՝ քո արդարության արեգակը թող
մտնի սիրտս նեղ.
Փառքիդ ճառագայթը մտքիս խորհրդարանում
թող ջահավորվի.
Եվ խաչակնքումը խաչիդ՝ մարմնիս և հոգուս
մեջ թող տարածվի՝ համասփյուռ:
Քեզ եմ հանձնում այսօր քո հորինած տաղա-
վարը՝
Այնտեղ բնակվող պահապան հոգուս հետ միա-
սին.
Զի դու ես Աստված անքնին,
Ամենակարողդ ամենքի համար և ամեն բանում
բովանդակապես,
Օրհնյա՛լ հավիտյանս. ամեն:

¹ Մարմնի



Բան ԶԵ

Սըդի խորժերէց խոսք Ըստու-ծո Հետ

Ա

Եվ քանզի զվարթ արթնությունը մեր նինջ ես
համարում,

Իսկ լոռությունը խոր թմրության մեջ՝ ի քեզ ու-
նեցած

Ուղիղ հավատքի համար՝ աչքերի ակնթարթ
բացություն,-

Ուստի հոգուդ իմաստությամբ ուղղի՛ր հաջող-
վածքն իմ ձեռնարկածի,

Որի համար ահա աղոթում եմ ես մաղթանքնե-
րիս հեծեծագին ձայնով:

Զորացրու ինձ, Տե՛ր, ճգնավորական բարենպա-
տակ իմ վաստակի մեջ,

Կարեկից եղիր իմ տկարությանն ու թեթևացրու
սկիզբն աշխատանքիս:

Արագացրու առաջադրված այս ձեռակերտս,
մշտապե՛ս կարող,

Դյուրացրու նրա ընթացքը դեպի ավարտում
լրիվ:

Բերկրությամբ հասցրու ինձ գործի վախճանին,
Արա՛ այնպես, որ ժամանակին հասնեմ նպատա-
կիս,

Ուղեկից եղիր իմ ճանապարհին,

Բարձր թռիչքով դեպի օգտակարն ինձ շտա-
պեցրու,

Աջ կողմս կանգնիր ամենածանր վտանգի
դեպքում,

Հսեցրու ձայնդ անձկությանս պահին,

Կորստյան ժամին ձեռքովդ փրկիր,

Ներգործիր մատովդ, երբ որ նեղն ընկնեմ.

Հարթիր արգելքներն ամենաչար խափանման,

Հոգեղենիդ առաքմամբ, ինչպես Ամբակումին,
ի՞նձ էլ ճար արա,

Խոսք չնորհիր ինձ ատյանում, կանգնած՝ բազ-
մության առաջ,

Իմաստություն դիր իմ մեջ, երբ դեմ-հանդիման
կանգնեմ քննության:

Կամքիդ ամպով հովանի եղիր ինձ հրաշապես,

Ու հանդարտեցրու քո կենաց փայտով մրրիկն
իմ ծովի,

Սանձիր երկրային կենցաղի պատկերը քո հրա-
մանով.

Զի եթե դու, Տե՛ր, ողոմությունդ կամենաս
ցույց տալ,

Կոհակներն այդ լույծ կարծր կլինեն ավելի, քան
քար,
իսկ եթե զլանաս խնամքող ցամաքում՝
Ամուր գետինը, որպես անկայուն, փուլ կգա իս-
կույն մեր ոտքերի տակ:

Բ

Հնդունի՛ր, Հիսուս, ձեռնարկությունն այս պա-
ղատանքներիս՝ քեզ ի հաճություն,
եվ ամենակասկածելի սայթաքումն իմ փոխար-
կիր մեծ վստահության:

Ինչպես ջրհեղեղի ամենակործան դարում,
Ովքեր գետնի հարթ տարածության վրա
ապրում էին անհոգ, առանց երկյուղի,
Ողորմությունիցդ զուրկ մնալով՝ կորստյան
մատնվեցին.

Իսկ հովանավոր լաստի երերուն հատակի վրա
Գթածիդ անվամբ ապավինվածներ պահպանվե-
ցին,—

Այդպես, նրանց հետ և ինձ մշտերեր աղաչա-
վորիս

Մարդասիրաբար ազատիր և տար դեպի խաղաղ
նավահանգիստ:

Հոգեոր շահի վարձն ինձ հետ բերելով,
Եվ իմ բազմաթիվ և ստորաքարշ մեղքերս թո-
ղած,

Քո առակավոր խոսքի համաձայն, քեզ եմ գա-
լիս, Տե՛ր,

Միանալով քեզ հավերժ անբաժան, օրհնյա՛լդ
համակ:

Եվ կցորդելով այս մաղթանքներին հոգեղեն-
ներն ամենամաքուր

Մարտիրոսների հետ այն հողեղեն, որոնք փորձ-
վեցին հրով ու ջրով,

Եվ մեր փոխարեն խնդրեցին քեզ այս աշխար-
հից ելնելիս,

Եվ մեզ հիշատակ թողին օգտակար,—

Մեզ ձայնակցելով, միայն ասեն՝ թող լինի՛,
լինի՛:





Բան ԶԶ

Սրբի խորչերեց խոսի Ասպո-ծո Հետ

Է

Բազմագանորեն շարահյուսված այս հառաջա-
գին ու տիբրաթախիծ ողբերի փոխարեն
Ողորմի՛ր բոլոր հոգիներին դու, թագավո՛ր գով-
յալ և երկայնամիտ,
Եվ առավել ևս նրանց, որ չունեն կենաց փրկու-
թյան ակնկալություն,
Ինչպես և նրանց, որոնք ննջեցին ի մահ
անպատրաստ՝ յուղի պակասից հանգած
լապտերով։
Ուստի և հիշի՛ր, Տեր իմ գթառատ, և այդ պատ-
ճառով տուր ինձ իրավունք,
Թե ի փառս ահավոր և սքանչելի մեծիդ՝
Մարդու կազմվածքը բաղադրեցիր դու իրար
հակառակ տարբեր տարրերով՝
Մեկը ծանր և մյուսը թեթև, մեկը սառն և մյու-
սը ջերմ,
Որպեսզի մենք այդ ներհակություններն հարթ
պահելով միշտ՝
Նրանց համերաշխ հավասարությամբ կոչվենք
արդար։

Եվ այսպես, առաքինաբար, երբ հոգու հետ
բարձրանանք,
Զմոռանանք և մեր խոնարհությունը կավի վե-
րաբերմամբ

Եվ ընդունենք պսակ ճգնավորական:
Եվ սակայն, ուխտազանց եղանք այս կանոնի
դեմ,

Զիջելով կառուցվածքին մեր հողեղեն՝ անասնո-
րեն սողալով կպանք երկրին՝

Մեկն իր ախտերով, մեկն անգթությամբ,
Մյուսն ամենաբաղձ կերակուրների իր մոլու-
թյունով,

Որպես մշտաբույծ գաղան շարունակ կապված
մնալով մեր ընդության հետ:

Պատահում է մերթ, որ մեկը այդ չորս տարրե-
րից մեր մեջ,

Անողոքելի, անգուսպ սլացքով ոստնելով ի
դուրս,

Ամբարտավանում է վայրենապես:

Եվ այսպես եթե տաքանանք մենք քո սիրո ջեր-
մությամբ,

Մեր մեջ գտնվող բոցի նշխարով,
Ցուրտը առընթեր և կենակից նրան՝ կասեցնե-
լով այն, ընդմիջում է բարուն:

Եթե էությամբ հրեշտակային օդաճեմ դեպի քեզ
թևել ուզենք,

Այս առաջնաստեղծ հողեղեն նյութի ծանրու-
թյունը հոծ

Մեզ քաշելով կխափանի մեր թռիչքը իսկույն:

Բ

Արդ, ամեն կողմից պարտված ու լքված,
Որպես ապիկար, հաշմված՝ մերժվեցի, կորա,
քշվեցի.

Եվ մաշված իսպառ բազում մեղքերից ի մահ
գլորվեցի.

Որի համար էլ պարզեներից զուրկ՝ ողորմու-
թյան կողմն եմ նայում,

Եվ ամոթահար երեսով ե՛ս էլ, որ տեր եմ ամեն
տեսակ մեղքերի,

Աղերսում եմ քեզ բոլոր կենդանի մեռյալների
հետ,

Զի կարող ես միշտ մի հնար անել ինձ նման մե-
ռած ու կորածներին.

Ամեն ինչի մեջ զորավոր ես դու.

Եվ մանավանդ որ կարենալուդ հետ՝ և՛ կամե-
նալն է քեզ ախորժելի:

Գ

Եվ արդ բարգավաճ ու կենսանորոգ շնորհներն
այս երկու,-

Կամենալն ու կարենալը իրար մոտ գալով,

Կվերանա անհույս վհատությունը բոլոր մեղա-
վորների

Եվ կդա այնժամ, կհասնի շուտով հոգիներ բու-
ժող

Քո հրամանի լույսն ավետավոր, Տե՛ր ամենայնի,
Օրհնյալ հավիտյանս. ամեն:



Ա

Եվ ահա, քանզի այս ողբերգության կտակը հա-
մեստ հասել է իր ավարտին,
Արա՛ այնպես, Տե՛ր, որ ինքնանախատ կշտամ-
բանքների այս խոսքերիս հետ
Վերջ գտնեն նաև ու դադար առնեն սովորու-
թյուններն իմ չար:
Դու ինքդ հուսաղրեցիր դատապարայալիս,
ասելով՝
«Հայրս չի ուզում, որ կորչի մեկն իսկ այս փոք-
րիկներից»,
Եվ դարձյալ, թե՛ «Հորս կամքն է, որ չկորցնեմ
բոլոր ինձ հանձնվածներին»:

Բ

Ահա՛ օրհնված ես դու գթության մեջ,
Քարեբանված միշտ՝ քաղցրության մեջ,
Խոստովանված՝ երկայնամտության մեջ,
Եվ ճանաչված ես այցելության մեջ.
Քարոզված Տեր ես դու փրկության մեջ,
Եվ ներբողված ես առատության մեջ,

Պատված ես պաշտպանության մեջ,
Փառավորված ես փրկության մեջ,
Երկրպագված՝ անբավ բարձրության մեջ,
Պաշտված ես անքննության մեջ,
Գովյա՛լդ միակ՝ հաղթության մեջ,
Հոչակված՝ հզորության մեջ,
Խնկավորված ես ողորմության մեջ,
Համբուրված՝ անճառ հեզության մեջ,
Ճաշակված ես դու խոնարհության մեջ:
Եվ քեզ հետ նաև ծնողդ երկնավոր՝ Աստված
բոլորի միսիթարության,
Ընդ որում և Սուրբ ու Բարի Հոգիդ,
Դու, որ սահմանեցիր չանտեսել ընկած գրաստը
թշնամու
Եվ անբանությամբ սայթաքած մարդուն:
Հզորիդ ինձ ցույց տված երախտիքներն ու
առաքինությունը մեծիդ
Փառաբանողներն անվերջ անդադար տոնում
են բարձրում,
Որոնց հետ, ուշադրությանդ արժանացնելով և
այս ձայնն աղերսական՝
Ընդունե՛ս այն դու մարտիրոսների պաղա-
տանքներով,
Իբրև հաճելի և անուշ բուրմունք,
Եվ այս հաշտարար խոսքի փրկանքով՝
Պարտքերը նախնյաց և աներեւոյթ վերքերը բո-
լոր,
Հոգին ու մարմինը մահացնող միջիններով ու
վերջիններով,

Ներքիններն ու արտաքինները, դրոշմներն ու
բիծերը¹

Եվ հատվածների խարանները ողջ բժշկիր, ամե-
նակարող,

Ողորմությանդ գեղերով ջնջելով ու մաքրելով
Բազմապիսի խայթվածքների հետքերը ամեն,
Որոնք քեզ համար հաճելինների հետ նմանապես
Յույց կտան նաև գարշելինները մեր բնության
մեջ:

Գ

Եվ եթե հասնեմ խորին ծերության քո առաջ-
նորդությամբ՝ մահվան արժանիս,

Մի՛ լքիր ինձ տկարությանս մեջ և մի՛ անարգիր
մազերս սպիտակ,

Մի՛ կորացնիր կործանվածին և կքյալին մի
իջեցնի,

Մի՛ ցած բերի խոնարհվածին և առկայծյալին
հողմի չնչին մի՛ մատնիր,

Մի՛ բաց թողնի գեղեռղին և մի՛ մրսածին՝ անվե-
րարկու

Թող չմնա տագնապյալն անդարման, ոչ էլ
խարխլված տունը՝ անխնամ.

Թող չանպատվվի պատկերն հնացած, և պա-
րարտությունը չանհամանա.

Թող որ չանարգվի շուքը չնորհի, և հնությունը
չքամահրվի,

Թող չալեկոծվի հոգուս նավն, ու հույսի երկա-
րությունը չկտրվի,

¹ Միջին ներկա, վերջին ապագա, ներքին հոգեկան, արտաքին
մարմնական և մյուսները:

Թող ուղղալարը չխզվի, ու չխանգարվի հիշություններ,

Թող չքայքայվի մարմնի կազմությունն, ու
բարձրացող թևերը չփետտվեն,

Զվարթ գեղեցկությունը չտգեղանա, չքաղվի
պայծառ ճաճանչը շողի,

Պատուհաններն աչքերիս չփակվեն և ոչ էլ
նրանց լույսը խափանվի,

Թող չընկնի պատկերը խոսուն:

Աղաչում եմ քեզ, բարեգո՛ւթ, ու պաղատում
եմ բոլոր սրբերով,

Լսիր այս ամենն իսկ հիմիկվանից, որպեսզի
վերջում չմոռանաս:

Դու եղար ինձ առաջնորդ և ազատարար, ըստ
սաղմոսողի,

Հանիր նաև ինձ երգողի հետ, Տե՛ր, կասկա-
ծանքներից ու վարանքներից,

Որոնցից սաստիկ վախենում եմ ես:


Թեև արժանի չեմ սովորական կերակուրն ան-
գամ ստանալու քեզանից որպես վարձք,

Բայց դու սովոր ես և կարող նույնպես ապե-
րախտներին էլ բարեգործել,

Քոնն են ամենայն բարիքներն անճառ ու
զարմանալի

Հրաշագործդ միայն՝ կատարյալ երկայնամտու-
թյամբ:

Օրհնյա՛լ ես դու Հոր և Սուրբ
Հոգուդ հետ հավիտյանս. ամեն:



Բան ԶԵ

Սրբի խորժերեց խոսէ Ասպոս-ծո Հեղ

Ա

Եվ ահավասիկ, կոտրված հոգով, սաստիկ հու-
սահատ,
Խորտակված սրտով առջեղ եմ թափում ջուրը
իմ կամքի, կաթիլն արցունքի,
Հիշեցնելով արեմաթացի Սամուել մարգարեին¹,
Որ առնելով ջուրն սկավառակից՝ թափեց քո
առջե, ո՞վ ամենատես,
Ցույց տալու համար ժողովրդին, թե խոստովա-
նությամբ և հնազանդությամբ
Պետք է ընկնել գարշապարներիդ կենդանարար:

Բ

Եվ արդ, ընդունի՛ր այս աղիողորմ հեծեծանք-
ներով հյուսված խոսքերը,
Եվ այս բանավոր անարյուն զոհի նվերն հոտո-
տիր, թագավո՛ր երկնի.
Սրբիր օրհնությամբ գիրը մատյանի այս ողբեր-
գության,

¹ Ա. Թագ. Է. 6

ԵՎ ՊՐՈՇՄԻՐ ՊՐՎԱԾՔՆ ԱՅՍ ՈՐԱԿԵՍ ԱՐՃԱՆ ՄՇՄՆՅԵՆ
ՆԱԼԿԱՆ՝

ՔԵԿ ՀԱՄԱՐ ՀԱՃՈ ՄՅՈւՍ ՄԻՋՆՈՐԴԱԼԿԱՆ ՄԱՂ-
ԹԱՆՔՆԵՐԻ ՀԵՏ:

ԹՌՈՂ ՈՐ ՆԱ ԸՆԴՄԻՉՄ մՆԱ ՔՈ ԱռԱՂ և ԱԼԿԱՆՅՆԵ-
ՐԻԴ ՀՆԽԻ ՀԱՐՈՒՆԱԿ.

ԵՎ ՀՐԹՈՒՆՔՆԵՐՈՎ ԸՆԹՐՅԱԼՆԵՐԻԴ ԲԱՐԲԱՌԻՇ
ԹՌՈՂ ՆԱ

Ու ՀՐԵՇՄԱԿՆԵՐԻԴ ԲԵՐԱՆՈՎ ԽՈՍՔԻ.

ԹՌՈՂ ՈՐ ՄԱՐԱԾՎԻ ԱԹՈՈՒԻԴ ՀԱՆԴԵՎ և ԸՆԾԱՅՎԻ
ՍՈՒՐԲ ԱՐԱՀԻ ՄԵՂ ՔՈ.

ՔՈ ԱՆՎԱՆ ՆՎԻՐՎԱԾ ՄԱՃԱՐՈՒՄ ԽՆԿԱՐԿՎԻ և
ԲՈՒՐԻՇ ՓԻԱՓԻԴ ԱԵՂԱՆԻ ՎԲԱ.

ԹՌՈՂ ԱՎԱՀՎԻ ՀԱՐՈՒՍԱ ՔՈ ԳԱՆՃԱՐԱՆՈՒՄ և ԹՌՈՂ
ԱՄԲԱՐՎԻ ՍՏԱԳՎԱԾՔԻԴ ՄԵՂ.

ԹՌՈՂ ՈՐ ԱՎԱՄՎԻ ԱՊԳԵՐԻՆ Ի ԼՈՒՐ և ԺՈՂՈՎՐԴԻ
ՀԱՄԱՐ ՔԱՐՈՂՎԻ.

ՊԱՏԿԵՐՎԻՇ ԹՌՈՂ ՈՐ ՄՏՔԻ ԴՈՆԵՐԻՆ և ԳԳԱՅԱ-
ՐԱՆՔՆԵՐԻ ԱԵՄԵՐԻՆ ՄՊՎԻ.

ԻԲՐԱ ԿԵՆԴԱՆԻՇ ԹՌՈՂ ԱՎԱՄՎԻ ՆԱ ԻՄ ԳՈՐԾԵՐՆ
ԱՆՕՐԵՆ Ու ԽՈՍՄՈՎԱՆԻ.

ԵՎ ԹԵՎԵՏ ՈՐԱԿԵՍ ՄԱՀԱԳՈՒ ԱԼԻՄԻ ՎԱԽճԱՆՎԵՄ
ԵԱ,

ՍԱԼԿԱՅՆ ԱՅՍ ՀԱՄԵՍԱ ՄԱՏՅԱՆՈՎՍ ՄԻՉՄ ԱՆՄԵՌ
ԿՄՆԱՄ:

ՔՈ ԿԱՄՔՈՎՇ ԹՌՈՂ ԱՅՆ ԱՆԵՂԾ մՆԱ, ՏԵ՛Ր,

ԵՎ ԱՎԱՄՎԱՊԱՐՏԻՍ ՀԱՆԴԵՎ ԴԱՄԱՎՈՐ ԴԱՌՆԱ-
ԼՈՎ ԱՆԴՈՒԼ,

ԱՆԱՀԱՊ ԿՇՄԱՄԲԻՑ, ՀԱՄԱՐՃԱԿ ՀԱՆԴԻՄԱՆԻՑ,

Անխնա պախարակիչ, անողոք պարսավիչ,
Անհամբույր ծանակիչ, անմարդասեր մատնիչ,
Անփրկելի տանջարար, անկաշառ գլխատիչ,
Խստասիրտ հրապարակող, աշխարհալուր բողոքող,
Մեծաձայն փողով, առանց լռելու, անդուլ-ան-
դադար
Իմ հանցանքները թող խոստովանի:

Գ

Այս գիրքն իմ ձայնով իմ փոխարեն պիտի աղա-
ղակի,
Ծածկվածները պիտի բանա և գաղտնիքներն
հրապարակի,
Կատարվածները բարձրաձայն ողբա, մոռաց-
վածները հնչեցնի,
Աներեւույթները պիտի հայտնի, բարուրվածնե-
րը բարբառի,
Դուրս պիտի հանի խորքում եղածներն ու մեղ-
քերը պատմի,
Անտեսները պիտի մերկացնի, թաքցրածները
ցուցահանի,
Սրանով որսերը պիտի շոշափիվեն, գայթակղու-
թյունները գտնվեն,
Անպատմելիներն հանդես պիտի գան և ճզմվեն
չարի մնացորդները:
Քո ողորմության շնորհիվ, Քրիստոս, կյանքը
պիտի թագավորի

Իմ ցամաքած ոսկորների գանձարանի պահեստում,
 Որով կենդանության գարնանամտի արշալույսին, օրը պայծառ նորոգության,
 Շնորհիվ քո ցողի հոգիս աճելով անմահ փրկությամբ
 Եվ անթառամ վերամբարձությամբ իմանալի
 բարիքների ճյուղեր ընձյուղելով,
 Պիտի նորից նոր դալարեմ դարձալ և կրկին
 ծաղկեմ,
 Հստ ներշնչումովդ գրված գրքերի հուսադրության:
 Եվ քեզ՝ միակ փրկչիդ և Հոգուդ՝ իսկակցին քո
 Հոր
 Միասնական Տերությանդ և Երրորդությանդ
 անճառելի
 Խորհրդական գովեստով՝ փա՛ռք և
 երկրագություն հավիտյանս. ամեն:






Բան Զօր

Սրբի խորժերեց խոսք Ասպառ-Ճռ Հեղ

Աստված և Տեր, կյանք և Արարիչ,
Ողորմած, գթած, լույս երկայնամիտ,
Անոխակալ, մարդասեր, ամենագուլթ,
Պարգևատու, փրկիչ,
Օրհնյա՛լ, գովյալ և բարեբանյալ:
Ամուր պահարան, վստահելի պատսպարան,
Բարություն՝ առանց նենգության,
Ճառագայթ՝ առանց խավարի,
Քավիչ մեղքերի, բուժիչ վերքերի,
Անհասներին՝ հնարք, անմերձներին՝ մոտիկ,
Անհուսության ելք,
Անունդ խոստովանված՝ Աստուծո Որդի:
Քեզ և ահավոր ու հզոր Հորդ
Եվ քեզ հետ երկրպագելի ամենակալ Հոգուդ
Փա՛ռք ու պաշտոն գոհաբանության
Հավիտյանս. ամեն:



Բան Դ

Սրբի խորհերեց խոսք Շատու-ժո Հեղ

Ա

Բարեբանյալ Աստված, Երկնավոր, միակ Արա-
րիչ,
Տեր ամենակալ, մեծություն ահեղ, գլություն
օրհնաբանելի,
Ողորմություն խոստովանելի, բարեբարություն
երկրպագելի,
Խնամակալություն պաշտելի, մարդասիրու-
թյուն տոնելի,
Պահպանություն խնկելի, բարձրյալ անքննելի,
Մերձավոր կամարար, ապավեն անկասկածելի,
Միկթարիչ սրտերի, փարատիչ վշտերի, ապա-
քինիչ ցավերի,
Վստահության վախճան, վերացումն պարտ-
քերի,
Փոխարկիչ կարիքների, կարգավորիչ կրքերի,
Հարմարիչ խոսքերի, սանձահարիչ լեզվի,
Պարփակումն շնչի, հաստատիչ հագագի,
Ամփոփիչ խորհուրդների, կրթարան կամքի,

Հանգստացնող հուզմունքների, հանդարտիչ
մըրիկների,
Եվ խաղաղությո՞ւն դու ծփանքների,
Որ բռնում ես իմ՝ իշխանականիս թևերը ամեն
ուղղությամբ թռչող
Եվ իմաստությամբ նվաճելով՝ դեպի քեզ դարձ-
նում:

Բ

Երախտավո՞րդ միշտ գովաբանված,
Դու, որ անհպարտ և երկայնամիտ հեզությամբ
համբեր՝
Անճառ հրաշքով տենչում ես հանգչել մաքուր-
ների մեջ.
Թագավո՞ր բոլոր արարածների, ըստ ամենայնի
ճանաչված, գթած,
Սկզբնահայր և նախաշավիդ՝ սիրո ընթացքի
կյանքի՝ ճանապարհ,
Որ քաղցրությամբ ես առաջնորդում երկնային
լույսիդ դիմողիս.
Պաշտպա՞ն վստահելի,
Որ չես թողնում ինձ սայթաքողս երբեք ի վայր
տապալվեմ.
Հույսի՝ կերպարանք,
Որ ճշմարտագույն գրավականով երևում ես
պարզ քեզ խնդրողներին.
Ապահո՞վ ապավինություն,

Որ չես մատնում երբեք դատապարտության
պատժին.

Ազատություն չնորհածիր,

Որ տալիս ես լիապես առանց փրկանքի ու փոխ-
հատուցման.

Աննախա՞նձ առատաձեռնություն,

Որ ճոխացնում ես հողանյութս անարգ քո ամե-
նասքանչ փառավորությամբ.

Պայծառություն անստվեր,

Որ բարձր ու վսեմ ճառագայթներով պարածած-
կելով թշվառիս՝ դարձնում ես կրկին բար-
գավաճ.

Քավի՛չ մեղքերի ամենատեսակ,

Որ փրկությունից մերժվածիս նախկին պայծա-
ռությամբ նորոգելով՝ դարձնում ես վերս-
տին վայելուչ.

Մեծակարո՛ղ դյուրահաս,

Որ բոլոր անբավ բարձրություններից առաջ ես
անցնում.

Ապահո՛վ ճամփա՝ դեպի խոստացված վայելք-
ներ տանող.

Անձկալի՛ երանություն,

Որի համար հաճելի է թողնել շունչս կենդանու-
թյան, որպեսզի գտնեմ քեզ, մի՛շտ կենդա-
նի.

Կամք անփոխելի, գովյա՛լ զորավոր՝ քավելու
գերուս.

Կյանքի անսխալ դեղ-սպեղանի,

Որ իսպառ եղծված մեռելներին իսկ կյանքի ես
կոչում սքանչելապես.
Աներկբայելի՛ դու ամենաստեղծ,
Որ հրով կիզվածին, հողմով հոսածին և գազան-
ների ժանիքներով հոշոտվածին
Մի ակնթարթում միևնույն մարմնով անպակաս
գարճյալ կկենդանացնես.
Անզուգակա՛ն համարձակություն,
Որի համար աստվածանվեր պարծանքով պար-
ծենալն է իրավացի:

Գ

Զվարթ քաղցրությամբ նայիր ինձ վրա երկն-
քիցդ, Տե՛ր,
ինձ, որ նեղված եմ ամենակործան վտանգների
մեջ,
Եվ հանգստացրո՛ւ սիրտս դյուրապես՝ իր բազ-
մատագնապ հեծություններից:
Վրաս հարձակվող սատակիչներին՝
Դիվական դժնյա հնարքներով սպառազինված
թշնամիներ լինեն նրանք,
Թե տգեղագույն և քեզ ատելի այլանդակ մեղ-
քեր,
Եվ կամ սպառիչ ու կորստաբեր ցավ ու ախտե-
րի հետքեր մնացորդ,-
Մերժե՛ս, դուրս հանես, կտրես, խափանես, հա-
լածես հեռու,

Վոնդես իսպառ և անդառնալի կերպով կորստ-
յան մատնես վերստին.

Եվ կառուցես, կանգնես դու կյանքի որպես
նպատակ ամուր մահարձան՝
Նշանը խաչիդ քեզ ապավինածիս, ո՞վ փրկու-
թյուն.

Եվ ահավոր քո մեծության այս անպարտելի և
անպատիր և անհերքելի հրաշքների շնոր-
հիվ

Թող քանդվեն բոլոր սատանայական որոգայթ-
ները գաղտնածածուկ.

Մեքենայությունները մերկացվեն և չքվեն
գայթակղությունք,

Թակարդ լարողները խայտառակվեն,

Թող երկան գան խայծերն ու ծուղակները նեն-
գավորի,

Վերանան ցանցի ծածկույթները, որոմների ծի-
լերը վառվեն,

Եվ թո՛ղ նզովվեն չարաբանությունները բռնա-
վորի,

Թող կտրվի լարը խաբեռության ի մահ որսա-
ցողի,

Թող կորչեն բանսարկությունները պատրողի,

Թող պակասեն զենքերը զրպարտչի,

Թող ընկնեն սրերը մահաբերների ձեռքից,

Թող սուզվեն սարքերը սադրողի,

Թող արձակվեն պարանները տագնապեցնողի:

Թող այլայլվի կերպարանքը սուտ՝ կեղծավորի,

Թող սանձահարվեն խիստ հարձակումները
խրոխտների,
Թող ցրվեն միաբանություններն ուտիչների,
Թող տրոհվեն տոհմերն ավազակների,
Թող քայքայվեն բույլերը բարբարոսների,
Թող քանդվեն ամրոցներն ապստամբների,
Թող արգելակվեն ամպրոպներն հանդուգնների,
Թող փարատվեն անձրենները փորձողի,
Թող հալվի և ցամաքի եղյամն աղանդավորի:
Թող խորտակվի եղջյուրը գոռողի,
Թող մանրվեն ձողափայտերը կուռքերի դրոշ-
ների,
Թող փշրվեն ամբարհավաճություններն հպար-
տացողների,
Թող նահանջեն գրոհները ճակատողների,
Թող քանդվի՝ միաբանությունը Բելիարի թե՛
անմարմին և թե՛ մարմնավոր զորքերի,
Մի արահետով եկողները թող յոթ ճամփաներով
փախչեն շվարած¹.
Այն գուբը, որ ինձ համար փորեցին, իրե՛նք թող
ընկնեն:

Թող ձանձրացողի ձմեռներն ամառվան փոխ-
վեն,
Թող կտրվի կցորդիչ կապը մշտաջան ավազակի,
Շողոքորթի համբույրն իմ ճակատին թվա թող
նողկալի,

¹ Բ. Օրինաց Ի. 7

Թող ընդհատվեն և հեռանան նետածգություն-ները նեղչի,
Թող սասանման մեջ մնա խարդախի նավը
մշտապես
Եվ խածանողի ատամները թող արմատից քաշ-
վեն:

Դ

Շնորհիվ օրհնյալ քո կենաց փայտի, որին
պրկվեցիր, Աստվածութեան անբռնելի,
Բեեռներիդ հիշատակով, որոնցով մահվան գոր-
ծիքի վրա դամվեցիր, Արարի՛չդ երկնի և
երկրի,
Արյամբդ տերունական, որով որսացիր հսկա
վիշապին, կարթելով նրան,
Դառն լեղիով, որը խմելով՝ ի դուրս թափեցիր
կորուսչի տված թույնը մահաբեր,
Քո սարսափելի չարչարանքների բաղձալի
պատմությամբ,
Որով լրբությունն հակառակորդի լոեցնելով՝
ամաչեցրիր նրան,
Անմեկնելուդ ըստ ամենայնի անհասկանալի
անունով,
Որից դողում են ու դատապարտվում՝ սոսկալով
սաստիկ սարսափումով
երեկի և աներեւոյթ էություններն ամեն,—
Շնորհիդ պարզեներն այս բոլոր խոստովանո-
ղիս համար

Պաշտպանություն, բժշկություն և քավություն
լինեն:

Իսկ մահաբեր ու դառնաթույն այն օձի համար,
Որի միջոցով տեղի ունեցավ չարությունը տիեզերագավ՝

Սատակման պատճառ թող լինեն նրանք.

Նույն ինքը դրանցով՝ կորուստի և անբուժելի
հարվածի

Տանջանքներին մատնվի թող, կապվի և բռնվի:
Ստեղծողիդ ողորմությունն ինձ հետ թող լինի,
Եվ շունչն իմ ոգու միանա քեզ հետ անբաժանու-
րեն ամրապինդ կերպով:

Ե

Եվ ով որ կարդա այս աղեռսածայն մաղթանք-
ների աղոթքները խնդրողական,

Ծեր թե երեխա, կույս թե երիտասարդ և կամ
աղախին,

Ամեն ոք, ով որ աստվածասիրաբար ի քեզ պա-
ղատի,

Թող որ անխտիր, հավասարապես երանության
մասը ընդունեն քեզնից,

Եվ ազատվելով իրենց պարտքերից, արատնե-
րից զերծ՝

Վերահաստատվեն նոր մաքրության մեջ.

Իրենց հոգու մեջ անփոփոխ կերպով նկարելով
քո պատկերը դարձյալ:

Ուստի, տիրապես՝ կարող, զորավոր, անպա-
 տում, անհաս, անիմանալի,
 Տե՛ս ահա, լսիր հառաջանքներն իմ այս հեծեծա-
 գին և աղերսաձայն,
 Որոնք բոլորի շուրթերից քեզ են ընծայաբեր-
 վում՝
 Ի սեր բարերար երկնավոր քո Հոր և քո Սուրբ
 Հոգու
 Կենդանատուիդ և փառակցին քո,
 Աստվածածնի բարեխոսությամբ և աղաչանքով
 բոլոր սրբերի:
 Քանզի բոլորին դո՛ւ ստեղծեցիր և ամենայն ինչ
 քեզանով եղավ,
 Եվ ամեն ինչի դու ինքդ ես տիրում:
 Եվ քեզ, որ մեկն ես անժամանակ Երրորդու-
 թյան իսկությունից,
 Հավասարապես փառավորված ընդմիշտ,
 Փա՛ռք հավիտյանս հավիտենից.
 ամեն:





Բան ՂԵ

Սրբի խորժերից խոսչ Ասպո-ծո Հետ

Ա

Տե՛ր, Տե՛ր գիթությանց և Աստված ողորմությանց,
Անուն մեծատառ, ձայն ահեղալուր, կոչումն
ահավոր,
Համբավ անպարփակ, բարբառ սոսկալի,
Հնչումն հիասքանչ,
Հուսադրություն բարերար, ամենողորմ քաղց-
րություն.
Որից վախեցած սասանվում են ողջ արարածնե-
րը:
Ահիդ պակուցիչ սպառնալիքից՝
Սավառնում են սերովբեները ու քերովբեները
թևամփոփում,
Պարուրվում են պարերը լուսակերպների,
Երկնային բոլոր պետությունները երկնչում
հիազարհուր,

Ու ցնծում են ողջ երկյուղած դողով՝ նավակա-
տիքի բերկրությամբ։
Զարհուրում դեերն ու ընկրկում են գնդերը
չարի,
Զքվում ոգիները խավարասեր,
Անդունդ գլորվում հրեշտակներն օտարի,
Խաչի նշանով խարխափում են հարձակումները
ընդդիմամարտի,
Փակվում են քինոտ ամաղեկացիք բանտի խոր-
քերում,
Անլուծելի հանգուցումներով պաշարվում
խմբերն հակառակորդի,
Մահազենների գումարտակները արգելափակ-
վում զնդանում անզերծ,
Դեերը պրկվում ահեղ հրամանիդ մետաղների
մեջ՝
Հնդդիմախոսներն ամենայն պապանձվում ան-
ձայն,
Աներեւոյթների բազմությունները պարավանդ-
վում են կորստյան հյուծմամբ,
Ու նեղվում անլույծ շղթաների մեջ առաքելու-
թյունք սուտ-քրիստոսների։

Բ

Մթին գիշերվա այս ժամին ահա՛ ձեռքիս մատ-
ներով
Նշանիդ այառնագրությունը քեզ եմ կարկա-
ռում։

Քեզ, որ ոչ միայն չես մթնում անգիտության
խավարով, ո՛վ ամենատես,
Այլև անմատույց լույսի մեջ ես բնակվում ու
հանգստանում:

Աղաչում եմ քեզ գոհաբանությամբ, ընդունի՛ր
դու ինձ,
Ա՛ռ վշտահարիս հզոր թևերիդ պաշտպանու-
թյան տակ,
Փրկի՛ր դրսից եկող պղտոր ցնորքներից,
Մաքրի՛ր սրտիս աչքերի տեսողության զգայա-
րանքը դու,
Կենաց փայտովդ ինձ ամրապնդիր տիսուր
անուրջների դեմ,
Արյունովդ սրսկիր բնակարանիս շուրջ-բոլորը,
Կողքիդ կենարար արյան կաթիլով գծագրիր
ճամփան իմ ելումուտի,
Քառաթերիդ ձևակերպումը թող պահպանարան
լինի երդիկիս,
Ու խորհրդանիշն ամենափրկիչ քո տանջանքնե-
րի,
Թող որ դեպի վեր նայող աչքերիս հանդեպ լի-
նի միշտ,
Զարչարանքներիդ գործիքը թող իմ տան դռան
ճակատին դրոշմվի,
Հավատքն իմ հույսի թող որ օրհնության ծա-
ռից կախվի քո:
Կաշկանդի՛ր դու, Տե՛ր, այդ նշանովդ հոգիների
սատակչին,

Եվ թող ներս մտնի առանց արգելքի պաշտպանը լույսի,
Ցավերիս սաստիկ ծանրության հետ մեղքերիս
բեռն էլ թեթևացրու
Մահճում, մտամփոփ լուարանիս մեջ,
Մտաբերելով հուսահատության պտուղները
դառնահամ,
Խոստովանում եմ ամենագետիդ բոլոր անօրեն
գործերը իմ չար:

Գ

Հանգստացրո՛ւ վաստակյալիս իմ բազմածուփ
աշխատանքից,
Կործանված ոգուս տարակույսների տագնապը
ցըի՛ր,
Դառնությունը վշտերի հետ և հեծությունը ցավերի հետ,
Անձկությունը թշվառությունների հետ,
Հառաչանքները խորտակումների հետ,
Արտաբեկությունը ապշությունների հետ,
Թմբությունը շվարման հետ,
Արբեցությունը հիմարությունների հետ,
Սառելը սիրո և հրաբորքոք ջերմությունը ցոփ-
ցանկական ախտի հետ,
Օժանդակ եղիր՝ ամենատխուր տարտամու-
թյամբ տկարացածիս,
Բարեգործ աջով քո շնորհատու, ձեռքովդ նորո-
գող, մատովդ կենսաբաշխ,

Մշտափայլ փառքովդ, անեղծ մշտակայությամբ, երեսովդ զվարթ,
Պաշտելի էիդ իսկությամբ և բարձրությամբ
երկրպագելի
Կտրի՛ր խեղդվողիս վշտալից հեծեծանքները,
Զարի հնարքը նոր և բանսարկուի խարդավանքը հին,
Օտար դրդումներն ի մահ մղողի,
Անպատճաճ դեպքերն ամենօրյա եղեռնագործի,
Աչքակապ ճարպկությունները դաժան դեմի,
Փաղաքշական բոցաշնչությունը գրավող կախարդի:
Պահպանի՛ր դու ինձ այս մահահանգույն
հանգստյան վայրում
Թաքուն մտքերից, մասնավոր սխալանքներից,
Մեծագույն մոլորանքներից, փոքրագույն սայ-
թաքումներից
Եվ չար խաբուսիկ ձանձրություններից:
Հեռացրո՛ւ հանցավոր ծառայիս զգայություն-
ներից
Խորհուրդներ անդեպ, կրքեր բասրելի, վարք
անարգելի,
Դեպքեր անպատճառ, վրիպելի հետքեր, պատ-
րանքներ ծաղրելի,
Խոհեր անգուսնելի և ավելորդաբանություններ
արհամարհելի:
Քեզ ապավինածիս զինի՛ր անսխալ հոգով և
մաքուր մարմնով՝


Հողմերի շնչից, բուռն հարվածներից,
Փոթորիկների բախումից, մրրիկների պոռթկու-
մից
Եվ գազանների հարվածներից գերծ մնալու հա-
մար:
Երբ փակեմ աչքերս՝ սրտիս նայվածքը թող
չստվերանա,
Այլ զվարթանա, պայծառանա ու վայելչանա,
Փայլի թող քեզ հետ, Տեր Հիսուս Քրիստոս, լու-
սավոր վառմամբ անշիշանելի:
Խոսքովդ մաքրիր իմ ննջատեղին՝
Խորամանկություններից, երկյուղներից,
Քեզ ատելի հիշողություններից,
Աստվածամարտ մտածումներից,
Հանցավոր խենթություններից,
Տիրանենդ անշնորհքություններից
Եվ աստվածընդդեմ պառակտումներից:
Խնամակալ լինես ինձ երկնային քո գնդերով,
պետություններով
Եվ իշխանություններով զորավոր ու անհաղ-
թելի,
Որոնք մաքուր մատակարարներ են սուրբ Աստ-
վածությանդ.
Առաքյալներն՝ ավետյաց Ավետարանով,
Մարգարեներն իրենց Կտակարաններով,
Եվ վերջին օրը երջանիկների քեզ ընծայվող
մաղթանքներով:

Այսժամ երկյուղով և քեզ հաճելի տրտմու-
թյամբ ես պիտի նիրհեմ¹
Եվ քո շնորհիվ բուռն ուրախությամբ արթնա-
նամ կրկին:
Եթե վհատությամբ ննջեմ նույնիսկ.
Հոգեոր բերկրությամբ պիտի հարություն առ-
նեմ դարձալ,
Եթե մինչև իսկ մեղքով ընկողմանեմ,
Պիտի կանգնեմ կրկին՝ մաքուր խղճով և անաղտ
անբծությամբ:

Դ.

Լսի՛ր խնդրանքներն իմ հառաչալից և հեծեծա-
գին, միա՛կ բարեգութ,
Բարեխոսությամբ սուրբ Աստվածածնիդ
Եվ արդարների բոլոր ու ընտրյալ նահատակ-
ների:
Բոլոր կողմերից, քո բարձունքն ի վեր, իմ ձայ-
նով փառք եմ առաքում ես քեզ,
Միշտ սուրբ և անմահ զվարթունների միջոցով՝
ի գովեստ քո Հոր և մեր Աստուծո,
Եվ ամեն ինչի ստեղծիչ և նորոգող Սուրբ Հո-
գուդ,
Հավիտյանս հավիտենից. ամեն:

¹ Բ. Կորնթ. Է. 9



Խորհրդաժողովն և աղաշական պարզաբանո-թյուն
ժամանակի երջանիկ բարեբախտո-թյան փայտի
վերաբերյալ

Ա

Գոհունակությունս եմ հայտնում քեզ, բարե-
գութ,

Միակ մարդասեր, երկնքի ու երկրի արարող,
Կենդանի Աստծու Որդի,

Զարթնած քո հիշատակի սիրո անձկությամբ
Փայտիդ հրավերով,

Որ հնչեցրիր մեր ականջներին.

Եվ սթափվեցինք, ելանք մահակերպ թմրության
միջից,

Կարծես սփոփիչ խոսքի կոչումով՝
Պաշտամունքի և օրհնության ժամին
Հանդիպելու քեզ ցնծությամբ
Այս հատուցման բեմի առջե:

Բ

Փա՛ռք քեզ, ահա, անուն անսահման
Եվ զորությունդ անընդգրկելի,
Որ փրկությունն իմ հոգացիր
Հնարներով բազմաքանակ.

Գոհաբանված անեղծ իսկություն,
 Որ այստեղ հրաշքով կերպարանեցիր
 Նմանությունը գալոց օրերի,
 Որ վայելչական խաղաղ գործիքով այս փայտե
 Որոտացիր սաստիկ, երբ քնած էի անկանգնելի,
 Կարծես ծուլության դանդաղությանը
 Խառնեցիր խրատիդ հանդիմանանքը,
 Հայրական սիրուդ հեզությանը
 Ճայթման ուժգնություն միացրիր.
 Երկու միջնորդի ընդուստ հարվածին
 Քաղցր անձրևեցիր մարդասիրաբար,
 Փափուկ վանկերի մեղմ նիրհի մեջ չընկղմեցիր,
 Եվ կամ անխնա ահավորությամբ
 Տառապած հոգիս չզարհուրեցրիր:
 Երկրպագություն ծնրադրական
 Բոլորի ստեղծչիդ,
 Որ հստակորեն՝ ցուցադրեցիր արդեն իսկ հիմա
 Հայտնության մեծ օրվա ահեղ գոչումը,
 Կենդանացրիր դժոխային անբանությունից,
 Որոնելով կանչեցիր պակասամիտներին
 Ուրախության գինուդ¹.
 Սրան դարձրիր անարատ հարսին հանդերձա-
 վորող
 Փեսայիդ սիրույն.
 Վախ ներշնչեցիր այս փոքր խթանով
 Վիթխարահսկա ապերասանին,
 Կրթիչ ստվար լուծ դարձրիր այս իրը
 Ստամբակի ուսին.

¹ Առակ. Թ. 5

Զարախոսի կզակին զսպող սանձ դրեցիր:
Մեծդ Աստծու անբավ բարձրությունը
Փառաբանյալ է հավետ,
Որ փայտի պարտքերը փոխարկեցիր
Կյանքի շնորհիդ ազատության,
Դարձյալ, վերստին իմաստնացրիր
Ցնդած հիմարիս՝
Հոգեոր քո հանճարով,
Կարկառ կրծտումով
Օձի հարվածի անբուժելությունը
Առանց մոռացման բացատրեցիր,
Երրորդությանդ կերպարանքի հետ
Ինձ վնասողի կապը դարձնում ես եռակի ամուր
Աշխարհի վերջին:

Գ

Ամենախնամ, խունկերի բուրմամբ
Ներբողյան գովք եմ վերառաքում քեզ,
Որ բազմաստվածյան ստապատիր կուռքերից
առավելորեն
Մեղսական հոգիս դարձրիր քո երկրպագությա-
նը:
Խրոխտ, ահարկու, նվիրական այս փայտով
Քարոզեցիր ճշմարտությունը,
Այս պատշաճությամբ մեծացրիր նոր ավետմանդ
պատիվը:
Հենց սա զինավառությանդ բարձրագոչ աղա-
ղակն է,

Կայսրերի երկրի արքա, Տեր Քրիստոս:
Քո մարտի ավարտի ուրախ հանդեսի նշանը,
Հիսուս,
Որով կապկպեց փարավոնը իմանալի.
Տաշած այս շերտը գոռողացած չարագործի
գլխի կատարի
Մշտական նեղիչն է:
Սրանով են Միոնի որդիները խմբվում պատե-
րազմում
Ընդդեմ խավարի աշխարհակալին¹:
Այս հինորյա օծված արձանը աստվածային հրա-
հանգների մի տուն է,
Որ չի հնանում և անխափան է²,
Որ հեռվից եկող նշանն է գալիք հատուցման
ժամանակի—
Ազգակից ու համանման կենաց փայտին,
Որ Աստծու դրախտում է.
Կոչման վայր է շտապ ու բարվոք հավաքումի,
Օրհնության վայր է.
Գիտության տունկի պատկերակիցը՝
Զարի ու բարու ընտրության ունակ,
Եվ մեծ հիշեցում խաչիդ նշանով տյառնա-
գրվելու
Սուրբ Հոգու շնորհով,
Ավետող նախասացություն

1 Եփես. Զ. 12

² ԾԱՌԱՆԴԻ. ԽԸ. 18-19, ԼԵ. 7

Առւրբ թագավորիդ գալստյան հուսով սպասող
դշխոյին.

Մաքուրների խմբի խրախճանության գոտե-
պնդող հորդոր.

Անապական սիրարկու անձնահամբույր միաց-
ման

Շքեղաշուք քողազարդ ամենածին կույս թագու-
հուն.

Հարդարիչը ծածուկ պճնանքի,

Որ հոգու վայելչությունն է.

Եվ նման է Սինայի պատգամին,

Որ դուրս էր հորդում Տիրոջից.

Անարատ որդիների մայր,

Պանծալի ու անշաղախ օրիորդը փառազարդ-
վում էր սրանով:

Դ

Երիքովի եղջերափողից առավել այս [գործիքով]
Գետնամած տապալեցիր Բելիարի բռնությունը.
Փայտե այս պարսով քար արձակեցիր Գողիա-
թի վրա,

Նորոգ գայիսոն կառուցեցիր

Իբրև վկա սատանայի ահեղ կործանման¹

Մեղքի խոր աճած արմատները այս գործիքով
խլեցիր,

Իմ մոռացված հանցապարտ գործերը սրա
երախտիքով ինձ վերադարձրիր:

¹ Հմնտ. Յեսու Ը. 18-19

Թե այն Բան Աստծուդ գալուստը հայտնող այլ
ձայն անվանեմ՝

Չեմ սիսալվի, այլ իրավ կլինեմ
Հոգեկիր նյութի տկար ամանը,
Իսկ Հիսուսիդ մեծագործությունները պատմվե-
լով՝

Կհռչակվեն առավելապես:

Վերուստ պարգևված բյուր օգնություններ,
Որ դու ես տալիս,
Այս անպատսպար ապավինությունից
Ի զարմացումն՝ երկրայիններին տրամադրեցիր:

Ե

Հանրաճանաչ է բարեխնամ մարդասիրությանդ
Անունն անքննելի,

Սրբամասն խորհրդով խնկարկված,

Լույսի կերպարանք անգծագրելի,

Որ այս կրկնաձիր նշանով

Արձակեցիր հեռաձիգ նետեր՝

Զայնատրական և օգագնա և հարմարընթաց,

Կենդանի հոգի իրենց մեջ կրող,

Որոնցով անսխալ դիպուկությամբ

Խավարի աղեղնավորի գաղտնի նպատակը

Հավետ կործանմամբ մերժեցիր:

Իբրև բարձրամուր պատնեշ բերդամարտության,

Կանգուն ու անխորտակելի,

Այստեղից այնտեղ, ուղարկեցիր թշնամու դեմ

Այս փայտի զարկի հունչերը

Իբրև կամարար սուրհանդակներ:

Մեծ ակնարկությամբ քո հրամանի,
Արյանդ խառնված օծության շնորհով,
Հեսանելով սրեցիր մոլի գոռողի խեթկիչ
եղջյուրն այս,
Ինչպես խաչդ փրկական:
Եվ մեծ ազդումից այս աղաղակի,
Երկնայինների ձայնից ավելի
Քանդվեց, վերացավ ամուր դրանդին
Կարճամիտների անվայելուչ երկչոտ վատա-
սրտությունը,
Հրեական պատկերացումների
Եվ ստվերական տան կործանման հետ:

Ω

Վերընծայում եմ փառաբանություն,
Քեզ՝ անմահ թագավոր,
Որ ստեղծեցիր, հաստատեցիր
Աջով քո հզոր,
Աղաչում եմ քեզ, կրկին կատարիր:
Սրանով անցկացրիր՝
Մեզնից հերքելով
Բանսարկուի խորամանկության դժնի վտանգը,
Մեղքի տապը տաժանական,
Եվ դառն հողմը խաբողի շնչման,
Մահվան երկյուղի տարրն արկածների,
Օդի ցնդման վնասակար տխրեցուցիչ հետևանք-
ները,
Թալկացնող դիվական հեծությունները:

Այս հեծանով, որ քո գենքն է,
 Նշանիդ թևերի օժանդակությամբ
 Տրիր վերստին հրածին ամպերը,
 Եվ կարկտաբեր որոտները,
 Բազմոտանի վիշապի փչումի
 Հրախավար կեղծավորության ցավագին ցոլ-
 մունքը,
 Սատակիչ սուրը, հարձակողական մարտը,
 Վայրենի մտքերով գրոհող դևերի պարերը:
 Այս փոքրիկ իրից զարհուրում են [դրանք]
 Ու մեծ դողումով տեղի են տալիս,
 Հին ծանոթությամբ հայտնապես գիտնալով,
 Որ այսպիսի ձայնից է Տերն ելնում դատելու:
 Եվ հոգեպես խրախուսվում են արիությամբ՝
 Ամրապես զինվելով Հոգու սուսերով՝
 Մարտիկները բոլոր աստվածարյալ.
 Այս հիշատակի կանոնով,
 Որ անպատմելի գոչմամբ
 Բոլոր ազգերին կազդարարի
 Երջանկաբար նահատակվելու օրինավոր ասպա-
 րեզում
 Ամեն ինչ փորձող հրի դատաստանը:

Է

Ահա հնչեց ավագ փողը¹,
 Որով համբարձավ Աստված օրհնությամբ,
 Պատմվեց սրանով ամեն մի երկրի,

¹ Եսայի ԻԵ. 13, Սաղմ. ԽԶ. 6

Հնչեց ականջին աշխարհասփյուռ հեթանոսների,

Մեծ [Սիոնի] պահապանների ձայնը բարձրացավ՝

Եսայիի խոսքի համաձայն,

Եվ նույն բարբառով կցնծանք բոլորս¹.

Սրանով խաչի թշնամիները ցնդեցին ջրի առակի նման²

Անպատվեց առաջին փայտի պտղի ճաշակումը,
Խորհրդավոր նյութն այս տոնվեց՝ կոչվելով
կյանքի [փայտ]³,

Անարգվեց երկաթը պատերազմական,
Ինչպես Տիրոջ սրբություն⁴

Զիու սանձի վրա

Մեծ նշանի կենսաձայն փայտն այս հարմարեց-
վեց.

Երկնային հովվի այս օծված ցուպով

Պատյան դրվեց մարդկային ձեռքի իշխանության սուրբը⁵:

Տաճարի վեմին քարտաշի մուրճ չգործեց⁶,

Իսկ աստվածակերտ խորանների մեջ

Փայտն այս նվիրական

Ալանալով խաչի թևերով՝ զորավոր է:

¹ Եսայի ԾԲ. 8

² Ելք ԺԴ.

³ Առակ. Գ. 18

⁴ Զաք. ԺԳ. 20

⁵ Ա. Թագ. ԺԵ. 39-40

⁶ Գ. Թագ. Զ. 7

Ոչ թե ամսագլխին,
 Կամ յոթն անգամ յոթ հոբելյաններին
 Մի անկյունում խափանվելով է փողհարում¹,
 Այլ տիեզերքի չորս ծագերում
 Եվ ծիրերում եզերքների,
 Ծովերի անտակ ջրերի ծոցում ու կղզիներում,
 Մեծ սաստկությամբ,
 Ինչ-որ աստվածային անարգել ճայթումով
 Ավետելով հնչում է:
 Այս փայտի հայտնությամբ
 Կոտրվեցին սատակողի սուսերները,
 Մեզ համար անօգտակարությունից
 Զեափոխվելով խոփերի ու մանգաղների².

Ը

Զհնչեց արձագանք խոր անձավներից
 Եվ ոչ օդը վիրավորելով դժնղակապես՝
 Հստ օտար մի իմաստակի,
 Ոչ անախորժ սրությամբ ականջ մտնելով
 Եվ ոչ ուղեղի ամանը չար տհաճությամբ
 թնդացնելով,
 Ոչ մարմնին ոսկոր խրտնեցնող փուշ բուսցնե-
 լով,
 Եվ ոչ միտք այլայլող ապշություն առաջացնե-
 լով,
 Ոչ պղնձանյութ զանգ հնչեցնելով,

¹ Ղետ. ԻԵ. 9, Սաղմ. Զ. 4

² Եսայի Բ. 14

Եվ ոչ քարը սալարկի հետ տհաճ զարկվելով:
 Նոր այս Սիոնի անխորտակ պարիսպ
 Սա արարչավանդ գլխավոր սպասքներից է,
 Որ քրիստոնյա եկեղեցականները
 Ղետացիների հետ խնամում են զգուշորեն կրե-
 լով,
 Հրեշտակի ձայնի օրինակով,
 Որ առակողի խոսքը այսպես տպավորեց
 Հավքի կանչի նմանությամբ¹:
 Ավետարանի նոր չնորհալի նվագարան՝
 Աստուծո Հոգին առ մեզ արթնացնող,
 Քան թե սաղմոսարանի օրհնությունը եղիսեի
 վրա².
 Նախընթաց սկզբնապարող է նա
 Բարետավիդ ողբերգությանց հարմարալար ջու-
 թակների,
 Բամբոի բառացի բարառնությանց բարքը պատ-
 կերող.
 Մի այլ տեսակի նոր սրինդ տրված մեզ
 Հնի փոխարեն,
 Ոչ թե հեթանոս ուրվաձայն հնչման,
 Կամ հրեական խակամտությամբ,
 Որ Տիրոջ ազդմամբ մերժեց մարդարեն՝³
 «Հեռացրո՛ւ ինձնից»,
 Այլ սիրեց սա ու կրկին պատվեց մաքուր հոգա-
 լով

¹ Ժողով. ԺԲ. 4

² Դ. Թագ. Գ. 15

³ Ամովս Ե. 23

Իբրև ահարկու դեերին ու չար պատահար-
ներին:

Ո-

Եվ արդ, ստացա օրհնաբանությամբ,
Հարգանքով գովեցի սրբության այս տուրքը՝
Ինձ պահպանություն, փառատրություն քեզ,
Քեզ պաշտամունք և ինձ գոհություն,
Անթերի կերտվածք արարչական բարձր փառ-
քիդ:

Աստվածարյալ այդ ձայնը թող մտնի
Հողերս շաղկապող պատվաստի մեջ,
Հանելու հոգուցս դեերի խաբեությունը,
Ստացած անեծքներն ու զագիր մեղքերը:
Այս իմաստավոր առարկան դարձրու
Զահավառ ջնար, անջրելի նամակ,
Անխափան ջատագով քո տերունի տնօրինու-
թյունների:

Ահա սրանով պարգևիր, բարեգութ,
Աղաչում եմ, հզոր,
Մեզ կրկին չնորհիր պահպանություն
Աներեռյթ ու երեելի թշնամիներից:
Ամենալի ձեռք, տուր մեզ,
Որ բաց ես անում և մատուցում ես սիրով բաշ-
իելով
Այլեւայլ բաներ,
Օդի քաղցրություն և անձրեների օգտակարու-
թյուն:

Հստ Քո հրամանի սրա բարբառով թող պակասեն՝

Տապախառն հողմ, ցավաբեր փչում,
Գրոհները չար խարդախ հեների,
Խափանվեն սրանով բոլոր հակամարտությունները

Դժնի մատնիչի զորքերի,

Հալչեն, վերջանան, մեռնեն

Երջանիկ օծյալ այս փայտից որդ և ուտիճ
Եվ բոլոր նմանները,

Որ զորանալով մեր մեղքերից՝

Կովում են մեր դեմ:

Սրանով հույսիդ երանության տունկն արմատացրու

Մեզ պաշտպանելու, ստեղծիչ բոլորի,

Արարածոց Տեր, Սաբեկի ծառն այս,

Որի ոստերից կախված է, քեզանով ծաղկած,
Քրիստոս,

Նոր սուրբ ավանդը արդի փրկության,

Պտուղը կյանքի անվախճանական:

Այս փառատրելի փայտի բարեհունչ ձայնարձակումով

Խորին խավարի անհուն հեռուները փախչեն
Խարդավանող բազմաձեռք ստապատիր ստորնականների

Ներհակ չարքերը:

Ներքին սրանով մեր սահմանների

Ստորագրված, ընտիր-պտղավետ անդաստան-ներից

Եվ քո մշակված կենդանի երկրից՝

Վատնիչ վերքերն ու մորմոքեցնող [միջատի] հույլերը,

Սրանով հատվեն հավելված պատահարները՝

Կրկնագեղ կամ վայելուչ,

Որ գալիս են մեզ չարի հնարներից.

Իսկապես վտարվեն սրանով,

Այն ինքնաստեղծ բաները, որ երկակ մեր բնության մեջ

Վերերևում են իբրև մերձավոր դավաճան,

Մեկին վրիպակ, օտարոտի մտածումներ,

Մյուսի մեջ՝ ապականող կեղտոտ զեռունների գարշ գոյացումներ.

Փրկիր, Տեր Հիսուս, աղաչում եմ քեզ,

Փրկիր, բարերար, ինձ մեկնիր աջդ ամենքից գովված,

Օգնելով սրանով՝

Ազատիր բոլոր թշնամիներից:

Ժ

Հրամանդ թող խառնվի, միանա սրան,

Հիմարացած աղամանդե սիրտս փոխարկելու

Դեպի քո խոսքի արդյունատրություն:

Քո սքանչելի հրաշքի նեցուկն այս

Խփես, միսրճես ծորած սրտերն ու լքված հոգիները,

Ամրապես կազմելով հաստատես
 Ուղիղ, անսասանելի լինելության,
 իսկ անշարժին կակլեցնես, որ զարթնի
 եվ զգաստ լինի հեզ հոգով
 Քո աստվածության պատվիրանի հանդեպ,
 Պողոսի ու Մատթեոսի նման¹:
 Մարդասեր, հիշեցրու այս պատվյալ փայտով
 Երախտիքները քո խաչի,
 Որով անճառ գործեր կատարեցիր,
 Իմ միջից հանիր, ապրեցնող, մեղապարտու-
 թյան վտանգը
 Նոր տապանակիդ պանծալի լծակներով²:
 Հզոր, քո կամքով բացվի կյանքի այս ձայնին
 Սրտի ականջը համառողների,
 Խուլ ականջները լսեն ակնարկությունդ մեծ
 այս բարությամբ,
 Սրա միջոցով պարզվի լեզուն համրացածների,
 Լուսավորվի տեսողությունը աչքերի՝
 Մաքրապես նայելու քեզ անայլայլ պշությամբ,
 Կազդուրվի, զղջա, դարձի գա կամքը ձանձրա-
 ցածների:
 Տեր, տագնապածիս ընձեռելով տուր
 Արցունքի անձրև:
 Սա քեզնով լինի մեզ ցնծության լուր,
 Ուրախության ձայն, բերկրանքի բարբառ,
 Հանգստյան նվագ, քավության առիթ,

¹ Գործք Թ. 1-9

² Ելք ԻԵ. 14

Վշտերի հերքում, խեղդումի խզում,
Եվ արձակություն նեղությունների,
Կրճատում խեթման, հերքում հեծության,
Թառանչումի թեթևացում, կարիքից ապահո-
վություն,
Կրքի կարգավորում, վհատումի սփոփություն,
Բժշկություն ցավերի, հեղդության մեջ համբե-
րություն
Եվ ուշադրություն անտես բաներին:

ԺԷ

Անխոտոր ու անխոտորնակ այս ցանկալի
կամրջով
Եվ վերնաշավիղ բարձր սրբագնա երկնաչու
սանդուղքով
Քո օրհնաբանված, ահեղ անունով Հոր մոտ
տանես,
Բարերար, Հոգուդ առաջնորդությամբ
Միանալու քեզ անբաժանելի,
Որով և սուրբ մեկ ու միակ,
Միասնական տերությանդ
Եվ անեղծ արարչությանդ ստեղծած
Կենդանիներից ու անշունչներից, վայելուչ գո-
հությամբ՝
Փառք և իշխանություն
Հավիտյանս հավիտենից, ամեն:



ՄԵԼԱԿԱՆ ԱՂԻՔ
ԱՐՅԱԼՈՒՅԹ ԱՂԻՔ ՄԵԼԱԿԱՆԻ ԱՂԻՔԻՆ

Ա

Սուրբ և ահավոր անուն անպատում, բարձրյալ,
Միշտ ախորժելի, անձկալի փափագ,
Սրբերգու փառատրողներից միշտ սրբաբան-
ված,

Որ բնակվում ես սուրբ վայրում,
Հի ամենազեղ բարությամբ,
Առատաձեռն աննվազելի,
Հույս բարի և ծագումն գովելի,
Երկրպագված փառավորություն,
Աչեղ և անզննելի, ամեն և ամեն ինչի մեջ:
Դաշն հույսի այս խոսքով
Քեզ միանալու ուխտ եմ անում,
Հզոր, այո՛, ամե՛ն, ալելուիա,
Հանուրի գովյալ թագավոր,
Բոլորի Աստված, գոյերի ստեղծիչ և կամարար
Տեր,

Միակ առիթդ պատճառվածների,
Փրկիչ և օծյալ մշտապաշտելի:

Բ

Ուստի մեկնությամբ պարզաբանելով մեզ համար
Անվախճան այս գանձը ու անփոխադրելի
Հարստությունը,
Հիսուս Քրիստոս, երկնային արքա, որին մեծ
դողով սպասարկում են
Ահեղ անմահների լուսաբերան բոցաշնչությունները,
Խոնարհվելով կամահոժար, անխոտոր մտքով,
Գոհությամբ ծունը եմ դնում, ստեղծո՞ղ էությունների,
Որ կան տեսանելի և ծածուկ:
Որ ես և էիր միակ բովանդակը՝ անպակասելի
ամեննեին,
Մեր [պատկերն] առար, իսկապես համայն,
Որպեսզի քո լրությունից լրացնես,
Օրհնյալ և բարեբանյալ, հավետ ճանաչված,
Միշտ անքննելի ողորմությամբ մեր փրկության
համար,
Ի փառս և գովեստ անճառ բարձրությանը
Ահավոր բարերարիդ:
Սկզբնաձիրդ մեր օծման շնորհի
Մեծախորհություն հրաշագարդության,
Քանզի քո լույսը ճանաչեցինք,
Անհաս ճառագայթ, անսահման ծագում,
Անաչառասփյուռ արեգակ¹,

¹ Մատթ. Ե. 45

Երկակշիռ տարրերի սահմանագատ աստղ,
Ոտքի ճրագ և ընթացքի լույս¹,
Որով այս խոսքիս հարմարության տեսությամբ
Տոնում ենք հրեշտակական պարերգությամբ,
Հստակ մտքով, փրկչավայելուչ կնդրուկով
խնկելով

Ամենիմաստիդ առատ պարգևաբաշխումը,
Անբիծ դավանման զվարթ յուղով:
Քանզի հենց սկզբից կողոպտվեց իբրև շնորհ-
ված

Բարձրագույն շնորհից,
Ողորմելի տիսրությամբ,
Սկզբնաստեղծ հայրն² իմ,
Գերի մեղքերի՝ մահվան մատնվեց,
Անզերծ հանգույցով կապվեց մերժելի ապակա-
նության,
Ծառի պատճառով՝ անկումն անդարձ ամենա-
կործան գլորման,
Լույսից մերժվելով՝ մատնվեց այս խավար վայ-
րին:

Իսկ դու, գթած տեր ողորմության,
Ավելի քան նա ճանաչեցիր նրան, որ ստեղծեցիր,
Չեղածի անկնկալությամբ չմնաց այնտեղ,
Ուր էր նախապես,
Դառնալով անկարող տեսնելու լույսը

¹ Սաղմ. ճԺԸ. 105

² Աղամը

Անսահմանելիիդ վերին անմատչելի գերակա-
յության,
Ոչ թե մշտափայլ հարատև վառմամբ
Տարածեցիր [լույսն] անաղոտ,
Այլ գիշերի մթության մեջ, որ սայթաքում են
ոտքերը,
Զեռք բերիր ձեթն ու պատրույգի նյութին հյու-
սելով՝
Օրինակ տվիր անախտ միությամբ մեզ միանա-
լուդ,
Մարդասիրաբար հյուսելով կազմեցիր.
Որպեսզի կանխակորուստ ծառի պատճառով
Մահու ստվերով տարագրվածներս,
Նրա ազգակից պտղի պատճառով
Զահավորվելով հավատի վառմամբ
Վերստին դառնանք նույն խնկարկության,
Ինչպես որ մահվան փայտին կապվեցիր,
Մեզ նույնպես նրա մոտ տարար կապեցիր,
Մեծ խորհրդի օրինակով միավորվելով կենաց
փայտի հետ¹:

Գ

Արդ, ինչպես օրը թերի է առանց գիշերի,
Նույնպես է տնտեսությունն առանց հարկ եղած
ձեթի,
Քանզի ինչպես սովորական, ոչ նվիրական
Ցուղն է լուսավորում մարմնական աչքի տեսո-
ղությունը,

¹ Ծննդ. գ. 22

Նույնպես անիմանալի կերպով
Քոյինաշունչ շնորհի ընտրությամբ մաքրվածը
Աներևույթ հոգիները միավորում է մեզ
անտեսիդ

Հրաշափառապես պայծառացնելով:
Եվ ինչպես իջնելով սուրբ ավագանի լուսարանը,
Մարմինը լվանալով՝ հավատում ենք, թե սրբու-
թյուն ենք ստանում,

Այդպես յուղի օծումով հուսավառվում ենք,
Սրանով կարծում ենք անտարակուսելիորեն
Հոգու զորություն ստացած:
Եվ ինչպես օրհնաբանելի տերունական հրա-
մանդ

Նախավճռում էր մեղքերի քավումն ախտաց-
յալների,

Իսկ դրան չհավատացողների հանդեպ
Հրաշալի բժշկություն անելով՝
Մարմնական աչքով տեսանելի,
Հաստատում էիր վստահելի վկա¹,

Այսպես և այս յուղը՝ կատարյալ փրկության
լույսով,

Լցվելով մեզ վրա՝ օծում է մեր խորանն արտա-
քին,

Իսկ ներքին մարդու մեջ մտնելով ոչ ակնհայտ,
այլ ծածկապես՝

Նոր կենդանություն է հաղորդում:

¹ Մատթ. Թ. 1-9, Մարկ. Բ. 1-12

Դ

Նյութի զանգվածն այս երկնի Արարչիդ
Պատկերն է պանծալի.
Քանի որ ովքեր յուղի օգուտն ստացան,
Ստացան և ողորմություն¹,
Եվ ի գովեստ քեզ դու սահմանեցիր սա՝
«Ողորմած եմ ես, Տեր»²,
Որովհետև ինչպես սիրո հետ նույնացնում ես
Աստված անունդ³
Նույնպես և մասամբ կոչվում ես սրանով,
Մեզ պարգևվածով
Պարարտ ճարպն այս վեհագույն մեծության
խորհուրդն է կերպավորում
Թանձը երկրային հողանյութ գոյացությամբ:
Որովհետև կենդանու այս մասը ուտել չէր թույ-
լատրվում այնտեղ,
Հստ հին Օրենքի,
Այլ արարչությանդ [արժանի] պտուղ էր հա-
մարվում⁴,
Նույնպես և այստեղ,
Որպես Տիրոջը մատչելի զորություն,
Վայելչապես նվիրվում է Աստված էիդ,
Հաճության ավանդն այս՝
Հոգուս հարազատ զուգաշավիդ,
Ուխտով պահված Արարողիդ:

¹ Մատթ. ԻԵ. 7-8

² Երեմ. Գ. 12

³ Ա. Յովհ. Ղ. 8

⁴ Ղետ. Է. 23-25, Ելք. ԻԹ. 13

Քանզի իմ հոգու օրինակն ու կարողությունը¹
Անշունչ արյունը և զվարթության ճենճերը
[Զոհի] մասի հատվածների հետ չեն ոչնչանա,
Այլ վերին արքայությանդ են ձոնվում ճաշակ-
ման,

Այդպես՝ այս նյութը ջահավորական
Մշտաբորբոք ու անաղարտելի:

Ե

Անդրանիկն արու չէր կարող լինել
Դատաքննությանը նախագահող՝
Առանց օծումով դրոշմված լինելու,
Եվ չէր կարող անկոխելի տեղը մտնել քահանա-
յության,
Եթե սրանով կատարյալ չլիներ:
Օծումով կնքելով քարը,
Որ խորհրդանիշն էր ընտրության խորանի²
Հակոբը երազում տեսավ հարմար սանդուղքը,
Որով իջնելը անճառ Բարձրյալիդ
Եվ իմ ելնելը խորհրդանշվեց.
Նա վեմ կանգնեցրեց և օծեց յուղով
Ի ցույց, հիշատակ գալոց օրերի³:
Ահարոնի քահանայության պայծառությունը
Մեծդ Աստուծո հրամանով օժմամբ էր ճոխա-
նում⁴,

¹ ԾԱՆԴ. Թ. 4

² ԾԱՆԴ. ԼԵ. 14

³ ԾԱՆԴ. ԻԸ. 10-12

⁴ ՂԱՏ. Ը. 30

Որով գլխից դեպ մորուքն իջնող գերափառ յու-
 թը,
 Հստ սաղմոսողի զարմանազան նկարագրու-
 թյան¹,
 Նախահոր փառքի վերադարձն էր
 Եվ կյանք բաժանող քո սուրբ շնորհի
 Գիրկընդիմառնումը մեր բնության հետ:
 Թագավորությունը պանծալի չէր քո ստեղծած
 պատկերով,
 Թե յուղի եղջյուրով չձեռնադրվեր
 Պճնության թագ ու պսակով,
 Հանուն քո, Քրիստոս²,
 Վեր չբարձրանար
 Եվ ինչպես մոռացա վեհերից առաջինին,
 Մեծությանդ ծառային և անպարագրելիիդ
 պատկերին,
 Մելքիսեդեկը չէ՞ր՝ ահավոր ճշմարտությանդ
 օրինակ,
 Զիթենյաց լեռան վրա,
 Ուր հետո կանգնեցին
 Մարմնացած Աստծուդ ոտքերը,
 Այն վերին հրեշտակների ձեռքով
 Այստեղի պտուղներից օծվեց,
 Ուստիև նախահոր շիրմի պաշտպան նստեց՝
 Քեզնից եպիսկոպոսական արքայապատիվ
 ճոխություն ստանալով,

¹ Սաղմ. 61Բ. 2

² Ա. Թագ. ԺԶ. 1.13

Մինչեւ հայտնվեցիր իբրև կատարյալ իսկու-
թյուն
Ունակ Աղամին կենագործելու:

Q

Արդ, որովհետեւ քոնն է շնորհը
Եվ քեզ է վայել գոհաբանություն,
Ո՞վ օրհնաբանված Որդի Աստուծո,
Դու հարմարեցրու իմ բարենշմար աղաչանք-
ները
Յուղավոր, խնկապատար ու զմուսալիր
Քեզ պատճառ փառքի,
Ինձ՝ մեղապարտիս, բուժվելու առիթ:
Տեր Հիսուս, աներեւույթ վերքիս մոտեցրու
Զեթն այս լուսանյութ
Եվ մահացու խոցի այս խարանին դիր
Յուղիդ օրհնյալ կաթիլներ,
Քո սիրո անապակ փրկարար գինով,
Արարչական միությամբդ¹
Խնամքի պատանքով պատսպարելով,
Որ մաղթական խոսքի մեկնողական շարա-
դրանքս
Մի վայելուչ հարմարությամբ քո Հոգու թևե-
րով
Իր կարգը գտնի:
Բարձրյալ, քո հոգին Դավթի վրա իջավ այն օրը²,
Երբ որ օծումով նվիրագործվեց.

¹ Ղուկ. Ժ. 30

² Ա. Թագ. ԺԶ. 13

Սավուղն այլ մարդ դարձավ
 Եվ մարգարեների շարքը դասվեց,
 Երբ իր դագաթին օծում ստացավ¹.
Ասորեստանցոց արքայությունը
 Օծմամբ գրավված՝ կցորդվեց տանն իսրայելի.
 Կայսրեր մի քանի՝
 Նշանավոր, վեհ ու երեելի,
 Խուժիկ, բարբարոս ազգուցեղերից,
 Կենսացնցուղ ցողով անձրեած այս յուղը
 Որսաց, ինչպես կարթով, ընտանի դարձրեց
 Մեծիդ Աստուծո հպատակության:
 Երկնային պատվասիրության՝ Կյուրոսին ուղղա-
 ված խոսքից
 Օծյալ հորջորջումը մեծ համարվեց²
 Եվ Սաղմոսողը մարգարեությունից նախընտրեց
 Օծյալ կոչումը՝ տարբերակեց ու սահմանազա-
 տեց,
 «Մի՛ դիպչեք նրանց և մի՛ մեղանչեք»³:
 Քորեբում Եղիային Աստծուց առաքելություն
 չնորհվեց՝
 Օծելու Հեռուին ու Ազայելին,
 Որ նշանակում էր հրաժարեցնել Բահաղի պաշ-
 տամունքից⁴:
 «Փեսայիդ անունը թափված յուղ է» հոգելից
 խոսքով

¹ Ա. Թագ. Ժ. 1-7

² Եսայի ԽԵ. 1

³ Սաղմ. ճԵ. 15

⁴ Գ. Թագ. ԺԹ. 9, 15-16

Վերավկայել է իմաստունը¹,
Նախապես գրվեց
Հոգին, որ Աստուծո ճիշտ պատկերն ու նմա-
նակն է,
Քեզնով փոքրի մեջ մեծդ է պատկերված,
Շնորհդ ստանալով միանանք քեզ հետ:

Է

Այլես ինչու հույժ երկար ու մանվածապատ,
Հեռու, գծագրական և այլաբան շարադրեմ
Վերինիդ ու ահավորիդ առջեւ
Աղոթական բանաստեղծություն:
Տերդ և կենդանարարդ,
Արարիչդ երկնի և երկրի,
Օծումից հետո սկսեցիր քարոզել արքայության
Ավետարանը²,
Այն օրերից վկայվելով Հովհաննեսի միջոցով
Իբրև Օծյալ և Գառն Աստուծո
Եվ վերացնող աշխարհի մեղքերի³:
Թեպետ քո օծմանը Հոգին էր բովանդակ էու-
թյամբ,
Խառնված աստվածությանը ամբողջապես,
Այդ [օծյալ] անունը պաշտվում է իբրև խորհր-
դանիշ
Սրբերի մեջ հրաշափառորեն ազդող շնորհի,
Որպեսզի աղամական մարմինը ստրկացած
Պատրաստ դարձնես այս հորջորջումով

¹ Երգ. Ա. 3

² Ղուկ. Դ. 18

³ Հովհ. Ա. 29

Միանգամայն բարձրանալու:
 Բանալով Եսայիի մարգարեռությունը
 Դու ինքդ՝ մարդացած աստվածությունդ կար-
 դացիր՝
 Հավաստելու քո ծառաների խոսքը, Տեր,
 Եվ երբ օծությամբ ճանաչեցիր խոսքը, թե
 «Տիրոջ Հոգին ինձ վրա է, որով հենց ինձ օծեց»¹,
 Հետո փակեցիր
 Որոշեցիր երկու հավասարափառ օծյալների որ-
 քանությունը,
 Խտրոցով նշեցիր սահմանի ընդարձակ հեռավո-
 րությունը
 Եվ կնքեցիր,
 Մերը միայն մի կաթիլով չնորհազարդելով,
 Իսկ քոնը բացատրեցիր Հոր և Հոգու հետ
 Կատարյալ հավասարությամբ:
 Մեր կերպարանքով երբ հայտնվեցիր՝
 Օծյալ կոչումով, գովեստով իբրև,
 Փառաբանիչ հրեշտակները
 Երկրային արարածներին ծանուցեցին,
 Որ մարգարեն նախապես գուշակեց
 Հորդանանում և ընտրյալ լեռ Թաթորում
 Հոր ձայնի գալուստը, թե՝
 «Մարդկանց շրջանում պատմում է իր օծյալի
 մասին»²:
 Որ և սաղմոսի ձայնն է պատմում կանխավ.

¹ Եսայի ԿԱ. 1: Ղուկ. Դ. 18

² Անովս Դ. 13

Հզորիդ այս փառքն ու պատիվը՝
Տրված ձեռնադրությամբ ստացածդ մարմնի.
«Օծեց քեզ, Աստված, քո Աստվածը
Յուղով ուրախության»¹:

Է

Մարգարեի «Մեր հոգու շունչը» խոսքը, Տեր
Քրիստոս²,

Որ իսկական օծյալ կոչումդ է,

Որով կենդանության շունչ ներարկեցիր

Լույս բարերարությամբդ ի դեմս մեր³.

Մի երջանիկ իմաստուն խոստովանելի մարդա-
սիրությամբ

Մեկին ասել է, թե Տիրոջ օծյալի առջև վկայեց.

Նորից ավետեց «Անգամ կոշիկ չվերցրի բոլոր
մարմնեղեններից»⁴:

Երգ երգոցը Սուրբ Եկեղեցի հարսին գովելու
համար

Աստուծո ցույց տված խորհուրդը լուսաբա-
նում է

Համեմատելով յուղեփողական գինու հետ՝

Զմուռն առաքինության, առաջին յուղով հան-
դերձ,

Եվ զմուռս ու կնդրուկ մաքուր վարքի՝

Ամեն տեսակ անուշաբույր փոշիներով ու

Յուղով շաղախած,

¹ Սաղմ. ԽԴ. 8

² Երեմ. Ողբ. Դ. 20

³ Ծննդ. Բ. 7

⁴ Սիրաք. ԽԴ. 13, 19. Հմնտ. Մատթ. Ժ. 10. Ղուկ. Ժ. 4

Առաջ բերեց այնժամ ու այժմ ևս:

Քրիստոս, երկնքի թագավոր,

Դանիելը կենսատու մահղ հստակ գուշակեց,

Քեզ անվանադրեց գերազանց բառով,

Եվ հորջորջեց քեզ օծյալ առաջնորդ.

«Օծյալը կսպանվի վաթսունինը յոթներյակ հետո»¹:

Բարեքի որդի Աղովյան Զաքարիայի ճրագակիր
աշտանակին

Յուղի բարեբաշխությամբ վառվող յոթնմասնյա
գնդերից

Քո լրության մասին՝ հանուն մեր փրկության և
օծության

Նախապատեցիր գերբնականորեն²:

Հստ հին օրենքի նախանշման՝

Տաճարի մեջ, խորանի առջե

Ամենընտելությամբ սովորույթ էր մատուցելու

Բաղարջաբլիթներ, յուղով խառնած շարմաղալ-
յուր,

Յուղով օծած մատաղ եղներ,

Որ կոչվում են տիրոջական,

Եվ որոշ հավքեր՝ թաթախած

Ճարպին ազգակից արյան մեջ³:

[Այդ ամենը] սրա խորհրդի հայտնի նշան են,

Որ հարմար են քեզ,

¹ Դան. Թ. 25, Դան. Թ. 26

² Զաք. Ա. 1: Դ. 1-7

³ Ելք Իթ. 10. Դևտ. Բ. 12, ԺԴ. 5-7

Մեծ Աստուծո Միածին ծնունդդ օրհնաբանյալ,
Միայն դու ես օծված նոր ու զարմանալի՝
ինքնությամբ, ամբողջ էությամբ,
իսկապես լրմամբ
Եվ ամեն ինչով անպակասելի:

Օ.

Եվ ի՞նչ կարիք կա բազմապատկելու
Անհասանելի այս մեծ խորհրդի զուգակշիռներ
Եվ չճաշակել քեզ, ո՞վ քաղցրություն¹,
Քեզնով իմանալ, թե ինչ է յուղն այս,
Որ մեղքի փայտից եկած տիսրությունը
Նրանով ես բուժում, զվարթացնում, ըստ սաղ-
մոսողի²,
Կամ պարարումը, որով մոռանում ենք մահա-
ցու կերը,
Կամ օծությունը, որով մոխիրի թշվառ տեսքը
Սրա միջով պիտի փոխարկենք
Հավերժ խնդության պայծառությանը³:
Եվ փրկվելով քո անվամբ, զորության Հոգով
Պիտի որդեգրվենք Հորը:
Եվ մարգարեի Հոգեոր ըղձականությունը,
Եվ բաղձանքը ամենատենչ
Իր ծերությունը պարուրվի ձեթով⁴,

¹ Սաղմ. ԼԳ. 9

² Սաղմ. ԹԳ. 15

³ Եսայի ԿԱ. 3

⁴ Սաղմ. ՂԱ. 11

Կամ գլխի կատարը օծանել յուղով¹:
 Հին խարդախությունը սաստիկ սուգի,
 Մահի ու կործանման,
 Կյանքի այս գեղով չկենագործվի՝
 Պատսպարելով պիտ օժանդակես.
 Եվ ո՞րն է ճրագի լուսավորելուն շնորհակալիքը,
 Եթե ոչ մեղքի անհասության մեզի և կուապաշ-
 տության խավարի մեջ
 Կերպակցելով միավորեցիր ինձ հետ իբրև էմմա-
 նուել²:
 Եվ կամ ինչո՞ւ մարգարեն, որ աստվածաբա-
 նում է
 Սփոփիչ ու զվարթարար օրհներգությամբ,
 Հստակ ու վայելուչ ավետում է ոմանց,
 Թե՝ «Կօծվեն յուղով՝ մրուրից մաքրած»³:
 Կամ իմաստունը հարսի անունից ասում է
 օրիորդներին.
 «Ինձ յուղով զորացրեք ու ծածկեցեք
 Գեղեցկազարդ խնձորով»⁴,
 Եվ՝ «Զիթենյաց պարտեզ տանելով գրկեցեք»⁵,
 Թե ահավասիկ այս ընտիր նյութով, քո Հոգով
 լցված չլիներ,
 Այս լույսով կտեսնեինք, գովյալ, անիմանալի
 քո բարձրությունը,

¹ Սաղմ. ԻԲ. 5

² Եսայի Է. 14, Սատթ. Ա. 23

³ Եսայի ԻԵ. 6

⁴ Երգ. Բ. 5

⁵ Երգ. Զ. 1

Եվ այժմ քեզ, միակ խնամակալ,
Բոլոր ստեղծվածների բարի պատճառդ,
Զեռք եմ կարկառում ես բազկատարած,
Գործակցությամբ երիկամներիս, սրտիս հեծու-
թյամբ,

Լեզվիս ու շրթունքներիս ձայնարկումով.

Լսի՛ր ողորմությամբ, Տեր,

Քեզ ուղղված խնդրանքս պաղատական,

Պարգևներով այս շնորհված

Իմ գոհությունն եմ քեզ վերառաքում,

Հզոր, ահավոր, բարձրյալ, անքնին,

Եվ միշտ համբուրված անտակ փափագով,

Սուրբ, սուրբ և միակդ միշտ սուրբ,

Մշտապես օրհնյալ՝ հավերժ, անդադար երգեցո-
ղությամբ:

Իսպառ վրիպածիս ընձեռիր առավել բարերա-
րություն,

Քաղցրության հույս տուր, որ քո լույսից մի
մասին

Անարժան եմ եղել,

Քեզնով ընդլայնվել, բարի,

Ծածուկ խորհրդի նրբությունը,

Աղերսանքիս գոհություն խառնել,

Դավթի հետ ասել՝ Աստված,

Ստացանք ողորմությունդ¹

Եվ գաղտնիքների ծածուկ մասերը

Քո իմաստությամբ հայտնի դարձրիր:

¹ Սաղմ. ԽԵ. 10

Ժ

Արդ, մեծություն քեզ, [ով] ամենակալ,
Աննվազելի առատաձեռն,
Գթության գործում [միշտ] ամենափույթ,
Մշտահոժար բժշկությանը,
Որ միացրիր, մերձավորին խառնեցիր,
Դյուրագյուտ, ընտանի նյութիս անճառ հրաշքը
Քո սքանչելիքի ահավորության:
Որովհետև ամեն բարձրության երկինքը
Երկրի լայնությամբ և ներքին անդունդների
խորությամբ
Ծովերի բազմությամբ չի կարող տանել,
Այլ իբրև չնչինը բարի մեծից
Փոքր գոյիս մեջ տեսակավորեցիր զորությամբ
Սահմանելով ճշմարտորեն անհրապուրելի,
Որ ինչ-որ նոր երևալով այլ էությունից
Հարեանցի կասկած հարուցի
Վիրավորելու, քան բժշկելու,
Առանց խտրության մտքի, կարծիքի:
Օրհներգված Որդի Աստուծո,
Ինչպես մարմինդ ցորենի հացից ես հանդեր-
ձում՝
Ուղիղ իմաստով և ոչ այլաբան,
Եվ խաղողի արյունը՝ կայլակ քո կողից,
Իսկ ջրերի առատությունը՝
Հոգեռը ծննդի ու կյանքի արգանդ,
Նույնպես և անմահիդ փչմամբ մեզ տրված հո-
գին¹

¹ Յովհ. Ի. 22

Արանով, սրա մեջ արդյունատրեցիր կյանքի
երկունք,

Որից առաջացած կերպարանքը չի ձևափոխվի
Անգամ հեթանոսությամբ,
ինչպես չի երկրորդվի տյառնագրությունը
Խաչափայտի:

Տեր, խավար երկրում նստածներիս
Քոյանման լույս ծագեցրիր¹:
Որովհետև շնորհի այս կերպավորումով
Աշխարհին ցույց տվիր
Անհասիդ անպակասելի լրիվությունը
Եվ լուսավորեցիր, որպեսզի տնանկը կարու
չմնա

Եվ ոչ հարուստը մեծամտանա,
ինչպես որ օդն է հավասար բաշխվում,
Կամ արեգակի լույսն է տարածվում,
Եվ կամ հոսում են վտակներ ջրի,
Որ երկրածիններին տալիս են հավասարաբար
Մանանայի գուգամասնությամբ՝
Փոքրերին ավելի, քան մեծամեծին:

ԺԷ

Իսկ այս նյութի խորին խորհրդի տեսանելու-
թյունը
Բնականորեն և հրաշապես է բացատրվում,
Որ ոչ թե երկմիտ հապշտապությամբ
Անհաստատապես իր տեղն է փոխում

¹ Եսայի Թ. 2

Եվ ոչ նենգելով լքում է իր պահարանը,
Քանի որ ոչ օճառով է խսպառ հերքվում,
Եվ ոչ ինչ-որ ընդդիմակցից ողողվելով դուրս է
ելնում:

Որովհետև ինչպես պատահած գույնը
Անհրաժեշտ բան է մարմնի էության համար,
Որ լինելով գոյացնում է, չլինելով ապականում,
Այդպիսի մի հարմարությամբ այս յուղի զորու-
թյունը,

Որը իր հատկության բերումով
Զբաղեցրած տեղից անբաժան է,
Դու կցորդեցիր մեզ հետ միասնաբար,
Տեր Հիսուս Քրիստոս,
Եղած իրի հետ միավորեցիր և օրինակը՝
Որովհետև աչքի տեսության և մտքին, ըղձին
անիմանալին

Առաջ բերելով կերպավորեցիր,
Երկրի պտուղներից ճգմելով ու քամելով,
Զարմանալի հրաշագործությամբ
Պատրաստեցիր մեզ մատակարարելու:
Մանավանդ որ ոչ թե բազում և զանազան ծաղ-
կանց

Խառնումով ու խմբակցությունով
Եվ բազմաբույր այլայլումով՝
Օծան այս յուղը հրահանգեցիր՝
Ըստ հին ու ստվերական օրենքի¹,
Այլ դա օրինակ համարելով
Եվ ինքդ խառնվեցիր

¹ Ելք 23-25

Վերնալույս ձեթի այս մաքրությանը:
Ու թեպետ անճառելի են քո անուշ համեղությունները,
Եվ համեմատելի չեն այլ օրինակների հետ,
Այլ դաշտի ծաղիկը, հովտի շուշանը,
Ընտիր նարդոսը, եղեգնախունկը՝
Հալվեով խառնած,
Քրքումի հաճելի բույրով,
Փթթած ողկույզի և ազնիվ գինու,
Ոչ սոսկ յուղի միությամբ,
Պատշաճորեն պատկերացար,
Փառավորյալ և անքնին անուն,
Որ ամեն ինչ լիացնում ես
Եվ որևէ բանի բնավ չես կարոտում:
Ուստի ոչ թե հակառակ առարկաների
Բոնորեն խառնում,
Որ օրինակն է բաժան կամքերի,
Այլ հոժար սիրով մեր կողմից պարարվում ես
Դու աստվածապես.
Մեզ համար ըստ մեզ պատկերանում ես
Կատարյալ վայելչությամբ,
Եվ բարի լույս, ջերմացնող հուր
Եվ սիրո տապ,
Առանց անգութ ցրտի շնչման,
Տեսնում են մաքուր մտքերը և ճանաչում
Ձեթի նյութեղեն կաթիլների մեջ,
Որով հնարավոր է իրոք Աստծուն միանալ:
Օծած և Աստծուն որդեգրված Սողոմոնի հետ

Հարսի բերանով երգում եմ երկնային փեսայիդ
 Բարեբան գոհություն,
 Մտքի ըղձանքով համբուրելով քո յուղերի հոտը,
 Ավելի քան բոլոր խունկերը¹,
 Եվ որպես հավիտենական կյանքի խոսք ունե-
 ցողի
 Իմաստուն և աստվածաբան Ավետարանչի²
 Հոգելից խոսքի համաձայն³,
 Յուղերիդ բույրով քո հետքով պիտի ընթա-
 նանք⁴
 Երեսներս լվանալով կյանքի ջրերով,
 Որ վեր է քան այս օդի երկինքը,
 Եվ գլուխս օծելով երկնային անապական յու-
 ղով՝
 Ուրախությամբ քեզ ընդառաջ կգամ,
 Զվարթորեն և ոչ տիրությամբ:

ԺԲ

Խնկելի յուղն այս,
 Պաշտելի ու երանելի,
 Սոսկ ուղեղի պահանոցը
 Կամ գագաթի վարսերը օծելով օգուտ չի տա,
 Եթե տերունի կենսատու խաչովդ չտյառնագրվի
 Զարմանահրաշ օրհնալույս յուղն այս

¹ Երգ. Ա. 2

² Յովի. Զ. 69

³ Առակ. Դ. 10

⁴ Երգ. Ա. 3

Հրեային ու խուժին, հնդիկին ու բարբարոսին,
Սկյութացուն ու հելենին,
Դժնի դուժին ու արհավրատեսիլ
Սոսկավիթիսար շնագլիսին,
Ազատ տիրոջն ու ծառայածին ստրուկին
Քրիստոյան դարձնելով՝
Քո անվամբ է կնքում, ընծայում Սուրբ Հոգուդ
եվ երկնային Հորդ հարազատ Որդի հաստա-
տում¹:

Բազմատեսակ են սրա հրաշալիքները
Նախ՝ հարմարված նյութին, ապա՝ զորությանը:
Որովհետև ինչպես փայտեղեն անոթը
Քանի չի օծվել,
Հեշտությամբ ջարդվում է ու դառնում անպետք,
Արժեզրկվում է,
Նույնպես և մարդը՝ չօծված սրանով,
Հեշտությամբ խորտակվում է
Եվ քեզնից հեռու լինելով՝ չի լուսավորվում:
Հիսուս, սա քո մատն է, որով²
Զարմանագործում ես հրաշալիքներ,
Որովհետև նրա անգծելի կազմությամբ
Ու կարծր պահպանությամբ պաշտպանելով
Ամենապատրաստ շրջաբերությամբ
Ծածկում է այլևայլ եկամուտ բաներից,
Այնպես որ սրա մաքրությամբ օծվածը
Արյամբ չի ներկվի

¹ Կող. Գ. 11

² Ղուկ. ԺԱ. 20

Եվ չի այլայլվի տխուր գույներով:
 Եվ մանավանդ իր թափանցել-խառնվելու հատ-
 կությամբ
 Հոգեպես մտնում է մեր թանձր մարմինը,
 Ու եթե սաղմոսողի անեծքը ձեթի պես
 Չարի բոլոր ոսկորներին է հասնում¹,
 Որչափ առավել Հոգիդ
 Լույսի սույն ճարպով կյանք տալով ողջաց-
 նում է
 Ներքին վերքերը անտեսանելի,
 Եվ այն խորքերից ազդումն է տալիս
 Հագագի շունչին,
 Ներգործելով ծայրանդամների վերջը,
 Մոռացնել տալիս մարմնի մահվան արկածները,
 Որովհետև, միշտ ահավոր, Տեր Հիսուս Քրիստոս,
 Քո կենսարար զորությունը խառնված է սրան,
 Եվ բնակվում է նրա հետ:

ԺԴ

Այս օծումը բարետեսիլ
 Բոնամարտիկ, մերկամրցման ըմբիշները ևս ու-
 նեն:
 Իբրև ճգնական հնարանքների զորավոր խթան,
 Անբոնելի՝ հակառակորդի համար
 Պաշտվում է օրենքով,
 Հզոր և ահարկու է դեերի և հիվանդության դեմ:
 Զի եղեկիելի բազմապաճույն պճնած խոսքով,

¹ Սաղմ. ճԸ. 18

Որ հեգնում էր իմանալի փարավոնին այլաբանուն,

Ողբական երանգներով.

«Երբ ստեղծվեցիր, ասում է,

Օծալ քերովբեի դեմ կռվելու պատրաստվեցիր,

Ուր հրեղեն քարեր էին հաստատված»¹:

Օրհնաբանված ահավորություն,

Որ ձեռքդ հասնում է ամեն տեղ,

Խոսքով անճառելի և քննությունից վեր,

Մշտապես խնկվում ես ավետարանով,

Իբրև օծալ նորածին՝ Դավթի քաղաքի մեջ,

Եվ քահանայապետի հարցին՝ թե

«Դո՞ւ ես Օծալը՝ Օրհնյալի Որդին»²

Պետրոսի երանելի դավանությունն էր՝

«Միակ Օծալը՝ կենդանի Աստուծո Որդին»³

Իսկ թերահավատ քննողները հարցնում են՝

«Դո՞ւ ես Օծալը, ասա համարձակ»⁴

Նաև քո կանոններից հավատում ենք

Օծալ ուսուցչիդ և բոլորի Տիրոջդ՝⁵:

Սրանից առաջ Հերովդեսը Օծալ անունով

Քեզ էր փնտրում հայտնապես⁶

«Ինչպես ես գրում, — ասացիր ինքդ, —

Աստուծո Օծալը և Տերը Դավթի, Որդին անսկիզբ,

¹ Եզեկ. Ի՛ւ. 13-14

² Սարկ. ԺԴ. 61

³ Սատթ. ԺԶ. 16

⁴ Յովհ. Ժ. 24

⁵ Սատթ. ԻԳ. 10, Յովհ. ԺԳ. 13-14

⁶ Սատթ. Բ. 4

Որդի՝ ժամանակով»¹:
Այսպես ըմբռնեցինք վայելչաբար
Այս բացատրությունը, որ մեզ տալիս է
Խորհրդավոր կոչման լրումը,
Որ նախապատիվ է [դարձնում] քրիստոնյանե-
րի վիճակը:

ԺԴ

Այնքան ահավոր, միաժամանակ այնքան սուրբ է
Յուղի սոսկալի, խնկավոր «օծություն» անունը,
Այնպես որ, ոչ ոք երկրայիններիցս չի համար-
ձակվի
Աստված կոչվել, այլ՝ լոկ աստվածային,
Նույնպես չի կարող մարմնավոր մեկը
Իրեն Քրիստոս համարել, այլ՝ լոկ քրիստոնյա,
Դա անհնար էր և առաջին մեծ մկրտչին՝
Զերով Հոգուն հրավիրողին²,
Որովհետեւ, ասում է, ես օծյալը չեմ,
Այլ ուղարկված եմ նրա առջեկից³:
Ինչպես Մարկոս Ավետարանչի խոսքն է⁴
Սրանով էին շրջում առաքելական լծակիցները,
Իբրև Աստծու ձեռք, օգտվելով սրանից,
Քո անվամբ ըուժում էին, առանց մարդկային
գեղամիջոցի:

¹ Սատթ. ԻԲ. 43-45

² Սատթ. Գ. 16

³ Հովհ. Գ. 16

⁴ Մարկ. Զ. 7. 13

Քանի որ ինչպես խավարը լույսից,
 Հիվանդությունը առողջությունից,
 Գիշերն օրվանից ու մահը կյանքից,
 Այդպես և այս տիրապարգև նյութից
 Մերժվում են չարի բոլոր հանգամանքները,
 Խափանվում են և իսպառ վերանում:
 Քանզի ինչպես որ զազիր ճանճերը,
 Սարդեր, զեռունները ականջամուտ,
 Իբրև թույնից՝ սպառվում, պակասում են այս
 նյութից,
 Այդպես այս յուղը երբ զորանում է
 Օրհնության շնորհիվ՝ և՝ դեերին է հալածում,
 Եվ չարքի մուրհակներն է ոչնչացնում,
 Եվ մահավճիռն է պատռում:
 Ավազանը կատարյալ է լոկ օծման օգնությամբ:
 Թե՛ ավազակներից մահացու խոցված
 Առաջին մարդուն տրվեց փրկության այս դեղը¹,
 Թե՛ Հակոբոսի և Խորայելի անբույժ վերքերին
 [Իբրև դեղ] այս պատվական իրը հիշվեց²:
 Այս յուղն էր փափագում Դավիթը հարակա
 հույսով
 Իբրև պտղավետ ձիթենի Աստուծո տան մեջ³,
 Այնժամ մերժելով թլիփատությունը՝
 Գուշակեց շնորհը մկրտության:
 Եվ ինչո՞ւ եմ ես ճառում սրանից,

¹ Ղուկ. Ժ. 34

² Եսայի Ա. 6

³ Սաղմ. ԾԱ. 10

Կարծելով՝ կարող եմ սպառել նյութը,
Մինչդեռ վերիններն իսկ ի զորու չեն
Սասնակիորեն բացահայտել այս խորհուրդը,
Եվ կամ՝ էապես:

ԺԵ

Փառք քեզ միշտ և ամեն ինչում, անմահ թա-
գավոր,
Այժմ իմ երգած օրհնաբանությամբ,
Որ արեցիր, կատարեցիր ինձ համար,
Բարեխնամ, գթած և ներողամիտ,
Հարուստ և առատ, ամենահաղթող,
Հայրերից սկսած՝ օրինակ տվիր,
Լրման հասցրիր իսկությունը ճշմարտապես:
Դու՝ բնությամբ՝ լույս ես և արեգակ մշտապայ-
ծառ,
Եվ աշակերտներիդ դասը լույս անվանեցիր¹,
Որով երկրի բոլոր արարածներին
Նրանց երջանիկ չնորհի շողերով լցրիր:
Մեկից անուշ յուղ ստացար ոտքերիդ
Նշան, որ ընդունելի են քեզ ուղղված խնդրանք-
ները²,
Եվ մի այլ պոռնկից՝ գլխիդ,
Նշանակ մեր հանդեպ գլխառատ սիրույդ³:

¹ Սատթ. Ե. 14

² Յովհ. ԺԲ. 3

³ Ղուկ. Ե. 46

Անսահմանելիդ մշտափափագ բաղձանքով հո-
 տոտեց յուղն այս,
 Հաստատուն ուխտով սահմանածդ մշտակա
 օրենք օրհնաբանելի՝
 Կյանքի պատգամներ քոյահրաման
 Քարոզելու աշխարհով մեկ
 Արժանավորությունը համեստ յուղի՝
 Ի զարմանս հրաշքը լսողների,
 Ի հուսադրություն գալիք սերնդի¹:
 Դուք սրբից ունեք օծությունը²
 Ասաց երջանիկն առաքյալներից,
 Մեկնաբանելով օծման խորհուրդը,
 Որ տալիս ես մեզ կենդանարարիդ
 Անպակաս էության առավելությունից:
 Ուստի գերազանցորեն քեզ նմանատիպ և հար-
 մարափոր
 Լույսիդ և Սուրբ Հոգուդ,
 Օրհնության կաթեցումն այս, որ սրսկվում է
 մեզ վրա անսպառ,
 Նաև Լույս է կոչվում,
 Իբրև ստեղծվածներից առաջինը
 Եվ արարչությանդ պատկերակից,
 Որով հալածում ես մեղքի խավարը:
 Իսկ Հուր է կոչվում, որովհետեւ
 Ամեն տեսակ տարրերի հետ
 Հավասարապես զուգավորվում է՝
 Բաշխված հայտնապես, թե ծածուկ,

¹ Սատթ. ԻԶ. 3

² Ա. Դովի. Բ. 20

Հուռո, թե հոչակված,
 Ու թե չբախվի հակառակորդի՝
 Զի բաղձա բորբոքվել ինքնասաստ կամքով:
 Նաև՝ օծումն, որ արքայաբար
 Որդեգրելով, քեզ հետ միասին՝
 Մատուցես Հորդ ի ժառանգություն,
 Ողորմությանդ [այս] ազգակիցը
 Մեր մեջ նկատվի անեղծանելի,
 Որպեսզի փայլենք գալիք փառքի մեջ:
 Կոչվում է Հոգի,
 Որպեսզի խաքեռության հետքը մաքրելով,
 Ուր բանսարկուի ներգործությամբ էր,
 Նոր փոփոխվելով
 Երկնային Հորդ երկրպագենք
 Հոգով և ճշմարտությամբ¹
 Հույսի հավատքով քեզ հետ բեկոված,
 Ամենապարզեց:

ԺՂ

Ահա արդարե ճշմարտագունեղ
 Այս լուսապատար, խնկալից յուղը
 Վերնայնիդ սիրո արտացոլումն է,
 Որի համար և Պողոսը պատշաճ դատեց
 Գոհաբանական ճառի մեջ ասել հայտնապես.
 Ով մեզ օծեց ձեզ հետ միասին ի Քրիստոս
 Հիսուս՝
 Աստված է, որ և կնքեց մեզ և մեր սրտերին

¹ Յովհ. Դ. 23

Հոգու առհավատչյան տվեց¹
 Ու նաև ասաց. Մի՛ տրտմեցնեք
 Աստծու Սուրբ Հոգին,
 Որով կնքվելու եք փրկության օրը²:
 Պատկառելի և անվանելի է
 Այս օծություն հորջորջումը
 Ինչպես հին օրենքում,
 Առավել և նորում:
 Տիրական տնօրինություններիդ ու չարչարան-
 քիդ
 Անցած խորհուրդն է ակնհայտ դարձնում
 Դավթյան սաղմոսի այն ասույթը, թե՝
 Տիրոջ և իր Օծյալի դեմ³
 Հավաքվեցին, կուտակվեցին
 Իշխանները ժողովուրդների:
 Մեծ մարգարենությունն էր ակնարկում
 Մոլեգնաչար հրեաների խմբի՝
 Անջնջելի արյանդ մեղքի տակ մտնելը,
 Երբ հանդգնեցին տերությանդ դեմ.
 Ո՞վ է, որ ձեռք պիտի մեկնի Տիրոջ օծյալին
 Եվ քավություն գտնի⁴:
 Որովհետև թեպետ Սավուղը
 Իր ազգակցի ձեռքով սպանվեց⁵,
 Օտար ազգերի ամոթն ու նախատինքը

¹ Բ. Կորնք. Ա. 21-22

² Եփես. Ղ. 30

³ Սաղմ. Բ. 2

⁴ Ա. Թագ. ԻԶ. 9

⁵ Բ. Թագ. Ա

Իսպառ չմերժեց [նրանց],
 Մինչև որ Աստուծո արյանդ հաղորդվեցին:
 Ապագայի մեծ հիշողության գրավական են
 Աղոթանվեր աղերսանքներն այն,
 Որ ասում էր իր սաղմոսով.
 Հանուն քո սիրելի Դավիթի
 Երես մի՛ դարձրու քո Օծյալից¹:
 Ու դարձյալ. Նայիր և տես քո Օծյալի երեսը²,
 Եվ՝ Ողորմություն արա Օծյալիդ³:

ԺԷ

Քրիստոս, երկրպագելի պարգևն է ձեռքիդ
 Լուսակիր հյութն այս,
 Եվ արքայական իր ճոխության մեջ
 Զի տեսնում ուրիշ բարձրություն մի մեծ,
 Քան քո անունից ասված քո խոսքը.
 Գտա իմ ծառա Դավիթին
 Եվ իմ սուրբ յուղով օծեցի նրան⁴:
 Հստ սովորության հիշելով և համբուրելով
 Քո լուսեղեն օծությունը,
 Տեր Հիսուս Քրիստոս,
 Քեզ ճանաչում ենք՝
 Անփոփխելի մշտնջենություն,
 Դու ես ամենը, ամեն ինչի մեջ,
 Միակ թագավոր թագավորությանց,

¹ Սաղմ. 6Ա. 10

² Սաղմ. 2Գ. 9

³ Սաղմ. ԺԵ. 51

⁴ Սաղմ. 6Ա. 10

Եվ յուղվածների ճշմարիտ օծյալ,
Երեկ և այսօր
Փառաբանվածդ երկրպագությամբ:
Ինչպես պատրույգը ճարպի մեջ թրջված
Նշողում չունի՝ մինչև չփառվի,
Այդպես և լույսի այս օծությունը՝ թափված մեզ
վրա,
Ապագայում է լուսավառվելու:
Սա [օծման] մեկին բացատրությունն է՝
Նախնիներից մինչև օրս,
Բարենշան օրինակով մի հարմարած,
Հրաշապայծառ գույնով ներկած:

ԺԷ

Արդ, պատճառը ապրեցուցիչ վեհագույն մասնց,
Աստվածային արարչությանդ հարազատների,
Առանց որի հնարավոր չէ քրիստոնյա լինել,
Եվ կամ անվանվել նազովրեցի,
Կամ հիշատակվել Հուղայի որդի,
Խրախույս կարդալ հանուն Հակոբի Աստուծո¹,
Այս ձեթի հյութը, որի մեջ
Միավորվում է սուրբ երրորդությունդ,
Շնորհքի ճառագայթ, շուքը մեր դեմքի,
Նկարագիրը մեր երեսների, բարեձևությունը
պատահմունքի,
Աչքերի լույսը, բիբերի տյառնագրությունը,

¹ Եսայի ԽԴ. 5

Այտերի վայելչությունը, կերպարանքի զարդը,
Շրթունքների պահպանարանը,
Հանդերձիչը կրոնների,
Վարքի հարմարիչ, հավաքման շաղկապ,
Անձանց գորություն, ընդդիմացող ուժ,
Հուռութի խափանող, հմայանք քակտող,
Զեռնածուների հալածիչ, կախարդների խայ-
տառակիչ,
Աղանդները բացահայտող, դեերին հաղթող,
Ցավեր փարատող, կնքվածներին սրբագործող,
Նորադարձների տենչանք, անիմանալի՝ իմաս-
տուններին
Ապշությունը հեթանոսների, անհավատների
նախանձը շարժող,
Գաղտնիքները բացահայտող,
Հարգանք՝ նվաստներին, փառք՝ ստրուկներին,
Պճումն կանանց, աճումն մանկանց,
Ծերերի հրճվանք, նվիրվածների ձեռնադրու-
թյուն,
Զգուշացում մաքուրներին, պսակ թագավորնե-
րին,
Ճոխությունն արքաների և կայսրերի մտադրու-
թյուն,
Քանի որ կնքված ամանը ցույց է տալիս
Պարունակության մեծագնությունը,
Նաև մեզ տրված շնորհի բարձրությունը՝
Սրանով ծածկված քո անվամբ,
Աստված Տեր Հիսուս Քրիստոս,

Վայելուչ ինչ-որ համեմատությամբ
Դառնում է ճանաչ:
Իսկ նրա անունը նույն հորջորջումով,
Ըստ հոգելից իմաստունների,
Դեռ եղիպտացիներից սկսած
Բացահայտում է իրի պատկերը՝
Աչեղ խորհրդի կերպարանքը:

ԺՈ

Զէ՞ որ մյուռոնը այս օրհնաբանված,
Որ մարգարեն նախապես աղերսելով
Աչքի լույս էր խնդրում¹,
Քերթողական խոսքով բացատրած՝
Հոմերոնը թարգմանվում է «իմ մայր»,
Այսինքն, որ մեր բնությունը ուժգնորեն ձգող,
Եվ կայունացնող չքնաղ փոփոխմամբ
Հոսուն ջրերը լուսավոր ավազանի,
Եվ կաթ մածուցող մակարդի նման
Իր մեջ է հաստատել վայրենությունս
Եվ հեղեղը աղբյուրների մշտահոս:
Իսկ մառնամուտը նույնպես մյուռոն է նշանակում,
Մի այլ բառով արտահայտված,
Այսինքն՝ մթին, որ խավարչուտ է
Եվ ծածկված է, անտեսանելի:
Օտարացեղ չէ այս դիմառնական կոչումը բառիս,

¹ Սաղմ. ԺԲ. 4

Քանի որ իրոք անուն է դրվում իրին համաձայն
 Եվ անքննելի է խորությունը այս,
 Քան թե ամեն մի սրբություն սրբոց:
 Քանի որ ոչ թե ջրի նման է աղտը լվանում,
 Կամ սիրտն ամրացնում հացի բնությամբ,
 Այլ նորոգ ինչ-որ մի հարմարությամբ
 Տնօրինապես տյառնագրվում է զգայարաններին,
 Սակայն վերնական անհասությամբ
 Ունի անուն անքննելի:
 Եվ ինչպես ասվում է՝ Աստված անմատույց
 Լույսերի մեջ է, իսկ անսահման փառավորու-
 թյամբ¹
 Անբավ խավարում ծածկված է անտես²:
 Արտաքուստ փակված՝ հասու չենք նրան:
 Նույն կերպ է և այս ծորումը լույսի
 Որոշ ճարտար լեզուներից
 Պատշաճ ասությամբ անվանագրված՝
 Մուայլ է կոչվում,
 Քանի որ անհնար է
 Երկրածին բնությամբ իսկությունն զգալ:
 Իսկ իր մեջ հարստաբար ու տիրականապես
 Երկու Աստուծո անուն է կրում:
 Եվ բարձրյալի անվանը նմանվելով
 Կրկնակի է մեծանում այս յուղը
 Նվիրագործված ամենաբուրյան ազնիվ կնդրու-
 կով,

¹ Ա. Տիմ. Զ. 16

² Դմնտ. Սաղմ. ԺԷ. 12

Զի Աստվածը մեր սպառիչ կրակ է¹ ըստ Մով-
սեսի,

Ու նաև լույս է, ըստ Հովհաննեսի²,

Ուստի Եսային ճշմարտորեն է սրան ակնարկում՝
Լույսն իսրայելի հուր պիտի դառնա³:

Ի

Դարձյալ նոր ձեռվ ներկայացնեմ՝
Իրը հայտնելու նոր մի պատկերով,
Չմոռանալով իմ նողկությունը,
Որը քաղցրացավ գթությամբ մեծիդ՝
Նորից ու նորից գովեստով օրհնել:
Մեռա՝ դառնություն է նշանակում⁴,
Տաժանելի կիրք և չարչարանքներ:

Մյուռոն՝ մեր լեզվով թե ստուգաբանենք,
Պիտի թարգմանենք մահ-մեռելություն:

Որովհետեւ այս հոգեոր օծմամբ
Մենք կտրվում ենք սնոտիասեր,
Մահակերպարան, տաղտուկ ու զազիր,
Հեշտություններից հակառակվողի,
Որ օդախոնավ մեղկություններով,
Ինչոր ջրացիր մի խոնավությամբ
Աղավաղում են հունչը քնարի իմ լսողության,
Թմբուկ-թաղանթի ներդաշնությունը
Ուժգին հնչումով մի անվայելուչ

¹ Բ. Օր. Դ. 24

² Ա. Յովհ. Ա. 5

³ Եսայի Ժ. 17

⁴ Ելք. ԺԵ. 23

Ներքեւ է ձգում, մատնում կորսայան
Հեռանկարը մարդուս գոյության:
Դարձյալ, վերստին հուսով ենք կապվում
Քո խաչի անճառ խորհրդին, Քրիստոս,
Դու, որ միշտ ողջ ես՝ մահով մկրտված,
Աստված, և հաղորդ քո խրախույսով՝
Սրբնով ենք մենք հաղորդվում կյանքիդ,
Եվ՝ բոլորովին անբաժանելի:

Ի՛ւ

Հիսուս, չորս կողմից դրոշմած այս յուղը
Բարձրյալիդ խաչի պես հաստատում է
Կեցուցչիդ զուգափառ և նմանատիպ արյան
չնորհը,
Եվ մեծարում է՝
Նույն անմերժելի փառքով պսակված:
Ծառն այդ կոչվում է օրհնյալ յուղի փայտ,
Հստ մարգարեի կանխասացության¹,
Դա սովորական անտառի տունկից կազմվածը
Հզոր մի ուժով փրկում է չարի նենք արկածներից

Եվ օտարոտի մտածումներից,
Վերադարձնում է քեզ՝ ստեղծողիդ,
Հասցնում նրան կյանքի նույն նյութին:
Եվ մեր մտքի պատուհանը մշտաբաց ու դյուրաթափանց
Տյառնագրում ենք հանուն ահավոր մեծիդ զորության,

¹ Եսայի ԽԱ. 19

Որ զգայարանքս խոհականորեն զգաստանան
քեզնով,
իբրև ըղձական օթևան Հոգուդ,
Եվ խավարահողմ խարդախող չարի
Խաբեռւթյան դեմ անհաղորդ մնան:
Զսպված այս լույսով՝ կենտրոնանում ենք,
Երեկոյան պաշտամունքի
Գոհաբանական նվագերգության,
Աստղերի հետ, որ նշանն են
Մեր մեջ վառվող քո շնորհի:
Սրանով են և փրկության բարի հուշարկումները
Տնկվում մեր սրտում ու պտղաբերում,
Քո մեծ գալստյան վերջին գիշերի
Ընթրիքի համար
Այս լույս ճրագն ենք, ահա՝ կիրառում:

Ի՞՞

Իսկ այժմ տառաթվերի գումարով դիտենք.
Թե քսանը չորսով մենք բազմապատկենք,
Եվ գտնենք տառը քսաներկուերորդ՝
Կբացատրենք խորին իմաստը [սրբալույս] յուղի,
Որ թարգմանվում է ճաշակ հեշտալի,
Եվ պատրաստում ենք այն ընկալելու մենք
ամբողջապես:
Երբ ութսուն նշող գրի փոխարեն դնենք չորս
հարյուրը,
Ստուգաբանենք՝

Զեթի անվան հետ նյութ է ստացվում,
Որ կերպարանքն է թթու խմորի:
Սա զանգվածն իրեն ենթարկել գիտե,
Որ ոչ թե քիչն է շատի ընդերքում,
Այն ամեն ինչը իր կողմն է ձգում՝ աճեցնելով,
Ինչպես ասում է Ավետարանը¹:

Ի՞՞

Այս համեստ յուղը միշտ օրինակն ու նմանությունն է
Համբարձման և խոնարհության:
Երբեմն իբրև կակուղ պատառ է տրվում, ընկալվում,
Համակշիռ ու հարմար խոսքի պես,
Երբեմն, սակայն, գերափառ է նա,
Բոլոր լուծական, հոսանուտ, ծորող նյութերի
վրա
Շրջում է իբրև
Այն հրաշափառ խորհրդի պատկեր:
Երբ որ լցվում է կաշվե պարկի մեջ՝
Ոչ թե գինու կամ ջրի պես թրջում,
Այլ պահպանում է հին պատշաճ ձեր:
Այսպես ստանալով առավելական
Այս բարիքը քո,
Որդիդ կենդանի Աստուծո,
Սրբանվեր այս օծելությունը
Մեր ճակատին ենք գրում քո արյամբ,

¹ Սատր. ԺԳ. 33, Ղուկ. ԺԳ. 21

Ու քո Հոգով տպավորում ենք մեր սրտում,
Եվ հավատում ենք խորապես,
Որ նա մի օր թե հայտնվի
Բազմաճաճանչ շառայլներով՝
Տարածվելու բազմատեսիլ,
Զարմանահրաշ ընդլայնումով,
Լույս կընծայե գալիք օր ու սերունդներին:
Երջանիկ ու վերնանշույլ ճարպն հոգեոր
Թող իմ դեմքին քո նշանով լուսավառվի:

Ի՞-

Եվ կարծես անհաս, անըմբոնելի
Մեծ զորությունն այս
Մտքի սլացքի թեթև թևերով,
Որ շատ, շատ վեր է մեր ըմբռնումից,
Անկանգ շարժումով, անհետ փախստյամբ
Ու լայն տարածքով տարաբաժանված,
Թաքնվեց ինձնից և չօրինակվեց.
Կամ զուգորդաբար չնմանակվեց,
Կամ սահմանումով չձեակերպվեց,
Եվ չկշռվեց զուգակցի չափով,
Այլ աստվածային խաչի նշանիդ հավասարու-
թյամբ
Եվ, կեցուցիչ, քո արյան հետ միայն
Հոգեորապես գերազանց եղավ:
Եվ հիմա օրհնիր մեզ, Տեր, սրանով:
Նաև ահավոր, լուսեղ, երկնային և զարմանալի
Քո անունը, Տեր, թող փառաբանվի,

Մաքրակրոնների բուրվառով խնկված,
Սուրբ, սուրբ անքնին, անպատում, բարձրյալ,
Ողորմած, երգված, ճշմարիտ,
Բարերար և սուրբ,
Սրանով փրկագործիր, և քավություն տուր
Բժշկություն պարզեիր, չնորհով օժտիր,
Առատածեռնիր, ով երանություն:
Օծվելով երկնանձրեւ լույսի այս ձեթով՝
Անարատ լինեմ,
Յուղված բանավոր այս հենքի մեջ թող
Մեղքի բիծն անգամ չտխրեցնե,
Որ հոգուս կերպը մնա անարատ:
Եվ թող բոլորը, որ կմոտենան օծվելու սրանով՝
Հարսնապաճույն վեհությունով գեղազարդ,
Սուրբ վայելչությամբ ու երջանկորեն
Հոգով զարդարվեն:
Թող այս լուսափառ և աստվածատուր
Կրակը իրեն մոտեցնողներին լինի կրկնեռաց
մուլս
Եվ բարեփափագ ջերմության ու հորինվածքի
երկաթ,
Որով ամբողջովին, ամենապատրաստ պնդու-
թյամբ
Քո կարծր անսասան վեմի վրա հարակա
Միշտ արձանանում,
Աներկբայորեն ի քեզ հաստատված:
Ով սրանով զինվի՝

Նշանակ լինի երկնամրցանակ այս մեծ պարգևնին.

Ո՞չ ջրով թրջվի, ոչ այրվի հրով, ոչ ցրտահարվի,
Ո՞չ վնասաբեր հողմն իրեն մարե,
Ո՞չ աղտեղանա ինչ-որ ուրվական պղծություն
ներից,

Եվ պահվածները չարին չմատնե¹,

Ո՞չ աշխարհից հեռանալիս անմտաբար
Դուրս նետել կյանքի գանձերն ամբարված,
Եվ քո թևերի օգնությունից զուրկ չմնալ [հանկարծ],

Մեր մեջ էացած [սուրբ] օծությունից,

Անմաքրությամբ չմերկանալ:

Այլ քո հաճությամբ կիզվենք նրանով,
Պարարվենք իրմով և լուսավորվենք,
Նրանով ազատված և արդարացված,
Պսակված ու թագավորած:

Եվ քեզ, միակիդ, միակ Օծյալիդ

Բոլորի երգը օրհնաբանական,

Եվ լեզուների փառատրությունը,

Հնչմունք ձայների, հանդիսավոր գովք,

Եվ շրթունքների բարեբանություն,

Սրբաբանությունը սաղմոսների

Հոր և Սուրբ Հոգու հետ

Հավիտյանս հավիտենից. ամեն:

¹ Յուղա. Ա. 1



Բան ԴԴ

Սրբի խորժերից խոսչ Ըստու-ծու Հեղ

Ա

Աստված հավիտենական, բարերար և ամենակալ,

Ստեղծող լույսի և հորինող գիշերի,

Դու կյանք՝ մահվան մեջ և լույս՝ խավարում,

Հույս՝ սպասողների և համբերություն տարակույալների.

Որ ամենարվեստ քո իմաստությամբ ստվերը
մահվան փոխում ես այգի,

Աննվազ ծագում և անմայրամուտ արեգակ,

Զի գիշերվա մութն անզոր է իսպառ քողարկել
փառքը քո տերունական,

Որին ծնրադրում են արարածներն ու երկրպա-
գում՝

Երկնավորներն ու երկրավորներն և սանդարա-
մետականները բոլոր:

Դու լսում ես հեծեծանքները կապյալների,
ունկնդրում խոնարհների աղոթքին

Եվ ընդունում ես նրանց խնդրանքները,

Աստված իմ և թագավոր իմ, կյանք իմ և ապավեն իմ,
Հույս իմ և վստահություն իմ, Տե՛ր Հիսուս
Քրիստոս, Աստված բոլորի,
Սրբերի սրտում հանգչող սուրբդ դու,
Միաթարություն վշտերի և քավարան մեղավորների,
Որ գիտես ամեն ինչ՝ նրանց լինելուց առաջ:
Ուղարկի՛ր պաշտպան զորությունն աջիդ
Եվ գիշերային երկյուղից ու չար դեմից ինձ
փրկիր,
Որպեսզի հիշատակը սոսկալի և սուրբ քո անվան
Միշտ համբուրելով հոգուս շուրթերով՝
Ըղձական շնչով ապրեմ պահպանված բոլոր
նրանց հետ,
Որոնք անդադար ի բոլոր սրտե քեզ են կանչում, Տե՛ր:

Բ

Եվ դրոշմից խաչի քո նշանի,
Որ աստվածային արյամբդ ներկելով դու նորուգեցիր,
Եվ մկրտելով մեզ որդեգրեցիր,
Եվ նկարեցիր ու հորինեցիր պատկերիդ փառքով,—
Պարզեներով այդ աստվածային թող ամոթահար լինի սատանան,

Մեքենայությունները քանդվեն թող ու որուց
 գայթները վերացվեն,
 Մարտնչողները պարտվեն թող որ, և թող չլինեն
 զենքեր սայրասուր,
 Մշուշը ցնդի, մութը փարատվի, մառախուղն
 անցնի:
 Բազուկդ հովանի լինի թող և աջդ կնքի.
 Քանդի գթած ես դու և ողորմած,
 Եվ քո անունով են կոչվում ծառաներդ¹
 Եվ քեզ՝ Հոր ու Սուրբ Հոգուդ
 Հետ հավե՛րժ փառք, իշխանություն:



¹ Իմա՞ քրիստոնյա



Ա

Արեգակ արդար, օրհնյալ ճառագայթ, պատկեր
լուսեղեն,
Փափագ անձկալի, անքնին բարձրյալ, անպա-
տում զորեղ,
Բարու բերկրություն, հուսատու տեսիլ, գովյալ
երկնավոր,
Թագավոր փառաց, Քրիստոս արարիչ, խոստո-
վանյալ կյանք,
Եղկելուս բազմավրեալ և սխալներով լի այս շա-
րադրանքի
Պակասները դո՛ւ լրացրու խոսքով քո ամենա-
զոր
եվ այն մատուցիր որպես հաճելի աղերս բարձր-
յալ Հորդ:
Դու ինձ համար անեծքների փորձության են-
թարկվեցիր՝
Կերպարանքովդ նմանվելով ինձ, կենաց օրհ-
նություն,

Բարեխնամ տեսուչ երկնայինների և ողջ երկ-
րայնոց:

Զի թե հանձն առար մեռնել ինձ համար, Աստ-
ված՝ դոլորի,

Ո՞քան ավելի պիտի ուզենաս կարեկցել և այժմ
ինձ, տառապալից տագնապահարիս,

Ազգակցիդ մեզ՝ մեզնից մարմնացյալ,

Մեղապարտիս հետ միշտ աղոթելով Հորդ հա-
մապատիվ:

Բ

Եվ պատվական արյանդ միջնորդությամբ,

Որ մատուցվում է միշտ առաքչիդ կամքին ի
հաճություն՝

Թող վերացվեն վտանգները մեղավոր դատա-
պարտյալիս,

Պարտքերը զիջվեն, ամոթը փարատվի,

Մոռացվեն խայտառակություններն ու դատավ-
ճիռն ի բարին փոխվի,

Սատակեն որդերն, ու լացը վերանա,

Դաղարի կրծառումն ատամների թող,

Ողբերն սպառվեն,

Արտասուքները ցամաքեն թող որ, սուգը հե-
ռանա,

Խավարն հալածվի, ու հուրը սաստիկ մարի,
մոխրանա,

Եվ բազմապիսի տանջարաններն ի բաց մերժ-
վեն:

Գ

Եվ թող բոլորին կյանք կամեցողիդ ու պարգևո-
 ղիդ գթությունը գա,
 Թող լույսդ ծագի, փրկությունդ փութա, օգնու-
 թյունդ հասնի,
 Այցելությունդ ժամանի, և ողորմությանդ ցողը
 կանխահաս
 Թող որ շտապի՝ հույժ թշվառությամբ մահվան
 վիճն ընկած
 Իմ ոսկորների պապակ անդաստանը ոռոգելու:
 Կենարար արյանդ բաժակն երկնավոր, որ պա-
 տարագվում է միշտ, անսպառ
 Հանուն ննջեցյալների հոգու փրկության և կե-
 նաց,
 Թող ծաղկեցնի և պտղաբերի լուսավոր օրվանդ
 Համար մշակված դաշտն իմ մարմնեղեն,
 Որպեսզի նրա մեղքով իսպառ մահացած հոգիս,
 Քո շնորհիվ, գթա՛ծ, քո մեջ զորացած,
 Եվ մեղքերից ազատ, անմահ կենդանությամբ
 Նորոգվեմ արդարների հարության օրը Հորիցդ
 օրհնված,
 Որի հետ փառք քեզ և քո Սուրբ Հոգուն
 Եվ բարեբանություն վայելչական գոհությամբ,
 Այժմ և միշտ և հավիտյանս
 Հավիտենից. ամեն:



ԲԱՌ-ԷՐԱՆ

Ա

Ազագուն - Նիհար, վտիտ, ցանքած, չորացած, ճողած:
Ախտախորհուրդ - Յիվանդագին:
Ակնահայրատ - Կավաշոտ հայացը ունեցող, ցանկասեր:
Աղբերահոս - Աղբյուրի պես հոսող, հորդահոս:
Ամենագրավ - Ամեն ինչ գրավող, ընթառող, ամենը իր մեջ ունեցող:
Ամբարհավաճ - Ամբարտավաճ, ինքնահավաճ, հանձապաստաճ:
Ամենապատիր - Ամեն բանով խարող կամ խարվող:
Այսական - Դիվական:
Այսահար - Դիվահար:
Անախտակիր - Ախտերից ազատ, մաքուր:
Անպարագրելի - Անբովանդակելի, անսահման, անեզր:
Աներևական - Աներևյուղ, անկասկած, աներկմիտ, հանգիստ, ուրախ:
Անհեղլի - Անփոփոխելի, անշարժ, հաստատուն:
Անկապուտ, անկապտելի - Անկողոպտելի, անկորուստ:
Անպատիր - Անպատրելի, չխարող, չխարվող:
Անչափագիր - Որի չափը չի կարելի գծել՝ գծագրել, անգծագրելի,
անչափագրելի:
Անեղ - Ինչ որ չի եղած, չի ստեղծված (մակդիր՝ Աստուծո), ինքնագոն:
Անձնադատ - Ինքն իրեն դատող՝ դատապարտող:
Անստվերագիր - Պարզ, պայծառ, հայտնի գծված կամ գրված:
Անհարիր - Ինչ որ չի կարող վեր կենալ՝ ոտքի կանգնել. նաև՝
անտեղի, անկապ, չհամատեղվող:
Անոպա - Կոպիտ, բիրոտ, վայրի, դաժան, խիստ:
Անկասելի - Չկասեցվող, կասեցման չենթարկվող:
Անվայրափակ - Անբովանդակելի, անպարագրելի, անսահման:
Անըստօյուտ - Անպարսավ, անթերի, կատարյալ, անարատ:
Անձնանեծ - Ինքն իրեն անիծող:
Անծախ - Ինչ որ չի մաշվում՝ չի սպառվում, անսպառ՝ անոչնչանալի:
Անձնամատնիչ - Ինքն իրեն մատնող, անձնատուր եղող:

Անժույժ - Անժումկալ, ցոփ, անհամբեր, անզուսպ:
Աշխար, աշխարանք - Լաց ու կոծ, ողբ, սուզ:
Աշխարել - Սգալ, ողբալ:
Ապականացու - Ապականության ենթակա, մահկանացու, անցավոր:
Ապաշավ, ապաշավանք - Զղջումն, ստրջանք:
Ապավանդակ - Չվան, թոկ (նավի):
Ապերասան - Անսանձ, անզուսպ, անզգամ:
Առասան - Թոկ, չվան (բարակ տեսակի):
Աստվածարյալ - Աստվածացրած, մարգարեացած, հոգով հափշտակված:
Արփիացնցուղ - Լուսաբացին ցնցոված:
Արժանապատիժ - Չարչարանքի՝ պատժի արժանի:
Արտաքնահարդար - Դրսի կողմից նաքուր՝ հարդարված:
Արջնաթույր - Սևաթույր:
Արտոսրածին - Արցունք բերող՝ առաջացնող:
Արտալած - Յալածված, դուրս քշված, ճամփից շեղված:
Արյունընծա - Արյունը՝ կյանքն ընծայող, կամ արյան հետ միասին ընծայված:
Ատամնառու - Ատամներն առնող, ատամների տակ ընկնող (ավագաքար):
Ավետարանել - Ավետավոր լուր տալ, համբավել:

Բ

Բարեբանել - Բարին, լավը ասել, օրինել, գովել, փառաբանել:
Բարձրահոն - Մեծամիտ, գոռող:
Բարեգգեցիկ - Բարեվայելուչ, բարեզարդ, բարեկարգ:
Բարունակ - Խաղողի որթի երկար ուռը:
Բելիար - Սաղայել, սատանա, ապստամբ (Աստծուց ապստամբած):
Բավիղ - Լաբիրինթոս:
Բազմական - Խրախճանք, կոչունք, կոչնական, սեղանակից:
Բարեփառ - Մեծահոչակ, բարեհոչակ, երանելի:
Բասրելի - Մեղադրելի, պախարակելի:
Բազմաստեղնյան - Շատ ճյուղավորված:
Բազմավաղելի - Շատ ավաղելի, շատ ցավալի:

Գ

Գաղտնակուր - Ծածուկ ուտող, մաշող:
 Գերաշխարհիկ - Աշխարհայինից վեր, աշխարհային պատիվներից
 բարձր:
 Գոյարան - Գոյության աղբյուր՝ պատճառ:
 Գուպար - Կոհվ, պատերազմ, մենամարտ:
 Գրվան - Աման, չափ-կշիռ:

Դ

Դատակնիք - Դատավճիռ:
 Դենար - Դրամի կշիռ, դահեկան:
 Դեղևել - Այս ու այն կողմ շարժվել, տատանվել, երերալ:
 Դժվարակութ - Դժվարքաղելի (պտուղ):
 Դիվալուկ - Դներից չարչարվող:
 Դիվաճեներ - Սատանայի համար տրված զոհ:
 Դյուրապատիր - Նեշտ խարվող, դյուրախար:
 Դույզն - Թիչ, փոքր-ինչ, չնչին չափով, աննշան:

Ե

Եղջական - Եղջվելու, ջնջվելու ենթակա, մահկանացու, անցավոր:
 Եղեռնալուր - Չարիք լսելու տրամադիր, հակամետ:
 Եպերելի - Պախարակելի, ծաղրելի:
 Երկայնամիտ - Երկար համբերող, հեզ, բարեմիտ:
 Երջանկակրոն - Սրբակրոն, իր կենցաղով ու վարօվ երանելի:

Զ

Զազրաթորմի - Գարշելի:
 Զենել - Մորթել, անասունը մորթել զոհի համար, զոհել:
 Զեղել - Լիքը լցնել:
 Զուգակշիռ - Նույն կշիռը՝ ծանրությունը ունեցող, հավասարակշիռ:
 Զվարակ - Արջառ, մատաղահաս ցուլ:
 Զվարթուն - Յրեշտակ, արթուն (հսկող):

Է

Է - Մակդիր Աստծու՝ իբրև մշտապես եղողի:

Ը

Ընբերաննել - Բերանը փակել, լռեցնել, պապանձեցնել:

Ընչեղ - ճոխ, հարուստ, ունեսոր:

Ըղձակաք - Խանդակաք, փափագելի:

Ընդոտնել - Ոտքի տակ տալ:

Թ

Թարմատար - Յետին, անպիտան, փուչ, անպետք, ավելորդ:

Թշվառաքրտինք - Դառն՝ դաժան աշխատանքով՝ քրտինքով ձեռք
բերած:

Թռչարան - Եռանկյունի առագաստ նավի առաջակողմում:

Ւ

Ինքնամարտ - Ինքն իր հետ մարտնչող, անձնամարտ:

Ինքնաբուն - Ի բնե, բնականից:

Ինքնոգոր - Ինքն իր հետ ոգորող, կռվող:

Իրավակշիռ - Արդարակշիռ, իրավունքով կշռող:

Իրավախնդիր - Իրավունք և արդարություն որոնող, պահանջող:

Լ

Լուսազարմ - Լուսեղենների զարմից, հրեշտակ, հրեշտակային:

Լուսնական - Լուսնին հատուկ, լուսնի ազդեցությամբ կատարված
(ախտ):

Լուղակ - Լողորդ, լողացող:

Լրապատար - Լիակատար, լեփ-լեցուն:

Լրթագույն - Կապտագույն:

Խ

Խարշատված - Այրված, չարաչար կերպով դադված:

Խիթ - Ցավ, խոց:

Խաբեպատիր - Խաբեական:

Խստամիտ - Խիստ մտածող, խստասիրություն:

Խտրոց - Անջրպետ, միջնորմ, պառակտիչ:

Ծ

Ծյուրած - Յալ ու մաշ եղած, հյուծված:

Կ

Կարապետ - ճանապարհ բացող, առաջնորդ:

Կարկամ - Կուչ եկած, կծկված, պապանձված:

Կարեվեր - Սաստիկ՝ ծանր վիրավորված, վերք ստացած:

Կայթել - Թռչկոտել, խաղալ, խայտալ:

Կարծրերախ - Խստերախ, սանձի շնազանդվող, անսանձ:

Կամարար - Ուրիշի կամքը, ցանկությունը կատարող, հնազանդ, հլու:

Կանխազեկույց - Առաջուց գեկուցող կամ գեկուցված:

Կենագործել - Կենդանացնել, կենդանություն բերել:

Կենագրավել - Կյանքից զրկել, կյանքը խզել, սպանել:

Կենազեն - Կյանքի գենք, միջոց, որով կյանք է ծեռք բերվում:

Կենսարիթ - Կենդանարար, փրկարար, կյանքի պատճառ եղող:

Կենսածիր - Կյանք պարզնող, կենսապարզ:

Կիզանողական - Կիզիչ, կիզելու զորություն ունեցող:

Կուլ - Ոլորված կամ հյուսված իրի ամեն մի թել:

Կողորովկ - Անուշահոտ խեժ:

Կոյուն - ճահճային խոտ, ծիլ:

Կոչունք - Յրավերք, խնջույք:

Կոշկոնցել - Խիստ չարչարել, խոշտանգել, ծեծել, ջարդել:

Կողկողել - Հալ, ողբալ:

Կրկնակապեն - Որի համար երկու անգամ է վճարված, կաշառք տրված:

Կրկնածիր - Երկու շնորհ-պարզն պարունակող:

Կրկտնապղտոր - Երկու տեսակ պղտորություն պարունակող,

կրկնակի պղտորող:

<

Հաստել - Հաստատել, հորինել, ստեղծել:

Հաստիչ - Հաստատող, ստեղծող արարիչ:

Հաստարան - Նեցուկ, հենարան, ապավեն:

Հանգույն - Համանման, նմանօրինակ:

Հանգունակից - Նմանակից:

Հայրատ - Պազշոտ, վավաշոտ, ցանկասեր:

Հայրատատես - Հայրատ, պազշոտ նայվածք ունեցող:

Համագոյություն - Բնութենակից, եակից լինելը:

Հագագ - Զայնարան, հնչափող:
Համարուն - Միևնույն բնությունն ունեցող, համագոյակից:
Համայնաջինջ - Ամեն ինչ ջնջող, բնաշխնջ եղած:
Համապատիվ - Հավասար, համարժեք, միևնույն պատիվն ունեցող:
Հազարապետ - Այստեղ՝ տնտես:
Հերապանծ - Պանծալի մազեր ունեցող, վարսագեղ:
Հեծան - Բիր, գավազան:
Հեծանոց - Հոսելի, եղան, քառեշտ:
Հեղձամդուկ - Խեղդված ու մղձկած, շնչասպառ եղած:
Հիակրաշ - Հրաշափառ, սքանչելի:
Հեն - Ավազակ:
Հոգմարախիծ - Շատ թախծալից, բազմաթախիծ:
Հոգեկեցույց - Հոգին ապրեցնող, հոգեշահ, փրկարար:
Հովանակ - Ավանակ:
Հորան - Այծերի և ուլերի հոտ:
Հոգմատխուր - Շատ տխուր:
Հոմանիշ - Տարփավոր, սիրեկան, նաև գործակից վատ գործի մեջ:
Հուռութք - Հմայություն, կախարդանք, համայիլ:

Չ

Չաղել - Ծաղը ու ծանակի ենթարկել, նշավակել:
Չաղկել - Գանահարել, ծեծել:
Չործ - Շոր, զգեստ, լարի կտոր:

Շ

Ֆապուկ - Ֆկուն, ոյուրաթեք, ժիր:
Ֆեպել - Փութալ, աճապարել:

Մ

Մայրի - Սոճազգիների ընտանիքին պատկանող ծառ:
Մարսավոր - Խարդախ վաստակ անող, խարդախսամիտ, մեղավոր:
Մարտիրոս - Հավատքի նահատակ:
Մարմաջ - Գրգիռ, տենչ:
Մահագեկույց - Մահը գուշակող:
Մանրագոր - Թունավոր բույս, որից պատրաստվում էր թմրեցուցիչ քնաբեր դեղ:

Մելան - Սև գույնի թանաք:

Մեծակական - Մեծ ողբ պարունակող լաց ու կոժ:

Մերկամարտիկ - Մերկ ձեռքերով՝ անզեն կովող, մենամարտիկ:

Մեղսածուփ - Մեղքերի մեջ ծփացող:

Մեղսամակարդ - Մեղքով մակարդված, մեղքերի մեջ թաթախված:

Միեղջյուրանի - Առասպելական կենդանի, որ ծիրանագույն կա-

ռափի վրա ունեցել է մի երկար և ստր եղջյուր, ապրելիս է

եղել Աֆրիկայում, Արարայում և Հնդկաստանում, և որին

բռնել կարող էին՝ միայն մի կույս աղջկի դնելով նրա որջը:

Ոնգեղջյուր:

Մշտանատուց - Ինչ որ միշտ մատուցվում է (աղոթքի մասին):

Մոլորաթափառ - Մեն ու մոլոր թափառող:

Մոլորապատիր - Մոլորեցնող ու պատրող, խաթեական:

Մուճ - Մժորուկների ննան, բայց ավելի մանր ու սաստիկ խայթող միջատ:

Ն

Նախաթռո - Առաջին աթոռը գրավող, գլխավոր, առաջնորդ:

Նախաշավիդ - ճանապարհի սկիզբ, մուտք, առաջընթաց, ուղեցույց:

Նամիր, նանրություն - Ունայն, ունայնություն, սին, դատարկ:

Նշմար - Նշույլ, աղոտ՝ հազիվ նկատելի լույս:

Նշուլագեղ - Գեղեցիկ նշույլներով զարդարված շողշողուն՝ փայլվիլող:

Շ

Շառավիդ - Ընձյուղ, ծառի ճյուղ, որ բուսնում է ծառի ոստի վրա:

Ո

Ողոք - Մեղմ համոզիչ խոսք:

Որա - Ցորենի կամ գարու խուրձ:

Ոգել - Ասել, արտասանել, երգել:

Ոգորել - Լարված ուժերով կորիվ մղել ախոյանի դեմ:

ՈՒ

Ուղեշ - Ծառի ճյուղ:

Ուղիս - Հոսող ջուր, գետ, առու, ջրի հոսանք:

Ունկի - Հնում կշռաչափ, նուկի:
Ուսամբարձ - Ուսի վրա բարձրացրած, առած:
Ուրվային - Ուրվական, ուրվականական:

Չ

Չքոտի - Չնչին, աննշան:

Պ

Պահպանակ - Ինչ որ մարմինը պահպանում է գենքի հարվածից.
հանայիլ՝ չար աչքից:
Պարածածկել - Չորս կողմից բոլորովին ծածկել, պատել:
Պատրություն - Պատրանք, պատրողություն:
Պատարել - Լիուլի լցնել, հորդացնել, առատացնել:
Պարավանդել - Կապկապել, շղթայել, արգելակել, կաշկանդել:
Պատարուն - Լիուլի լցված, զեղուն:
Պարակցություն - Դասակցություն:
Պակուցիչ - Խիստ վախեցնող:
Պակուցումն - Վախ, ահաբեկում, սարսափ:
Պաղպաջուն - Փայլփիլուն, պսպղացող:
Պարգևածիր - Պարգևարաշիւ:
Պոռնկապատիր - Պոռնիկի պես, կամ դեպի պոռնկությունը հրա-
պուրող:
Պակապաճույճ - Պսակով պաճուճված, պսակազարդ:

Ջ

Ջայլ - Մեռելի վրա ողբ, լաց ու կոծ, սուօք:
Ջամբել - Կերակրել, սնուցանել:
Ջրակարծ - Զուր կարծված համարված (կարկուտի մասին):

Ա

Սանդարամետ - Երկրի խորքերը, ստորերկրյա վիհ, անդունդ,
դժիխը:
Սադրանք - Թելադրանք, դրդում, գրգռում:
Սեպուհ - Ազնվական ծագում ունեցող, ասպետ, պայազատ:
Սկզբնածիր - Սկզբի առաջին ծիրքը՝ գույքը՝ պարզ եղող, նախա-
պարզել:
Ստամբակ - Ծմբոստ, հեստ, գոռ, խռովարար:

Ստրջանալ - Արածի վրա ցավել, ափսոսել, զղալ, ապաշխարել:
Ստրկամեծար - Ստրուկին հարգանք, մեծարանք ցույց տվող,
անարգամեծար:

Սրբասուն - Սրբության՝ մաքրության մեջ սնված՝ դաստիարակ-
ված, բարեկրոն, առաքինի:
Սփածանելի - Մեջքը կապելու լաթ, գոգնոց:

Վ

Վարատական - Տեղահան եղած, աստանդական, գաղթական:
Վայրագասուն - Դուրսը՝ անբնակ տեղերում սնված, վայրի:
Վարմ - Յուսված ցանց, թակարդ, որոգայթ:
Վաստականվեր - Իր վաստակը՝ աշխատանքը նվիրող:
Վնասապարտ - Մեխսապարտ, հանցավոր:
Վրիպալուր - Սխալ լսող:

Տ

Տապանակ - Փոքր տապան, արկդ: Կրոնական՝ Նոյի տապանը:
Գանձանակ, ուր պահպում էին նվիրական սրբությունները:
Տարտարոս - Դժոխք, խոր վիհ, անդունի: Փոխաբերական՝ տան-
ջանք:
Տաղանդ - Ծանրության չափ, հնում՝ քանքար, դրամաչափ: Բնա-
կան մեծ ընդունակություն, ձիրք, շնորհք:
Տաժանակոծ - Դաշն կոժ պարունակող, տաժանելի, ողբալի:
Տարմ - Խումբ (թռչունների), երամ:
Տիսեղծ - Խիստ տգեղ, այլանդակ, պակասավոր, անկատար:
Տյառնագրություն - Խաչակնքում:
Տնելի - Նվիրական, պաշտելի:

Ց

Ցանցարկ - Ուռկան ձգելը, ուռկան ձգողը:
Ցիո - Վայրի էշ, իշավայրի:

Փ

Փաղանգ - Զորաբանակ, խումբ:
Փեսավեր - Փեսայի մտերիմ ընկերը հարսանիքի ժամանակ,
փեսեղբայր:

Փրկանակ - Նա, որ իր անձը տալիս է ուրիշի փրկության համար.
փրկության պատճառ, առիթ, գործիք, ազատող միջոց:

Ք

Քարբ - Թունավոր մեծ օձ:

Քանքար - Հնում ծանրության չափ (առհասարակ՝ դրամ, ոսկի կամ արծաթ):

Քարակոշկոծ - Քարաջախջախ արած, քարածեծ, քարաջարդ:

Քաղցրասնույց - Քաղցր, հեշտալից կյանքով սնված, փափկասուն:

Քանասար - Արաբական գայլ, կատաղի, չար:

Քնարան - Քնելու տեղ, անկողին, փոխաբերաբար՝ գերեզման:

Քուրծ - Այծի մազից կոպիտ գործվածք. այդպիսի գործվածքից հագուստ:

Քստմնափուշ - Քստմնեցնող՝ ծակծկող փշի նման:

Քրտնակնդրուկ - Քրտինքով նվիրած:

Օ

Օշինդր - Աբսենդ, անհաճելի, դարնահամ բույս:

Օրակշիռ - Օրը կշռող՝ բոլորող, օրը կազմող:

Օրենուսույց - Օրենքի ուսուցիչ, օրենք ուսուցանող:

ԾԱՐԱՊՈՒՅԹԻՆ

ԱԽՈՎԱԿԻԱՅ ՕԻՏԱԿԱՐ ԽՈՎԵՐԻ, ԼՂԱԾՎԱԿԱԲԻ, ՀՈՒԵՇԱՀ ԽՈՎԱԵՐԻ,
ՄԵՓԱԿԱ ԱՋԻ ՄԵՂԴՐԱԲԻ, ԿԵՎԱԲ ԶԻՏԱՎԱ ԿԱԾՈՆԵՐԻ ԿԱՐՎԱՐ
ՀԱՎԱՖՐՈՒՅԹԻ, ԱՄԵՇԵՐԻՑ ՀԱՎԱԳԻՇՈՒՅԹԻՆԵՐԻ, ՄԵՐԵՐԻ
ԽՈՍՏԱՎԱԿԱՐՈՅԹԻ:

ԿԱՐԱՆԵՐԻ ԱԽՈՎԱԿԻԱՅԹՈՅԻՆ, ԾԱՇՈՒԿ ԲՎԵՐԻ ԱՄԱՎՅՈՒՄ, ԱԽՈՎԱՎՅՈՒՆԵՐԻ
ԾՈՒՅՈՒՅԹՈՅԻՆ, ԱԲՈՒԵԼԻ ՎԵՐԵՐԻ ՉՈՐՎՈՐ ՄԵՆԻՎԻՆԵՐԻ, ԱՏԵՍՎԱՆԵՐԻ
ԾՎԿԻ ԱՅԹԻ ԴԵՐԵՐԻ, ԿԱՎԱԿՈՐ ԱԽՈՎԱՎՅՈՒՄ ՉԱՐՉԱՎԱԲԵՐԻՑ
ԱԽՈՎԱՎՅԹԻ ՀԱԼՐՆԵՐ՝ ԸՏ ԲՈԼՈՐ ԲՆՈՒՅԹՈՒՆԵՐԻ ԿՎՐԵՐԵՐԻ, ԱԽՈՎՎԵԼՈՒ
ԱԽՈՎԵՐԻ, ԱԽՈՎԵԼՈՒ ՊԱՏՃԱՎԵՐԻ:

ՄԻԱՅՆ ՀԵՎԵՐԻ Ֆ ԱԽՈՎՈՒ ԱԽՈՎԱՎՅՈՒՆԵՐԻ ԽԵՐԱԾՈՒՆ
ՆՎԵԿՎ ՎՎԵՐ ՎՎԱԿՎ ԴԻՇՈՐԻ ԴՎՅ
ՈՂՄԵՐԻԳՈՒՅԹ ՄԱԽԵՎԱՆ

ԾԱՐԱԿ

- Ա.** Դատաստանի աղոթք
- Բ.** Ինքնամեղաղրանք
- Գ.** Սուլը Գրքի վերաբերյալ աղոթք և խորհրդածություն
- Դ.** Խոնարհ մաղթանք
- Ե.** Պատարագի ահավոր խորհրդի հանդեպ երկյուղ

- Զ.** Ինքնամեղադրանք
Է. Ինքնամեղադրանք
Ը. Դարձյալ ինքնամեղադրանք
Թ. Դարձյալ ինքնամեղադրանք՝ աղոթքի հետ
Ժ. Հավատի գովաբանություն
ԺԱ. Դարձյալ հավատի, ինչպես նաև ապաշխարության հույսի մասին
ԺԲ. Փափագներ, ինչպես նաև քնի հանգստի աղոթք
ԺԳ. Դավանություն և աղոթք
ԺԴ. Երուսաղեմից Երիքով իջնողի պաղատանքը
ԺԵ. Գոհաբանական աղոթք, ինքնամեղադրանք, ինչպես նաև յոթանասուն անգամ Ներելու խորհուրդը
ԺԶ. Փառաբանական աղոթք
ԺԷ. Մաղթանք ու ինշրանքներ
ԺԸ. Նախ գոհաբանություն և ապա՝ օրինակներով մաղթանք
ԺԹ. Վայելու աղոթք և ինքնամեղադրանք
Ի. Ինքնամեղադրանք և պաղատանք
ԻԱ. Դարձյալ ինքնամեղադրանք
ԻԲ. Խոնարի ինքնամեղադրանք
ԻԳ. Տաղաչափական ինքնամեղադրանք
ԻԴ. Ինքնամեղադրանք և աղոթք
ԻԵ. Խորտակված նավի օրինակ և աղոթք
ԻԶ. Ողբերգական աղոթք
ԻԷ. Մեղայի գովաբանություն և աղոթք
ԻԸ. Ինքնամեղադրանք, ինչպես նաև մաղթանք մարգարեի խոսքով. դիվասարսուու շերմության դեմ
ԻԹ. Գոհաբանական աղոթք՝ թախծալից օրինակով

Լ. Աղոթք և համեմատություններ

ԼԱ. Աղոթք՝ սրբերի կցորդությամբ

ԼԲ. Աղոթք և շերմագին ինքնամեղադրանք

ԼԳ. Պատարագի խորհրդով գերագույն աղոթք

ԼԴ. Սուրբ Հոգուն ուղղված աղոթք և Նիկիական
դավանությունը

ԼԵ. Աղոթք

ԼԶ. Աղոթք խաչելության խորհրդով

ԼԷ. Մաղթանք Ջրիստոսի գանահարության հիշատակմամբ

ԼԸ. Փառքով գալուստը և վճիռը

ԼԹ. Խոնարի ինքնամեղադրանք

Խ. Դարձյալ խոնարի ինքնամեղադրանք

ԽԱ. Աղոթք

ԽԲ. Աղոթք ավազակի խորհրդով

ԽԳ. Ըղձալից աղոթք

ԽԴ. Հույսի աղոթք

ԽԵ. Խոստովանություն

ԽԶ. Մարմին կազմության օրինակով

ԽԷ. Անառակի խորհրդով

ԽԸ. Սողոմոնի դարձի օրինակով

ԽԹ. Գովաբանություն մարգարեի խոսքի հիշատակմամբ

Ծ. Խոստովանական աղոթք

ԾԱ. Սաղմոսների դրվատանքով և Մանասեի

հիշատակմամբ մաղթանք

ԾԲ. Աղոթք մարգարեների խոսքերի հիշատակմամբ

ԾԳ. Պատարագի գովաբանություն

ԾԴ. Ինքնամեղադրանք

ԾԵ. Աղոթք և պարտագիր

ԾԶ. Խոնարի ինքնամեղադրանք

ԾԷ. Խոնարի աղոթք

ԾԸ. Մաղթանք և ինքնամեղադրանք

ԾԹ. Ինքնամեղադրանք՝ սրբերի հիշատակությամբ

Կ. Ինքնամեղադրանք և սաղմոսների վկայակոչում

ԿԱ. Նույն խորհրդով

ԿԲ. Դարձյալ մարգարեների խոսքերի վկայակոչում

ԿԳ. Յուլյսի օրինակով

ԿԴ. Ինքնամեղադրանք

ԿԵ. Գերեզմանի օրինություն

ԿԶ. Գերեզմանի գենք

ԿԷ. Խոնարի ինքնամեղադրանք

ԿԸ. Պատշաճավոր ինքնամեղադրանք

ԿԹ. Յարձակվողների օրինակով

Հ. Ավելի Տիրոջը հուսալ, քան արդարներին

ՀԱ. Աստծոն հետ հաշտեցնող պանծալի խոսքեր

ՀԲ. Միանձն վանականներին

ՀԳ. Մահվան օրվա համար

ՀԴ. Յուսահատների աղոթք

ՀԵ. Սուրբ Եկեղեցու և Սուրբ Երրորդության դավանություն

ՀԶ. Խոնարի ինքնամեղադրանք

ՀԷ. Խաչելության խորհրդով

ՀԸ. Աղոթք

ՀԹ. Գալստյան խորհրդով

Հ. Աստվածածնին ուղղված մաղթանք

ՀԱ. Յրեշտակներին ուղղված մաղթանք

ՀԲ. Մարտիրոսներին ուղղված մաղթանք և աղոթք

ՀԳ. Աղոթք

- ԶԴ.** Առավոտյան աղոթք
- ԶԵ.** Աղոթք
- ԶԶ.** Անհույսների աղոթք
- ԶԷ.** Ծերության ժամանակի աղոթք
- ԶԸ.** ՍամՎելի արտասուբի մասին
- ԶԹ.** Անվան աղոթք
- Դ.** Հովսի և հարության մասին
- ԴԱ.** Գիշերը Ննջելու աղոթք
- ԴԲ.** Ժամահարի մասին
- ԴԳ.** Մեռուի մասին աղոթք
- ԴԴ.** Գիշերվա աղոթք
- ԴԵ.** Աղոթք Ննջեցյալների համար

Ա. ԳՐԻԳՈՐ ՆԱՐԵԿԱՅԻ

ՄԱՏՅԱՆ ՈՂԲԵՐԳՈՒԹՅԱՆ (ՆԱՐԵԿ)

Գրասրարից թարգմանեց Մկրտիչ Խերանյանը

| | |
|----------------------------|----------------------------------|
| Յրատարակչության տնօրեն՝ | Տ. Նարան արքեպս. Յովհաննիսյան |
| Սրբագրիչներ՝ | Ս. Գրիգորյան Գր. Դարբինյան |
| Շարվածքը՝ | Ա. Վարդապետյանի |
| Եջաղումը՝ | Ղևոնդ քահանա Մայիսյանի |

ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ ՅՐԱՏԱՐԱԿՉՈՒԹՅՈՒՆ

Ս. ԷԶՄԻԱԾԻՆ - 2012

Չափսը՝ 70x100 1/32, թուղթը՝ 80 գ.,
կազմը՝ կոշտ, ծավալը՝ 656 էջ,
տպաքանակը՝ 5.000:



ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ ՏՊԱՐԱՆ